











# محكمة الشعب

المضبطة الرسمية  
لمحاضر جلسات محكمة الشعب

الجزء الأول

١٩٥٤





## مخضر

### الجلسة الاولى لمحكمة الشعب

المنعقدة علنا في الساعة العاشرة صباحا ، بمقر قيادة الثورة  
في الجزيرة ، يوم الثلاثاء ٩ نوفمبر سنة ١٩٥٤ ، الموافق ١٣ ربيع  
الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ أول  
نوفمبر سنة ١٩٥٤ ، الموافق ٥ ربيع الاول سنة ١٣٧٤ ، بناء  
على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو  
مجلس قيادة الثورة ، وعضوية القائمة بام انور السادات ،  
والبكباشي ( ١ . ح ) حسين الشافعي ، عضوى مجلس قيادة  
الثورة .

وبحضور البكباشي محمد التابعى المدعى ، والاستاذ مصطفى  
الهلباوى رئيس نيابة أمن الدولة ، عضوى مكتب التحقيق  
والادعاء .

وتولى تسجيل المحاكمات بالاختزال الاستاذان طلعت الصبان،  
وممدوح توفيق ، مندوبا مصلحة الاستعلامات .

\* \* \*

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد

( حضر المتهم )

• الرئيس - فتحت الجلسة . . أولى جلسات محكمة الشعب  
الادعاء . . المتهم موجود ؟

البكباشى محمد التابعى - المدعى - المتهم موجود والقضية جاهزة ..

الرئيس - محاكمة المتهم محمود عبد اللطيف محمد ..

المتهم - افندم ..

الرئيس - بالادعاءين الآتيين :

« اتى افعالا ضد نظام الحكم الحاضر وضد سلامة الوطن فى الداخل والخارج ، وذلك لانه فى يوم ٢٦ من اكتوبر سنة ١٩٥٤ ، وما قبله بمدينتى القاهرة والاسكندرية :

أولا - اشترك مع آخرين فى تنفيذ اتفاق جنائى الغرض منه احداث فتنة دامية لقلب نظام الحكم ، وذلك بانشاء نظام خاص سرى مسلح للقيام باغتيالات واسعة النطاق ، وارتكاب عمليات تدمير بالغة الخطورة ، وتخريب شامل فى جميع انحاء البلاد ، تمهيدا لاستيلاء الجماعة التى ينتمى اليها على مقاعد الحكم بالقوة »

ثانيا - شرع فى قتل البكباشى اركان الجرب « جمال عبد الناصر » رئيس الحكومة تنفيذا للاتفاق الجنائى المشار اليه فى الادعاء الاول » ..

( المادتان ٢ و ٣ من أمر مجلس قيادة الثورة الصادر فى أول نوفمبر سنة ١٩٥٤ بشأن تشكيل المحكمة واجراءاتها ) ..  
مذنب أو غير مذنب ؟

المتهم - .....

الرئيس - سمعت الكلام الذى اتقال ؟

المتهم - أيوه ..

الرئيس - فاهم الادعاء المقام عليك ؟

المتهم - أيوه ....

الرئيس - مذنب أو غير مذنب ؟

المتهم - مذنب ..



الرئيس - مذنب ؟

المتهم - أيوه ...

البكباشي محمد التابعي - المدعى - المتهم لما أعلن بالادعاء المقام عليه سألناه اذا كان عنده محامى ، فقال انه مفيش محامى ... وأمر تشكيل المحكمة لايحتم وجود محامى ... والقضية جاهزة والشهود مستعدين وموجودين .  
الرئيس - موجهها كلامه للمتهم - مش عاوز حد يدافع منك ؟

المتهم - عاوز ...

الرئيس - عاوز مين ؟

المتهم - المحامى محمود سليمان غنام ..

الرئيس - واذا كان محمود سليمان غنام مايرضاش ؟

المتهم - يبقى فتحى سلامة ..

الرئيس - واذا كان فتحى سلامة مايرضاش ؟

المتهم - يبقى مكرم عبيد ...

الرئيس - واذا كان مكرم عبيد مايرضاش ؟

المتهم - يبقى أى واحد تختاره المحكمة ..

الرئيس - موجهها كلامه للمدعى - اتصل بالمحامى دول بالترتيب على حسب طلب المتهم اللى يرضى منهم ييجى يدافع عنه ييجى .. واذا ماكانشن ولا واحد منهم يرضى ييجى هلشان يدافع عنه ، يبقى ينتدب أى واحد تانى .

المدعى - حاضر يا أفندم ..

الرئيس - اذن تؤجل الجلسة ثمانية وأربعين ساعة ، على أن تعود المحكمة الى الانعقاد فى الساعة العاشرة من صباح يوم الخميس ١٤ ربيع الاول سنة ١٣٧٤ ( الموافق ١١ نوفمبر سنة ١٩٥٤ ) .

( رفعت الجلسة فى الساعة العاشرة والدقيقة الخامسة صباحا ) .

## محضر

### الجلسة الثانية لمحكمة الشعب

المنعقدة علنا في الساعة العاشرة والدقيقة العشرين صباحا ،  
بمقر قيادة الثورة في الجزيرة ، يوم الثلاثاء ١١ نوفمبر سنة  
١٩٥٤ ، الموافق ١٥ ربيع الاول سنة ١٣٧٤ •

المؤلفة وفقا للأمر الصادر من مجلس قيادة الثورة بتاريخ  
اول نوفمبر سنة ١٩٥٤ ، الموافق ٥ ربيع الاول سنة ١٣٧٤ -  
بناء على المادة السابعة من الدستور المؤقت •

والمشكلة برئاسة قائد الجناح جمال مصطفى سالم عضو  
مجلس قيادة الثورة •

وعضوية القائمقام أنور السادات ، والبكباشي ( أ. ح ) حسين  
الشافعي ، عضوى مجلس قيادة الثورة •

وبحضور البكباشي محمد التابعي المدعى العام ، والاستاذ  
مصطفى الهلباوى رئيس نيابة أمن الدولة ، عضوى مكتب  
التحقيق والادعاء •

وتولى تسجيل المحاكمات بالاختزال الاساتذة طلعت الصبان ،  
وممدوح توفيق وإبراهيم فكرى أحمد فوده مندوبو مصلحة  
الاستعلامات •

\*\*\*

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد •



### حضر المتهم

الرئيس - فتحت الجلسة . . . المتهم موجود ؟

المدعى - المتهم موجود .

الرئيس - جاهز ؟

المدعى - جاهزين .

الرئيس - موجهها الكلام للمتهم - سمعت الادعاء اللي عليك ؟

المتهم - أيوه .

الرئيس - وقلت انك مذنب ؟

المتهم - أيوه .

الرئيس - ايه أقوالك ؟ السيد حمادة الناحل رايح يترافع عنك وأحب بالمناسبة دى أقول ان المحكمة تشكر السيد حمادة الناحل لتطوعه بالدفاع عنك .

الاستاذ حمادة الناحل - الدفاع - وانا بدورى أشكر المحكمة على هذه الثقة وأدعو الله أن يمنحني القدرة على أداء دورى ويوفقني في مهمتى .

الرئيس - موجهها كلامه للمتهم - اتفضل قول أقوالك للمحكمة . . . تحب تنكلم انت أو السيد المحامى يتكلم عنك .

المتهم - السيد المحامى

الدفاع - أفكر نأخر مناقشته ونسمع أقوال الشهود أولا .

رئيس النيابة - المتهم قال فى التحقيق كل حاجة .

الرئيس - بس يقول ايه أقواله قدامنا .

الدفاع - ما فيش مانع يقول وبرضه نناقشه تانى .

المدعى - المتهم قال كل حاجة فى التحقيق واعترف بارتكاب الحادث وقال عن المحرضين له وعن طريقة التسدير وكل التفاصيل .

الرئيس للمتهم - قول أقوالك .

المتهم — من مدة وأنا في الاخوان . . . من سنة ١٩٤٢ ومن مدة  
{ شهور بس انضمت للمنظمة السرية ودي مكونة من ثلاثة  
أشخاص محمود عبد اللطيف وهنداوى دوير وسعد حجاج .

الرئيس — على صوتك شوية واتكلم على مهلك وخليك هادى .  
المتهم — أنا في الاخوان من سنة ١٩٤٣ وما انضمتش الهيئة  
السرية . . الخلية السرية الا من مدة أربعة شهور بس . والخلية  
السرية مكونة من هنداوى دوير ومحمود عبد اللطيف وسعد  
حجاج . وفي الاربع شهور كنا نجتمع كل اسبوع من نصف ساعة  
الى ساعة . في بيت هنداوى دوير كل يوم اثنين وكان اجتماعنا  
لحفظ القرآن ودراسة السيرة والجهاد في سبيل الله . وقبل  
الحادث بأسبوع واحد كان هنداوى دوير قال لنا على حكاية  
الاتفاقية وان الرئيس جمال عبد الناصر وقع الاتفاقية وان  
الاتفاقية دي غلط وخيانة في حق البلد واتفقنا احنا الثلاثة ان  
اللى تتاح له فرصة ينفذ الاغتيال . وبعدين هنداوى دوير جاب  
لى المسدس قبل الحادث بيومين وقال لى المسدس بتاع سعد  
حجاج ماجاش فنفذ انت الخطة وبعدين قبل الحادث بيومين  
قرأت ان الرئيس حيروح الاسكندرية لحضور المهرجانات الشعبية  
فرحت لهنداوى الساعة العاشرة ونصف بالليل وقتله اللى قرينه  
في الجريدة فقال مفيش مانع على بركة الله وقت على سعد  
حجاج الصبح وقتل له بالامر فأبدى تأسفه اللى محضرش السلاح  
بتاعه علشان ييجى معايا وتوكلنا وسافرت على الاسكندرية في  
قطر تسعة ونصف اللى يوصل واحدة تقريبا وبعد كده رحت  
محرم بك واتمشيت شويه ودخلت مطعم واتغديت وبعدين رحت  
لوكاندة دار السعادة وأخذت حجرة خاصة وغرت ملابسى وفي  
الساعة أربعة وربع نزلت على ميدان المحطة وجدت جماعة  
متظاهرين رايعين المنشية فمشيت وراهم وبعد ما وصلت  
الميدان وقفت ولما جه الرئيس وهو بيتكلم كلمته أطلقت عليه  
طلقات من المسدس . . بعد كده الناس قبضوا على ورحت



البوليس الحربى فى الاسكندرية وقلت الاقوال بتاعتى امام النائب العام وهو اللى كتب المحضر .

**الرئيس -** للمدعى - عايز تسأله

**المدعى -** أيوه ... الشعبة بتاعتك فين ؟

**المتهم -** فى امبابه .

**المدعى -** بتقول انكم كنتم بتجتمعوا فى الشعبة وتذاكروا القرآن والسيرة والجهاد فى سبيل الاسلام ايه المقصود بالجهاد فى سبيل الاسلام ؟

**المتهم -** المقصود به محاربة اعداء الاسلام والحرية .

**المدعى -** مين دول ؟

**المتهم -** كنا بنفسرهم انهم الانجليز واليهود ومن يقف فى سبيل الدعوة الاسلامية وبعدين جت حكاية الاتفاقية وقبل الحادث بأسبوع واحد اجتمعنا واتكلمنا فيها احنا الثلاثة وأقرينا أن الاتفاقية فيها خيانة البلاد وأنها ابخست حق البلاد وادت الانجليز كل الحقوق فى البلد وعلى هذا الاساس بنينا حكمنا .

**المدعى -** انت قرئت الاتفاقية ؟

**المتهم -** قرئت ... وقرئت بعض الملاحق .

**المدعى -** فهمتها ؟

**المتهم -** اللى أنا فهمته منها انها أدت الانجليز كل الحقوق وقرئت فى الجرائد أنها استبدلت بالخمسائة مليون جنيه الديون بتوع مصر مبلغ ٣٢ مليون جنيه ثمن أسلاك وكابلات فى القنال .

**المدعى -** الاستبدال ده كان مذكور صراحة ؟

**المتهم -** كان فيه الملاحق وفسرتها جريدة الاخبار ... كانت كتبت قالت استبدال الديون بين كل من مصر وبريطانيا باثنين وثلاثين مليون جنيه ثمن كابلات وبعض المنشآت فى القنال .

**الرئيس -** والا كان فيه حاجة ثانية مزعلاك في الاتفاقية ؟

**المتهم -** أيوه فيه حاجة ثانية وهى انه ما كانش ضرورى الاتفاقية لان وجودهم في مصر بعد سنة ١٩٥٦ حيبقى غير شرعى وحيطلعوا من أنفسهم خصوصا وأن أساليب الحرب اتغيرت والنظم بناع الحرب دلوقت القوات بدل ما تكون مجموعة في حنة واحدة تلقى عليهم قبيلة ذرية فهم كانوا حيفرقوا قواتهم خوفا من القنابل الذرية .

**الرئيس -** يعنى انت كمان جنرال وتفهم في الشئون العسكرية كويس ؟

**رئيس النيابة -** رأيك ايه لو ما عملتش الاتفاقية كان الانجليز حيفخرجوا ازاي من القنال ... رأيك ايه كمواطن أو كأخ من الاخوان ؟

**المدعى -** وبتدعو للجهاد .

**المتهم -** خروجهم يحتاج الى جهاد والجهاد جربناه قبل كده في كتائب الجامعة لما راحت القنال كان الانجليز منزعجين من الكتائب لغاية ما صرحوا في بعض الصحف وقالوا انهم مستعدين للجلاء بس توقف العصابات .

**رئيس النيابة -** انت قلت انك قرئت معاهدة ١٩٣٦ تقدر تقول لنا ايه هي ؟

**المتهم -** هي كانت جعلت للانجليز كل حق في البلد انهم يستعملوا كل حاجة بالثمن مثل السكك الحديدية والتموين وأي حاجة في المطارات والمواصلات ... كل ده بالفلوس من أجل ذلك كانت الديون التي على بريطانيا لمصر ترتبت من أجور المواصلات والسكك الحديدية .

**رئيس النيابة -** رأيك ان معاهدة ١٩٣٦ احسن أو الاتفاقية احسن ؟

**المتهم -** معاهدة ١٩٣٦ انتهت طبعاً .

**الرئيس -** أفكر بلاش مناقشة المعاهدات احنا ما بناقش عبد الحميد بدوى وبنأخذ رأيه فى الموضوع . . .

**رئيس النيابة -** أنت دراستك ايه ؟

**المتهم -** أنا درست الابتدائية أربع سنين فى القسم الليلى ورسبت فيها وكنت دارس قبل كده أولى .

**المدعى -** فهمت ايه الفكرة من النظام السرى ؟

**المتهم -** الفكرة هى الجهاد فى سبيل الله ودراسة القرآن والسيرة . . . ده كل اللى فهمته .

**المدعى -** الغرض منه ايه ؟

**المتهم -** الغرض منه محاربة أعداء الاسلام وأعداء الدعوة .

**المدعى -** مين أعداء الدعوة الاسلامية .

**المتهم -** أعداء الدعوة الاسلامية .

**المدعى -** مين ؟

**المتهم -** اللى يقف فى طريق الدعوة الاسلامية .

**المدعى -** انت قلت أن قبل الحادث بيومين هنداوى ؟ جابلك

مسدس . . . منين جابه ؟

**المتهم -** ما قالش منين جابه . . هو قال لى استعد وما قالش

جابه منين .

**المدعى -** ما اداكش طلقات ؟

**المتهم -** ١٥ طلقة .

**المدعى -** ما قالش منين جابهم ؟

**المتهم -** لا ما قالش .

**المدعى -** ما اداكش فلوس ؟

**المتهم -** ادانى اثنين جنيه علشان أصرف منها .

المدعى - ما أخذت ش خمسة جنيه من على نويتو .

المتهم - أداهم لى يوم السفر .

المدعى - ليه ؟

المتهم - هنداوى قال لى خد منه .

المدعى - ليه ؟

المتهم - علشان السفر والمصاريف ؟

المدعى - ما أخذت ش حاجة ثانية ؟

المتهم - لا .

المدعى - لك دراية باستعمال المسدسات ؟

المتهم - ما فيش دراية إلا معلومات ضعيفة كنت أخذتها فى

الحرس الوطنى عن الطبنجة وانها تضرب بالتوجيه ... وفى

فلسطين أخذت معلومات غير رسمية كانوا الاهالى بيطلعونا

نضرب نار .

المدعى - ايه اهتمامكم بالحرس الوطنى وايه الظروف

لانضمامك اليه ؟

المتهم - كان فيه نداء للمواطنين بالتطوع وكنت من ضمن

المواطنين اللى تطوعوا .

المدعى - ما صدرش لكم أوامر بالانضمام الى الحرس

الوطنى ؟

المتهم - دى حاجة كانت كل الناس بتنضم اليها وتطوعت زى

كل الناس .

المدعى - تعرف هنداوى من امتى ؟

المتهم - من سنة ١٩٥١ .

المدعى - وسعد حجاج من امتى ؟

المتهم - من { أشهر .

المدعى - تعرف مين تانى من النظام السرى ؟

المتهم - دى المجموعة بتاعتنا وما أعرفش حد غيرها .

**المدعى - من رئيس المجموعة ؟**

**المتهم - هنداوى دوير .**

**المدعى - اتفقتم على مين يقتل الرئيس جمال عبد الناصر ؟**

**المتهم - هنداوى قال كل اللى تتاح له الفرصة منا احنا الثلاثة .**

**المدعى - هل سبق حد حاول ؟**

**المتهم - المحاولة اللى قمت بها كانت محاولة اسنطلاح بس**

**ما كانش معايا مسدس .**

**المدعى - امتى وظروفها ايه ؟**

**المتهم - محاولة الاستطلاع كانت فى مؤتمر الموظفين .**

**المدعى - اشرحها للمحكمة .**

**المتهم - فى مؤتمر الموظفين قبل الحادث بيومين رحت عند**

**اشارة المرور وشففت الرئيس وما دخلتش جوه لان الحراس**

**مانعين الدخول .**

**الرئيس - الجهاز السرى كان بيشتغل لحساب مين ؟**

**المتهم - لحساب الاخوان .**

**الرئيس - اخوان مين ؟**

**المتهم - الاخوان المسلمين .**

**الرئيس - يعنى كنتم بتحاربوا اعداء المسلمين علشان**

**الاخوان المسلمين يتربسوا افرض انك قتلت الرئيس هل**

**انت فاهم ان الحكومة دى عدوة الاسلام وعلشان كده رحت**

**تقتل رئيسها والا فهمت ان الرئيس بس هو اللى عدو الاسلام**

**واللا الحكومة كلها عدوة الاسلام .**

**المتهم - فهمت ان الرئيس عدو الاسلام .**

**الرئيس - هو لوحده ؟**

**المتهم - اه .**

**الرئيس - بس ؟**

**المتهم - ..... .**

- الرئيس — ده اللى فهموه لك .  
المتهم — آه .  
الرئيس — والجهاز كان يشتغل لحساب الاخوان ؟  
المتهم — أبوه  
الرئيس — ما تعرفش من رئيس النظام الخاص ؟  
المتهم — لا .  
الرئيس — مين اللى يعرف .  
المتهم — أنا أعرف أن رئيسنا هنداوى والرئيس العمومى  
ما أعرفوش .  
الرئيس — تعرف صلاح شادى ؟  
المتهم — أعرفه لانى فى سنة ١٩٥٢ كنت سافرت معاه لبون  
سعيد لمؤامرة ضد الانجليز ولكن ماتمتش .  
المدعى — وبعدين ؟  
المتهم — العلاقة بعد كده . . . كنت أقابله فى المركز العام  
أسلم عليه .  
المدعى — بس كده ؟  
المتهم — وبعدين طلبنى من امبابة علشان احرس بيت  
المرشد العام لغاية ما اعتقل وبعدين سبت الخدمة وجيت فى  
امبابة .  
المدعى — ليه اختارك انت  
المتهم — ما أعرفش .  
المدعى — تعرف عبد المنعم عبد الرؤوف ؟  
المتهم — ما أعرفوش .  
المدعى — ماشفتوش فى امبابة عند مصطفى الوردانى ؟  
المتهم — لا .  
المدعى — ما سبقش عرض عليك سلاح تانى لتنفيذ القتل  
غير المسدس ؟



- المتهم - كان عرض عليه مسدس صغير .
- الرئيس - فيه بينك وبين جمال عبد الناصر حاجة ؟
- المتهم - لا .
- الرئيس - شفته قبل كده ؟
- المتهم - لا .
- الرئيس - سلمت عليه ؟
- المتهم - لا .
- الرئيس - امال ليه رحت علشان تقتله ؟
- المتهم - فهموني أن الاتفاقية جنائية .
- الرئيس - مين اللى فهمك ؟
- المتهم - هنداوى دوير .
- الرئيس - اطلبوا هنداوى دوير نسمع كلامه .
- المدعى - ماسبقش عرض عليك حزام تلبسه وتجريه عملية  
النسف ؟
- المتهم - هنداوى عرضه عليه الساعة اتناشر ونصف بالليل  
لما رحت أخبره بالسفر فقال ده عندنا حزام تلبسه وتقابل  
الرئيس جمال عبد الناصر وتعاثقه وينفجر وتنسفوا انتم الاثنين .
- المدعى - شفت الحزام ؟
- المتهم - لا .
- الرئيس - مارضتش ليه ؟
- المتهم - ..... .
- الرئيس - خفت على نفسك ؟
- المتهم - لا ماخفتش على نفسى
- الرئيس - ليه مارضتش ما هى كانت الطريقة دى أضمن  
من المسدس ؟
- المتهم - ..... .
- الرئيس - ايه اللى خلاك ماقبلتش ؟

- المتهم - لا ما قبلتش .  
الرئيس - ما قبلتش ليه ؟  
المتهم - .....  
الرئيس - اتكلم حد ماسكك ..... ماتخفش .  
المتهم - قلت ماينفعش علشان الزحمة .  
الدفاع - ويمكن الرئيس مايرضاش يحضنه .  
المدعى - ما أخبرتتش حد بعزمك على السفر ؟  
المتهم - أخبرت سعد حجاج .  
المدعى - مفيش حد ثانى . . . ماقلتتش ليحيى سعيد .  
المتهم - أنا رحت له علشان آخذ الشنطة .  
المدعى - ماقتلوش حاجة ؟  
المتهم - لا . . . يمكن يعرف من هنداوى .  
المدعى - قابلت نويتو .  
المتهم - أيوه . . . واخذت منه خمسة جنيه وبس .  
المدعى - ماقتلوش حاجة ؟  
المتهم - لا  
المدعى - قابلت عبد الحميد البنا ؟  
المتهم - أيوه وماقتلوش حاجة  
المدعى - ما اخذتش منه حاجة ؟  
المتهم - لا  
المدعى - ماتعرفش الخطة . . . انت رايج تقتل الرئيس  
متفكرش تعمل ايه علشان تهرب ؟  
المتهم - لا مفكرتش وهنداوى قال لى الحرس بعد كده  
سيطلق عليك النار وتموت .  
المدعى - كنت عارف انك رايج تموت ؟  
المتهم - أيوه .  
المدعى - مفكرتش فى طريقة للهرب ؟  
المتهم - لا

- الرئيس — حفظت ايه في القرآن ؟  
المتهم — حفظت جزء من سورة البقرة ١٠  
الرئيس — وايه تانى ؟  
المتهم — وبعض آيات •  
الرئيس — بس ؟  
المتهم — وبعض صور قصيرة وسورة يس ( ٣/٤ آل عمران )  
الرئيس — من سنة ١٩٤٢ حفظت ده بس ؟  
المتهم — أيوه •  
الرئيس — ده كل الى حفظته في ١٢ سنة  
المتهم — كنت كل أسبوع بنحفظ ٥ آيات • وبعض الاسابيع  
نكسل ما نحفظش •  
الرئيس — الدين فيه كسل ؟  
المتهم — .....  
المدعى — النظام السرى كان مكون من مين ؟  
المتهم — كان مكون من هنداوى وسعد حجاج وأنا •  
المدعى — ماتعرفش الرئاسة لمن ؟  
المتهم — لا  
المدعى — الاوامر كانت بتيجى منين ؟  
المتهم — ما اعرفش كان بيحبها هنداوى •  
المدعى — ماتعرفش بتيجى منين ؟  
المتهم — لا  
المدعى — على نويتو كان فى النظام السرى •  
المتهم — لا أعرف •  
الرئيس — تعرف سورة « قل هو الله أحد » •  
المتهم — أيوه •  
الرئيس — اقراها •  
المتهم — بسم الله الرحمن الرحيم « قل هو الله أحد الله الصمد  
لم يلد ولم يولد ولم يكن له كفوا أحد »

- الرئيس — تقدر تشرحها لنا .
- المتهم — ماخذتش شرح .
- الرئيس — امال كانوا بيعلموكم الدين ازاي ؟
- المتهم — شرح عامى كده .
- الرئيس — كانوا بس بيعلموكم الاتفاقيات الدولية ؟
- المتهم — ..... .
- المدعى — تعرف ابراهيم الطيب .
- المتهم — كان مرة هنداوى عرفنى به فى بيته .
- المدعى — على أساس ايه ؟
- المتهم — قال لى أخوك ابراهيم الطيب .
- المدعى — عرفك بحد تانى ؟
- المتهم — واحد اسمه توفيق .
- المدعى — قال لك عليه ايه ؟
- المتهم — قال ده حيكون مندوب القيادة .
- المدعى — قيادة ايه ؟
- المتهم — قيادة الاخوان .
- المدعى — ابراهيم الطيب كلمك ؟
- المتهم — قعدنا نتكلم فى بيت هنداوى دوير فى الجهاد فى سبيل الله .
- المدعى — قال لك ايه ؟
- المتهم — حاجات عامة .
- المدعى — ماطلبش منك القيام بأى مأمورية ؟
- المتهم — لا . اللى طلب منا توفيق .
- المدعى — قال لك ايه ؟
- المتهم — قال أن فيه السيد أنور السادات عاوزين تدرسوا بيته كويس وكمان جريدة الجمهورية وتشوفوا أى طريقة اسلم لاننا نقدم على اغتياله .
- المدعى — وبعدين عملتم ايه ؟

**المتهم -** رحنا هناك وشفنا البيت والجريدة وكان ان استقر الامر على انه حيكون في الجريدة وبعدين قال لنا استنوا لما تصدر أوامر وبعدين انقطع ماجاش .

**المدعى -** كنت لوحذك ؟

**المتهم -** أنا وسعد حجاج .

**المدعى -** ما اداكوش مسدس ؟

**المتهم -** لا ..

**المدعى -** ابراهيم الطيب صنعته ايه ؟

**المتهم -** محامى ... هنداوى قال لنا انه محامى .

**المدعى -** تعرف صلته ايه بالجهاز السرى ؟

**المتهم -** هنداوى قال انه من الاخوان .

**المدعى -** ألم تسأل عن السبب فى قتل أنور السادات .. قلت أن الرئيس جمال عبدالناصر كان عدو الاسلام طيب والسيد أنور السادات تقتله ليه ؟

**المتهم -** ما سألتش .

**المدعى -** مأمورية خطيرة زى دى ما تسألش ؟

**المتهم -** .....

**المدعى -** انت تعرفه قبل كده علشان يكلفك بمهمة زى دى .

**المتهم -** .....

**الرئيس -** انت راجل صاحب دعوة والا متشرد تقتل الناس ؟

**المتهم -** ....

**الرئيس -** الدعوة وعرفنا انك ماتفهمش حاجة فى الدين قل هو الله أحد ماتعرفهاش وماتعرفش حاجة فى القرآن فى ١٢ سنة ... والاتفاقية ماطلعش عبد الحميد بدوى . يبقى تقتل ليه ... الراجل اللى يقول لك اقتل ده ماسك لك ذلة فيه لك ذلة عند هنداوى دوير .

**المتهم -** لا مافيش

**الرئيس -** آمال بتطاوعه ليه لا يقول لك اقتل ... اقنعك

- بأيه بالنسبة لانور السادات ؟  
المتهم - أقنعني بأنه يبحارب الاسلام في مقالاته .  
المدعى - قرئت مقالاته ؟  
المتهم - قرئت بعضها .  
المدعى - فيها حرب على الاسلام ؟  
المتهم - كان فيه مقالة يقول فيها ان الاديان اذا وقفت في طريق تقدم الشعوب فالشعوب حيمكن ان تتخلى عن دينها .  
المدعى - تتخلى عن دينها ؟  
الرئيس - ايه تانى ؟  
المتهم - قال ان الاديان اذا وقفت في طريق تقدم الشعوب فالشعوب ممكن أن تسير في طريقها وماتكونش الأديان عائق في طريقها .  
المدعى - قرئتها بنفسك ؟  
المتهم - أيوه  
الرئيس - طبعا فهمتها زى الاتفاقية وزى قل هو الله أحد مش كده والا فهمتها بطريقة تانية .  
المتهم - ...  
الرئيس - تعرف ايه عن المؤتمر الاسلامى ؟  
تعرف ان فيه حاجة اسمها المؤتمر الاسلامى للشعوب الاسلامية ؟  
المتهم - سمعت أن السيد انور السادات دس سكرتيره للمؤتمر الاسلامى .  
الرئيس - كان  
المتهم - وما يزال .  
الرئيس - ايه فايدته والا ماقريتش عنه حاجة ؟  
المتهم - لا ماقريتش عنه حاجة .  
المدعى - بتقول أنك كنت بتفكر في القران سن القران يحل قتل المسلم ؟



المتهم - لا

المدعى - هه ! !

المتهم - لا

المدعى - آمال ليه كنت عاوز تقتل الرئيس جمال عبد  
الناصر والقائمقام أنور السادات هم دول مش مسلمين ؟  
المتهم - مسلمين ... ولكن فهمونا انهم خارجين عن  
الاسلام ..

الرئيس - مين اللى فهمك ؟

المتهم - هنداوى دوير .

الرئيس - هنداوى دوير ده كلامه زى القرآن يعنى ؟ ..  
القرآن اللى حفصهولك مش بيقول ان القتل حرام ؟  
المتهم - أيوه ..

الرئيس - والا يمكن انت مابتفهمش كلام القرآن ؟

المتهم - صحيح أنا أقدمت على العمل ده ... وقبل ما أقدم  
عليه ما كنتش شاعر بأى حاجة كان حاجة طبيعية .. ولكن  
بعد أن أقدمت عليه شعرت بالندم وشعرت بأنى خاطيء .  
الرئيس - خاطيء ليه ؟ !

المتهم - لانه كان خلاف الاسلام ..

الرئيس - خلاف الاسلام فى ايه ؟

المتهم - فى الفهم اللى فهمته علشان قتل المسلم .

الرئيس - الادعاء ... فيه أسئلة ثانية ؟

المدعى - لا يافندم . واحنا مكتفين باقواله ..

الدفاع - لو سمح لى سيادة الرئيس بكلمة ..

الرئيس - أيوه اتفضل ..

الدفاع - خلال هذه المناقشة آمنت باننى الى جوار شخص  
غير عادى ... غير طبيعى .... كنت قد فكرت فى هذا قبل  
أن ألقاه ، وبعد أن لقيته مرة ومرة ، وبعد أن سمعته الآن آمنت

بان هذه المهمة العصبية التي ألقيت على كاهلى ، انما هى مهمة الدفاع عن شخص مجنون . . لا أريد أن أفرع عن هذا الجنون وعدم المسؤولية ، ولكننى أستهدف أولا وقبل كل شئء التدليل على أنه لا يوجد مصرى عاقل . . مصرى يسير كما يسير الاقوياء . مصرى طبيعى ، يقوم على الاعتداء على الرئيس جمال عبدالناصر لا أريد أن أعطل الدعوى بل نمضى فى سماع الشهود ، ولكننى أطلب بعد سماع الشهود اليوم احالته على الطبيب الشرعى علشان يقعد معاه ساعتين ويدينا تقرير عنه يجينا يوم السبت الصبح . . وده ماأظنش انه يكون موضوع جدل بيننا وبين الادعاء لانه لاصلة له بتعطيل الدعوى . ونحن هنا قد جئنا لالنتحدث فى الصغائر وانما لنشترك جميعا محكمة وادعاء ودفاعا فى رفع خطر عن بلادنا ، ولذلك أرجو أن تقدرؤا هذا الطلب وتفصلوا فيه .

**وكيل النائب العام -** الادعاء يعترض على هذا الطلب ، وقد تكلم المتهم طويلا فى التحقيقات كما تكلم طويلا اليوم امام حضراتكم واعترف تفصيليا بأنه ارتكب الحادث وبيت النية منذ اسبوع كامل على ارتكاب الحادث ، ثم سافر الى الاسكندرية وارتكب الحادث ثابتا جامدا كما هو الان وذكر لحضراتكم الدافع الذى من اجله ارتكب هذا الحادث وذكر لحضراتكم فى التحقيقات ايضا اسماء من حرضوه ومن سلموه الاسلحة فاذا جاء اليوم لحضراتكم واعتذر عن فعلته ، واراد ان يتظاهر بأن ضميره قد أنبه ، وان ضميره قد استيقظ . . الان اذا فعل هذا فيكون رجلا عاقلا كل العقل وليس مجنونا كما يريد الدفاع ان يدرأ عنه المسؤولية . وانما لفعل الدفاع يريد من هذا ويستهدف من وراء ذلك أن يطلب استعمال الرأفة مع المتهم . . ولكن أن يقول عنه انه مجنون فلا يقبل عقل سماع هذا اطلاقا .

**الدفاع -** استمىح المدعى فى كلمة هادئة . . أريد أن أقول له أن معارضته هذه انما هى معارضة تقليدية . . معارضة تقليدية

لان من شأن الادعاء أن يعارض الدفاع فنحنا زميلي الكريم هذا النحو ولم يستهدف فيه مصلحة الدعوى ولم يستهدف فيه مصلحة العدالة لان ثبات المتهم وجموده هو عندي آية جنونه . . هذا الجمود حينما يقدم انسان على قتل قائدين من قادة بلده - هذا الجمود حينما يلزم انسان على هذا النحو لا يدل فحسب على ان جانبه قد خلا من كل قلب بل يدل كذلك على أن جمجمته قد خلت من كل رأس . . . ثم ماذا يهم المدعى أيخشي ماسيتلو هذه الدعوى ؟ مش حيقال ولا يمكن ان يقال ان الجهاز السرى وقد بلغ عدده مابلغ كله مخبول . وعلى اية حال فأنا لا اريد ان اتعرض لدعاوى أخرى اذن فلا مصلحة الدعوى ولا مصلحة العدالة ولا ما يراد لهذا البلد من سمعة كريمة نريد أن تبقى عليها اننا نقول انه أكثر مايكون عقلا . . الى شرع في قتل انور السادات لانه كتب مقال في الدين . . والى شرع في قتل جمال عبد الناصر غداة اخراج الانجليز بعد جهاد سبعين سنة . . يبقى ده عاقل ؟! . . او ان في هذا مصلحة العدالة ؟! . . بالطبع لا ، ولهذا سميت معارضة المدعى بانها معارضة تقليدية لا أكثر ولا اقل .

**المدعى -** دى مش معارضة تقليدية بل دفع تقليدى مداولة قصيرة بين السادة اعضاء المحكمة

**الرئيس -** المحكمة معترضة على احالة المتهم على الطبيب للشرعى ، لان المتهم لما ارتكب هذه الجناية لم يرتكبها بدافع داخلى من نفسه بل من املاء بعض اشخاص كانوا يجتهدون به وبتأثيرات خارجية ، وكان المتهم عاقلا عندما كان يسمع هذه التأثيرات ويتناقش معهم ، وكان عاقلا عندما أقدم وذهب ودبر وانذاك يبقى خط الجنون مش واضح هنا . . . كل فرد منا يمكن يكون له نصيب من الجنون ، فهل نحال جميعا على الطبيب الشرعى ؟

**المدعى -** هذه محاولة اشترك فيها اكثر من واحد واكثر من محرض وهم موجودون خارج القاعة ونحن نطلب من المحكمة الان

سماع شهادة الشاهد الاول او المحرض الاول هنداوى دوير .

**الرئيس - اذن يستدعى هنداوى دوير .**

( حضر الشاهد )

وقد اخرج السيد رئيس المحكمة مصحفا صغيرا من جيبه ووضع على حافة المنصة وطلب سيادته من الشاهد ان يتقدم ثم قال له .

طبعا عارف ده ( مشيرا الى المصحف )

**الشاهد - ايوه . .**

**الرئيس - قل ، والله العظيم اقول الحق ولا شئ غير الحق والله على ما أقول شهيد . .**

( حلف الشاهد اليمين )

**الرئيس - ايه الى تعرفه عن موضوع التهمة بتاعة محمود عبد اللطيف فى تعديده على الرئيس جمال عبد الناصر ؟**

**الشاهد - ايوه يافندم . .**

**الرئيس - نرجوك ان تكون هادئا واذا كنت عاوز كوباية ميه نجيبلك كوباية ميه . .**

**الشاهد - تسمح لى أتكلم فى الموضوع على طول**

**الرئيس - اتكلم زى مانت عاوز . . . اتكلم على راحتك . .**

**الشاهد - فى الاشهر الاخيرة . . من خمس شهور أو أربع شهور أو بعد مارس بالتحديد انقسم أعضاء الهيئة التأسيسية للاخوان المسلمين الى ثلاثة أقسام ، احدها وعلى رأسها بعض الاخوان زى الاستاذ البهى الخولى يؤيد الثورة ويرى ضرورة أن الاخوان يقوموا بتأييد الثورة . . وفريق آخر وقف موقف حياد أو على الاقل مائع . . ماقدرشى يحدد موقفه بالضبط وماأرادشى أنه يفضب دول أو دول . وكان على رأس هذا الفريق الدكتور خميس حميده اللى هو وكيل الاخوان . . والفريق الثالث كان يرى أن الثورة ماشية فى طريق يعارض الاتجاه الاسلامى . . على أثر هذا الخلاف الشديد الهيئة التأسيسية كأعضاء فقدت**

احترامها في نفوس الاخوان ومكتب الارشاد لم يستطع أن يقوم بمهمته في توجيه الاخوان وكذلك فقد إحترامه فعلا في نفوس الاخوان حتى أصبحت التعليمات التي تصدر منه لا تلقى تأييدا من الاخوان . وكان لابد من تعديل الحال فرؤى أن هذه الهيئة لا تمثل الاخوان ، فما دامت لها صفة من صفات الابدية وهى التعيين مدى الحياة فلا بد من تغييرها الى وضع آخر يستقيم مع الامور . . . وهم كانوا ينتخبوا اخوان ممن يستطيعون تأييدهم ويتوجهوا بالدعوة الوجهة التي يريدونها باعتبارهم ممثلين للاخوان تمثيلا كاملا فرؤى تعديل القانون ، وفعلا عدل القانون . . . في هذه الفترة أزاء هذا الاضطراب الشديد - سيطر على الدعوة بعض أفراد غير رسميين يعنى أفراد مالهمش الصفة الرسمية زى ابراهيم الطيب . . . الاستاذ ابراهيم الطيب المحامى . ووجدنا أن الاجهزة الادارية في الاخوان المسلمين أصبحت كلها معطلة ماعدا الجهاز الخاص الجهاز السرى في الاخوان المسلمين وأنا أرجو بهذه المناسبة أن يكون هذا آخر عهد الاخوان المسلمين بالنظم السرية ، وأن تكون هذه الطلقات الاخيرة آخر طلقات تسدد الى صدر مصرى بهذه الصورة الاسيفة التي آسف عليها أشد الاسف . . . كان الجهاز السرى يسيطر على الموقف ويصدر تعليماته الى الاخوان . وعلى أثر هذا بدأت التعليمات تيجى تلقائيا من المسئول ، وكان في هذه الفترة من الاسبناذ ابراهيم الطيب المحامى المسئول عن النظام السرى في القاهرة وأنا في امبابه كنت رئيس المنطقة وكنت طول عمرى في المنطقة رئيس النظام السرى . . . وفي أثناء المعاهدة أو بعد الاتفاق المبدئى الى وقع بالحروف الاولى ، قامت الخلافات حول ما اذا كانت المعاهدة صالحة أو ضارة وبدأت تشجن نفوس الاخوان بانها ضارة وصدر قرار مكتب الارشاد الى وجه الى السيد الرئيس بخصوص رأى الاخوان في المعاهدة واللى قيل فيه أن ده مجرد نصيحة وأنه غير ملزم للحكومة وان من واجبنا أن نوجه أى حاجة للحكومة

باعتبارنا من الشعب وتطورت الامور بعد هذا يا سيدى الى ان بدأت المنشورات تنزل وكانت تيجى للاخوان علشان يقرأوها وعلشان ينزلوها ويوزعوها على الناس .. الاستاذ ابراهيم الطيب كان بيقول ان الخطة اللى اتخذها النظام السرى هى تعبئة نفوس الاخوان من الوجهة الشعبية وتعبئة نفوس الناس ضد المعاهدة . وعلى هذا الاساس نزلت جملة منشورات باعتبار ان الاتجاه هو اتجاه تبصير الناس كما يقول الاستاذ ابراهيم الطيب - على اساس ان المعاهدة ضارة . فى الفترة دى ياسيدى شحنت نفوس الاخوان شحنا شديدا ضد المعاهدة وكان على اثر هذا ان الاخوان طبيعى كانوا متضايقين من المعاهدة ضيقا شديدا وكانوا يقولون : ما المصير ؟! .. ايه يعنى ، حنعمل ايه ؟ .. وبعدين بصينا فجأة وجدنا المنشورات انقطعت نهائيا ، فسألت ابراهيم : انتم عبيتونا وفرغتنا ليه ؟ .. فقال ان الاتجاه مش حيكون اتجاه شعبى بل احنا قررنا ان الاتجاه يكون اتجاهها ارهايبا .. فقلت له يا استاذ ابراهيم ان الاتجاه الارهابى ده لن يؤدى الى نتيجة وذكرته بما تحمله الاخوان فى ايام فاروق ، وقلت له ان احنا والبلد مش حانجنى من هذا الطريق شىء ، فقال لى ان هناك خطة كاملة واحنا حانفدها .. طيب ياسيدى .. قبل الحادث بحوالى خمستاشر يوم أو أكثر قليلا جانى وقال لى ان خطتنا هى ان النظام قرر انه هو يعتدى أولا على الرئيس جمال عبد الناصر وبعد كده يتخلص - بتحديد اللفظ - يتخلص من الضباط الاحرار بنى صورة سواء بالاعتقال أو بالخطف أو بالقتل . فقلت له يعنى انتم حققتم المسائل دى اسلاميا فقال لى آه .. واهل حضراتكم تعرفون ان النظم السرية دى المسائل اللى تناقش فيها ماتناقش بشكل أوسع وفعلا قال لى انه انتخب محمود عبد النظيف ليقوم باطلاق الطلقات الاولى ، وهى الاعتداء على الرئيس جمال عبد الناصر ، وجاب لى المسدس اللى



شفتة في القضية وبعدين أنا اديت المسدس على طول لمحمود  
عبد اللطيف . وقلت لابراهيم الطيب ، ايه الخطة يا سيد  
ابراهيم ، فقال لي الخطة ان الرجل الصعيدي - مع الاعتذار  
طبعاً عن هذا التشبيه - ان الرجل الصعيدي يتتبع خصمه  
سنة كاملة لغاية ما يتخلص منه . . فالخطة أن محمود يعتمد  
على مجهوده الشخصي في تتبع الرئيس جمال عبد الناصر ،  
ولا سيما أنه بعد المعاهدة نزل الى الميادين والى الشعب ويمكن  
أن محمود ينال منه . **وفعلاً قلت لمحمود هذا وقد سلمته**  
**المسدس وسلمته الطلقات . .** وفي هذه الاثناء - وأنا أقولها  
يا سيدى الرئيس لوجه الحق ولوجه الله زارنى الاستاذ محمود  
الحواتكى والاستاذ عبد الفتاح القرشى فى البيت يمكن الساعة  
تسعة وقالوا لي أن احنا بلغنا أن النظام - قالوا لي كده ودى  
كلمة تطلق على النظام السرى - **قالوا ليه ان النظام قرر أن يتجه**  
**اتجاهاً أرماليا وأن الحواتكى علم ان الاستاذ المرشد غير موافق**  
**على هذا الاتجاه وأنه قال لى بالتحديد أننى برىء من دم جمال**  
**عبد الناصر اذا قتل . .** قلت له : مين اللى قال لك هذا الكلام  
فقال لي : قاله شخص لست فى حل من ذكر اسمه . وقد  
سبق أن قلت هذا الكلام فى التحقيق . . وبعدين سألت نفسى  
احنا رايعين فين . . ثم قابلت محمود بعدها على طول وقلت  
له أوقف كل حاجة وهو موجود أمامكم واسألوه واعتقد أنه  
صادق وحيق قول الحق . . وبعدين جانى زارنى ابراهيم ، وهو  
كان بيزورنى فى هذه الفترة كل يوم باعتبار أن دى خطوة أولى،  
وأن دى هى اللى حتمشى فى هذا الطريق . . جانى ابراهيم تانى  
يوم فقلت له على حكاية الاستاذ الحواتكى والاستاذ القرشى . .  
وبهذه المناسبة ماكنش الاستاذ ابراهيم يعرفنى بمكانه أبداً وإنما  
كان بيجى عندى . . جانى الاستاذ ابراهيم فقلت له على حكاية  
الاستاذ الحواتكى . فقال لي أن الكلام ده كلام غلط ،

وان الناس دول متصلين بالمفصولين وبلاستاذ البهى  
وانهم عاوزين يعطلوا شغلنا . فقلت له يعنى الامر صادر من  
الاستاذ المرشد ، فقال لى ايوه . . فقلت لمحمود امش فى طريقك .  
قبل الحادث بثلاث أو أربع أيام كان الاستاذ ابراهيم بيتفق معى  
فقال لى أنا حاجيب لك عدة حاجات لتكون بمثابة العمل الاول اللى  
تبدأ بعدها الخطة ، وهى مدفعين على أساس انهم يبقوا كمين  
يوجه ضد ركب جمال عبد الناصر وجاب لى لغم على شكل حزام  
وشرح لى طريقة العمل وقال ان محمود يبقى يتحزم به وجاب لى  
طبنجة ثانية وقال لى ان محمود على نصيرى يأخذها ويقوم بدور  
محمود عبد اللطيف . . اللغم والمسدس جابهم لى يوم الثلاثاء . .  
محمود بعد ما اخذ المسدس نزل وراح مؤتمر الموظفين ولم يعمل  
حاجة . . وفى نفس اليوم الاثنين . . جانى يوم الاثنين بالليل  
الساعة عشرة احداشر ونص اتناشر وقال لى أنا مسافر اسكندرية  
فقلت له علشان ايه يا محمود فقال لى الرئيس مسافر النهارده  
اسكندرية . . فقلت افرض انه مفيش حاجة هناك فورانى جريدة  
القاهرة وكان منشورا فيها ان الرئيس مسافر اسكندرية . . أنا  
طبيعى الان فى موقف الشاهد ومش عاوز أبرىء نفسى باعتبار ان  
مكتب الادعاء انهى هذه القضية وانما اقرراننى قلت لمحمود بلاش  
هذا المشوار فقال لى لازم أسافر وبهذه المناسبة اقرر - وان كان  
هذا الكلام يغلظ العقاب على محمود - أقرر أن محمود كان  
متحمسا لهذا العمل فعلا . فقلت له طيب ياسيدى سافر وسافر  
فعلا . هو سافر يوم الثلاثاء وكان الكلام ده يوم الاثنين بالليل  
الساعة اتناشر اللى هو بدء يوم الثلاثاء جانى الاستاذ ابراهيم  
الطيب يوم الثلاثاء وجاب لى اللغم والطبنجة وقال لى ابقى اعرض  
أحدهما على نصيرى . . محمد على نصيرى رفض انه يأخذ اللغم  
وأنا كنت أبدبت اعتراضاتى على اللغم ، ولكن ابراهيم قال لى  
العسكريين قالوا انه كويس كده وان احنا مالناش أن نعترض على

الناحية الفنية . . . طيب ياسيدى يوم الثلاثاء الساعة اثنين . . .  
اولا انا كنت فى المحكمة فى هذا اليوم لغاية الساعة واحدة ونص  
وكنت أترافع فى حداشر قضية وهذا ثابت فى محضر الجلسة كما  
هو ثابت فى التحقيقات التى اجراها رجال الادارة وبعدين روجت  
البيت الساعة اثنين اتغديت انا واولادى وخلصت غدا . . الساعة  
اتنين ونص جانى الاستاذ ابراهيم ومعاه اللغم والطبنجة . ويظهر  
ان الاستاذ ابراهيم كان جاى فى السكة ووراه الأخ الاستاذ  
عبد العزيز كامل لأنه جه بعده على طول فقال لى هات ابراهيم  
يتغدى عندى . . . وبهذه المناسبة أقرر ان الاساذ ابراهيم الطيب  
قال لى ماتقولش الحاجات دى للاستاذ عبد العزيز كامل لانه كان  
معارض فى هذا الاتجاه ويمكن يقنعك انك تعدل عن تنفيذ الخطة  
. . وبعدين قعدت انا وابراهيم فى أودة المكتب وجبت له على  
صينية الشاى طبق خضاروسوية رز وبدأ ابراهيم يتغدى وفعلا  
وحبه وجه الاستاذ عبد العزيز كامل فقال ييجى ابراهيم يتغدى  
معايا فقال ابراهيم انا حاتغدى هنا فقال عبد العزيز ابعت حد  
ينزل للحاجة اللى هى الست الوالدة يجيب لنا شوية حاجات  
**ودخلت أنا اللغم وكان ملفوف فى ورقة وكنالك المسدس فى أوضة**  
**من أوض البيت** وقعد ابراهيم وعبد العزيز يتغدوا وفضلوا قاعدين  
ييجى ساعة . وبعدين الاسناذ عبد العزيز كامل جاله واحد  
فلسطينى من الاخوان فجئت واحدة خدامه تقول له ان فيه واحد  
هاوزه فنزل الاستاذ عبد العزيز وبقيت انا وابراهيم وقعدنا لغاية  
الساعة خمسة ونص وكان فيه ميعاد ان نصيرى حيچى فجسه  
وعرضت عليه اللغم فقال لا ده ماينفعشى وأخذ المسدس على  
أساس انه يقوم بنفس المهمة الموكولة لمحمود عبد اللطيف وعلى  
اثر ذلك انصرفنا . . انصرف ابراهيم وخرجت انا ورجت لمكتبى  
وفضلت فيه لغاية الساعة تسعة . وكنت قاعد مع الدكتور  
موريس اسكندر وهو جارى وصاحب اجزخانة . وبعدين روجت

البيت فعلمت في الطريق — وأنا كنت عارف ان محمود في الاسكندرية وما كناش سمعنا الراديو لان الحته اللي احنا كنا فيها مفيهاش راديو — وأنا في السكة عرفت ان محمود عبد اللطيف اعتدى على الرئيس . . . . .

الشاهد — ( مستمرا ) — ومن حمد الله ان الرئيس مااعتديش عليه ونجى بحمد الله بعد كده أنا قدرت انه سيقبض على فأخذت الست بتاعتى الساعة ٩٣٠ ونزلنا بسرعة أخذنا قطر ١٠١٥ من الجيزة وروحنا المنيا ودخلنا الساعة ١٣٠ ورجعت صباحا في قطر التاسعة ونزلت الى مركز امبابه وسلمت نفسي الى البوليس وأنا جاى في القطر قدرت عدة مسائل منها أن زعماء الاخوان منقسمين على أنفسهم وان الدعوة في هذه الفترة يسيطر عليها أناس غير مسئولين وغير معروفين للاخوان وان الاتجاه الارهابي اتجاه صورته الطبيعية الواضحة البسيطة انه غير اسلامي ان القتل على هذه الصورة قتل غير اسلامي قدرت هنا وقدرت انه لو وقعت العمليات التي تحت يدي ففيها ارهاق للاخوان وارهاق للبلاد وعلى الامن واذا كانت دي ما أصابتش يمكن حاجة ثانية تصيب وقررت لذلك ان اسلم نفسي للبوليس وأضع نفسي تحت تصرف المسئولين ولذلك قابلت الضابط وقلت له أنا عايز اسلم نفسي للبوليس ده الحادث وأنا تحت تصرفكم في اى اسئلة .

الرئيس — قول اى حاجة عايز تقولها اذا كان عندك حاجة ثانية عايز تقولها .

الشاهد — ابراهيم قال ان الخطة هي الاعتداء على الرئيس وبعد كده خطف او الاعتداء على الضباط الاحرار فيه اظن حوالى ٥٠ واحد وكذلك أعضاء مجلس قيادة الثورة .

الرئيس — الضباط الاحرار دول الجهاز السرى بتناع الجيش ؟

**الشاهد -** أنا ما اعرفش ان فيه جهاز سرى فى الجيش وهو كلامه فى الحقيقة عن الضباط الاحرار بس وهو الاسم الذى يطلق على الضباط الذين يتعاونون مع رجال الثورة .  
**الرئيس -** يعنى الجهاز السرى بس فى الاخوان ؟

**الشاهد -** أيوه ، . . . ومن المؤسف أن الاعتبارات دى قدرتها وأنا فى القطر ما قدرتهاش قبل الحادث وهذا محل الاسف .  
والواقع أن الانسان يظل يسير فى الخطأ ولا يعلم أنه خطأ حتى يقع فيه والانسان يظل يدخن وهو يعلم ان التدخين ضار ولا يحس حقيقة بضرره الا اذا أصيب بكحة . . . أو مرض يبقى يعالجه . . . ومحل الاسف أنى لم أفكر فى الحادث قبل وقوعه وانما بعد ذلك وأنا مفروض أنى كمحامى ادافع عن المتهمين لا ان أقف موقفهم .

**الدفاع -** دلوقت كمحامى لسه . . . محامى ايه . . . يجبان ادافع عن كرامة مهنتى .  
**الرئيس -** الشاهد يقول اللى هو عايزه . . . والدفاع لازم يكون باله طويل .

**الشاهد -** أنا يا سيدى الرئيس محام ولا زالت صفتى قائمة واذا كان موقفى هنا الآن مؤسفا فأننى آسف كل الاسف وأنا مطمئن الى أى مصير تقدره المحكمة بالنسبة الى وأتحملة بكل شجاعة وصبر باعتبار ان كل واحد يعمل حاجة يتحمل نتيجة عمله .

**الرئيس -** ما عندكش حاجة ثانية عايز تقولها ؟

**الشاهد -** لا اذا كان فيه أسئلة أنا مستعد للإجابة .

**الرئيس -** ترفع الجلسة للاستراحة .

( رفعت الجلسة فى الساعة الحادية عشرة والدقيقة الخامسة

والعشرين ) .

( أعيدت الجلسة في الساعة الثانية عشرة ظهرا )

**الرئيس -** أعيدت الجلسة - الشاهد فيه عنده حاجة ثانية عايز يقولها ؟

**المدعى -** هو كان خلص كلامه .

**الشاهد -** بخصوص الحادثة نفسها خلاص .

**الرئيس -** فيه حاجة ثانية ؟

**الشاهد -** بخصوص النظام السرى ؟

**الرئيس -** هل لك أقوال ثانية عايز تقولها من غير أسئلة ومن غير مانقاشك في الموضوع . . فيه عندك حاجة عايز تقولها ؟

**الشاهد -** ايوه يا فندم . . بس انالى شكوى صغيرة بخصوص اعتراض الاستاذ حماده الناحل على اننى محام .  
**الرئيس -** انا رديت عليه .

**الشاهد -** الانسان لا يصح أن يجهز على جريح ولم يكن يليق به ان يطعننى وانا في هذا الموقف وبينى وبينه خصومة لانه يحضر ضدى في قضايا خاصة .

**الرئيس -** مفيش طعن .

**الشاهد -** ايوه يا فندم . . مسألة النظام السرى في الاخوان المسلمين . النظام السرى هذا ترك من ايام البنا الله يرحمه وانشئ هذا النظام اصلا لمحاربة الانجليز ولمحاربة الملك السابق وكان على رأسه الاستاذ البنا كمشرف مسئول باعتباره المرشد العام وكان يرأسه في ذلك الوقت على ماوضح في قضية سيارة الجيب - الاستاذ عبد الرحمن السندى وقد اشترك هذا النظام في حرب فلسطين والطلائع الاولى في حرب فلسطين كانت من الاخوان - ومن النظام الخاص بالذات وكان يختار أفراد من المخلصين المؤمنين المضحين بأرواحهم وأموالهم في سبيل الله وذلك لتحرير البلاد العربية والاسلامية من الاستعمار الاجنبى . هذه هى فكرة النظام الخاص في الاصل وأساس هذه الفكرة لاغبار عليه لان المسلم



يجب ان يجهز تجهيزا اسلاميا كاملا فقد قال رسول الله صلى الله عليه وسلم من لم يغز ولم تحدثه نفسه بالغزو مات ميتة جاهلية كما قال ارموا واركبوا ولئن ترموا خير من أن تركبوا . بقى أن الدولة تحارب التسليح فكان لابد من التخفى ولقد اشترك هذا النظام فى حرب فلسطين وفى معركة القنال وعمر شاهين . والمنيسى وغيرهما من الشهداء كانوا من اعضاء هذا النظام . وبعد ما انتقل البنا الى رحمة الله كان عبد الرحمن السندى يرأس النظام وكان مكونا من عدة جماعات الجماعة مكونة من خمسة اشخاص على رأسهم واحد والشعبة المهمة بها عدة جماعات وكل جماعة يرأسها واحد وتدرج على نظام هرمى يرأسه عبد الرحمن السندى ومعظم هذا النظام فى القاهرة وقد توجد مراكز او مناطق ادارية تخلو من هذا النظام مثل اسوان وذلك لانها بعيدة ولا تيسر لها فهم اغراضه الجماعات منتشرة أصلا فى القاهرة ويرأسها عبد الرحمن السندى ولما انتقل الاستاذ البنا الى رحمة الله وجه الاستاذ الهضيبي اختيار مرشدا عاما وبهذه المناسبة أقرر كيف اختير مرشدا عاما . . . . . الاستاذ البنا ترك ١٠٠ شخص او اكثر كلهم قد بعض ولا يدينون لاحد بالولاء والاستاذ البنا كان غاوى بترينات . .

الرئيس - غاوى ايه ؟

الشاهد - بترينات . . . . . يعنى يبقى المحل مثلا فى الظاهر والبترينة فى شارع فؤاد ومعنى ذلك انه كان يضم الى الجمعية التأسيسية اناسا لا صلة لهم بالاخوان المسلمين فمثلا جبه واحد من النيابة خرج برشوة وبصينا لقيناه عضو فى الجمعية التأسيسية . الواقع ان الشيخ حسن البنا كان يضعهم جميعا فى الظل لانه رجل عملاق فلما الاستاذ البنا أخذ بهذه الصورة - لم يكن للهيئة التأسيسية قوة ادارية او أى صفة . كانت تجتمع به ليقرر ما يشاء فلما مات برزت واخذت طابع التوجيه وهم لا يلتفون نحو شخص منهم . . . . . اختلفوا ولم يتفقوا على شخص منهم فرؤى اختيار احد الناس القريبين من الاخوان وله اتجاه اسلامى فرشح الهضيبي وانتخب

انتخابا حرا على ما نعلم . وبدأ الصراع بين الهضيبي والسندى لأن الهضيبي أول ما جه أعلن أن هذا الاتجاه خطأ وأعلن أن قتل الخازندار قتل غير إسلامي وأن قاتله يدخل النار ولذلك بدأ الصراع بين الهضيبي والسندى وانتهى هذا الصراع بفصل عبد الرحمن السندى وبعض زملائه من الإخوان المسلمين واستمرت الحال على ما هي عليه وقيل أنهم جابوا قيادة أخرى لهذا النظام ودى يفسرها بعدين ومشيت الأمور الى ما بعد الثورة بفترة كبيرة الى أن فصل السندى وجاب الهضيبي قيادة جديدة للنظام وبدأت تتصل بالإخوان وبعدين هرب عبد المنعم عبد الرؤوف .

الرئيس - مين ده ؟

الشاهد - ده ضابط في الجيش كان يحاكم وهرب فرأت قيادة النظام السرى انها تستعين بمعلوماته في الناحية العسكرية وأنا شخصيا استصفته يومين ثلاثة جابهولى ابراهيم الطيب وقال لى ده ضيف سرى ما يصحش حد يتصل بيه وفعلاقعد عندى يومين ثلاثة وكان ابراهيم بيحى يقعد معاه فترة طويلة وعلى اثر هذا طرأ تعديل جديد على النظام السرى ونظم الجهاز السرى الى جماعات كل جماعة من سبعة وكل أربع جماعات تكون فصيلة وهذه الفصيلة تسليح بالاسلحة مدافع والقنابل والطبنجات ده الترتيب اللى جه فى النظام السرى زى ما أدليت بأقوالى الاولى بمجرد تسليمى نقبى للبوليس وافكر دى صورة معقولة للنظام الخاص . . ترجع بقى للخطة العامة فى مسألة المعاهدة قيل بعد الاتفاقية ان الثورة تتجه بالبلاد بعيدا عن الاسلام ولا بد اننا نجيب حكومة أخرى تتجه نحو الاسلام ولا يحكم الإخوان لسببين الاول أن بعض الإخوان ما يمثلوش الاسلام وما يقهروش يطبقوا الاسلام والسبب الثانى أن البلاد غير مستعدة لتقبل النظم الاسلامية ككل لا يتجزأ ولهذا يحسن ان نسير بالتدريج حتى تستقر صورة واضحة ولذلك

اقول انه لم يكن في ذهن الاخوان او المسئولين ان يحكموا وعلى هذا الاساس رتبت الخطة على ان يعتدى على الرئيس جمال عبد الناصر واعضاء مجلس قيادة الثورة والضباط الثانئين يعتقلوا او يخطفوا أو شيء من هذا القبيل وابراهيم الطيب قال ان فيه اتصال بالرئيس محمد نجيب والاتفاق على أساس أنه يبقى يهدى البلاد أثناء هذا الاضطراب وأنا سألت ابراهيم قلت له يا أستاذ ابراهيم انتم عاوزين تستغلوا الرئيس محمد نجيب في فترة الاضطراب ده علشان يهدى الشعور العام والا انتم واثقين ان فيه صلة قال فيه صلة فسألته ايه كنهها فقال ما يصحش اننا تكشف كل اوراقنا - وبهذه المناسبة اذكر انه ليلة ما جه المرشد من سوريا كنا في البيت عنده في الصالون وبعدين الساعة اتناشر ونصف .. واحدة تقريبا ضرب التليفون فواحد من الاخوان لا اتذكره الان رد على التليفون ولما سألناه مين قال ده الرئيس نجيب ببسأل على المرشد وعائز يكلمه ضرورى وقال لما يقوم من النوم قولوا له ان الرئيس نجيب سال عليك وأنا أذكر المحادثة على التفصيل كما رواها لنا ذلك الاخ .

- آله .. مين ؟

- أنا الرئيس نجيب .. الاستاذ الهضيبي موجود انا عائز

أكله .

- ده جه من الساعة ٩ ونام .

.. أنا عاوز أكله - أنا سمعت انه جه دلوقت وعائز يكلمه

ضرورى .

- لا ده جه من الساعة ٩ وراح المركز والتقى بالاخوان وخطب

فيهم وهو دلوقت نايم .

- طيب لما يقوم قولوا له ان الرئيس محمد نجيب سأل عنك

ده في ليلة ما جه المرشد من سوريا بالذات فلما يكون ده في

ذهنى ويقول ابراهيم الطيب ان فيه صلة .. معقول انى اصدقه

.. ده من حيث الخطة العامة يافندم .

الرئيس - الادعاء عايز يناقشه ؟

المدعى - ايوه ... انت قلت ان الخطة العامة هي قتل الرئيس جمال ثم تهدئة الحالة هل كان مقصود ان تقوم ثورة شعبية او ايه دي عايزين تفسرها ؟

الشاهد - ايوه ... تفسيرها ان الاخوان كان مقصود انهم يعملوا ثورة شعبية  
الرئيس - ايوه .

الشاهد - وبعدين في الايام الاخيرة انتهوا الى انهم يقوموا بعمليات ارهابية تنتهي باضطرابات في البلاد يسيطر عليها الرئيس محمد نجيب وينتهي من اعضاء مجلس قيادة الثورة وتكون حكومة تتجه بالبلاد اتجاه اسلامي لعل ده واضح .  
الرئيس - ايه الخطة ؟

الشاهد - الاعتداء على الرئيس واعداء القيادة . والضباط الاحرار فيحدث اضطراب يسيطر عليه محمد نجيب .

الرئيس - ازاي الخطة بتوضع ومنين بتيجي ومنين بينفذها ؟  
الشاهد - الخطة بتوضع في قيادة النظام السري اولولا اعرف منه الا اشخاص معدودين ويطلع عليها المرشد والمفروض ان يصادق عليها وانا اعرف المسئول عن قيادة النظام السري والمسئول يعرف اللي يليه وانا اعرف ابراهيم الطيب ويوسف طلعت في القسم المدني واعرف صلاح شادي وانه مسئول عن الضباط في الجيش والبوليس والخطة بتوضع في القيادة وتعرض على المرشد ليقرها او لا يقرها فان اقرها تنزل للاخوان لينفذوها .

المدعى - مين المهيم على النظام ... مين الرئيس بتاعه ؟

الشاهد - مكتب النظام انا اعرف منه ابراهيم الطيب باعتباره رئيس مناطق القاهرة ويوسف طلعت وصلاح شادي فيما اعتقد ودول يقرروا والمفروض انهم يعرضوا الامر على المرشد فيوافق او لا يوافق .

**المدعى - اذن النظام تبع المرشد ؟**

**الشاهد - لازم يتبع المرشد .**

**الرئيس -** فى أيام المرحوم الاستاذ البنا قلت انه كان يرأس النظام بنفسه وان كان فيه رئيس آخر هو عبد الرحمن السندى .

**الشاهد -** أيوه كان بيتلقى اوامره من البنا مباشرة .

**الرئيس -** يعنى النظام كان بيتبع الاستاذ البنا مباشرة ؟

**الشاهد -** أيوه

**الرئيس -** وبعد المرحوم حسن البنا ؟

**الشاهد -** نفس الحال

**الرئيس -** يعنى استبدلت رئاسته برئاسة ؟

**الشاهد -** أيوه

**الرئيس -** وبعد قل الاستاذ البنا هل تبعية هذا النظام لمكتب

الارشاد أو الجمعية التأسيسية أو المرشد ؟

**الشاهد -** للمرشد

**الرئيس -** بنفس الطابع القديم ؟

**الشاهد -** أيوه

**الرئيس -** افكر ده اللى المدعى عايز يعرفه ؟ .

**المدعى -** أيوه وعائزين نعرف كمان التسليح .

**الشاهد -** قبل ماييجى عبد المنعم عبد الرؤوف كان النظام

مقسم الى خمسات .

**الرئيس -** نسهل الموضوع شوية .

**الشاهد -** طيب .

**الرئيس -** فيه مرشد .

**الشاهد -** أيوه .

**الرئيس -** يتبعه نظام خاص له رئاسة منها ابراهيم الطيب

ويوسف طلعت وصلاح شادى .

**الشاهد -** صلاح شادى فيما أعتقد ... ولكن دكهم

عن علم .

**الرئيس -** ينزل من هذه الرئاسة نظامين مدنى مسئول عنه ابراهيم الطيب ويوسف طلعت وعسكرى خاص بضباط الجيش والبوليس ومسئول عنه صلاح شادى .

**الشاهد -** قسم الضباط لا أعلم عنه شيئاً لانه كان أيام البنا تابع له مباشرة ولكن القسم المدنى مقسم الى فصائل وجماعات والفصيلة مكونة من ٣٠ شخص لها قائد ورديف له وبعدين يفضل ٢٨ ودول يقسموا أنفسهم الى ٤ جماعات كل جماعة منها ٧ أشخاص .

**الرئيس -** ايه الى تعرفه عن النظام السرى الموجود الان وايه هي مناطق تقدر تعددها ؟

**الشاهد -** كل منطقة فيها فصيلة أو أكثر حسب قدرتها .

**الرئيس -** القاهرة فيها كام منطقة ؟

**الشاهد -** ٧ مناطق والجيزة ٣ مناطق . منطقة امبابة .

**الرئيس -** ويرأسها ؟

**الشاهد -** أنا ومنطقة بين السرايات ويرأسها على الفيوسى والجيزة ويرأسها أخ اسمه يوسف مش فاكى بالضبط اسمه يوسف ايه ومنطقة الفسطاط ويرأسها فيما أعتقد الاستاذ عبد العزيز احمد والعباسية ويرأسها أخ اسمه الخضرى ومنطقة شبرا أخ اسمه محمد شديد ومنطقة وسط القاهرة ويرأسها أخ اسمه سيد ابو سالم .

**الرئيس -** مش فاكى المناطق الثانية ؟

**الشاهد -** هم بقو قد ايه . . . هم تسع مناطق كل منطقة بها فصيلة وقد يكون رئيس المنطقة لا يرأس الفصيلة لكبر سنه فيجوز أن يكون واحد تانى هو رئيس الفصيلة والمسئول عنها .

**الرئيس -** تعرف حد . . . تقدر تضرب مثل ؟

**الشاهد -** فى منطقة امبابة مثلا رئيس المنطقة الدكتور حسن الباشا وده مدرس فى كلية الآداب وكان لا يعلم عن النظام السرى

شيء ؟ وأنا وكيل المنطقة كنت المسئول عنه ورئيسه .  
**رئيس النيابة -** فيه منطقة جنوب القاهرة أو شرق القاهرة ؟  
**الشاهد -** أنا قلت اللي جنوب القاهرة وشرق القاهرة اللي هي  
العباسية .

**الرئيس -** الجزء اللي شرحته خاص بالقاهرة المسئول عنه  
ابراهيم الطيب ؟  
**الشاهد -** أيوه .

**الرئيس -** فيه تنظيم آخر عن المناطق الثانية ؟

**الشاهد -** جاز لكن ما اعرفوش .

**الرئيس -** ماهي مسئولية يوسف طلعت ؟

**الشاهد -** مسئول عن القسم الخاص في غير الضباط و ابراهيم  
الطيب عن القاهرة .

**الرئيس -** يوسف طلعت عن القاهرة وغير القاهرة والا  
ما تعرفش عنه حاجة ؟

**الشاهد -** أيوه جاز ولكن الحقيقة النظام معظمه في  
القاهرة ؟

**الرئيس -** طيب المكتب بتاع رئاسة النظام لما يعمل خطة  
واقت أحد الاعضاء ورئيس منطقة ورئيس فصيلة ما تعرفش . .  
**الشاهد -** ما كنش في أمبابه فصيلة حتى الآن ماكانش فيه  
غير أنا ومحمود عبد اللطيف في الجهاز السرى .

**الرئيس -** كنت ترأس الجهاز أو النظام الموجود ؟

**الشاهد -** أيوه .

**الرئيس -** وانت كنت رئيس أحد الاجهزة السرية ؟

**الشاهد -** أيوه في أمبابه ومكنش في أمبابه الا أنا ومحمود

عبد اللطيف في الجهاز السرى أما بقية الاخوان فكنا لسه رايعين  
نعمل منهم جهاز ، انما ما كناش عاملين والاخوان اللي كانوا  
موجودين كنا حنختارهم .

**الرئيس —** مين اللي كان بيختارهم في امبابة ؟

**الشاهد —** أنا باعتباري رئيس منطقة .

**الرئيس —** على أساس ايه ؟

**الشاهد —** فهم الدعوة والنضحية من أجل مبادئها ونضع العضو فترة تحت الاختبار ونديله دراسات اسلامية كحفظ القرآن والاحاديث النبوية الشريفة الى أن يمر ستة شهور فاذا اثبت بعد ذلك انه قادر والشخص عنده استعداد نديله تدريبات عسكرية وبعد هذا كله اذا ثبت صلاحيته نفهمه انه في النظام وبعدين ندرجه تدريبات عملية .

وهذه المراحل كلها لم تطبق في امبابة ، وكل ما طبق فيها .  
أنا شكلناها .

**الرئيس —** باعتبارك شخص ذو نفوذ ومسئول في هذا النظام لابد ان تعرف قوانين هذا النظام او الطرق المتبعة . فمثلا اذا الرياسة اقترحت وضع خطة تعرضها على مين ؟

**الشاهد —** المكتب يتفق على خطة ثم يعرضها على المرشد ثم تنزل من ابراهيم الطيب الى لانفذه .

**الرئيس —** واذا لم يوافق المرشد ؟

**الشاهد —** امتنع

**الرئيس —** هل يبلغ لك القرار في هذه الحالة ؟

**الشاهد —** لا يقول لي احنا حنعمل كذا ولا يقول المرشد موافق او غير موافق وفي حادثة محمود عبد اللطيف لما الحواتكى قال لي هذا الكلام اضطررت ان استفسر من ابراهيم الطيب .

**الرئيس —** عندك اعتقاد ؟

**الشاهد —** في كل حاجة لازم تيجي من المرشد العام .

**الرئيس —** ده النظام الموجود ؟

**الشاهد —** ابراهيم الطيب هو صلتى بهذا النظام .

**المدعى —** تعرف على نويتو وما وظيفته ؟

**الشاهد —** ايوه وعلى نويتو امين صندوق المنطقة .



**المدعى -** مش فى النظام ؟  
**الشاهد -** لا

**المدعى -** مش رديف لك ؟

**الشاهد -** مفيش واحد فى النظام الا انا ومحمود عبد اللطيف ودليلي على هذا اننا لما جينا نخطر واحد تانى عشان يقوم بنفس عمل محمود عبد اللطيف جابوا لنا واحد من بره وهو محمد على نصيرى . وهذا دليل على انه ليس عندى أحد غير عبد اللطيف وجايز يكون عندى اخوان كويسين انما لاعطى هذه التعليمات الا لشخص من الجهاز حتى يكون موافق على كل عمل اصدره اليه . ولم يكن فيه احد فى النظام الا انا ومحمود عبد اللطيف والاخوان فى امبابة احنا شكلناهم وعملناهم جماعات وفات عليها ٢٠ يوم لا تزيد او شهر واسسه لا أخذوا التدريبات ولا أخذوا اى شىء واسسه مجرد تشكيل اى نعلمهم كالاخرة .

**الرئيس -** فيه سلاح فى امبابة ؟

**الشاهد -** ايوه وانا سلمته للحكومة وكان بخصوص العمليات التى قلتها فى التحقيق .

**المدعى -** من فين - وايه عدد السلاح ده ؟

**الشاهد -** الاستاذ ابراهيم لما وضعت الخطة للاعتداء على الرئيس جمال عبد الناصر جاب لى اربع عمليات عملية محمود عبد اللطيف بالطبنجة وعملية محمد على نصيرى بالطبنجة وجاب لى حزام فيه لغم وهذا الحزام يلبسه الشخص الذى يروح للعملية والمفروض انه يروح يتأبط الرئيس ويوصل توصيلة معينة عشان يموتوا هم الاثنين وابراهيم الطيب جاب مدفعين كما قلت فى التحقيق ودول معدين على أساس ان ابراهيم يختار الناس لعمل كمين فى طريق الرئيس جمال عبد الناصر انما لم يكن عندنا اسلحة للفصيلة لانه لم يكن عندنا فصيلة .

**الرئيس -** فى اقوالك قلت ان النظام السرى كان له هدف

مخصوص ايام المرحوم حسن البنا ايه الهدف ده ؟  
الشاهد - كما قلت في اول الادلاء باقوالى ان هذا النظام اصلا  
وضع لمحاربة الانجليز وللجهاد في سبيل الله ومحاربة الملك السابق  
فاروق لانه كان مقدر طغيانه في البلد .

الرئيس - وماهو الهدف الذى تبلور اليه هذا النظام الخاص  
بعد الثورة ؟

الشاهد - والله ياسيدى قبل الثورة وقع النظام في اخطاء  
يعنى حصلت منه عدة اغتيالات مثل اغتيال المرحوم الخازندار  
وكان هذا ايام المرحوم حسن البنا ففهم ان هذا من تقاليد النظام  
اى لمحاربة اى شخص يعتدى على الدعوة فالنظام يحارب هذا  
الاتجاه .

الرئيس - الغرض من هذا النظام كان عشان محاربة الانجليز  
والملك الفاسد ومحاربة او تعضيد وجهة نظر الدعوة لكن بعد  
الثورة كان بيحارب ايه ؟

الشاهد - الى ما قبل المعاهدة كان الانجليز لسه موجودين .

الرئيس - ده واحد من الاهداف ... وبعدين ؟

الشاهد - الملك السابق فاروق مشى وفضل حماية الدعوة  
اى المحافظة عليها من اى شخص يعتدى عليها باعتبار انه موجود  
تحت تصرف الدعوة .

الرئيس - باعتبارك الشخصى هلا فكرت ان الثورة قامت  
وفتحت معسكرات للتجنيد العام واعادت تنظيم القوات المسلحة  
مافكرتش ان هذه المعسكرات كالحرس الوطنى ومعسكرات  
الشباب غرضها ايه ؟

الشاهد - غرضها تجنيد كل شخص له رغبة في خدمة البلاد  
لمحاربة الانجليز طبعاً .

الرئيس - هل اعتقدت في داخلية نفسك ان الاخوان يقدر  
يعملوا تنظيم اقوى من هذه التنظيمات .

الشاهد - ايجب وجه مقارنة وأنا لم يأت في ذهنى مقارنات

الرئيس - الهدف واحد ؟

الشاهد - مجاش في ذهنى وجه المقارنة ، وكان الاخوان يثيرون  
مسألة لازمة هذا النظام الخاص خاصة وانه كان يحارب من عدة  
جهات من الاخوان .

الرئيس - ليه ؟

الشاهد - كئن يحارب من مكتب الارشاد لانه كان يعتقد انه  
فيه افتيات على سلطته وكان يحارب من ناس في الاخوان وجدوا  
أن النظام انحرف عن أسسه من أيام حسن البنا واتجه الى  
اغتيالات معينة فكان يحارب لانهم يعتقدوا أن هذا وضع غير  
اسلامى .

الرئيس - ذكرت في أقوالك أن الاخوان ابتدأوا يتسحنوا نفوس  
الاخوان ضد الاتفاقية .

الشاهد - أيوه .

الرئيس - ازاي شحنتوهم ؟

الشاهد - ينزل لهم بيان من مكتب الارشاد وبيان المرشد اللى  
عمله في سوريا والبيان الاول عدت فيه أخطاء المعاهدة على أساس  
أن هذه المعاهدة ضارة بالبلد وكان هذا مقدمة لاقامة حكومة  
جديده .

الرئيس - مين المسئول عن المنشورات ؟

الشاهد - كانت المنشورات تجينا من ابراهيم الطيب والنظام

الرئيس - مين المسئول عن المنشورات ؟

الرئيس - كانت تجيلك باعتبارك أحد أفراد النظام الخاص .

الشاهد - كانت تجينا من ابراهيم الطيب يعنى من قيادة  
النظام مباشرة .

الرئيس - الاوامر التى تصدر من النظام الخاص تناقش  
او لاتناقش

الشاهد - أقول يافندم . أيام الاستاذ حسن البنا كانت ثقة  
الاخوان فيه من الوجهة العلمية والتربوية ثقة لاحد لها ، فكانت

الاوامر لاتناقش على الاطلاق فلما وقعت الاخطاء في أيام الاستاذ حسن البنا من النظام السرى أصبحت الامور لا تيجى تناقش وهذه حقيقة أقررها ، ولذلك أنا شخصا قلت لمحمود انت حانتدب لعمل يمكن تتهم فيه انك خائن وفكر في هذا أدامك ثلاثة أيام واسألوه وانه سيجيب على هذا .  
انما الاصل ان هذه الاوامر لاتناقش ولكن أنا شخصا كنت أناقشها .

الرئيس — وليه ماناقتش ابراهيم الطيب لما سمعت من الحواتكى ؟  
الشاهد — ناقشت وأكد لى ان هذا صادر من المرشد ، وما دام أكد لى ...

الرئيس — أكد لك كلاما يعنى قال لك بكلامه لا ببيان .  
الشاهد — أيوه بكلامه شخصا .

الرئيس — يعنى دكتاتورية ؟  
الشاهد — طبعا .

الرئيس — نظام دكتاتورى .

الشاهد — فيه معنى من معانى الدكتاتورية .

الرئيس — وهل هذا يمشى مع الدعوة الاسلامية ؟  
الشاهد — لا

المدعى — فيه نقطة الاسلحة ، انت قلت ان قبل الحادث جاءت لكم اسلحة في امبابة فأين وضعت هذه الاسلحة .  
الشاهد — الاسلحة التى سلمتها للحكومة هى اللى جاءت والاخ عبدالحميد البنا هو من الاخوان ساكن في بلدة وراق العرب فجيت وقلت له أجر شقه لانه كان ساكن في أودة واحنا ناخذ أوده مالکش دعوة بيها وفعلا أجرنا شقة أودتين واحنا اخذنا أوضه حطينا فيها الحاجة دى وعبد الحميد البنا لايعرف من أمرها شيئا وحقيقة أن ركن العلم مش متوفر عنده لانه لايعلم حقيقة هذه الحال وكنا نأخذ منها .

**المدعى -** يعنى عبد الحميد البنا ماكانش فى النظام .  
**الشاهد -** أناقلت لما جينا نكون الفصيلة وضعته فيها باعتبارها  
الاساس فى النظام لكن لم تتكون الفصيلة بعد . والفصيلة كانت  
فى البداية منى ومن محمود عبد اللطيف وعلى نويتو  
**المدعى -** قلت ان مكتب الهيئة التأسيسية كان فيه ثلاث  
شيع - فرقة برياسة بهى الخولى وفرقة اخرى برياسة الدكتور  
خميس وفرقة ثالثة فما هى هذه الفرقة الثالثة ومن رئيسها وما  
هى ميولها ؟

**الشاهد -** الفريق الثالث كان يرى ان الثورة تتجه اتجاها غير  
اسلامى وان هذا الوضع ضار بالدعوة الاسلامية ويمكن يكون  
رئيسه الاستاذ المرشد ولكنى لا أعرف أحدا من أفراد هذا  
الفريق أو رئيسه أو المسئول عنه وأنا لا يمكننى أن أحدد شخصا  
بالذات لانى لست عضوا فى الهيئة التأسيسية .

**المدعى -** ما معنى عبارة (( المسائل تحقق اسلاميا )) ؟  
**الشاهد -** المقصود هو هل هذه الاعمال أو عملا بالذات  
جائز أو غير جائز من وجهة الشرع .

**المدعى -** يعنى قسم للافتاء وما طريقته أو كيف تحقق  
التصرفات من الوجهة الاسلامية فى النظام ؟

**الشاهد -** مكتب النظام الذى هم المسئولين عن قيادة النظام  
لما يقترح امرا يعرضه على الاستاذ المرشد والمفروض ان هذه  
القيادة لما تقترح شيئا يكون متفق مع الاسلام وهم فيما بينهم  
يحققون هذا الاسلام أى هل تجوز أو لا تجوز شرعا ثم يعرض  
المكتب بعد التحقق هذه الاقتراحات على الاستاذ المرشد .

**المدعى -** عاوزه توضيح .

**الشاهد -** يرجعوا الامر الى الاصل العام فى الاسلام .

**المدعى -** هل فيه قتل اسلامى وقتل غير اسلامى ؟

**الشاهد -** الاسلام حدد خمس حالات على سبيل الحصر  
للقتل ولا يجوز قتل المسلم الا فى حدودها . وليس منها طبعاً

فكرة الاغتيال السياسى باعتبار ان القتل السياسى قتل عمد وفاعله يدخل النار ومع هذا أصبح القتل من تقاليد النظام السرى من أيام الاستاذ حسن البنا فقتل النقراشى والخازندار أى انها أصبحت مسألة مفترضة .

**الرئيس -** يفهم من كلامك ان الفرق الثلاث التى انقسمت اليها الاخوان هى الفريق الاول برياسة بهى الخولى والثانى برياسة الدكتور خميس والفريق الثالث برياسة المرشد ، والفريق الاول مع الثورة والفريق الثانى موقفه مائع والفريق الثالث كان ضد الثورة لانه معتقد ان الثورة متجهة اتجاها ضد الاسلام ومن سياق الحوادث فهم أنك كنت تتلقى الاوامر يعنى كنت عضوا فى النظام الخاص أى أنك تبقى من الفريق الثالث .  
**الشاهد -** هذا منطقى .

**الرئيس -** هل كنت فى الفريق الثالث ؟  
**الشاهد -** أنا كان لى وضعين رئيس منطقة تابع لمكتب الارشاد وكأحد أفراد النظام السرى اتبع النظام السرى .  
**الرئيس -** لكن فيه واحده تجيب الاخرى بمعنى أنى لما أضرب واحد واقتله فالقتل يجيب الضرب واحاكم لانى قتلته وانت قلت ان المرشد كان رئيس الجهاز السرى وهو مسئول عنه .  
**الشاهد -** لما يجينى أمر من النظام السرى أنفذه لكن هل هذا النظام السرى تابع لبهى الخولى أو تابع للدكتور خميس أو تابع للمرشد فهذا مالا أعرفه .

**الرئيس -** لكن انت قلت ان النظام السرى تابع للمرشد وانت تعلم ان المرشد كان متريس هذا الفريق لانه يعتقد أن الثورة متجهة بالبلد ضد الاسلام . والمفروض أن المرشد هو الرئيس فى هذا الجهاز فى خصوص الهيئة وفى الوقت نفسه المرشد مسئول عن الجهاز وعن النظام السرى وانت أحد أفراد هذا النظام السرى واذا لم تكن متفقا معه فى الفكرة العامة كنت تسبب الجهاز السرى ولا تنسب اليه .

**الشاهد -** الواقع أننا كنا بنتردد على هذه الجهات الثلاث .  
**الرئيس -** لكن انت نفذت قرارات خاصة بالجهاز السرى .  
**الشاهد -** أيوه .

**الرئيس -** أرجوك تمشى معايا ببساطة .  
**الشاهد -** حاضر .

**الرئيس -** انت كنت أحد أعضاء الجهاز السرى وهو يتبع المرشد باعترافك واقرارك كويس ، المرشد كان منتحى رأى وله هذا الرأى وهو أن الثورة متجهة ضد الاسلام فهل انت متفق معه على هذا ؟

**الشاهد -** أقول لحضرتك بمنتهى الصراحة أنا كنت ماشى فيه كعضو فى النظام .

**الرئيس -** بدون تفكير .

**الشاهد -** الحقته دى لم تتوضح وهى أنى ضد الثورة .

**الرئيس -** أنا لم أسألك هل انت ضد الثورة او معاها ، انما انت كنت على الاقل فى داخلية نفسك من غير ما تبلورها تعتقد أن الثورة ماشية ضد النظام .

**الشاهد -** أيوه مادمت كنت عضو فى هذا النظام أبقي كده .  
**الرئيس -** باعتبارك محامى ومتعلم وحاصل على أكبر درجة تعليم فى بلادنا بل فى العالم اجمع تقدر تفسر لى ازاى الثورة متجهة بالبلاد ضد الاسلام ؟

**الشاهد -** الثورة حققت أعمالا كثيرة وحققت أعمالا طيبة .  
**الرئيس -** ملىش دعوة بالأعمال ، نحن نتكلم عن النقط التى أثارت فى نفسك فكرة أن الثورة متجهة ضد الاسلام .  
**الشاهد -** دلوقتى مفيش .

**الرئيس -** وقبل الآن ؟

**الشاهد -** الاخوان كانوا يشحنوا بمنشورات أن الثورة على اتصال بالانجليز وهذه المعانى كانت مسيطرة على ذهن الاخوان لدرجة أنهم لا يفكرون فيها .

**الرئيس -** يعنى النقطة التى كانوا يشحنوا فيها أذهان الاخوان من أيام الاتفاقية .  
**الشاهد -** أيوه .

**الرئيس -** وما هو الموقف قبل الاتفاقية ؟

**الشاهد -** كان الاخوان عامة زى ما تعرفوا مؤيدين الثورة اى مشوا فى طريق الثورة الى أن جاءت حوادث مارس فاختلف الاخوان مع الثورة على هذه المعانى وقبل مارس كان الاخوان مع الثورة (( صافى يالبن )) و ٢٤ قيراط انما بعد مارس بدأت هذه الخلافات تثور وكان يقال لنا دائما ان الثورة بتجيب ناس من الاخوان وتديلهم مناصب معينة وهؤلاء لايصح أن يصرفونا عن أنه عمل خطير ضد الدعوة بقصد فركشة الاخوان .

**الرئيس -** لكن قبل مارس كان مامعنى قيام الجهاز السرى ؟  
**الشاهد -** الاخوان كانوا قبل مارس قلبا وقالبا مع الثورة أما استمرار بقاء الجهاز السرى فهذه مسألة استقرت مع الاخوان منذ أيام الاستاذ حسن البنا ومشيت كما هى .

**الرئيس -** هل الاسلام يرتضى وجود قوتين فى البلد ؟  
**الشاهد -** الاسلام يأمرنا بالسير وراء الحاكم فى أى اتجاه كما يأمرنا بأن نصلى وراء الامام حتى ولو علمنا أنه فاجر .

**الرئيس -** أى أنك ارتضيت قبل مارس أن تكون فى الجهاز السرى فهل يسمح الاسلام بوجود قوة عامة مكونة من أفراد هذا الشعب وقوة مختفية كهذه وهل عللت حكم الاسلام فى داخلية نفسك حتى أنك قبلت هذا الوضع أن الاسلام لايجيز هذا ، والا فاية دعوة هذه واية رسل دعوة هؤلاء أرجوك أن تحللها لى ؟

**الشاهد -** المسألة بقيت منذ الاستاذ حسن البنا واستمرت بعد ذلك كما سبق أن قلت ثم حصل الخلاف فيها بين الاخوان وبدعوا يفكرون فيما اذا كان هذا النظام يتفق مع الاسلام أو لايتفق ولو أن المسألة سارت بعد ما مات الاستاذ البنا وظل النظام كما



هو اما انها قوة غير قوة الحكومة فهذا شيء آخر وانما الذي حصل  
ان الامر استقر دون تفكير كمسألة تقليدية للاخوان .

الرئيس - مش تقليدية ؛ لانها لو كانت تقليدية لبقيت حاجة  
مستمرة وانما هناك نقط خاصة ثارت وتثور في أذهان الناس  
وهم أنهم يفكرون في هذا النظام السرى ولما فكر الاستاذ المرشد  
الهضيبى فكر في تغيير رئاسة هذا الجهاز وقال تصريحاً كبيراً  
أيامها تذكره أولاً ؟

الشاهد - لا أذكره . قال ايه ؟

الرئيس - قال ان الدعوة مافيهاش سرية .

الشاهد - أيوه قال هذا والمفروض أن الاستاذ المرشد لما  
يقول هذا لا يصح أن يقول أن هناك أشياء سرية لان هذا يكون  
اعترافاً بوضع غير مشروع في البلد .

الرئيس - يعنى كان نفاق وهل الاسلام وافق على نفاقه ؟

الشاهد - هذه مسائل يسأل فيها هو وانما أنا أذكر أن  
هذه المسألة استقرت من أيام الاستاذ حسن البنا وظلت قائمة  
الى ما قبل المعاهدة وكان فيه سبب مشروع لقيامها وهو أن  
الانجليز كانوا موجودين في البلد أما بعد المعاهدة وهذه أيام قليلة  
فأنا لا أجد مبرراً لبقاء الجهاز السرى .

الرئيس - الادعاء يجب يسأل الشاهد .

المدعى - الشاهد ما عندوش معلومات أن الحكومة طلبت حل  
هذا النظام قبل ٢٥ مارس ما عندكش فكرة .

الشاهد - لا

الرئيس - انت بتقول ان النظام السرى بعد الثورة كان من  
أهدافه أن يحارب الانجليز وبعدين جه الاستاذ المرشد الهضيبى  
أيام لما حصل فيه كلام عشان محاربة الانجليز فى القنال بعد  
الثورة وقال انه مدخر قوة الاخوان ليحارب بها كيفما يشاء ان  
شاء الله فى الجزائر اذا رأى الاسلام هذا ولم يقبل أن يصرح بأنه

سيحارب الانجليز مما يفهم من التصريح انه مش عاوز يشترك  
في حرب الانجليز في القنال فهل هذا لم يوجد في نفسك شك  
لتبين حقيقة الاتجاه الذي يستعمل من أجله هذا الجهاز ؟  
الشاهد - قطعا مسأله متناقضة .

الرئيس - الحكومة الموجودة تقول انى اجهز لمحاربة الانجليز  
وتعلن هذا فما الذى يجعل المرشد يحجم عن التصريح بهذا ؟  
الشاهد - كان الاخوان يقولون فيما بينهم لازم نروح نجاهد  
في القنال انما المسأله ان الاستاذ المرشد وهو الشخص المسئول  
قد يصرح تصريحات لا يقصد من ورائها نفس التصريحات كما  
قال انه ليس لديه نظام سرى .

الرئيس - انت تعرضت في كلامك الى أن الجهاز السرى ذهب  
وحارب في فلسطين وفي القنال وكان من بينهم بعض الشهداء  
وهذا سبب من الاسباب اللى جعلك تعتز أو يعتز الاسلام ببعض  
الناس انهم يدافعون عن دعوتهم والجهتين التى اشتركتهم فيها  
فلسطين والقنال والدولة فى واحد منهما اشتركت رسميا وهى  
حرب فلسطين فهل قارنتم شهداءكم بشهداء الدولة ؟  
الشاهد - لا ، لم نقارن كان عندنا شهداء وكان الجيش فيه  
شهداء كثير .

الرئيس - الجيش والمتطوعين .

الشاهد - كانت كتيبة الجامعة العربية معظمها من الاخوان  
يا سيدى الرئيس .

الرئيس - وده ما خلش ليه تخش فى نظام الدولة بدل من  
أن تكون نظاما داخل نظام الدولة .

الشاهد - أيوه - كان الاستاذ حسن الهضيبى متصرف فى  
الشئون كلها وكنا نسمع ونطيع

الرئيس - كيف تسمح لنفسك وأنت رجل متعلم أن تسير  
وراء شخص ومفروض أن تعرف ان فيه مشتركين فى هذا الجهاز  
أقل منك علما مثل محمود عبد اللطيف ازاى ترتضى لنفسك هذا

**الوضع وتفضلوا ماشيين وراء حاجة مفضين باسم الدين كيف ترتضيه لنفسك كمتعلم ؟**

**الشاهد -** لو بقيت الحال خمسة أو ستة شهور لحل هذا النظام بطبيعته لسبيين السبب الاول ان الاخوان بدأوا يناقشوا هذه المسائل والسبب الثانى هو أن بعد محنة ١٩٤٨ بعض الاخوان من النظام خرج .

**الرئيس -** زى مين ؟

**الشاهد -** فيه عدد من الاخوان خرج ، فيه ناس خرجوا فعلا وقالوا أن هذا اتجاه غير اسلامى وأنا من ضمن هذا الفريق وكنت أرى أن الأساس الفكرى للنظام من حيث محاربة الانجليز ومحاربة الملك السابق كما سبق أن قلت لحضراتكم بصرف النظر عن قيام الثورة أساس فكرى صحيح ، وإنما الأخطاء التى وقع فيها النظام ما يصحش أن يبقى هذا النظام بعد ذلك ولما قامت الثورة استمر هذا النظام باعتبار أنه تراث من أيام الاستاذ حسن البنا ، وأى واحد من الاخوان كان يريد أن يمس هذا النظام كانوا يصرخوا فى وجهه على أساس أن الاستاذ حسن البنا هو الذى عمله ولا يجوز مناقشته هذا هو الأساس الذى استمرت عليه الفكرة وكنا نحاول اصلاح الأخطاء التى وقع فيها النظام . ومفيش شك أن بقاء مثل هذا الحال خطأ وأنا سلمت به ولذلك قررت أن أضع كل مالى من بيانات تحت تصرف الحكومة .

**الرئيس -** عندما صدر أمر حل الاخوان فى يناير سنة ١٩٥٤

اصدرت الحكومة بيانا بحل الاخوان ، فايه اللى فهموه لكم ؟  
**الشاهد -** قرأنا هذا البيان وعرفنا أن من ضمن الاسباب التى من أجلها حلت الاخوان حاجة اسمها النظام السرى ، وهذا كان واضحا فى البيان والاخوان فى هذه الفترة كان شعورهم أنهم معتدى عليهم لانهم لم يعملوا شيئا وعلى هذا الأساس قامت فى أذهانهم أن الثورة مش عاوزه بعد أن حلت الاحزاب حاجة من بقايا العهد الماضى يكون موجود هذا هو الذى استقر فى أذهانهم ولما الثورة أفرجت عن الاخوان مشيت الامور كما كانت .

**الرئيس -** انت قلت في الاول كان فيه نظام سرى وهذا النظام كان قائما وقلت ان هذا النظام السرى من اسمه « السرى » انه غير شرعى .

**الشاهد -** هذا من وجهة نظر الدولة طبعاً .

**الرئيس -** هل تريد كمواطن ان تعيش في دولة لاتحترم فيها قوانينها ؟

**الشاهد -** قطعاً لا - وأنا ابدت اسفى في اول اقوالى لهذا السبب وعشان كده سلمت نفسى لادلى بكل ما لدى من معلومات .  
**الرئيس -** أنا أتكلم الان عن يناير ، فهل الدولة المحترمة تكون كذلك اذا لم تكون قوانينها محترمة وأن تعين المواطنين ليعيشوا في كنفها ؟

**الشاهد -** أنا لا أَرْضى هذا طبعاً .

**الرئيس -** وهل لما يكون مثل هذا النظام سبباً في حل الاخوان فهل لا يكون سبباً كافياً ؟

**الشاهد -** أعتقد هذا وانه سبب كاف .

**الرئيس -** ألم تفكر في هذا ؟

**الشاهد -** ولكن حل الاخوان لا يحل النظام السرى لسبب واحد وهو أنهم يتحولون جميعاً الى نظام سرى ولذلك فان اجراء حل الاخوان كفكرة لا يحل النظام السرى . وعلى هذا الاساس يحل النظام السرى وانما لا يجوز حل الاخوان نفسها على اعتبار أنها أعمال غير اسلامية لايجوز أن يأتيها مسلم .

**الرئيس -** مفيش مسلمين غير الاخوان المسلمين ومحدثي يدخل الجنة غير الاخوان ؟

**الشاهد -** لا - فيه ناس اكرم من الخارج .

**الرئيس -** وهل يحل الاخوان تحل الدعوة الاسلامية ؟

**الشاهد -** أبداً .

**الرئيس -** اشمعنى قصرتم على انفسكم هذه الدعوة الا يوجد مسلمون في مشارق الارض ومغاربها ؟

**الشاهد -** فيه طبعا فهناك جماعة شباب محمد وغيرها .  
**الرئيس -** كل مسلم يدعو ويطبق الاسلام في داخلية نفسه  
وفي عائلته دون أن يعمل نظاما سريا .

**الشاهد -** حل الاخوان كفكرة ومصادرة أملاكهم بطبيعة الامر  
ينتهى بأن الاخوان يظلوا على ترتيباتهم وهو النظام السرى .  
**الرئيس -** معنى هذا أن فكرة الاسلام خرجت من جماعة  
تدعو الى الاسلام الى فكرة جماعة صاحبة نظام خاص يكون في  
العلانية تحت دعوة الاسلام واذا حلت ينزل تحت الارض ويستغل  
من تحت الارض .

**الشاهد -** أيوه

**الرئيس -** أظن الفكرة بعيدة عن دعوة الاسلام .

**الشاهد -** الفكرة أصبحت جماعة معينة .

**الرئيس -** الاسم للاسلام وحقيقتها لا يعلمها الا الله

**الشاهد -** نعم يعلمها الله .

**الرئيس -** في كلامك قلت ان الاخوان لا يفكرون في انهم يقيموا  
حكومة .

**الشاهد -** الان على الاقل .

**الرئيس -** قلت في كلامك ان فيه ناس من الموجودين في رئاسة  
الاخوان لا يفهمون الاسلام ولا يعرفون كيف يطبق الاسلام فكيف  
ترضى أن تكون في جماعة تدعو للاسلام والرئاسة فيها لا تفهم  
الاسلام ولا تطبق الاسلام ومن هم هؤلاء ؟

**الشاهد -** الكلام من ناحية الهيئة التأسيسية فهذه الهيئة  
كانت معينة من أيام الاستاذ حسن البنا .

**الرئيس -** كانت عبارة عن « وش البترينة »

**الشاهد -** كيف أرتضى لنفسى هذا ؟ أنا كنت أعتبر هذا خطأ  
وكنا نحاول اصلاحها لان الهيئة التأسيسية في يدها التشريع  
والتنفيذ ولها القيادة وكان لها صفة الابدية والاخوان تحت كانوا  
« يرفسوا » ويتخائفوا ولكن مش قادرين يعملوا حاجة لانهم باقين

من تراث الاستاذ حسن البنا — كل هذا وقع — والاخوان كشعب قاموا بمجهود ضخم الى ان اقتنعت الهيئة بحل نفسها وفعلا في الاجتماعات الاخيرة عدل القانون على اساس اختيار أعضاء الهيئة التأسيسية بالانتخاب وهذا ولاشك اصلاح وضمع معين وهو البقاء في الهيئة التأسيسية باعتبار أنها هيئة تدعو للاسلام . أما ان اشخاص الهيئة التأسيسية لم يكونوا من الاخوان ولا دراية لهم بالاسلام فقد أدى ذلك الى عدم احترام هذه الهيئة . وكما قلت ان الهيئة التأسيسية أخذت شيئا من القداسة والاخوان أعدوا يحطموا في أنفسهم لدرجة أنها فقدت سيطرتها وثقتها في نفوس الاخوان الى أن اضطرت الى حل نفسها بعد أن وجدت نفسها في عزلة عن الاخوان فعديل القانون . وهذا لا ينفي أن فيها اشخاصا مسلمين من طراز المسلمين . مع وجود الاشخاص الذين لا صلة لهم أصلا بالاخوان .

**الرئيس — احنا ما قلناش الكل . احنا قلنا البعض .**

**الشاهد —** مثلا فيه واحد اسمه الاستاذ أحمد مطر وهو مفتش في وزارة المعارف ولا صلة له بالاخوان وانما هو رجل مسلم والاستاذ عبد الحكيم عابدين وهو شخص تركه من أيام الاستاذ حسن البنا وهذه التركة عليها ديون ونحن كشعب شللناها . وكان لا يرضى عنه الاخوان لاسباب كثيرة انما كنا نعمل ايه . الهيئة التأسيسية تنتخب مكتب الارشاد وقد وضعوا عددا كبيرا من الناس في الهيئة التأسيسية فكل ما ييجي انتخاب ينتخبوه ويأخذ أغلبية ويبقى سكرتير عام رغم أنف الاخوان ونحن كنا « نرفس » ولو امتسد الاجل بالجماعة الى ان تجتمع الهيئة التأسيسية لكان حصل الكثير لكن هذه ارادة الله وانا بقيت بعقيدة هي امكان اصلاح الاخوان لاننا كنا في جماعة من مبادئها اصلاح فممكن اني اصلح هذه الهيئة لالفرار منها وانا شخصيا اعتكفت سنة ولا ادخل فيها المركز العام للاخوان المسلمين كما اني احب الافراد الذين لم يحضروا درس الثلاثاء من أيام الاستاذ البنا .

**الرئيس** — فى أقوالك قلت ان الشيخ حسن البنا سبب لكم تركة مثقلة فى جماعة الاخوان وانكم استحملتوها الى ان تصلحوها معتمدين على الوقت فهل التركة الموجودة فى الاخوان أثقل أو التركة الموجودة فى البلد أثقل . كمواطن رأيك ايه ؟

**الشاهد** — التركة الموجودة فى البلد أثقل بكثير جدا لان الاخوان

**جزء من البلد**

**الرئيس** — هل ممكن ان الاخوان يحاربوا الجمعية التأسيسية القديمة وفى الوقت نفسه يتفرغوا للدعوة ؟

**الشاهد** — لاشك ان الخلافات القديمة استنفذت جزء ضخيم من مجهودهم الى ان انتهينا الى هيئة ارتضت أن تحل نفسها .

**الرئيس** — هل نسيتم موقف البلد المثقلة بالديون ؟

**الشاهد** — أنا كمواطن أترك هذا للحكومة .

**الرئيس** — وهل أنت تركت لها فرصة ، ده انت اشتغلت فى الجهاز السرى وعامل رئيس وبتضرب .

**الشاهد** — أنا أعترف انى أخطأت .

**المدعى** — انت قلت ان فيه ناس لا يصلحون للحكم مثل عبد

الحكيم عابدين فايه الاسباب ؟

**الشاهد** — فيه أخطاء شخصية وخلقية وأنا أعفى نفسى من

ذكرها .

**الرئيس** — لاداع للتعرض للأشخاص بسبب أشياء شخصية .

**المدعى** — وايه وكيل النيابة اللى طلع بتهمة رشوة ؟

**الشاهد** — هذا مساس بشخص معين ، وماقدرش أقول اسمه

خاصة اذا كانت النيابة قد حفظت القضية .

**المدعى** — قلت ان ابراهيم الطيب كان بيديك منشورات

فما نوعها ؟

**الشاهد** — بيان الاستاذ المرشد فى سوريا .

**المدعى** — هل هذا البيان كان بموافقة مكتب الارشاد أو

بدون موافقته ؟

الشاهد — بدون موافقته طبعا .  
المدعى — اعمال خطيرة كهذه فهل يوافق عليها مكتب  
الارشاد ؟

الشاهد — لا أعلم  
الرئيس — هو قال لك ان الامور ماشية دكتاتورى  
المدعى — كمل لنا مسألة المنشورات .  
الشاهد — جاء لنا خطاب الى الرئيس موجه من الاستاذ  
المرشد .

المدعى — بس  
الشاهد — كانت بتيجى لنا مجلة « اسمها الاخوان فى  
المعركة » .

المدعى — كانت بتطبع فى الجهاز السرى .  
الشاهد — نعم وهذه المجلة التى عنوانها الاخوان فى المعركة  
عبارة عن نشرة دورية فيها تفسيرات للقرآن وأحاديث وتفسير  
للموقف السياسى من وجهة نظر الاخوان المسلمين .  
الرئيس — ليس ما رحتش انت تقتل الرئيس جمال عبد  
الناصر وانت راجل بتجند الناس وقرأت الاتفاقية على الاقل  
احسن من محمود عبد اللطيف خصوصا وانك بتنفذ الاوامر  
فى الجهاز السرى . ليه ما رحتش تنفذ ؟

الشاهد — أنا غير مدرب تدريب كافى .  
الرئيس — ومحمود عبد اللطيف مدرب لانه كان فى فلسطين  
والقنال ؟

الشاهد — المفروض ان كل واحد يسافر يكون مدرب .  
الرئيس — هل تعلم انه كان مدرب على المسدس ؟  
الشاهد — لا مش مدرب .

الرئيس — انتم تبقوا متساوين فى التدريب .  
الشاهد — انا لم اطلق فى حياتى اكثر من خمس رصاصات



في الحرس الوطنى لانى أعدت خمس أيام فقط ولم يمكنى أن أوفق بين عملى فى المكتب وبين التدريب فى الحرس الوطنى اذا تراكمت المذكرات على .

الرئيس — انما قدرت توفق بين فكرة التدريب فى الحرس الوطنى والتدريب لحاجة خاصة .

الشاهد — لو سألتنى عن عقيدتى فأنا كنت باتدرب للحرس الوطنى للفكرة الوطنية .

الرئيس — والنظام السرى ؟

الشاهد — مسألة تقليدية .

الرئيس — هل لدى المدعى أسئلة يريد توجيهها للشاهد .

المدعى — يقولوا ان البلد غير مستعدة لمحاربة الانجليز ،

فليه ما استنتوش لما تؤولوا الراى العام ، فليه عاوز تعمل حركة بدون تأهيل ؟

الشاهد — يسأل المسئولون .

المدعى — من يتولى الحكم من الناس دول ؟

الشاهد — المفروض انهم يكونوا ناس ينتجهوا بالبلاد نحو

الاسلام ، وانا معنديش معلومات وانما كان بيدور فى أذهان

الناس بعض أسماء معينة مثل الاستاذ محمد العشماوى وأفتكرمش

بالتأكيد عبد الرحمن عزام اللى كان أمين عام الجامعة العربية .

ومعلوماتى عن هذا الوضع انها اسماء ترددانا ليه ما ستتناش

فلا أسأل لانى لا أعرف هذا ؟

المدعى — ألم تناقش فيه ؟

الشاهد — لا

المدعى — الحزام اللى جابه لكم الضباط — مين هؤلاء

الضباط ؟

الشاهد — لم يقل لى اسماء الضباط ، انما انا قلت ان هذا

الحزام غير عملى انما ابراهيم الطيب قال لى لا تتكلم لان اخواننا

العسكريين قالوا لى انه سلاح كويس فضلا عن انى مش من حقى ان اسأل لانى لو سألت عنهم تبقى الحكاية مكشوفة .

**المدعى -** مين صاحب الاقتراح بتاع الخزام ؟

**الشاهد -** ابراهيم الطيب على اساس انه اقتراح الجماعة العسكريين .

**المدعى -** الا تعرف سبب اختفاء المرشد والرياسة بتاع الجهاز السرى ؟

**الشاهد -** ايوه أقول لحضراتكم ، لما اختفى المرشد انا سألت ابراهيم الطيب ليه اختفى المرشد فقال لى ان الاستاذ المرشد اعتقلوه المرة الماضية وفيه فكرة الآن لاغتياله فاخفى **واحنا محافظة عليه خليناه يختفى** ، فأنا قلت له هل معنى هذا انه راح يفلت مفيش طريقة الا اذا طلع بره البلد خالص ، وقلت له هذا كلام غير منطقى كما انى غير مقتنع وانا عاوز تحقيق واطلب تحقيق لانه وضع غير طبيعى ومش كل ساعة يعتقل الاخوان ويحصل دربكة فيها . وبعد هذا اجتمعت بالاستاذ يوسف طلعت على اساس انه يحقق معنى فى هذه المسألة وفى هذه الفترة قلت لابراهيم الطيب لا تنزل امبابه بعد هذا لانك تتصرف تصرفات هوجاء ، فجاء لى يوسف طلعت فسألته فقال لى ان الذى حصل ان المرشد بات بره فجاء البوليس وفتش منزله فى الليلة دى فرؤى انه لا يعود الى بيته فقلت له الا تعلم ان هذا الاختفاء يثير فزعا فى نفوس الاخوان **فقال دى غلطة وخلاص ولا يصح أن تحدث** فقلت له لازم يظهر فقال لى مش دى الوقتى .

**المدعى -** المرشد اختفى انما ليه اختفى اعضاء الجهاز السرى ؟

**الشاهد -** اختفى اعضاء الجهاز السرى لانهم معروفون للبوليس

**المعنى -** ولكن هؤلاء الاعضاء كانوا معروفين للبوليس واذا  
ظهروا فان البوليس سيقبض عليهم وبهذا يتعطل الجهاز  
باعتبار انه تعطيل لقادته .

**الرئيس -** ما الدافع ان الحكومة تعتقل اعضاء الجهاز  
السرى ؟

**الشاهد -** لان الحكومة ميصحش ترتضى ان يكون فى البلد  
مثل هذا الجهاز

**الرئيس -** لكن ليه ما اعتقلتهمش من زمان ، والا هم فى  
داخلية نفوسهم كانوا عارفين انهم قادمين على الخطة دى  
سلفا فاستخبوا .

**الشاهد -** يصح يكون هذا فى ذهنهم ومن الجائز ألا يكون  
هذا قائم فى ذهنهم

**الرئيس -** انت تعرضت فى كلامك الى مسألة رئيس  
الجمهورية وقلت ان ابراهيم الطيب قال لك ان فيه اتصال  
بين محمد نجيب والاخوان ، عاوز هذه النقطة التى قالها لك  
ابراهيم الطيب انك تعيد الحادثة كما حصلت فسرهما ؟

**الشاهد -** ابراهيم الطيب لما جانى وقال لى خطة الاعتداء  
على الرئيس جمال عبد الناصر وبعدين قتل القادة والضباط  
الاحرار فى هذه الفترة رايح الرئيس محمد نجيب يلقى بيان  
فى الراديو يهدىء فيه الخواطر وتشكل حكومة غير الحكومة  
القائمة ، فأنا سألته هل معنى هذا ان فيه اتصال بينه او اتفاق  
على هذا المعنى والا حتبقوا تستفلوه - وهذا نفس الكلام فقال  
لى فيه اتصال بالرئيس محمد نجيب ، فأنا سألته والاتصال  
ده كنهه ايه فقال لى الواحد ما يصحش يسأل واحنا لا نكشف  
أوراقنا . وأنا لم أعتقد ان فى هذا الكلام كذب لانه كان فى ذهنى  
مسألة اتصال محمد نجيب بالاستاذ المرشد ليلة ما حضر من  
سوريا فاعتقدت ان فيه اتصال واما وسيلة هذا الاتصال فلا  
أعرفها والا لقلتها بصراحة للمحكمة .

الرئيس - ما هي واقعة اتصال اللواء محمد نجيب بالاستاذ المرشد اذكرها لنا ثانية ؟

الشاهد - وصل الاستاذ المرشد الساعة ٩ أو ١٠ مساء وأعد مع الاخوان في المركز العام الى الساعة ١١ وبعدين راح البيت وراح معه عدد من الاخوان واعدنا في أودة الصالون .

الرئيس - كان مين موجود

الشاهد - عدد كبير

الرئيس - الا تذكر منهم أحدا

الشاهد - هم كانوا خمسين واحد ، والواقع ان الحادثة نفسها متعلقة بواقعة معينة وليست بأشخاص وانا لا اذكر اشخاص وانما اذكر الواقعة .

الرئيس - اذكر الواقعة

الشاهد - بعض الاخوان انصرفوا ولكن بقي عدد كبير ، وبينما نحن قاعدين ضرب جرس التليفون حوالى الساعة ١٢ر٥ أو واحدة صباحا فقام واحد من الاخوان - والله لا اذكره - وتكلم في التليفون وكنا نسمعه يرد فيقول (( لا يا افندم )) - (( جه من الساعة ٩ )) - (( نام وماقدرش نقومه )) وبعدين قلنا له مين ده فقال : الرئيس محمد ، فقلنا له اش عرفك فقال واحد بيقول أنا محمد نجيب وطبعا تفاصيل المكالة حبينا نعرفها لان لما الرئيس محمد نجيب يتصل بالاستاذ المرشد يثور في نفوسنا معرفة تفاصيل الحادثة فقال ان محمد نجيب قال هوه الاستاذ المرشد موجود فقلت له ايوه يا افندم فقال انه عرف انه وصل الساعة ١٢ فقلت له لا ده وصل الساعة ٩ وراح المركز العام واتصل ببعض الاخوان وجه المنزل نام ، فقال له انا بلغنى انه جه البيت على طول فقلت له لا ده راح المركز العام اولاً . وقال لنا انه الرئيس نجيب لان صوته فيه لكنة معينة وظاهرة في الكلام ومفيش واحد ينتحل شخصية الرئيس محمد نجيب .

الرئيس - ألا تذكر واحدا ممن كانوا معك في هذه الليلة .  
الشاهد - بشرفي لا اذكر - والواقعة هذه تذكرتها اليوم ولو  
تذكرت أحدا لقلت .

الرئيس - واياه التعليق الى دار بين الاخوان الموجودين في  
الصالون ؟

الشاهد - هو لما قال قول له ان الرئيس محمد نجيب سأل  
عليك لم يخطر في ذهننا معنى غير أنه وصل من السفر فبيسأل  
عليه وبعدين أنا ربطت بين الحكاية دي وبين كلام ابراهيم الطيب  
وان فيه اتصال بالرئيس محمد نجيب واعتقدت ان هذا معقول،  
وان فيه صلة منطقية ان واحد بيجي من السفر الرئيس  
نجيب يتصل بيه .

الرئيس - جه في أقوالك في التحقيق ..

الشاهد - أيوه يا فندم

الرئيس - ان المفهوم في شعب الاخوان ان هناك اتصالا بالرئيس  
محمد نجيب ..

الشاهد - أيوه يافندم .

الرئيس - انت لم تذكر هذا الكلام المحدد في أقوالك بتساعة  
حادثة التليفون ..

الشاهد - أيوه يافندم .

الرئيس - كان مفهوم في شعب الاخوان ان هناك اتصال  
برئيس الجمهورية

الشاهد - أيوه .. ولذلك لما سألت ابراهيم قال لي هذا  
الكلام ..

الرئيس - طيب ايه اللي خلى هذا الكلام يدور في صفوف

الاخوان ايه هي الدوافع يعنى ؟

الشاهد - كان المفروض أو اصل الخطة وان المفروض ان  
يعتدى على الرئيس وعلى أعضاء مجلس قيادة الثورة ، وأن  
الرئيس محمد نجيب يبقى له « رول » معين ..

الرئيس - ايه الصورة اللى كنت تنتظرها ؟  
الشاهد - كنت منتظر أن الرئيس محمد نجيب يتكلم فى  
الراديو ويهدى الخواطر .. ده اللى كنت متصوره فى نفسى .  
الرئيس - بفرض ان عملية اغتيال الرئيس جمال عبد الناصر  
نجحت ، كان حيتبعها ايه .. ايه الصورة اللى فى دماغك ؟  
الشاهد - كان حيتبعها محاولة الاعتداء على أعضاء مجلس  
قيادة الثورة والضباط الاحرار يخطفوا أو يعتقلوا ، وعلى هذا  
الاساس تبقى فيه دوشة فى البلد والرئيس محمد نجيب ييجى  
يهديها أو يخلصها وتتكون حكومة جديدة والكلام ده برضه أنا  
قلته فى التحقيق ..

المدعى - تعرف صلاح شادى ؟  
الشاهد - أيوه يافندم أعرفه ..  
المدعى - ايه صلتك به ؟  
الشاهد - أنا صلتى به .. كل صلتى به مرتبطة بآنى أنا من  
الاخوان وهو من الاخوان .  
المدعى - ما اشتغلتش معاه فى حاجة ؟  
الشاهد - اطلاقا ..  
المدعى - هل كان له علم بهذه الخطة ؟  
الشاهد - هو المسئول عن الضباط فطبعاً لازم يكون عنده  
علم ..

المدعى - ايه رأيك فى الاتفاقية ؟  
الشاهد - رأى أنا شخصياً  
المدعى - أيوه .. وانت رجل محامى ..  
الشاهد - أنا قلت فى التحقيق أن الاتفاقية لما وقعت  
بالحروف الاولى ..

الرئيس - مفيش داعى للتعرض لمسائل الدولة ..  
المدعى - أصل هو له رأى تانى قاله فى التحقيق وهو أنه كان  
فاهم الاتفاقية فهم غلط ..

**الشاهد —** موجهها كلامه لسيادة الرئيس — اذا ما كنتش سيادتك عاوزنى أتكلم فى الموضوع ده بلاش .

**الرئيس —** البلد مش مسئولة انها تفهم شخص فاهم غلط .. ومفيش داعى لمعرفة رأيه فى الاتفاقية ..

**المدعى —** ايه هو الحكم فى الاسلام .. كيف يكون الحكم بالاسلام فى تطبيق مبادئ الشريعة الاسلامية كما ورد فى القرآن الكريم .. الجماعة من اهدافها الحكم بالاسلام .

**الشاهد —** هدفها الوحيد الحكم بالاسلام .

**المدعى —** وألم تضعوا أبحاثا عن كيفية الحكم بالاسلام زى الدستور والقانون الخ ؟

**الشاهد —** أيام الاستاذ البنا طلبت منه أن يكتب فى هذا فقال لى .. اذكر بالضبط أنه قال لى ان احنا شعبنا كتب وكتابات ، وأن المكتبة الاسلامية مليانة ، وأن مهمتنا مش اننا نعمل كتب ، بل مهمتنا اننا نعمل رجالة ، ومعنى هذا أن هو مهمته أن يربى الامة تربية اسلامية تنتهى بأن نطبق ما هو موجود فى المكتبة الاسلامية .

**الرئيس —** ما هى التربية الاسلامية ؟

**الشاهد —** اعداد الفرد المسلم من حيث تطبيق الواجب اللى عليه نحو الله

**الرئيس —** ازاي ؟

**الشاهد —** الصلاة والصوم .. يعنى اعداد الناس وتفهمهم أن الاسلام دين صالح فى كل مكان وزمان ، وتكوين الجماعة التى تقوم على هذه المعانى .. ولما تتكون غالبية الشعب على هذا النحو ونيجى نطبق القرآن كما كان فى أيام الرسول صلى الله عليه وسلم يبقى معقول ومقبول .

**المدعى —** الحكم ازاي يكون يعنى ؟

**الشاهد —** يعنى شكل الدولة ؟

المدعى - شكل الدولة وقوانينها .. هذه المسائل الم يعمل لها أبحاث ؟

الشاهد - اتعمل لها أبحاث ، ولكن فى شكل فردى .. أما شكل الدولة وكونه يبقى جمهورى ... ملكى ... حكم على أى صورة من الصور المعروفة لا .. ما اتعملش شىء فى هذا الصدد ، وإنما الشكل كان يتحدد فى صورة اسلامية تختلف عن الديمقراطية وعن الدكتاتورية وعن الشيوعية ..

المدعى - يعنى مفيش تحديد ولا نص مضبوط ؟

الشاهد - الواقع ان الاخوان لم يعدوا هذا الدستور .. وأنا قلت لحضراتكم اننى قلت للاستاذ البنا احنا عاوزينك تفضى شوية على أساس انك تكتب لنا ايه اللى يطبقه الاخوان ، وأذكر أنه قال فى مناسبة ما أن الناس يجتمعون على مبادئ لا على تفاصيل لاننا اذا دخلنا فى التفاصيل فسنختلف ونتفرع ولا ننتهى الى خير كثير ، وان احنا ماشيين على مبادئ اسلامية ، ولو تعرضنا للتفاصيل فيمكن ييجى فقيه ويختلف معنا ، وجايز نستهلك فى مسائل فرعية ..

الرئيس - تستهلك لما تيجوا فى الحكم .. مش كده ؟ طيب ايه شكل الحكومة اللى هى الحكومة الانتقالية اللى حتفرض حكم الاسلام وتنتظر منها ايه ؟ .. افرض انه حيحصل اغتيال فرد أو خمسين أو مائة وحيحصل هياج شعبى وبعدين ييجى محمد نجيب يهدىء الخواطر ويكلف ناس علشان يحكموا .. والحكومة دى حتكون تحت وصاية الاخوان طبعاً ؟

الشاهد - ايوه المفروض هذا ..

الرئيس - يعنى زى ما الاخوان يقولوا لها تعمل وتؤهل الشعب والبلد علشان حكم اسلامى ، لأن المرشد قال ان البلد غير مستعدة للحكم الاسلامى ورياسة الاخوان فيهاش ناس أو أن أغلبيتهم لا يمثلوا الاسلام ولا يعرفوش يطبقوا الاسلام .. طيب افرض ان الجهاز نجح فى تنفيذ الخطة .. طبعى هو



يرمى للوصول الى مأرب وهدف .. فايه اللي كنت تنتظره من هذه الحكومة ... كانت حتعمل ايه ؟

**الشاهد -** آه .. اللي كنت أنا أنتظره أو يعنى زى ما كان ثابت فى ذهننا أن يعلن الدستور اللي يوضع وان تستقى مبادئه من المبادئ الاسلامية على أساس أنها مبادئ يعنى صالحة لحكم البلد ، وده يعنى الاساس ..

**الرئيس -** دستور تستقى مبادئه من المبادئ الاسلامية على أنها صالحة لحكم البلد ؟

**الشاهد -** أيوه يافندم ..

**الرئيس -** زى ايه كده ... قل لنا .. اضرب لنا مثل ..

**الشاهد -** الواقع ان دى كلها مبادئ ..

**الرئيس -** اذا كنت فاكرنى باتجنى عليك .. فمفيش مانع اذا كنت عاوز وتحب أن أى واحد من اللي قاعدين يجاوبك ..

**الشاهد -** لا يافندم .. أستغفر الله أنا ماقلتش كده ..

**الرئيس -** أنت قلت ان ده مش متمشى مع الاسلام .. طيب يحصل ايه لما الوضع يتغير ، وتتغير الحكومة بحكومة ثانية ؟

**الشاهد -** من حيث ايه ؟

**الرئيس -** ايه النقط المحددة .. هل أوافق مع الحكومة أو اختلف مع الحكومة .. يعنى ايه النقط المحددة اللي تيجى الحكومة على أساسها .. مش لازم يكون فيه خط مرسوم لحكم البلد عاوزين نعرف ما هو هذا الخط ؟

**الشاهد -** مثلا التشريع الجنائى والتشريع المدنى .. التشريع المدنى يستقى كل مبادئه من التشريعات الفرنسية . وكان القانون القديم .. اقصد ان المفروض والظن ..

**الرئيس -** أنا بأسأل عن الجماعة مش عن ظنك انت .. يجوز انت تختلف مع الجماعة فيما تأتى به هذه الحكومة .. وكان موقفك موقف المعارض للاخوان المسلمين وتروح عامل

جهاز سرى ، ويبقى فيه كمان جهاز للطيب واخر لمحمود  
وهكذا .. فايه رأى الجماعة فى الموضوع ده ؟

**الشاهد -** الرأى مثلا بدل ماتستقى مبادئ التشريع المدنى  
من المبادئ الفرنسية تبقى تستقى من مبادئ ( أبو حنيفة ) ..  
**الرئيس -** هل هناك مبادئ وخطط ونقط موضوعة علشان  
الحكومة تيجى تشتغل على أساسها ؟

**الشاهد -** فى الجماعة لا ... مفيش وانما فى المكتبة  
الاسلامية مخلفات الائمة الاربعة وهى فيها ما يفى بهذا الغرض  
من الناحية الدينية .

**الرئيس -** يعنى الجماعة ما كنش عندها خطة مرسومة . ؟  
**الشاهد -** لا ما كنش عندها .. وعلشان كده هم كانوا  
بيؤخروا أنفسهم ؟

**الرئيس -** كيف كانوا بيؤخروا انفسهم وكيف بدءوا بالعملية ؟  
**الشاهد -** هم ما كانوا عاوزين ينفذوا الخطة فورا لانهم  
كانوا خايفين لينكشفوا ..

**الرئيس -** طيب ما هو الغرض اللى ثار فى نفسك .. يعنى ما  
هو الفرق بين الحكومة اللى حاجبوها والحكومة الموجودة ؟  
ما هما الاثنين فى « الهوا سوا » ..

**الشاهد -** الاخوان كانوا بيتهموا بانهم عاوزين يصلوا للحكم ،  
فيجوز هم عاوزين يداروا عن انفسهم هذه التهمة .

**الرئيس -** يعنى هم كانوا عاوزين يجيبوا حكومة صورية  
تكون زى ( الاراجوز ) وزى المثل اللى ضرب فى جماعة الاخوان  
اللى هو « وش الباترينة » بتاع الجمعية التأسيسية ..

**الشاهد -** يجوز ده اثر فى نفس الاخوان وترك طابع عميق  
فى نفوسهم ..

**المدعى -** ايه رأيك فى الاسلوب الذى اتبع فى القتل .. وهل  
هو يتفق مع أسس وأحكام الاسلام ؟؟

**الشاهد -** هذا الاسلوب من حيث شرعية العمل في الاسلام محرم ، ومحرم على الاطلاق ، وانما كيف وافقت عليه ؟ زى ما قلت لحضراتكم أنه كان من تقاليد الجماعة في أيام الاستاذ البنا القيام بمثل هذا العمل ، وعلى هذا الاساس اصبحت هذه التقاليد مستقرة .. وانما من الناحية الاسلامية لا يجوز القتل بهذه الصورة وده اللى خلانى اهتريت وده خلانى سلمت للحكومة بكل الحاجات اللى عندى علشان أوقف التيار الجارف من الارهاب ..

**الرئيس -** تقدر تقول لنا ايه القانون اللى يحكم الاخوان المسلمين ..

**الشاهد -** اللى يحكم جماعة الاخوان لائحة داخلية تشكل الاخوان الى مرشد عام ، وهيئة تأسيسية ، ومكتب ارشاد ، ومناطق ، ورؤساء مناطق ، .. يعنى تشكيل ادارى ... ده تشكيل العمل في الاخوان ، وبعد كده يستقوا المبادئ من القرآن نفسه ..

**الرئيس -** دلوقتى كل اللى فهمناه من الاسئلة والاجوبة عليها اننا وجدنا أن الحكم في الاخوان يرجع الى المرشد ، وهناك جمعية تأسيسية صورية ، وجهاز سرى للضغط عليها ، وهذا الجهاز السرى الحكم فيه دكتاتورى ، والحكم الدكتاتورى مستقى من المرشد ، اذ ان نظام الجماعة كله دكتاتورى . فلنفرض - وانت شخص متعلم في هذا النظام - لنفرض انك لاتوافق الحكومة اللى جابوها لاعداد البلاد نحو الاسلام واختلفت الجماعة ... فايه اللى يحددك من أن تنفصل أو أن تذهب اى مذهب من المذاهب أو أن تعمل عملا ايجابيا .. ايه اللى يحددك ؟

**الشاهد -** في حالة الاختلاف سواء مع الجماعة أو مع الحكومة ، المفروض لما الانسان يختلف يبقى لا يتبين وجه الحق ، فالمفروض عليه اسلاميا انه يقعد في بيته ولا يأتى عملا معيناً

لما تبقى فيه فتنة - من حيث وجهة النظر - المفروض ان الانسان يقعد في بيته ..

**الرئيس -** انتم اصلا بتعتبروا الحكومة الموجودة في الحكم مش مسلمة ؟

**الشاهد -** ايه يا فندم ..

**الرئيس -** انت .... انت مش نفذت أوامر الجهاز السري  
**الشاهد -** أيوه ..

**الرئيس -** يعني انت اعتبرت ان الحكومة الحاضرة والناس بتوع القيادة مش مسلمين .. بدليل انك لما اختلفت معهم ما قعدتش في بيتك ..

**الشاهد -** انا اعترفت ان ده كان خطأ ..

**الرئيس -** انت من يوم مسلمت نفسك كنت قاعد ولكن ..  
**الشاهد -** ده كان راي قيادة الاخوان ، وانما يجوز رايي يختلف عن هذا ..

**الرئيس -** واذا واحد تانى اختلف رايه عن رأيك ؟  
**الشاهد -** يقعد في بيته ..

**الرئيس -** واذا واحد تانى ماقعدش في بيته ؟  
**الشاهد -** يمشي تبع قيادة الاخوان ..

**الرئيس -** افرض انه مش موافق ..

**الشاهد -** ما دام مش موافق لازم يقعد في بيته ..

**الرئيس -** هل ده حكم الشورى بتاع الاسلام ؟

**الشاهد -** قطعاً دي حالة طبيعية من غير شك ..

**الرئيس -** الادعاء يجب يسأل حاجة .

**المدعى -** لا خلاص ..

**الرئيس -** طيب ترفع الجلسة لمدة ربع ساعة للاستراحة .

( رفعت الجلسة في الساعة الواحدة والدقيقة الاربعين

بعد الظهر ) .

( أعيدت الجلسة في الساعة الثانية والدقيقة

الخامسة والعشرين بعد الظهر )

الرئيس — الادعاء عنده أسئلة ؟

المدعى — لا ...

الرئيس — الدفاع يحب يوجه للشاهد أسئلة ؟

الدفاع — لى سؤالان فقط ..

الرئيس — اتفضل ..

الدفاع — ما الذى يعرفه حضرة الشاهد عن أخلاق محمود

عبد اللطيف من حيث سرعة استجابته للتأثير عليه من عدمه ؟

الشاهد — ....

الرئيس — والله لو يتكرم السيد المحامى باعادة السؤال تانى ،

لانى أنا نفسى مش فاهمه ..

الدفاع — ما الذى يعرفه حضرة الشاهد — بحكم الصلة بينه

وبين المتهم — ما الذى يعرفه حضرة الشاهد عن طباع المتهم

محمود عبد اللطيف من حيث سرعة استجابته للتأثير من عدمه

.. هل هو الشخص الذى له قيادة خاصة أو شخص هوائى

يسهل التأثير عليه ؟ .. أرجو أن أكون واضحاً ..

الرئيس — موجهها كلامه للشاهد — فاهم السؤال ؟

الشاهد — أيوه أنا فهمت السؤال ..

الرئيس — طيب جاوب عليه ..

الشاهد — أنا سبق انى قلت أن محمود عبد اللطيف بالذات

كان متحمساً لهذا العمل ، وسبق أن قررت فى التحقيقات أن

محمود عبد اللطيف هو الذى اقترح أن يسافر الى الاسكندرية

لهذا العمل وان الاصل ان محمود عبد اللطيف كان سيرتكب

الحادث فى القاهرة وهو الذى اقترح ان يسافر الى الاسكندرية

... ومعنى هذا انه صاحب تفكير مستقل استقلالاً كاملاً

لا سيما وأنا أعلم أنه صاحب شخصية ولا يتأثر بسرعة وأنا بهذا لا أريد اتهامه وإنما هذه هي الحقيقة فهو شخص صاحب تفكير مستقل ويحفظ جزءا كبيرا جدا من القرآن وكان متحمسا بالذات لهذا العمل ، وأدل شئ على هذا انه هو اللي اقترح على السفر الى الاسكندرية ، ولما قلت له بلاش مشوار اسكندرية ده يا محمود قال لي لا ، أنا عاوز أسافر اسكندرية . وأعتقد انه صاحب تفكير مستقل وأنه لا يتأثر بسرعة . .

( هنا أوما المتهم برأسه ومال تجاه الاستاذ حمادة الناحل المحامي يسر في أذنه ببضع كلمات )  
الرئيس — موجهها كلامه للمتهم — اتكلم اذا كنت عاوز تقول حاجة . .

المتهم — حضرته بيقول اني كنت متحمس وأنا اللي اقترحت عليه السفر الى الاسكندرية . .

الرئيس — زعق شوية يا محمود . .  
المتهم — حاضر . . أنا عاوز أقول انه بصفته الرئيس بتاعى لو عاوزنى ما أروحشى اسكندرية ، مش حا اقدر أعصى له الامر علشان هو رئيسى . . ولكن الحكاية مش حكاية تحمس — لو كان كده . . .

الرئيس — المفهوم من كلام الشاهد انك انت طبيعتك انك شخصية وأنت متحمس فما بالك اذا كان هناك أمر بهذا . . تبقى متحمس لهذا الامر . .

الشاهد — ورد على هذا انه صاحب تفكير مستقل وانه هو اللي اقترح السفر الى الاسكندرية . .

الرئيس — يعنى هو كان متحمس للفكرة ؟  
الشاهد — أيوه .

الرئيس — موجهها كلامه للمتهم — يعنى المفهوم ان الامر صدى لك وانت تنفذ الامر ده . . . الدفاع . . .  
الدفاع — أفندم . . .

**الرئيس -** فيه نقطة أخرى ؟  
**الدفاع -** هل كان يمكن لمحمود عبد اللطيف مش بوصفه  
الشخصي بل بوصفه عضوا في النظام السري أن يخالف الامر  
الذي صدر اليه ؟

**الشاهد -** كان ممكن يافندم . . ودليلي على هذا - وهو  
صادق ولو سألتوه يقول لكم اننى قلت له كده - انا قلت له . . .  
فكر وشوف **انا** كنت توافق على الفكرة أو لا . . . وأقصد ثلاث  
أيام فكر ، وانت حر في هذا ولك مطلق الحرية ، ولك أن تفكر  
ومن حقتك أن تقول لا ، ولا ضير عليك في هذا . . ومع هذا جاني  
وقال لى أنا مطمئن لأى عمل يصدر الى وكان من الممكن أن  
يخالف وان يرفض هذا الطلب ولا ضير عليه وما كنش النظام  
حيقتله .

**الدفاع -** في حالة رفضه ، هل كان ح يستمر عضوا في الجهاز  
السري رغم ترده ورفضه لما صدر اليه ؟

**الشاهد -** ما افتكرشى . . المعقول انه هو طبيعى ينحى بس  
عن الجهاز السري ويظل عضوا في الاخوان المسلمين . .

**الدفاع -** قلت انه كان من المفروض بعد الفوضى التي تعم أن  
الرئيس نجيب يهديء الشعب بكلمة ثم بعد ذلك تتولى الامر  
حكومة أخرى . . من هم أفراد الحكومة الاخرى التي كانت في  
ذهنكم كهيئة ترونها أداة انتقال من حال الى حال . . وقد قلت  
ايضا أن الاخوان ماكانوش صالحين أو الظروف مش ممهدة . .

**الشاهد -** بس عدالة المحكمة توافق على هذا السؤال .

**الرئيس -** اذا حبيت تجاوب جاوب . . واذا ما حبتش بلاش .

**الشاهد -** بس هل هذا السؤال يخص الدفاع عن محمود  
عبد اللطيف .

**الرئيس -** انت شاهد ولك مطلق الحرية في أن تجيب أو لا  
تجيب ، فاذا كنت تعترض على السؤال قل هذا . . . . أنت  
شاهد ولك الحرية الكاملة في الاجابة أو عدم الاجابة . .

**الشاهد** - سبق أنى أجبت عن هذا السؤال في معرض  
التحقيقات واليوم في هذه الجلسة ، وعلى هذا الأساس فلا داعي  
للتكرار وإنما إذا أمرتنى المحكمة ان أعيد ما سبق ان قلته فأنا  
مستعد لذلك . . .

**الرئيس** - اذا حببت . . عيد الكلام . .

**الدفاع** - احنا سمعنا منك اسمين . . اسم على وجه التوكيد  
واسم على وجه الاحتمال . . فهل دول اللي حيكونوا الحكومة ؟  
حيطوا محل مجلس القيادة . . . انا باسأل عن اسماء افراد  
الحكومة اللي تتولى الحكم في مرحلة الانتقال وتسيطر على شئون  
البلد . .

**الرئيس** - هل يقصد الدفاع ان الافراد اللي كانت تحتكون  
منهم الحكومة فيما بعد هذا الانقلاب اخذ رايه فيهم ام لا . .  
**الدفاع** - نعم . . . او جرى عليه نحو العرف .

**الرئيس** - موجهها كلامه للشاهد - هل اخذوا رايك في هذا ؟  
**الشاهد** - المسائل دي مايختصش بها افراد امثالنا ، بل احنا  
تيجي لنا تعليمات بهذا . . وفيه اسماء انا ذكرتها في التحقيقات  
وانما هذه المسألة قطعيا انا لا أعلمها . . .

**الرئيس** - يعنى المسألة دي ليست من اختصاصكم . .  
**الشاهد** - ايوه . . ودي من مسئولية الناس اللي فوق على  
أساس اننا نعملها كاشاعة ، لان المفروض ان المسائل الخطيرة تيجي  
بهذا الشكل وتشاع على اعتبار انه كان بييجي بها الناس اللي في  
القيادة سواء وافق الافراد المختارون او لم يوافقوا . . . هذا  
مش من شأننا . .

**الدفاع** - قلت بأن بروجرامكم منذ ان تورط الجهاز السري في  
الخطاء كان اصلاح هذه الاخطاء . . هل كان يعاونكم لتحقيق  
هذا الهدف الاعتداء أولا على الرئيس وثانيا على أعضاء مجلس  
قيادة الثورة ثم ثالثا على الضباط الاحرار . . . هل ده مما يوصلكم  
الى هذا التطهير ؟



- الشاهد - السؤال ده متناقض خالص . . .
- الرئيس - السؤال ده يمكن يكون خارج عن الموضوع . . .
- احنا عاوزين سؤال يتعلق بالموضوع اللي احنا بننظره الآن . .
- الدفاع - وهو كذلك يافندم . . . أنا مكتفى بهذا القدر . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - طيب . . . تؤجل الجلسة للبيعة السادسة . .
- الدفاع - أنا لى طلب . .
- الرئيس - اتفضل . .
- الدفاع - احنا لنا شاهد دفاع واحد ممكن نحضره اذا ما وافقتم عليه . . شاهد دفاع واحد هو الاستاذ الهضيبى . . علشان اذا قررتم حضراتكم احضاره يبقى يجهزه الادعاء . . وأنا أطلب سماعه كشاهد دفاع . . .
- الرئيس - هل الادعاء له اعتراض على هذا ؟
- المدعى - هو متهم وحييجى دوره . . .
- الرئيس - ليس هناك مانع، ويطلب الاستاذ الهضيبى كشاهد والآن ترفع الجلسة على أن تعود الى الانعقاد فى الساعة السادسة مساء . .
- « رفعت الجلسة فى الساعة الثانية والدقيقة الخامسة والثلاثين »
- « بعد الظهر »

## محضر

### الجلسة الثالثة لمحكمة الشعب

المنعقدة علنا في الساعة السادسة والدقيقة الخامسة عشرة مساءً ، بمقر قيادة الثورة في الجزيرة ، يوم الثلاثاء الموافق ٩ نوفمبر سنة ١٩٥٤ ، الموافق ١٣ ربيع الاول سنة ١٣٧٤ .  
المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ ، الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو مجلس قيادة الثورة ، وعضوية القائمقام انور السادات ، والبكباشي ( ا.ح ) حسين الشافعي ، عضوى مجلس قيادة الثورة .

وبحضور البكباشي سيد سيد جاد المدعى ، والاستاذ علي نور الدين وكيل النائب العام ، عضوى مكتب التحقيق والادعاء وتولى تسجيل المحاكمات بالاختزال الاساتذة : طلعت الصبان وممدوح توفيق ، وابراهيم فكرى احمد فوده مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب ) المتهم فيها محمود عبد اللطيف محمد  
( حضر المتهم )

الرئيس - فتحت الجلسة . . . الادعاء

البكباشي سيد سيد جاد - المدعى - الشاهد موجود . . .  
محمد على نصيرى .

( نودى على الشاهد )

( حضر الشاهد )

الرئيس - اسمك ايه

الشاهد - محمد على نصيرى

الرئيس - عارف ده

الشاهد - ايوه .

الرئيس - ايه .

الشاهد - مصحف .

الرئيس - طيب قول والله العظيم والله العظيم والله العظيم

اقول الحق و لاشئ غير الحق والله على ما اقول شهيد .

( ردد الشاهد صيغة اليمين )

الرئيس - المدعى

المدعى - هل انت من جماعة الاخوان المسلمين ؟

الشاهد - ايوه .

المدعى - من اى منطقة ؟

الشاهد - انا من الزقازيق اصلا وجيت فى بين السرايات .

المدعى - لك صلة بهنداوى ؟

الشاهد - اخيرا .

المدعى - متى كانت آخر زيارة لك بهنداوى ؟

الشاهد - يوم الحادث .

المدعى - ليه ؟ . . صف الموقف لآخر زيارة ؟

الشاهد - هو كان اتصل بى وادانى مسدسين ادانى الاول

وقال لى جربه فجربته وجدته مينفعش ادितه له والثانى جربته

فى ملاعب كلية الزراعة ف ضرب طلقة ولم ينفع فاعدته له فقال

لى فيه حزام فيه مفرقات ليه تأمينين وشرح لى طريقة العمل  
به وقال لى تاخده وترتكب به جريمة فقلت له لا لا ما اقدرش  
أشيل حاجة زى دى وأنا شعرت بان فيه حاجة خطيرة فقال  
على العموم انت مش مكلف بحاجة فخذ المسدس ده جربه فأخذه  
وانصرف فى المساء سمعت الخبر فى الاسكندرية وكنت أزور  
صديق مريض اسمه على شاهين وقبض على .

الشاهد - لماذا وقع الاختيار عليك بالذات للذهاب الى  
هنداوى ؟

الشاهد - لا ادرى . أيام طرد محمد نجيب كنت قد اشتركت  
فى الحرس الوطنى وخرجنا فى مظاهرة ثم أخذنا نطالب بالكفاح  
المسلح ولما طلعنا الى قصر النيل البوليس اطلق علينا الرصاص  
وقتل اثنين من زملائنا فقلنا ان ده يبقى شىء خطير وثارت ثورة  
الجامعة فواحد صاحبى اسمه حسين عرفنى بهنداوى وطلب  
منى أن انضم الى مجموعة قبل الدور الثانى فقلت ما اقدرش  
لانى ما دخلتش الدور الاول لانى كنت مريض وبعدين دخلت  
قبل الدور الثانى .

المدعى - هل تذكر افراد المجموعة التى كنت تنضم اليها فى  
الجهاز ؟

الشاهد - ايوه السيد عواد واحمد الفيومى وعلى شاهين  
ويوسف عليان وطلعت ابراهيم وسلامة خليل وانا وفيه واحد  
أظن كمان بس مش فاكر اسمه دلوقت .

المدعى - لماذا اعطاك هنداوى المسدس ؟

الرئيس - مين كان رئيس المجموعة ؟

الشاهد - سيد عواد

- الرئيس -** شغلته ايه الجهاز ده ؟  
**الشاهد -** كنا بنتمرن على القتال وحرب العصابات .  
**الرئيس -** حرب العصابات ؟  
**الشاهد -** أيوه .  
**الرئيس -** ايه الغرض ؟  
**الشاهد -** هو قال الغرض تكوين حكومة اسلامية .  
**الرئيس -** مين اللي قال ؟  
**الشاهد -** سيد عواد قال الغرض تكوين حكومة اسلامية وطرده المستعمرين وعمل جيش .  
**الرئيس -** هل كان كل واحد من جماعة بيدرب ؟  
**الشاهد -** لا مش كلهم بعد ما ينضم لفترة ويلاقوه صالح يدربوه وينضم للمجموعة .  
**الرئيس -** المجموعة داخله في تكوين الشعب ؟  
**الشاهد -** كلها تابعة للشعب  
**الرئيس -** معروفة لافراد الشعب كلهم ؟  
**الشاهد -** لا مش كلهم .  
**الرئيس -** التنظيم ده مسمينه ايه ؟  
**الشاهد -** التنظيم السرى  
**الرئيس -** وغرض التنظيم السرى هو اقامة حكومة اسلامية ؟  
**الشاهد -** أيوه  
**الرئيس -** امال ايه غرض الجماعة كلها ؟  
**الشاهد -** تكوين حكومة اسلامية والفرد اللي يصلح بعد  
ها يأخذ دور التربية والتكوين ينضم للتنظيم  
**الرئيس -** يعنى الجماعة معموله علشان تكون دور تكوين  
الاعضاء علشان يخشوا الجماعة السرية وايه التنظيم السرى ده ؟  
**الشاهد -** انا دخلته اخيرا ولا اعرف قوانينه ونظمه معرفة  
وثيقة .

الرئيس — الطاعة عمياء ؟

الشاهد — لا .

الرئيس — امال دخلت ازاي دون ان تعرف قانون الجمعية ؟

الشاهد — لما ادخل اعرفه .

الرئيس — لما تخش الجامعة تخش من غير ما تعرف

قوانينها ؟

الشاهد — لا اعرف القانون الاول .

الرئيس — امال تدخل ازاي جماعة سرية من غير ما تعرف

تنظيمها ، معقول الكلام ده ؟

الشاهد — لا .

الرئيس — طيب نحب أنك تقول لنا الكلام المعقول . هو أنت

تبقى في سنة ثانية حقوق وتدخل جماعة متعرفش قانونها ؟

الشاهد — لا يا افندم .

الرئيس — طيب قول الكلام المعقول يا تبقى بتخبى .

الشاهد — الجماعة : فيه فصايل والفصايل بتكون مجموعات

والفصيلة / ٢٨ والمجموعة فيها / ٧ افراد .

الرئيس — رئيس الجماعة بيتصل بمين ؟

الشاهد — برئيس الفصيلة .

الرئيس — ومين رئيس الفصيلة بتاعتك ؟

الشاهد — اللى كان بيزورنا واحد انا استنتجت انه رئيس

الفصيلة ولكن مش فاكر اسمه .

الرئيس — أنت انضمت للجماعة امتى ؟

الشاهد — سنة ٩٠ .

الرئيس — وانضمت امتى للجهاز السرى ؟

الشاهد — قبل الدور الثانى على طول .

الرئيس — امتى يعنى فى سبتمبر فى أكتوبر ؟

الشاهد — فى أواخر سبتمبر .

الدفاع — لما ادالك هنداوى المسدس قال لك ايه ؟

- الشاهد — قال لى جربه .  
المدعى — علشان ايه ؟  
الشاهد — مقلش .  
المدعى — عرفت ان فيه خطة وضعت ....  
الشاهد — لايه ؟  
المدعى — لتحقيق فكرة الحكومة الاسلامية والا مكنتش لسه تعرف ؟  
الشاهد — لا .  
المدعى — والحزام تستعمله ازاي ؟  
الشاهد — قال لى تربطه على وسطك وان فيه تأمينين وشرح لى طريقة العمل به .  
المدعى — وتروح فين ؟  
الشاهد — مقلش انا لما قلت ان دى حاجة خطيرة مقدرش اشيها قال على كل حال انت مش حتكلف بحاجة تنفيذية ودانى المسدس .  
الرئيس — طيب بعد الفصيلة اللى قلت عليها دى ...  
الشاهد — أيوه رئيسها انا افكرت اسمه دلوقت اسمه سعد فغلول .  
الرئيس — د الرئيس بتاع بين السرايات ؟  
الشاهد — أيوه .  
الرئيس — ورئيس الجماعة بتاعتك . اسمه سيد عواد ...  
طيب ورئيس الفصيلة بيتصل بمين ؟ انتم بتعملوا لحسابه ؟  
الشاهد — لا د لازم فيه واحد أعلى منه .  
الرئيس — مين ؟  
الشاهد — ما أعرفش .  
الرئيس — شعبان كان معاك فى الجماعة .  
الشاهد — لا دا فى المنطقة .  
الرئيس — فى النظام البسرى ؟

الشاهد — مادام بيدي أوامر يبقى في النظام .  
الرئيس — وانت تسمع كلامه على طول ؟  
الشاهد — لا .

الرئيس — مش قال لك روح لدوير فرحت ؟  
الشاهد — زى ما أى واحد يقول لى روح لفلان اروح . وهو  
قال لى اتصل بهنداوى .  
الرئيس — مقلش علشان ايه ؟  
الشاهد — لا .

الرئيس — ولما رحت اتصلت بهنداوى وانت متعرفوش  
وشعبان مقالكش الغرض من المقابلة وهنداوى قال لك خد  
طبينة وجربها مفكرتش ليه بيديك الطبينة . مآثرتش فى نفسك  
بعض الهواجس ؟ مفكرتش ان فيه حاجة ؟  
الشاهد — هوه يوم ما ادانى الحزام قال لى انت مش مكلف  
بعمل تنفيذى واحنا باعتين ناس وراهم وقال لى انت تراقب  
الحفلات بس وانت مش مكلف بتنفيذ شىء . فلما قلت له انى  
ما أقدرش اشيل الحزام اللى زى ده فادانى المسدس علشان  
اجربه فقلت له الدنيا ليل .

الرئيس — انت مش جربت واحد ومضربش ؟  
الشاهد — لا دا التانى والأولانى ماضربش خالص .  
الرئيس — يعنى جربته . ولما ما ضربشى ادالك واحد غيره  
وجربته ؟  
الشاهد — أيوه .

الرئيس — وقال لك تراقب مين ؟  
الشاهد — قال لى تروح الحفلات وتراقب ، وتشوف مدى  
استقبال الناس والحماس أد ايه ورحت مؤتمر الموظفين وقت  
إطلاق الصواريخ .

الرئيس — ايه الحماس اللى شفته ؟  
الشاهد — كان فيه هتافات كثيرة وناس كثير وانا رجعت



قلت لهنداوى .

الرئيس - وهل مراقبة الهتافات تستدعى أنك تشيل طبنجة ؟

الشاهد - لا وهوه قال لى وقت ماتروح ماتشيلش حاجة .

الرئيس - ما سألتش الطبنجة علشان ايه امال ؟

الشاهد - لا ماسألتش .

الرئيس - تحب نكون عاقلين شوية فى الاجابة . واحد

ماتعرفوش ورحت تقابله وادالك طبنجة علشان تجربها ماتنفعش

ادالك واحدة تانية نفعت وقال لك ماتشيلش السلاح معاك لما

تروح الاحتفالات امال تشيل السلاح امتى وليه ؟

الشاهد - قال لى خليك جاهز لما يطلب منك حاجة .

الرئيس - ماسألتش جاهز ليه ؟

الشاهد - علشان اقامة حكومة اسلامية . عندما يطلب منك

العمل .

الرئيس - ايه التعليمات الاسلامية اللى علموها لك ؟

الشاهد - حفظ القرآن والحديث .

الرئيس - القرآن قال انك تقيم حكومة اسلامية بالقتل

والسلاح ؟

الشاهد - السلاح لطرد المستعمر وطرد المستعمر يحتاج

الى سلاح ولازم نكون مستعدين لان العالم الاسلامى كله مستعمر

فلازم نكون جيش اسلامى علشان نموت فى سبيل الله وهم

مودونا ان نعد انفسنا لهذا .

الرئيس - لما رحت تقابل هنداوى دوير قال لك ايه غير

حكاية السلاح ؟

الشاهد - اتكلم معايا عن المعاهدة وقال لى انها ضارة بالبلد

وان الانجليز ممكن يخرجوا لانهم عاوزين استقرار فى الشرق

الاوسط . واحنا دلوقت حانكون كقاعدة لهم وحننضر كثير جدا

لارتباطنا بالاحلاف العسكرية وحانظل مرتبطين بالشرق الاوسط

وده يضر البلاد فى حين أننا لو حاربنا الانجليز ممكن يخرجوا .

وقال كمان ان البلد موجودة في ظل احكام عرفية ومحدثش قادن  
يتكلم ودى حالة متسرش وشايفين الطلبة اطلق عليهم الرصاص  
لأنهم ينادون بالكفاح المسلح للحرس الوطنى .

الرئيس - هو الحرس الوطنى الفى ؟

الشاهد - لا ماشى .

الرئيس - انت دخلت الحرس الوطنى ؟

الشاهد - ايوه .

الرئيس - دربتك الحكومة علانية او سرا ؟

الشاهد - علانية .

الرئيس - علشان تروح تنضم للجهاز السرى ؟

الشاهد - لا .

الرئيس - انت راجل فى كلية الحقوق وتقدر تفكر . . .

ونجحت وانتقلت سنة ثالثة ؟

الشاهد - لا .

الرئيس - يعنى سقطت لما انضميت للجهاز السرى ؟

الشاهد - أنا كنت مريض .

الرئيس - مين رئيس الجهاز ؟

الشاهد - أنا أعرف ان رئيس الجماعة بتاعتى السيد عواد .

الرئيس - ومين رئيسه ؟

الشاهد - ما أعرفشى .

الرئيس - يعنى ماشى عميانى كده ؟

الشاهد - لا . . فى الاول خالص ماكنشى فيه حاجه ولسكن

بعد طرد محمد نجيب . قالوا مايصحش ان الرئيس يطلع ويرجع

من غير أن الشعب ما يفهم ايه المقصود من هذا وان ده يسىء لى

البلاد أمام الدول الاجنبية ومصطفى البساطى فى الجامعة قال

يصح انكوا تطلعوا تعبروا عن شعوركم فطلعنا ، وبعدين اطلق

علينا الرصاص . وفضلت الجامعة نائرة مدة .

**الرئيس -** ازاي تسمح لنفسك انك تنضم في جمعية سرية  
ماتعرفشي أغراضها ايه أو نظامها ايه ؟

**الشاهد -** الغرض هو اقامة حكومة اسلامية .

**الرئيس -** لما انتوا ماشيين كده عميانى ليه ممشتوش ورا  
الحكومة عميانى لما طلعت رئيس الجمهورية وبعدين جابتوا ؟  
مش هوه ده المبدأ اللي خلاك تنضم للجهاز السرى ؟ ولا انت  
بتدين بمبدأين مبدأ سرى والآخر علنى ؟

**الشاهد -** احنا كنا بنعمل للوطن والاسلام .

**الرئيس -** ايه اللي عرفك ان الحكومة دى مابتعملش للوطن  
أو الاسلام علشان ماتمشيش وراها ؟

**الشاهد -** مظاهرة الجامعة كانت للوطن . صحيح كان الشعور  
ثائر لطررد محمد نجيب ولكن تحولت الى مظاهرة تطلب الكفاح  
المسلح .

**الرئيس -** ومين اللي يقرر الكفاح المسلح ؟

**الشاهد -** الحكومة .

**الرئيس -** يعنى اللي يقرر هو المسئول . . القائد ؟

**الشاهد -** أيوه .

**الرئيس -** ليه ماخرجتوش بالنظام بتاعكم وعملتوا عمل ؟

**الشاهد -** احنا في المعركة كنا بنتدرب في تل بسطة وحاولت

النزول للميدان ولكن فاجأنى المرض .

**الرئيس -** انتوا كنتوا عاوزين حكومة اسلامية ؟

**الشاهد -** أيوه ودا احنا أعلناه في الجامعة وقلنا اننا نتعاون

مع الموجودين على قيام الحكومة الاسلامية لأن مافيش حاجة  
بتيجى مرة واحدة .

**الرئيس -** عاوزه استعداد ؟

**الشاهد -** الجيش موجود يراقب البلاد مراقبة كويسة

والحكومة تضع لها الانظمة وتمشى .

- الرئيس** — وبعدين ايه اللي غير الحال ؟  
**الشاهد** — مافيش تغيير .
- الرئيس** — أمال شلت السلاح ليه في الخفاء ؟  
**الشاهد** — أنا رديت له السلاح .
- الرئيس** — انت رديت المسدس الأول والثاني ولكن الثالث فضل معاك ؟  
**الشاهد** — أيوه لأنى ماخرجتش من البيت .
- الرئيس** — شلت معاك سلاح ليه قبل الحادث ؟ وقبل ما تعرف أن في الامر جناية وان الامر خطير ؟  
**الشاهد** — هنداوى قال لى خد المسدس وجربه .
- الرئيس** — يعنى بتشتغل مجرب أسلحة ؟  
**الشاهد** — هوه قال لى كده وماكنتش عارف ايه اللي عايزينه .
- الرئيس** — تبقى انت طالب في الجامعة ودرست الدين وعرفت انك انت عاوز تكون حكومة اسلامية وبتقود مظاهرات الجامعة بدون ما تعرف سببها ؟ وبتنضم للجهاز السرى وما تعرفش مين اللي بيقوده وواحد يدريك سلاح تجربته وترجععه وتانى وتالت وترجععه وما تعرفشى الغرض ايه . . . الكلام ده لو أخوك قاله لك كنت تصدقه ويخش دماغك ؟
- الشاهد** — دا اللي حصل بالضبط . ولكن في مظاهرات الجامعة كنا فاهمين اللي بنعمله .
- الرئيس** — كنت فاهم ايه ؟ وايه غرضها ؟  
**الشاهد** — قالوا . . .
- الرئيس** — مين اللي قال ؟  
**الشاهد** — الوعي السياسى اللي موجود .
- الرئيس** — موجود فين ؟  
**الشاهد** — في الجامعة .
- الرئيس** — مع مين ؟  
**الشاهد** — مع الطلبة .

- الرئيس - طلبة ايه ؟  
الشاهد - طلبة الجامعة .
- الرئيس - زى مين ؟ تفكر مين منهم ؟  
الشاهد - كان موجود عدد كبير منهم وهم قالوا الجيش  
حيختلف مع بعضه والاحسن ان الجيش يكون موجود .  
ويراقب الحكم وييجى ناس فى الحكم يراقبهم الجيش وده كان  
الرأى الموجود .. يعنى الجيش يوجد بره الحكم ويقوم على  
الحكم افراد يراقبهم الجيش .
- المدعى - ايه ميل البساطى الى انت سمعت كلامه ؟  
الشاهد - من الاخوان
- المدعى - جابها منين الاوامر دى ؟  
الشاهد - لازم من المركز العام .
- الرئيس - يعنى من مكتب الارشاد ؟
- الشاهد - أيوه وهو مقسم الى أقسام : قسم الطلبة - قسم  
العمال الخ .. وهو الذى يرسم السياسة .
- الرئيس - ايه العلاقة بين خروج محمد نجيب وبين انكوا  
تتجندوا تجنيد مسلح ؟
- الشاهد - دكه فى فبراير او يناير واحنا فى ابريل دلوقت .
- الرئيس - احنا دلوقت فى ابريل ؟  
الشاهد - لا فى أكتوبر .
- المدعى - ايه تسليح الجماعة ؟ نظامه ايه ؟  
الشاهد - واحد يكون معاه طبنجه وواحد يكون معاه برن  
واتنين استن والباقي بنادق .
- الرئيس - ايه تانى غير السلاح ده ؟  
الشاهد - بس كده .
- وكيل النيابة - حصل فى مارس بمناسبة المظاهرات مؤتمر  
للطلبة اعلن فيه الكفاح المسلح .

الشاهد - ايوه

وكيل النيابة - يعنى ايه الكفاح المسلح ؟

الشاهد - يعنى نروح القنال .

وكيل النيابة - ايه علاقة انكوا تعملوا مظاهرة عشان محمد

نجيب بالكفاح المسلح ؟

الشاهد - المظاهرة بدأت بخروج محمد نجيب وانتهت الى

مطالبة الحكومة بالكفاح المسلح والتزول الى القنال .

وكيل النائب العام - وهل يكون الكفاح المسلح بعمل مظاهرة ؟

الشاهد - الغرض من عمل المظاهرة هو لتكوين الراى العام

والحكومة تسمع رايه .

وكيل النائب العام - بالنسبة لهنداوى لما رحت له آخر مرة

وقال لك انت مش مكلف فسرهما شوية .

الشاهد - ساعة ما ادانى الحزام شرح لى عمل الحزام فقلت

له انا ما اقدرش اشي له فقال لى طيب جرب المسدس ده .

الرئيس - يعنى خفت على نفسك .

الشاهد - شعرت ان المسألة بقت خطيرة .

الرئيس - الحزام اخطر من المسدس .

الشاهد - لما أجرب المسدس مفيش حاجه .

الرئيس - لكن لما تجرب المسدس تروح ، فهل هذه هي

الشجاعة اللى علمها لك الدين الاسلامى ؟

الشاهد - هوه ما قالش جرب الحزام انما قال لى بس خليك

دايما على استعداد ، فقلت له انا ما اقدرش اشي له حاجة زى دى

الرئيس - خفت لتتنسف بيه ؟

الشاهد - الحزام خطر على الموجودين وهنداوى قال لى احنا

باعتين ناس وراهم .

وكيل النائب العام - ايه معنى عبارة « احنا باعتين ناس

وراهم » ؟

الشاهد - هو قال لى انت مش مكلف واحنا باعتين ناس

وراهم .

**وكيل النائب العام —** ورا مين ؟

**الشاهد —** ورا رجال الثورة .

**وكيل النائب العام —** لكن هنداوى اعترف انه كلفك بانك

تشيل مسدس وتستعد لضرب الرئيس جمال عبدالناصر اذا  
اتيحت لك فرصة ، وان الحزام ده تلبسه ولما تقابل الرئيس  
جمال عبد الناصر تبقى توصل سلكين فينسفكم الحزام .

**الشاهد —** هو قال لى خذ الحزام الى ان نطلبك فى عمل

تنفيذى فقلت له انا ما أقدرش أشيله .

**الرئيس —** مارايك فى كلام هنداوى فى انه قال لك خذ

المسدس ده عشان تقتل بيه الرئيس جمال عبد الناصر .

**الشاهد —** جايز عنده النيه دى لكن لم يصرح لى بيها وأنا

معرفةش منه حاجة .

**الرئيس —** لكن هوه صرح لك بيها .

**الشاهد —** ماعرفةش منه حاجة .

**الرئيس —** هل تعرف محمود عبد اللطيف ؟

**الشاهد —** لا .

**الرئيس —** ماشفتوش ؟

**الشاهد —** لا ما أعرفوش ( نظر الى الجهة التى يجلس فيها

المتهم محمود عبد اللطيف )

**الرئيس —** دى أول مره تشوفه فيها ؟

**الشاهد —** ايوه .

**الرئيس —** أنه واحد فيهم .

**الشاهد —** اللى أعد جاره الشاويش ولازم هو ده ( أشار

على المتهم ) لان اللى جانبه لابس كويس ( أشار على الاستاذ

حماده الناحل ) .

**الرئيس —** مفروض أن محمود عبد اللطيف لابس مش كويس

**الشاهد —** بعد الاعتقالات يكون لابس الواحد وحش .

- الرئيس** — اشمعنى انت لابس كويس ؟  
**الشاهد** — عشان كنت قالع هدومي ولابس ملابس ثانية .  
**الرئيس** — تعرف ايه عن رياسة الاخوان المسلمين والجمعية التأسيسية والناس اللي بيشتغلوا فيها ؟  
**الشاهد** — طبعا المرشد هو الرئيس وفيه مكتب الارشاد والجمعية التأسيسية وبعدين فيه مناطق والمناطق تضم الشعب . هذا هو النظام .  
**الرئيس** — ايه الحاجات اللي حصلت في الجمعية التأسيسية ومكتب الارشاد ؟  
**الشاهد** — يقال ان فيه راى يقول انه يجب ان نمشى مع الحكومة لانها خطوة كويسه ونساعدھا وكان فيه راى ثانى يقول انه يجب ان تقام حكومة على اسس سليمة وكان ممكن في المعاهدة نأخذ حقوق اكثر من هذا وكان فيه خلافات على مناصب لانعرفھا بالضبط ولكن هذا حسب ما سمعته .  
**الرئيس** — هل تعرف أعضاء الجمعية التأسيسية ؟  
**الشاهد** — بعضهم .  
**الرئيس** — ناس كويسين ؟  
**الشاهد** — الذى أعرفهم من جهة الشرقية ناس كويسين .  
**الرئيس** — كلهم كويسين ؟  
**الشاهد** — اللي عندنا في الزقازيق في الجمعية التأسيسية كويسين .  
**الرئيس** — زى مين ؟  
**الشاهد** — الشيخ أحمد نار وفارس فريح مدرس .  
**الرئيس** — بيشتغلوا ايه ؟  
**الشاهد** — فارس فريح مدرس .  
**الرئيس** — فين ؟  
**الشاهد** — مدرس ابتدائى في ههيا .  
**الرئيس** — تعرف انه كويس ازاي ؟



- الشاهد -** كان يعمل كتائب تربوية ، كان مربى .
- الرئيس -** مربى ازاي ؟
- الشاهد -** يربى الفرد على النواحي الاسلامية .
- الرئيس -** ازاي ؟
- الشاهد -** يلتقى محاضرات .
- الرئيس -** انت أعدت كام سنه في سنه أولى في الكلية ؟
- الشاهد -** أنا طول عمري بانجح بس المرض هو السنه دي اللي خلاني أسقط .
- الرئيس -** والا لما دخلت الجهاز السرى سقطت ؟
- الشاهد -** سقطت مره لما رحت القنال وبعد ذلك مرضت بالكلى ولم أدخل الامتحان بأمر الطبيب .
- الرئيس -** الادعاء عايز يسأله ؟
- المدعى -** لا .
- الرئيس -** الدفاع عايز يسأله ؟
- الدفاع -** لا .
- الرئيس -** هات الشاهد اللي بعده .
- المدعى -** الشاهد يحيى سعيد .
- ( نودى على الشاهد يحيى سعيد فحضر )
- الرئيس -** اسمك ايه ؟
- الشاهد -** يحيى سعيد محمود سعيد .
- الرئيس -** عندك كام سنه ؟
- الشاهد -** حوالى ٣٥ سنه .
- الرئيس -** بتشتغل ايه ؟
- الشاهد -** موظف في مخازن مصلحة التنظيم .
- الرئيس -** درجة ايه ؟
- الشاهد -** باليومية .
- الرئيس -** من اد ايه موظف ؟
- الشاهد -** من سنة ١٩٣٦ .

الرئيس — وقبل سنة ١٩٣٦ ؟

الشاهد — ما كنتش موظف .

الرئيس — وكنت بتشتغل ايه ؟

الشاهد — كنت باشتغل فى جريدة كوكب الشرق .

الرئيس — بنشتغل فيها ايه ؟

الشاهد — فى المطابع .

الرئيس — عارف ايه ده ( وأشار سيادته الى المصحف ) ؟

الشاهد — أبوه مصحف .

الرئيس — قول والله العظيم أقول الحق ولا شيء غير الحق

والله على ما أقول وكيل

( ردد الشاهد الحلف )

وكيل النائب العام — يا يحيى ايه معلومانك عن جمعية

الاخوان المسلمين ؟

الشاهد — مشترك .

وكيل النائب العام — فى أى شعبه ؟

الشاهد — قديما فى شعبة أولاد علام بالدقى ثم نقلت الى

امبابه من ثلاث سنوات فذهبت الى اخوان امبابه وكنت فى

شعبة خارطة المنيرة بامبابه جنب مدينة العمال لانى سكنت بها

منذ ثلاث سنوات تقريبا .

وكيل النائب العام — هل تعرف شيئا عن النظام الخاص فى

الجماعة ؟

الشاهد — لو كانت هناك انظمة .

الرئيس — انت مشترك فى الجمعية زى ما تكون فى الاتوبيس

او الترامواى . قول عضو بين نوع الاشتراك !

الشاهد — اسمها كده من جماعة الاخوان المسلمين .

الرئيس — المشترك يدفع اشتراك فى جهة معينة ليستفيد

منها ؟

الشاهد — انا كنت ادفع اشتراك عضوية .

**الرئيس -** ايه اللى ضمك للاخوان ؟

**الشاهد -** أحد الاخوان فى المصلحة ، ذهبت معه مره واتنين .

**الرئيس -** سنة كام ؟

**الشاهد -** سنة ١٩٤٧ او ١٩٤٨ فالحقنى بهم وكنت ساكن

فى عزبة اولاد علام وكنت احضر معهم واذاكر مذاكرتهم واعمل  
كما يعملون دراسات فقهية وروحية معهم حتى أزمة سنة ١٩٤٨  
فحلت الجماعة وما كانش لى أى شىء ملحوظ فيهم ولذلك لم  
اعتقل لانى كنت بعيد وعضو جديد فى الوقت ذاته . ولما رحت  
امبابة انضميت اليهم وكان لهم مقر فى المنيرة فكنت اتردد عليه  
باستمرار حتى انى اعرف جميع الاخوان الموجودين فيها وكثرة  
معارفى فيهم كثيرة نظرا لانى كنت قديم وكنت أتقابل بأكثرهم .

**الرئيس -** متى انضممت الى النظام الخاص ؟

**الشاهد -** لم أنضم الى النظام الخاص او حاجة من هذا

القبيل .

**الرئيس -** ما علاقتك بهنداوى ؟

**الشاهد -** ليس لى به علاقة اطلاقا ولم اره سوى مرتين

اتنين لانه فى امبابة وأنا فى المدينة بعيد .

**وكيل النائب العام -** مش تعرف ان فيه نظام خاص فى

امبابة ؟

**الشاهد -** سمعت هذا الكلام منذ شهرين من على نويتو

بالمنيرة ان الاخوان يعملون جيش اسلامى ويعملوا أسر وترتيبات  
من هذا القبيل فكنت أسمع منه الكثير عن هذه الحاجات فقلت  
له ما القصد من هذا الجيش تعملوا بيه ايه فكان يقول طرد  
المستعمر من البلاد العربية . وأنا تمللى يمر على على نويتو  
باستمرار فى المنزل وكنت أسمع منه لانى أحب أسمع كل حاجة  
عنهم فقال ان هناك فكرة لانشاء جيش اسلامى وهذا الجيش  
لتحرير أرض الاسلام من المستعمر - عرفت هذا منه

حوالى شهرين ولكنى لم أنضم لهذه العملية نظرا لانى رب أسرة  
وعندى من الاولاد أربعة .

**وكيل النائب العام -** ما نظام الجيش وكيف يكون فى شعبة  
امبابه ؟

**الشاهد -** سمعت ذلك من على نويتو انهم يقسمون انفسهم  
الى مجموعات كل مجموعة من سبعة افراد او ثمانية وأفتكر  
سبعة أشخاص ويعملوهم وحدات صغيرة او جماعات صغيرة .  
**وكيل النائب العام -** فيه فى امبابه كام مجموعة ؟

**الشاهد -** كان يقول لى هناك أربع مجموعات .

**وكيل النائب العام -** تعرف مين قائد هذه المجموعات ؟

**الشاهد -** كنت أعلم من على نويتو انه هنداوى دوير .

**وكيل النائب العام -** ما وظيفة على نويتو ؟

**الشاهد -** بعد هنداوى دوير على طول مساعده او اللى معاه

على طول بعده على طول .

**الرئيس -** اسمه ايه ؟

**الشاهد -** مساعد .

**الرئيس -** الكلمة اللى ناسيها .

**الشاهد -** مش ناسى حاجة هو كان مساعد هنداوى فى هذه

الجماعة .

**الرئيس -** يعنى الرديف ؟

**الشاهد -** الرديف معروف مساعد له .

**وكيل النائب العام -** هل تعرف محمود عبد اللطيف ؟

**الشاهد -** اعرفه - اعرف محمود عبد اللطيف من زمان

وسمعت من على نويتو فى مرة من المرات انه هو وسعد حجاج

فصلوهم من النظام بتاعهم او التشكيل فأردت ان اتعرف فكان

يقول لى لان اهم مهمة وهى حراسة الاستاذ المرشد اثناء اختفائه

في المدة الاخيرة هذا ما قاله لى على نويتو .

**الرئيس -** المرشد اختفى ليه ؟

**الشاهد -** لا أعرف .

**الرئيس -** مش يهيك تعرف ده ؟

**الشاهد -** والله لا يهمنى ذلك ، وما يهمنيش اختفائه او

ظهوره والذي يختفى طبعا الجبان .

**وكيل النائب العام -** انت بتحب تسمع فماذا سمعت ؟

**الشاهد -** سمعت أنه اختفى بعد حادث منيل الروضة

فخاف على حياته .

**الرئيس -** ما هو هذا الحادث ؟

**الشاهد -** حصل في أثناء الصلاة في منيل الروضة مظاهرة

او حاجة من هذا القبيل وبعدها اختفى .

**وكيل النائب العام -** شفت محمود عبد اللطيف امتى ؟

**الشاهد -** صبيحة يوم الحادث جاءنى الساعة ٧ ونده فنزلت

فقال لى تسمح أنا عاوز شنطه وعلى بيقول أى شنطه فقلت له

مفيش غير بتاعة ابنى الصغير وهيه ناقصة البطانة فقال لى

وريهالى فشافها واخذها ومشى الى جهة المنيرة .

**وكيل النائب العام -** ما عرفتش عبد اللطيف كان رايع فين ؟

**الشاهد -** لا والله شأنه شأن أى أخ أعطيتها له بسلامة نية

وحسن الضمير .

**وكيل النائب العام -** قلت ان التنظيم اللى عاملينه بقصد

تكوين جيش اسلامى ايه اللى سمعته عن اهداف الجيش ده -

وعاوز يعمل ايه او ينفذ ايه وتشكيله في السر ؟

**الشاهد -** احيانا يقول لى مش في السر وهذا الجيش

الاسلامى الغرض منه طرد المستعمر من البلاد العربية وتحريرها

من الاستعمار كما يقول فكانت مهمة هذا الجيش هى انهم

يعدوا انفسهم للمحاربة في الجزائر او تونس او مراکش او في

اي بلد عربى آخر كما سافروا من قبل فى فلسطين .  
**وكيل النائب العام** — ما سمعتش أن الجيش ده له مهمة فى مصر ؟

**الشاهد** — كنت سمعت من على نويتو هذا الجيش معمول' علشان ايه والقصد منه ايه وسألته هل تريدون به الحكم أو عمل انقلاب داخل البلاد فقال لى لاما تقدرش نعمل حاجة ولا تقدر أن نصل الى الحكم ولا بعد سبع سنين ولا نعمل شيئاً الا اذا كان الجيش أو تنظيمه اللى موجود فى قلبه يعمل وما علينا ان نجحت الا أن تؤيدهم .

**وكيل النائب العام** — ازاي يعنى ويحصل ايه والخطة كانت ايه ؟

**الشاهد** — اذا بدا التنظيم اللى فى قلب الجيش وعملت عمل' أو حاجة من هذا القبيل ونجح فيها يبقى تؤيدهم .  
**وكيل النائب العام** — هل المجموعات مسلحة ؟

**الشاهد** — أنا ما كنتش أسمع عن التسليح شىء لأن على نويتو قال ما جابولناش أسلحة .

**وكيل النائب العام** — واذا جت أسلحة ما الغرض منها ؟

**الشاهد** — والله ما كترتش عليه وكنت أخشى أن يحرم عنى بعض الكلام فكنت أسمع منه شوية شوية .

**وكيل النائب العام** — مفروض تقوم هذه المجموعات بانقلاب ؟

**الشاهد** — المجموعات كانت تؤيد من يقومون بالحركة .

**وكيل النائب العام** — مين يقوم بالحركة . ؟

**الشاهد** — الاخوان الذين يقولون عنهم فى صفوف الجيش .

**وكيل النائب العام** — والمدنيين فى المجموعات ؟

**الشاهد** — يناصروهم .

**وكيل النائب العام** — الا يستعملون الاسلحة التى معهم ؟

**الشاهد** — هوه قال يساعدهم ويناصروهم .

**وكيل النائب العام -** اذا تحقق الانقلاب يحصل ايه ؟  
**الشاهد -** في الحكم مش عايزين يغيروا رئاسة الجمهورية  
الا بعد مدة ويعملوا اى رئيس وزارة زى ما يقولوا لمدة وبعدين  
يصلوا فقلت له القصد امتى وتحكموا ازاي فقال لى الكلام ده  
بعد مدة ولا سبع أو ثمان سنين للوصول الى هذا ، لان فيه  
خطوات طويلة أمامنا .

**وكيل النائب العام -** ما هى هذه الخطوات التى سمعتها ؟  
**الشاهد -** البلد ما نقدرش نحكمها لانها عايزه .....  
**وكيل النائب العام -** لو حصل انقلاب ماذا سيحصل ؟  
**الشاهد -** الشعب يطالب بالاشياء التى يقولونها له .  
**وكيل النائب العام -** شكل الحكم ازاي ؟  
**الشاهد -** كما هو عليه مش حيغروه ، مفيش نية التغيير  
دلوقتى والقرآن كما يقولون الآن الحكم به يأخذ وقت طويل فى  
مرحلة سبع سنوات أو أكثر .

**وكيل النائب العام -** الناس اللى يتولوا الحكم مين ؟  
**الشاهد -** مرة قالوا عبد الرحمن عزام ومرة قالوا .....  
مش فاكّر .

**الرئيس -** ماهو عملك فى الاخوان ؟  
**الشاهد -** كنت سكرتير سنة ١٩٥٠ وأعرف أكثر الاخوان  
وبعدين قفّلت فى مدة الشهرين فلم أعمل معهم ولأنه لم يكن لهم  
مكان وبعدين جه وقال لى انت ومحمود ومحمد زكى وعبد اللطيف  
انتم الاربعة تعملوا اسرة وكوناكم اسرة عشان تزودونا بالاخبار  
فقلت له اخبار ايه فقال لى كل شائعة تمس الاخوان تقول لنا  
عليها ونديكم حاجات تدرسوها وتقرأوا فيها وجبلى كتساب  
المعذبون فى الارض فقرانه وبعد كده لم يجيبوا لنا برنامج أو اى  
شئ نقرأه .

**الرئيس -** بس المعذبون فى الارض ؟

**الشاهد -** هذا حصل وبعدين اجتمعنا حوالى ٣ - ٤ اجتماعات لحفظ سورة آل عمران فحفظنا ٣٠ آية على ثلاث مراحل ثم اتقطعنا وانحلينا من انفسنا لانهم بعدوا عنا ومفیش میل منهم الينا اما علاقتى بعلى نويتو فكانت مستمرة فكان يمر على وكان يتكلم معى عن كل شىء .

**الرئيس -** يعنى شमित ان حكاية الدعوة مش ماشية ؟

**الشاهد -** عرفت انها كلام فارغ .

**الرئيس -** والحقيقة ؟

**الشاهد -** الحقيقة يعلمها الله . وهذا زيف وخداع وغش

ونفاق منهم والمقصود حيل لجذب الناس اليهم او شغل ظلام مش حاجة منورة .

**الرئيس -** علشان ايه يجذبوا الناس اليهم ؟

**الشاهد -** علشان يلموا الناس حوالهم .

**الرئيس -** فرحانين بالهيصه دى ؟

**الشاهد -** يكسبوا الناس حوالهم .

**الرئيس -** بالاشتراكات ؟

**الشاهد -** طبعا أقله .

**الرئيس -** قول لنا اذا كنت تعرف شىء عن الاشتراكات .

**الشاهد -** لا أعرف الا منتهى الصراحة . وانا قلت كل ما

اعرفه واى خدمة انا مستعد للافادة بيها .

**الرئيس -** خدمة . . . مش عايزين نخدم .

**الشاهد -** أى حاجة يعنى اذا كانت أى حاجة مش باينة انا

قلتها أقولها الان واقولها لانى ما عنديش شىء أخبيه .

**الرئيس -** رحت أول مرة قابلت هنداوى فين ؟

**الشاهد -** فى مكتبه مع على نويتو .

**الرئيس -** خدك ليه ؟

**الشاهد -** علشان يعرفنى بيه .



**الرئيس —** مش عشان يكشف عليك كشف هيئة يشوفك  
تليق والا لا ؟

**الشاهد —** هذا ما يعلمه الله وطبعاً ما اليقش لانه سألنى  
هل أنا مدرب على النظام العسكرى فقلت له أنا ما خدمتش  
مسكرى وما عنديش وقت للتدريب فقال لى انت متزوج قلت  
له أيوه وعندك أولاد قلت له أيوه فلقيته تبرم وبص لعلى وعمل  
اشارات انى ما انفعش .

**الرئيس —** ما اثر هذا فى نفسك ؟

**الشاهد —** ما اتأترتش .

**الرئيس —** ايه الإخبار بتاعة الشعب ائلى كنت بتودىها ؟

**الشاهد —** والله مفيش حاجة ...

**الرئيس —** مش كنت عامل ضابط مخابرات ؟

**الشاهد —** ولا ضابط ولا حاجة ... ده اللى عمله ، قال

يعنى بينظم اما الحقيقة اللى كان بيقله لى ، هات اخبار او اى  
حاجة ... وفيه واحد اسمه حمزة الجوهري ، فانا كنت  
رحت مع زميلى اللى اسمه حمزة الجوهري .. رحى معاه  
وشفت الاستاذ البهى الخولى ووجدت الجماعة التانيين اصدق  
وحضرت جلساتهم مرة واثنين .. مرة فى مسجد الرفاعى  
ومرة فى مسجد الحسين ومرة فى المركز العام .. أنا رحى  
هناك يوم الثلاثاء — يوم الحادث وغادرت المركز العام الساعة  
ثمانية وثلاث تقريباً وكانوا موجودين بعد المحاضرة نفسها ..  
**الرئيس —** انت قلت فى الاقوال بتاعتك ان على نويتو كان  
يقول لك كل حاجة خاصة بالنظام السرى

**الشاهد —** أيوه ..

**الرئيس —** قل لنا كل حاجة خاصة بالنظام السرى . ؟

**الشاهد —** أنا قلت ده فى التحقيق ..

**الرئيس —** احنا ملناش دعوه بالتحقيق .. احنا عاوزين

نسمع هنا كل حاجة من اول وجديد .. قل لنا كل حاجة  
قالها لك عن النظام السرى .. يعنى عاوزينك تقول لنا الحكاية  
من الالف للباء ..

**الشاهد -** اولاً هو ما كلمنيش عن كلمة النظام السرى على  
اعتبار ان ده معناها الفصائل السرية ، بل على أساس ان  
الفصيلة تتكون من سبع افراد تقريباً .. كل مجموعة تتكون  
من سبع افراد يبقى سبعة فى اربعة بثمانية وعشرين واحد .  
وكنت أسأله هل فلان منهم او ضمتوه يقول لا .. او فلان ده  
منهم يقول أيوه .. وبالطريقة دى عرفت اكثرهم ..

**الرئيس -** تقدر تقول لنا عن أسمائهم .. هه .. توكل على  
الله وقل لنا عنهم ..

**الشاهد -** على طول مفيش حاجة .. انا كنت قلت بعض  
أسماء منهم زى محمد رهونى .. سعد حجاج .. على نويـتو  
طبعاً .. حامد نويـتو .. عبد الخالق او الحاج عبد الخالق فى  
امبابة .. عبد المنصف البحيرى .. عبد القادر سلمانى ..  
صلاح خليفة .. محمود الصياد .. عبد الحى ابراهيم ..  
أظن .. وكثير بس مش قادر اتذكرهم الا اذا سمعت اسمائهم  
**الرئيس -** لا احنا مابنقولش ..

**الشاهد -** أصلى مش قادر احصر الاسماء كلها ..

**الرئيس -** انت ذاكرتك زى الحديد ..

**الشاهد -** لا والله .. ( ضحك ) ..

**الرئيس -** تقدر تقول لنا الاقسام بتاعة الناس دول ، ده جاى  
منين وده جاى منين ؟

**الشاهد -** منين ازاي ؟ لاما أعرفشى .. أنا أعرف خطط ،  
لان المعلومات ما كانتش بتجبنى صح فى الحقيقة ..

**الرئيس -** طيب لما لقيت الجماعة كلها ماشية كده ،  
اتصلت بهم ليه ؟

**الشاهد —** انا انقطعت عنهم قبل الحادث بشهر تقريبا ..

**الرئيس —** ليه ؟

**الشاهد —** غلشان لقيت أحسن منهم .. لان دول كابوا ناس

بتوع شغل الظلام والاختفاء ..

**الرئيس —** مين دول ؟

**الشاهد —** الهضيبي وشلته ..

**الرئيس —** دول بتوع شغل الظلام والاختفاء ؟

**الشاهد —** ايوه ..

**الرئيس —** ايه شغل الظلام والاختفاء ده . ؟

**الشاهد —** اللي يختفى ده معناه ايه ؟

**الرئيس —** تفتكر انت ايه ؟

**الشاهد —** أفندم ؟

**الرئيس —** تفتكر انت ايه ؟

**الشاهد —** اللي يختفى هو ده اللي بيعمل في الظلام ، هو

اللي كان بيث الدعايات في الشعب والحاجات اللي كان بيعملها

ضد الحركة ، والشهرة والتشهير والكلام الفارغ اللي كنا

ينسمعه

**المنعم —** هل تعرف عبد المنعم عبد الرؤوف ، وما معلوماتك

عنه ؟

**الشاهد —** تاني يوم عيد الاضحى الماضي أخذنى على نويتو

صباحا الى منزل مصطفى الوردانى بالمنيرة وكان غائبا في بلدته

.. ده مصطفى الوردانى .. ودخلت فوجدت شخص متوسط

وحليق وقاعد بيشوح على ترايبزه بعلب كبريت مناورات حربية

وبيدرس فيها وبعدين أنا مارضيتش أقول ده مين ولا حاجة ..

**ولكنه قال لى ده الضيف أو الأسد .** فقال لى انت ما شفتش

الشكل ده في المركز العام قبل كده ، قلت له لا فقال لى ده عبد

المنعم عبد الرؤوف وبعد كده قال لى الضيف مشى .. ده كان

رابع او خامس يوم عيد الاضحى الى فات بالضبط فصورته في ذهني لانى قعدت معاهم اكثر من ساعة .

**الرئيس -** ايه الحاجات الحربية اللي كان بيشرحها ؟  
**الشاهد -** والله مافهمتش منه الا انه كان عامل أمشاط كبريت وقاعد مرصصها على ترايزة أكل كبيرة .

**الرئيس -** مين ؟

**الشاهد -** الضيف نفسه . .

**الرئيس -** وكان بيشرحها لمين ؟

**الشاهد -** كان موجود أربعة من اللي ذكرت أسماؤهم . .

**الرئيس -** تقدر تذكر لنا أسماؤهم تانى ؟

**الشاهد -** أعرف منهم حسن عبد المنعم وعلى نويتو واتنين تانيين مش متذكر حقيقة مين هم . . وهو كان قاعد يشرح لهم وكان يرتدى بيجامة على فائلة بحمالات .

**الرئيس -** ألم تسمع عن على نويتو ؟

**الشاهد -** سمعت انهم كانوا في كرداسة مقيمين في معسكر

للتدريب . .

**الرئيس -** تدريب ايه ؟

**الشاهد -** في المعسكرات بتاعة الاخوان للتدريب وكان موجود

فيها عبد المنعم عبد الرؤوف . .

**الرئيس -** تدريب روحى يعنى ؟

**الشاهد -** لا . . ده تدريب جيل . . تدريب عسكرى فى

كرداسة ، وبعدين هاجمهم البوليس وهربوا وما مسكوش حد . . واللى قال لى الكلام ده على نويتو بعدها بأسبوع أو أكثر . .

**الرئيس -** انت عندك معلومات كويسة أوى عن الجهاز

السرى من على نويتو . . فايه شغلة الجهاز ده في الجمعية ؟

**الشاهد -** الحقيقة اللي أنا أفهمه عنه انه زى ما قال لى في

الاول . . قال لى دى فصائل أو نواة جيش اسلامى . . ده

الاصل الحقيقى اللى أنا فاهمه ، أما انه جهاز سرى فبذه كلمة ثقيلة على سمعى ..

**الرئيس -** والجيش الاسلامى ده ايه كانت علاقته ؟  
**الشاهد -** علاقته بايه ؟

**الرئيس -** بجماعة الاخوان ..  
**الشاهد -** جماعات ..

**الرئيس -** يعنى كل واحد يقدر يتطوع فى هذا الجيش ؟  
**الشاهد -** لا .. كانوا هم بيأخذوا ناس مخصوصة ..

**الرئيس -** باعتبارك عضو فى جماعة الاخوان وهى تقوم بعمل نواة جيش اسلامى ، وهذا الجيش غير معلوم لدى جميع الناس ، وبishtغل من تحت الارض .. ما تعرفشى ايه هى علاقة الجيش ده بهذه الجماعة اللى انت عضو فيها ؟

**الشاهد -** والله ده اللى سمعته منهم ..

**الرئيس -** موقفك انت .. تعتقد ايه .. شفت ايه ؟

**الشاهد -** اعتقادى ان هناك فيه شىء فى الظلام .. ان هناك غموض ..

**الرئيس -** تعتقد مين اللى بكون هذا الجيش ؟

**الشاهد -** والله كان على نويتو بصفته هو اللى ماسك العلية دى فى امبابه أصلا ، أما هنداوى فمالوش اتصال بها ..

**الرئيس -** غير يوم الكشف ..

**الشاهد -** ماحصلش علاقة تانية .. وعلى نفسه كان بيتكلم وفى دردشة الحديث قال لى يعنى انى أشترك .. أما كونى أشترك ..

**الرئيس -** قال لك ان فيه فصائل حتكون ، وهذه الفصائل فيها جماعات ..

**الشاهد -** ما قاليش غير دول اللى حضرتهم فى امبابه ..

- الرئيس - يعنى نواة الجيش الاسلامى بدأت فى امبابه ؟  
الشاهد - امبابه دى حاجة من ضمن ..  
الرئيس - من ضمن ايه ؟  
الشاهد - من ضمن الجيش الاسلامى .. لما يطلبوا منهم  
امبابه يقوموا يكونوا ..  
الرئيس - مين اللى يطلب منهم ؟  
الشاهد - الاخوان أنفسهم ..  
الرئيس - مين الاخوان دول .. انت ؟  
الشاهد - الاخوان اللى أعلى من على وهنداوى ..  
الرئيس - مين هم دول يعنى ؟  
الشاهد - الكبار بتوع الاخوان ..  
الرئيس - مين ؟  
الشاهد - الهضيبى وشلتة .. هو فيه حاجة تتعمل من غير  
ما يعرف عنها رئيسها أو المسيطر عليها .  
الرئيس - لازم يعرفها رئيسها ؟  
الشاهد - لازم يعرف بها ده المعتقد ودى الحقيقة ..  
الرئيس - دى الحقيقة ؟  
الشاهد - أيوه لازم يعرف .  
الرئيس - مين هم الناس المتصلين بالهضيبى وبرياسة  
الاخوان ؟  
الشاهد - هنداوى .. وهنداوى يدى لعللى ..  
الرئيس - بواسطة مين ؟  
الشاهد - أنا ماعرفشى التسلسل ..  
الرئيس - انت تعرف على وهنداوى وبعض الاسماء التى  
ذكرتها .. وبعدين السلسلة من أول هنداوى لحد المسئول  
الحقيقى اللى هو الهضيبى .. ما تعرفش حد ؟

الشاهد — لا ..

الرئيس — خالص ؟

الشاهد — لا ..

الرئيس — تعرف انه كان فيه ناس ؟

الشاهد — أعرف من على انه كان بيقول دايم ان المسئولين  
بلغوني هذا ..

الرئيس — يعنى انت كنت واثق ان العملية مش من بنات افكار  
على او هنداوى ؟

الشاهد — مش معقول انها تكون من بنات افكار على او  
هنداوى .. لازم تكون من فوق خالص أعلى من على وهنداوى .  
الرئيس — باعتبارك عضو فى الاخوان ، مين أعلى جماعة فى  
جماعة الاخوان ؟

الشاهد — مكتب الارشاد على طول ..

الرئيس — ومين رئيس مكتب الارشاد ؟

الشاهد — الرئيس بتاعه هو الهضيبى اللى هو رئيس جماعة  
الاخوان نفسها ..

الرئيس — افرض مكتب الارشاد لم يوافق على رأى  
الرئيس ؟ .

الشاهد — يبقى العبرة برأى المكتب وما يهمش الرئيس ..  
وله الحق انه يشيله ..

الرئيس — اختلف معاه وما شالوش ؟

الشاهد — لازم يقر كلام المكتب والهضيبى واحد من ضمن  
اللى فيه .. وده اللى أفهمه من نفس القانون .

الرئيس — يعنى مكتب الارشاد هو المسئول عن نواة الجيش  
والا الهضيبى ؟ .. انت قلت الهضيبى مرة ومكتب الارشاد  
مرة ..

**الشاهد -** الهضبي بعلمه ، اما المكتب فهو مختص بالتنفيذ  
في كل شيء ..

**الرئيس -** الادعاء ... يجب يسأل حاجة ؟

**المدعى -** لا .. مفيش حاجة .. بس عاوز اعرض على الشاهد  
الشنطة ..

( وهنا أشار البكباشي سيد سيد جاد الى شنطة أخرجها من  
بين الاحراز الخاصة بالقضية وقال للشاهد ) :

**المدعى -** دي شنطتك ؟

**الشاهد -** ايوه يا فندم ..

**الرئيس -** دي من غير بطانة ..

**الشاهد -** أيوه من الداخل .. مش كاملة ..

**الرئيس -** ايه الخطة اللي قال لك عنها على نويتو ؟

**الشاهد -** عن ..

**الرئيس -** خطة الاخوان .. فيه خطة قال لك عليها نويتو ..  
خطة يقوم بها جماعة الاخوان بتاعة عمل انقلاب ..

**الشاهد -** سبق أن تكلمت في الحنة دي أمام سيادتكم ..

**الرئيس -** معلش .. قول لي مرة واثنين وتلاته يمكن  
تكون ذاكرتي ضعيفة ..

**الشاهد -** معلش حاضر .. الخطة انهم يكونوا جيش  
اسلامي في قلب الاخوان .. .. هذا الجيش يتكون من فصائل  
وحدات أو جماعات ، وبعدين الغرض منه تحرير البلاد  
العربية من المستعمرين .. أمثال الجزائر وتونس والبلاد  
العربية ...

**الرئيس -** أنا باتكلم عن خطة الانقلاب اللي كنت قلت عليها ..

**الشاهد -** أنا باقول له ايه يعني الجيش ده .. هل أنتم  
مالكوش هدف آخر للجيش ده ؟ أو ايه يعني لازمة هنا



الجيش .. أو أنتم عاوزين تغيروا الحكم ؟ فهو كان يقول لا ..  
احنا لنا تنظيماتنا الخاصة وتشكيلاتنا في كل حنة ، ولما نعوز  
نعمل حاجة زى دى ، ماعليناش الا ان تؤيد الجيش أو الحركة ،  
لانهم هم ما يقدروش يقوموا بحاجة زى دى ..

**الرئيس -** جاء فى كلامك فى التحقيق ردا على السؤال الاتى :  
ألم يذكر لك على نويتو ماهى الخطة التى يسعى النظام  
لتنفيذها ؟ .. فكان لك جواب والجواب بتاعك كالاتى ..  
**الشاهد -** اتفضل ..

**الرئيس -** الجواب بتاعك كان كالاتى : - ان يقوم الاخوان  
جميعا بعد تدريبهم على اوسع مدى عسكريا بعمل انقلاب وهم  
آلاف يريدون أن يتموا اعداد أنفسهم تدريبيا وتسليحا جيدا  
وبمعاونة تشكيلات الاخوان داخل الجيش ورجال البوليس ،  
وانتظارا لاشارة البدء بهذه الخطة يقوم النظام اسرى الموجود  
فى الاخوان بتأييد الانقلاب الذى يبداه البوليس والجيش ،  
وذلك باحتلال المنشآت العامة ، وبعد ذلك يستولى الاخوان على  
الحكم بشرط أنهم ...

**الشاهد -** أيوه ...

**الرئيس -** فاكرا الكلام ده ؟

**الشاهد -** صح ..

**الرئيس -** الكلام ده مضبوط ؟

**الشاهد -** أيوه ..

**الرئيس -** اذن كنت تعرف ان هناك نظام سرى ؟

**الشاهد -** مش جيش ، بل جيش اسلامى ..

**الرئيس -** تقدر تكمل لى بقية الكلام ده ؟

**الشاهد -** أيوه .. سيادتكم جيت وقلت لفساية ما يقوم

الاخوان ...

الرئيس - ويحتلوا المنشآت العامة .. ايه هي المنشآت العامة ؟

الشاهد - يعنى يساعدوا الجيش فى توطيد الحركة نفسها ، وبعد كده يجيبوا حد تانى من غير الاخوان ليمسك الحكم .. منهم أنفسهم ..

الرئيس - مين ؟

الشاهد - أى حد من الناس اللى يثقوا فيهم ..

الرئيس - زى مين ؟

الشاهد - حاجة زى عزام .. حاجة من هذا القبيل ، ومحمد نجيب قالوا يبقى مكانه وبعدين نشيله لاننا مش راضيين عنه .. يعنى فيه بينهم وبينه حاجة زى كده .. مش عاوزينه أما هم يصلوا الى الحكم .. لسه .. فيه مراحل بعيدة كى توصلهم الى الحكم اذعوم ..

الرئيس - ومحمد نجيب بعد ما يخلوه فى رئاسة الجمهورية يشيلوه ليه ؟

الشاهد - مش راضيين عنه ..

الرئيس - ويخلوه فى الاول ليه ؟

الشاهد - عاشان الشعب أو حاجة زى كده ... زى ما قال لى . يستنوا عليه شويه وبعدين يغيروه .. وأنا ما غيرتش من أقوالى ..

الرئيس - يعنى يضحكوا عليه .. يلفوه تحت باطهم وبعدين يتركوه .. ده اسلام ؟

الشاهد - برئت من ذلك ..

الرئيس - برئت من الاسلام ؟

الشاهد - لا من ذلك .. فالاسلام نور ولا خفاء فى الاسلام ..

الرئيس - مافيهش كذب أو نفاق ؟

الشاهد — لا . . .

الرئيس — وليه فضلت في الجماعة دي من سنة ١٩٣٦ ؟

الشاهد — لما أراد الله انى أروح مع الجوهرى واسمع الفريق

الآخر والاستاذ البهى الخولى في مسجد الرفاعى ، واسمع عن  
المرشد وعن انهم فصلوا وفصلوا ، بدأت انتظم في سلوكهم وانقطعت  
عن الجماعة . . .

الرئيس — ايه الاستعداد اللى كانوا بيعملوه علشان حركة  
الانقلاب ؟

الشاهد — تدريب انفسهم في الجيش الاسلامى . .

الرئيس — ايه التسليح بتاع الجماعة ؟

الشاهد — تسليح الجماعة . . كان يقول انهم جيجيبوا لكل

جماعة في فصيلة طبنجتين ومدفع وثلاث بنادق . .

الرئيس — مدفع ايه ؟

الشاهد — مدفع رشاش . .

الرئيس — تعرف اسمه ؟

الشاهد — أى نوع من هذه الانواع . . .

الرئيس — كان عندهم أسلحة ؟

الشاهد — والله ما شفتش . . حقيقة الامر ان على كان

يغضب ويقول لى باستمرار . ما جابولناش أسلحة علشان

التدريب . . وبعدين قال انهم جابوا طبنجتين . .

الرئيس — امتى الكلام ده ؟

الشاهد — من اكر من شهرين . . وبعدها انا طبعى لم

أسأله في حاجة من هذا القبيل ، سوى يوم الشنطة بالليل ،

كان مارر على وكنت انا جاي من المركز العام الساعة تسعة فقال

لى جصل حادث . . حصل كذا وكذا ، فقلت له يا على انت بعت

محمود ياخذ الشنطة منى وما كان منى الا انى لطمت على وشى ،

واترميت على الارض ، وقلت له كده تغشنى .. حرام عليك  
خربت بيتى .. ده عندى أولاد صغار ووالدتى ..  
الرئيس - ايه اللى يخلى على نويتو يضع سره فيك ؟

الشاهد - لكل شخص أن يأخذ واحد أو حد يقدر يتكلم  
معه ، فكان على يجالسنى لقربى من بيته وكان كثير التردد على  
.. فلما كان يشطح كده والا كده كان يتردد على ..

الرئيس - الادعاء ...

المدعى - مفيش حاجة ...

الرئيس - يوم مؤتمر الموظفين كنت فين ؟

الشاهد - أنا ما عنديش تذكرة وكنت فى البيت .. كنت  
قاعد أمام البيت ، وجيرانى يشهدوا بذلك .

المدعى - مؤتمر الموظفين كان سابق على الحادث .. كان يوم  
الخميس ..

الشاهد - والله لم أغادر البيت اطلاقا نظرا لانى كنت تعبانا  
وأعصابى تلفانة عقب الحادث ..

الرئيس - ليه ؟

الشاهد - لانى من بعد ما عرفت حكاية الشنطة قلت كفانة

الرئيس - أنا بأسألك عن مؤتمر الموظفين .. كنت فين يوم  
الحادث ؟

الشاهد - ( يفكر قليلا ) عاوز أتذكر ..

الرئيس - عاوز تتذكر ايه ؟

المؤتمر ده ؟

الشاهد - سيادتكم بتقول ان مؤتمر الموظفين كان قبيل  
كده ..

الرئيس - ( موجهها كلامه للسيد المدعى ) سيبه يتكلم ..

الرئيس - علشان الحادث ؟

**الشاهد** - سيادتك بتقول ان ده كان قبل الحادث .. اذا كان المؤتمر قبل الحادث فأنا لم انتقل من البيت .. بس أنا عاوز أتذكر كان يوم ايه ..

**الرئيس** - يوم مؤتمر الموظفين ؟

**الشاهد** - أيوه .. علشان أتذكر ، وعلشان أوضح الحجة دى .. كان يوم ايه من الايام اللى قبل الحادث .. يوم الخميس او الاربعاء ، علشان أقدر أقول بالضبط أنا كنت فين في الحصة دى بالذات ..

**الرئيس** - تعرف واحد اسمه ابراهيم الطيب ؟

**الشاهد** - محامى فى مكتب عبد القادر عوده ..

**الرئيس** - شغلته ايه ؟

**الشاهد** - محامى .

**الرئيس** - فى الاخوان بيشتغل ايه ؟

**الشاهد** - ما أعرفشى ..

**الرئيس** - هو عضو فى الاخوان ؟

**الشاهد** - أنا أعرف انه من الاخوان من زمان ..

**الرئيس** - من الناس البارزين ؟

**الشاهد** - ليس لى علاقة به ، نظرا لانه فى وادى وأنا فى وادى

آخر ..

**الرئيس** - هو فى أى وادى ؟

**الشاهد** - أنا أصلى فى امبابه مش فى مصر ..

**الرئيس** - امبابه بتاعتنا دى ؟

**الشاهد** - أيوه ..

**الرئيس** - أمال مش فى مصر يعنى ايه ؟

**الشاهد** - أقصد يعنى مش فى وسط القاهرة ..

**الرئيس** - هل قابلته ؟

**الشاهد -** قابلته مرة مع على نويتو لغرض .. كان هذا الغرض من ثلاثة اشهر ، كان قال لى على أنا سأنتظرك فى ميدان الاوبرا ، وبعدين طلعتنا ورحنا على المكتب بتاعه ، فعلى خبط على الباب ، فطلع لنا ولقيته لابس نضارة ، وهو شاب صغير .. قعدوا يتكلموا مدة طويلة وبعدها على قال له أن يحيى اللى فى مخازن التنظيم مع حمزه الجوهري ، ويظهر ان حمزه ده من الجماعة اياهم ..

**الرئيس -** من الجماعة اياهم يعنى ايه ؟

**الشاهد -** يعنى من الجماعة المختلفين مع الاخوان ..

**الرئيس -** حمزه ده اللى اخذك ووداك لابراهيم الطيب ؟

**الشاهد -** حمزه ده اللى رجعتى للاخوان .. يعنى فصلتى من الاخوان وودانى مع الاخوان التانيين البعيدين عن الهضيبى ..

**الرئيس -** الاخوان كانت منقسمة الى قسمين ؟

**الشاهد -** أيوه .. قسم مع الهضيبى ، والقسم الآخر مع الاستاذ صالح عشاوى والاستاذ عبد الرحمن البنا والاستاذ البهى ..

**الرئيس -** الادعاء .. فيه أسئلة ؟

**المدعى -** مفيش ..

**الرئيس -** والآن ترفع الجلسة للاستراحة لمدة نصف ساعة .

( رفعت الجلسة فى الساعة السابعة والدقيقة الخامسة والاربعين مساء )

### اعادة الجلسة

( اعيدت الجلسة في الساعة الثامنة والنصف مساء )

الرئيس - فتحت الجلسة . . المدعى . . الشاهد الذي يليه .

المدعى - عبد الحميد البنا .

( نودى على الشاهد فحضر )

الرئيس - اسمك ايه ؟

الشاهد - اسمى عبد الحميد البنا .

الرئيس - بتشتغل ايه ؟

الشاهد - عامل بمصلحة العامل بوزارة الصحة .

الرئيس - سنك كام سنة ؟

الشاهد - ٢٤ أو ٢٥ سنة . . - ٢٥ سنة .

الرئيس - تعرف ده ايه ؟

الشاهد - أيوه . . مصحف .

الرئيس - قول والله العظيم والله العظيم والله العظيم أقول

الحق ولا شئ غير الحق والله على ما أقول وكيل .

( ردد الشاهد صيغة اليمين )

الرئيس - المدعى

وكيل النيابة - ايه علاقتك بالاخوان المسلمين ؟

الشاهد - من الاخوان يافندم .

وكيل النيابة - فى اى شعبة ؟

الشاهد - وراق العرب .

وكيل النيابة - من امتى ؟

الشاهد - بقالى حوالى تسعة أشهر .

وكيل النيابة - انضميت للنظام ؟

الشاهد - أيوه يافندم .

**وكيل النيابة — وازای انضمامت .. وليه .. قول المحكمة ؟**

**الشاهد —** من مدة شهرين حضر على نويتو وقال احنا عاوزين منكم اسرة تحفظ سورة آل عمران وتفسيرها .. وكنا نجتمع كل اسبوع ونحفظ ثلاث آيات وتفسيرهم .. وبعد ثلاث اجتماع على نويتو قال لى انتقل من الشقة اللى انت فيها لاننا عاوزين اودة ثالثة فانتقلت من الشقة اللى انا فيها لاني متزوج جديد الى شقة مكونة من اودتين وجه على نويتو ومعه واحد ماعرفوش .. وقمت اعمل لهم الشاي وعبال ماعملت الشاي كانوا بيتحدثوا مع بعض فقال لى الاودة دى بتساعة الفرش والاودة الثانية ليست بتطبخ فيها .. فقلت له ايوه .. فقال لا المكان ما يصلحش وبعد كده بعشرة ايام او اسبوع .. ارسل لى على نويتو سبت وطلع منه حاجات ورضها فى صندوق وقال لى دى حاجات فاضية ماتخافشى منها .. وبعدها باسبوع ارسل لى اخوه حامد نويتو ومعه شنط قماش فيها قطعتين وقاللى على اخويا قال لى حطهم جنب الحاجة الثانية .. ويوم السبت قبل حادث الرئيس كنت مريض فأرسلت خطاب للمصلحة للكشف الطبى على ولما علموا الاخوان زارونى يوم الاثنين وصلاح خليفة كان ضمن اللى جم هم وعلى .. جم زارونى .. فعلى قال له مفيش حاجة وصلت المنطقة لحسد دلوقتى . فقال له صلاح لا .. وانا حاولت الاتصال بعلى ماعرفتش .. وبعد مامشيوا بنصف ساعة ارسل لى على اخوه حامد فقال لى احنا عاوزين عشر ظروف من صنف الظرف ده .. فقلت له انا ما اعرفشى .. فدخل تقاهم من الحاجات اللى كانوا جايينها .. الكلام ده يوم الاثنين .. ويوم الثلاثاء قبل حادثة الرئيس الساعة ثمانية الا ثلث جاب ظرف من الصنف ده واخذ عشرة تانيين .. وبعد ذلك يا حضرة الرئيس



لم يتصل بى حامد او على وانا مريض وملازم الفراش لحد ما  
ماجت مباحث الجيزة وقبضت على واخذت الحاجات .

**وكيل النيابة -** امتى جابوا الاسلحة ؟

**الشاهد -** قبل الحادث .. فى سبعة اكتوبر تقريبا بعد

ما سكنت فى الشقة بحوالى ٩ ايام .

**وكيل النيابة -** انت فى مجموعة رئيسها مين ؟

**الشاهد -** صلاح خليفة .

**كيل النيابة -** ايه غرض المجموعة ؟

**الشاهد -** والله يا حضرة الرئيس ما اعرفش .. وهما

قالوا المطلوب حفظ سورة آل عمران وتفسيرها .. واجتمعنا  
مرتين وحفظنا بعض آيات ..

**الرئيس -** المجموعة دى كانت علنية او سرية ؟

**الشاهد -** علنية .. وكنا بنجتمع فى بيت أحد الاخوان ..

**الرئيس -** الشعبة كانت تعرف ؟

**الشاهد -** أيوه والتعليمات كانت حفظ القرآن .

**الرئيس -** والسبت .. كانت الشعبة تعرفه ؟

**الشاهد -** لا على قال لى ما تفهمشى لواحد من الاخوان ودى

حاجة ما يعرفهاش الا أنا وانت وهنداوى .. ولحد الآن ما  
حدش من الاخوان يعرف عنها أى حاجة .

**وكيل النيابة -** ما سألتش ايه الغرض ؟

**الشاهد -** قال دى حاجات كلها فاضية ومتخافش .

**وكيل النيابة -** كانت ازاي ؟

**الشاهد -** حاجات ملفوفة فى ورق جرايد .

**وكيل النيابة -** شكلها ايه ؟

**الشاهد -** كانت ملفوفة فى ورق جرايد .

**وكيل النيابة -** مفتحتهاش ؟

**الشاهد -** هو رصها بايده في الصندوق .

**وكيل النيابة -** ما قالكش انها خطيرة ؟

**الشاهد -** لا هو قال كلها قزاير فاضية متخافشى منها .

**وكيل النيابة -** عرفت امتى انها اسلحة ؟

**الشاهد -** لما ضبطت .

**وكيل النيابة -** مش قبل كده جه حامد وأخد عشرة أظرف .

**الشاهد -** ايوه عرفت ان فيها ظروف لما جه ومعه اظرف

وقال عاوزين من الصنف ده . . وفك علبة من العلب وأخد

١٠ أظرف .

**وكيل النيابة -** شفت ايه ؟

**الشاهد -** لفف مخطوطة في الصندوق .

**وكيل النيابة -** ما شفتش قنابل وقوالب جلجنايت .

**الشاهد -** لا ما شفتش . . هي كانت ملفوفة في ورقها زى

ما هي .

**وكيل النيابة -** ضبط عنده خمس قنابل يدوية من طراز

ميلر . . و ١١ انبوبة حارقة وقوالب مواد متفجرة ولغم متفجر

وحزام دمور بشريط فيه ١٠ أصابع جلجنايت . . وبين المجموعتين

حجر بطارية واجهزة للتفجير ومدفعين وادواتهم و ٣٤٦ طلقة

من عيار ٩ مللى من نوع الطلقات التى استعملت في الحادث .

**الرئيس -** أول اجتماع حدث امتى ؟

**الشاهد -** بقاله حوالى ٤٥ يوم . .

**الرئيس -** كان فين ؟

**الشاهد -** في منزل عبد القادر حنفى سلمان .

**الرئيس -** مين حضره ؟

**الشاهد -** كل المجموعة .

الرئيس - اتكلمتم في ايه . ؟

الشاهد - حفظنا { آيات من آل عمران .

الرئيس - ما تكلمتوش في حاجة خاصة بالاتفاقية ؟

الشاهد - جالنا منشور بعنوان لن تمر الاتفاقية .. وجه

منشور خاص بالرئيس محمد نجيب وأنه طلب ان يطلع على  
المعاهدة وما وافقوش .. وفيه شوية كلام كمان وانا راجل  
عامل ما أفهمش .

الرئيس - صلاح ما قلش الاتفاقية بطالة وله طعن عليها .

الشاهد - صلاح سأل عن المنشور اللي بعنوان لن تمر  
الاتفاقية فلماذا الاتفاقية حتمضى .. فقال على احنا الاخوان  
المسلمين ٢ مليون يا اما ياخذوا برأينا يا اما ما ياخذوش .

الرئيس - وبعدين .

الرئيس - وبس .

الرئيس - لما سألتو صلاح احنا فايدتنا ايه ...

الشاهد - صلاح ؟

الرئيس - أو على فقال لكم انتم جماعة احتياطي .

الشاهد - سأل صلاح على فقال انتم جماعة منظمينكم

ومفيش حاجة جات لنا عنكم .. استمروا في القرآن والتفسير  
لان دوركم لم يأت .

الرئيس - انت قلت في التحقيق انه قال لكم يا اما تشتركوا

اولا ...

الشاهد - نشترك في ايه ؟

الرئيس - مش ده كلامك وقلت انك قلت لصلاح انكم غير

مدربين عسكريا .

الشاهد - نعم يافندم .. حضرتك عايز تقول ايه ؟

**الرئيس -** حضرتى عاوزك تتكلم . . وانت مش قلت له احنا مش مدربين علشان ايه ؟

**الشاهد -** مش أنا اللي قلت له .

**وكيل النيابة -** ما قالش صلاح خليفة أو على نويتو أن قبة خطة ضد الحكومة لمنع توقيع الاتفاقية أو القيام بعمل .  
**الرئيس -** ما قالش أنتم جيش اسلامى تعتمد عليه الجماعة وقت الحاجة .

**الشاهد -** هو قال لى احنا ٢ مليون ياما ياخدوا برأينا اولاً .  
**الرئيس -** الجماعة اللي كانت بتقعد برئاسة صلاح كانت بتعمل ايه ؟

**الشاهد -** احنا اجتمعنا ثلاث اجتماعات . . . اجتماعين حفظنا فيهم قرآن وفى الاجتماع الثالث جانا المنشور بتاع لن تمر الاتفاقية وبعدين الاجتماع اللي فيه المنشور بتاع محمد نجيب .  
**الرئيس -** مين اللي كان مدرب عسكرياً ؟  
**الشاهد -** صلاح خليفة ومحمد الغريتلى وصفوت سيدهم وأنا .

**الرئيس -** وانت اتدربت فين ؟

**الشاهد -** فى معسكر الحرس الوطنى . . قعدت حوالى ٢٦ يوماً .

**وكيل النيابة -** أنت قررت فى التحقيق ان المفروض ان السلاح سيستعمل فى تكوين جيش اسلامى فى الثورة الشعبية اذا تلقى الاوامر بذلك .

**الشاهد -** ازاي ما أعرفشى السلاح وازاي أقول كده وأقول انه حيستعمل فى ثورة .

**الرئيس -** أنت قلت فى مرة ثانية أننا كنا فى منزل عبد القادر سلمان وكان صلاح معاه منشورات فى الشنطة ووزع علينا هذه

المنشورات وفهمنا هذه المنشورات وان فيها عدة بنود .. البند الاول ان الاخوان مستعدين للقيام بثورة شعبية وانهم حي عملوا زجاجات عادية تعبأ بمواد وتلقى أثناء المعركة وفيه اخوان مستعدين بالسلاح .. هذا الاجتماع قبل الحادث بأسبوع - وقلت ان على نويتو قال ان شاء الله ثورة موفقة وان صلاح قال ازاي الاسلحة مجتش للآن .. احنا مفيش عندنا اسلحة ولا سكاكين .. فاذا اعتقلت نعمل ايه .. فقال نهرب واذا ما قدرتش يضع الواحد كل حاجة في بيته من أثاث خلف الباب لمنع الدخول حتى يأتى باقى الاخوان للمساعدة وضرب البوليس .. مش ده كلامك .. ماتطولش معانا خرينا نخلص .. مش دى أقوالك الى انت ماضى عليها قول الكلام الى انت عايز تقوله .

**الشاهد -** على نويتو قال كده لما حضر المنشور الاخير وفيه منشور صغير وبتسالة الاخوان عليه .

**الرئيس -** لما انت عارف كده ما تتكلم .

**الشاهد -** قالوا له ازاي حتقوم بثورة شعبية واحنا ما عندناش حاجة .

**الرئيس -** ما قالش علشان ايه الثورة الشعبية . ؟

**الشاهد -** قال حتيجي الاوامر من المنطقة .

**الرئيس -** علشان ايه .. ؟ انت مش عضو في الاخوان وهي قال حتعملوا ثورة شعبية ما سألتش ليه ؟

**الشاهد -** ما سألتش .

**الرئيس -** فيه واحد ينضم لثورة شعبية ما يعرفش فرضها .. انت معذور ياابنى انت عامل .. ويمكن كمان بحل القراءة والكتابة .

**الشاهد -** والله صحيح .

**الرئيس -** كنت بس بتشيل اسلحة ؟

- الشاهد -** قالوا ان فيه ثورة شعبية وافقت عليها الجماعة وطبعا مش حتشترك الا لما تيجى الاوامر ..
- الرئيس -** انت مش عارف تتكلم .. كنت بتحفظ دين ازاي .. وكنت بتحفظ آل عمران ازاي ؟
- الشاهد -** كنا بنحفظ ٧ او ٨ آيات فى الاسبوع .
- الرئيس -** عارف معنى الايات اللى انت حفظتها ؟ تقدر تقول لنا آية واحدة منها ؟
- الشاهد -** زى ايه ؟
- الرئيس -** حاجة من الحاجات اللى حفظتها .
- الشاهد -** زى ايه ؟
- الرئيس -** الادعاء فيه أسئلة تانية ؟
- المدعى -** حد طلب انك تحتفظ بزجاجات فاضية فى بيتك ؟
- الشاهد -** على قال كل واحد يحفظ زجاجتين فاضيين .
- المدعى -** علشان ايه ؟
- الشاهد -** معرفش : . وواحد قال ان كان على القرايزنشتري اية او مايتين - فقال ان كان يحصل شرا بلاش .
- الرئيس -** مين اللى كان بيعيب المنشورات ؟
- الشاهد -** على نويتو .
- الرئيس -** ومين تانى ؟
- الشاهد -** وصلاح خليفة .
- الرئيس -** اتفقتم انكم تسموا انفسكم بغير اسماءكم الحقيقية ؟
- الشاهد -** لا ..
- الرئيس -** تعرف محمود عبد اللطيف ؟
- الشاهد -** ايوه .
- الرئيس -** تعرفه منين ؟
- الشاهد -** من اخوان امبابه وجالنا فى حفلة الفطار فى رمضان

الى فات .

الرئيس - تعرفه من امتى ؟

الشاهد - من ٧ - ٨ شهور

الرئيس - صاحبه ؟

الشاهد - لا .

الرئيس - انت متبرى منه ؟

الشاهد - انا ما اعرفش حتى بيته .

الدفاع - انت كنت فى الجهاز السرى بتاع امبابة . . كان

عددكم كام ؟

الشاهد - انا من الوراق وما اعرفش حاجة عن الجهاز السرى

الدفاع - قالوا لكم جيش اسلامى . .

الشاهد - احنا مجموعة وراق العرب .

الدفاع - برياسة مين ؟

الشاهد - صلاح خليل

الدفاع - وهنداوى تعرفه ؟

الشاهد - رئيس المنطقة فى امبابة .

الدفاع - المجموعة بتاعتكم كام ؟

الشاهد - سبعة .

الدفاع - تبقى احدى المجموعات .

المدعى - هل تذكر السبب فى تسليح المجموعة ؟

الشاهد - ما حصلش تسليح .

( انصرف الشاهد )

( مثل الادعاء البكباشى ابراهيم سامى جاد الحق والاستاذ

عبد الرحمن صالح )

الرئيس - الشاهد الذى يليه .

المدعى - السيد عبد الله الرئيس

- ( تودى على الشاهد فحضر )  
الرئيس - اسمك ايه ؟  
الشاهد - السيد عبد الله الرئيس  
الرئيس - سنك كام سنة ؟  
الشاهد - ٢٦ سنة .  
الرئيس - بتشتغل ايه ؟  
الشاهد - طالب فى كلية الاداب .  
الرئيس - فى سنة كام ؟  
الشاهد - فى آخر سنة .  
الرئيس - قل والله العظيم والله العظيم والله العظيم اقول  
الحق ولا شىء غير الحق والله على ما اقول شهيد .  
( اقسم الشاهد اليمين )  
الرئيس - المدعى .  
وكيل النيابة - هل انت عضو فى جماعة الاخوان المسلمين ؟  
الشاهد - نعم انا عضو فى جماعة الاخوان المسلمين ؟  
وكيل النيابة - منذ متى ؟  
الشاهد - منذ سنة ١٩٤٦  
وكيل النيابة - فى أى شعبة انت ؟  
الشاهد - فى شعبة بين السرايات .  
وكيل النيابة - هل ما زلت بها ؟  
الشاهد - نعم  
الرئيس - الى الان ؟  
وكيل النيابة - لم تكن فى منطقة اخرى ؟  
الشاهد - لا .  
وكيل النيابة - مالكش اى نشاط فى شعبة اخرى ؟  
الشاهد - لا .



**وكيل النيابة -** ألم تكن في وقت ما في منطقة عرب جهينة ؟  
**الشاهد -** نعم .

**وكيل النيابة -** ماذا كنت تعمل بهذه الجهة ؟

**الشاهد -** كنت أعمل في النظام السرى للاخوان المسلمين .  
**وكيل النيابة -** أشرح هذا النظام للمحكمة .

**الشاهد -** حينما كنت في شعبة بين السرايات وحدثت مشكلة الاستاذ المرشد العام وبعدين رحنا عند المرشد العام نسأله عن سبب فصل عبد الرحمن السندي وزملائه عاتبنى شخص يدعى محمود يونس عن هذا العمل وتعرفت به وألحقنى بالنظام السرى فى عرب جهينة وكنت اعمل مع سبع اشخاص وزارنا فى عرب جهينة ابراهيم الطيب وقال لنا فى هذا الاجتماع **اننا سنتخذ موقف ايجابى من الحكومة فسألته لماذا سنتخذ هذا الموقف فقال لأحد سببين** **عشان نعرقل المعاهدة من ناحية ومن ناحية ثانية اذا الحكومة حلت الاخوان نتخذ هذا الموقف الايجابى** فبدأت أفكر من ذلك الحين فى هذه السياسة ثم بعد أن غادر ابراهيم الطيب عرب جهينة جاء الحاج محمود يونس وقال ان فيه تنظيم جديد سرى سيعمل للفصائل والجماعات وكل فصيلة من اربعة اشخاص والجماعات من ثلاث اشخاص مقاتلة وقال لى انت تبقى قائد الفصيلة وبعد ذلك كلفنى ابراهيم الطيب ان اجرد الاسلحة الموجودة لدى الاخوان المسلمين وفى هذه الاثناء بدأت افكر لماذا هذا العمل وجردت الاسلحة الموجودة فى عرب جهينة وكفر حكيم والدقى وهناك وجدت اسلحة فى الدقى أثارت انتباهى لماذا توجد فى شقة وسط القاهرة ؛ كل هذه الاشياء أثارت انتباهى ، وكلفت بنقل اسلحة الى حلوان والمعادى فنقلتها فعلا وبدأت أفكر جديا فى هذه السياسة فكتبت

خطابا الى ابراهيم الطيب ليرفعه الى الاستاذ المرشد عن هذه السياسة وناقشت الامر من وجهة نظرهم ووجهة نظرى وخرجت بالثلاث نتائج الآتية :-

**الاولى -** الا نتخذ موقف ايجابى من الحكومة وان نقول رأينا في المعاهدة رأى حر وأن تكون المعركة معركة رأى .  
**والثانية -** ألا يكون رأى الاخوان رأيا ملزما لأننا لسنا أغلبية في البلاد .

**والثالثة -** ان هناك فترة انتقال حددتها الحكومة وستنتهى وبعدها سيجرى انتخابات وسيعقد مجلس النواب وفي الحياة الدستورية المتبع ان القوانين التى تصدر فى غيبة البرلمان تعرض على أول برلمان يعقد فلو أخذنا أغلبية فلا مانع أن نقول رأينا في المعاهدة بصراحة ولم ازد فى هذا الخطاب عن هذا . ثم رد على ابراهيم الطيب عن طريق حسين شعبان وقال لى هل انت مستعد لتنفيذ غير ما أرسلته فى خطابك . فأثارتنى هذه العبارة فقلت له فى الخطاب الاخر الذى ارسلته الى ابراهيم الطيب اننا لا يمكن ان يكون هناك رأى ولا يناقشه احد ، ولا بد ان نناقش الامور بالحب والصفاء ونخرج بحل يشرف الدعوة ويحفظ هذه الدماء التى ستسيل واصريت على مقابلة الاستاذ المرشد لشرح الموقف وقلت له فى اخر خطاب انى اعتكف فى المنزل حتى اقابل الاستاذ المرشد ثم اعتقلت فى ٤ اكتوبر سنة ١٩٥٤

**وكيل النائب العام -** متى بدأ التنظيم الجديد للنظام السرى فى الجماعة ؟

**الشاهد -** منذ حوالى خمس شهور .  
**وكيل النائب العام -** وما هو الغرض من التنظيم الجديد ؟  
**الشاهد -** لغاية ما اعتقلنا لم يقل لنا احد الغرض منه ، وانما فهمت أن التطور الطبيعى للنظام السرى للاخوان المسلمين هو

عرقلة المعاهدة او ان نتخذ موقف ايجابى اذا حلت الحكومة  
الاخوان .

**وكيل النائب العام -** ماهو الغرض من التنظيم الجديد فى  
الفترة الاخيرة ؟

**الرئيس -** تنظيم الجهاز السرى .

**الشاهد -** هو كان استمرار أو اعادة تنظيم جديد .

**الرئيس -** اعادة تشكيل .

**الشاهد -** لم يقال لنا الغرض من ذلك .

**الرئيس -** ماهو الغرض الذى تستهدف به الجماعة من ايجاد  
النظام السرى - انت قلت فى صدر الكلام انك أحد أعضاء الجهاز  
السرى فباعتبارك مشترك فيه ماهى الاغراض من وجوده ؟

**الشاهد -** حينما عدت من فلسطين كونونا الى مجموعات ، كل  
مجموعة من خمسة أشخاص ولم نعرف من سنة ١٩٤٩ او اواخر  
١٩٥٠ لغاية ماذهبنا الى معركة القنال اننا من الجهاز السرى الا  
عند سفرنا الى القنطرة لمحاربة الانجليز ، فى هذه الليلة فقط عرفنا  
أننا من الجهاز السرى للاخوان - والله على ما أقول شهيد - وحينما  
عدنا بقينا فى هذه المجموعات . وانا كشاب لم افعل فى حياتى  
ما يضر بلدى ولم أكن اتصور الا حينما بدأت الاسلحة توزع اننا  
سننتخذ موقف ايجابى أو ان الشعب سسيحارب بعضه ولم أكن  
أتصور مطلقا هذا وبدأت افكر فى هذه السياسة ثم بعد ذلك  
بدأت اعارضها بكل شدة .

**وكيل النائب العام -** وضع المحكمة اجزاء الفصيلة التى كنت  
ترأسها فى عرب جهينة يعنى اسمها ورؤساء المجموعات وما تعلمه  
عن الاعضاء بصفتك كنت قائد لهذه الفصيلة ؟

**الشاهد -** لقد وضحت هذا فى التحقيق وسأذكر ما تذكره الان .

انا كنت قائد الفصيلة ورديفى محمد الديب وكان قائد الجماعة الاولى شخص يدعى سيد ناصر وقائد الجماعة الثانية محمد سليمان الهضيبى وقائد الجماعة الثالثة احمد الصاقورى وقائد جماعة الخدمات امام حجر وهناك أشخاص آخريين مذكورين فى المحضر .

**وكيل النائب العام -** ذكرت الان احمد الصاقورى وسيد ناصر وامام حجر وقلت اسماعيل سليمان الهضيبى . فهل كان اسماعيل الهضيبى أحد رؤساء المجموعة الرابعة او له وظيفة أخرى ؟  
**الشاهد -** وظيفته مخزنجى وقائد جماعة المخبرات .

**وكيل النائب العام -** فمن اذن قائد الفصيلة الرابعة ؟  
**الشاهد -** محمد سليمان انا ذكرت سيد ناصر ومحمد سليمان واحمد الصاقورى وامام حجر

**وكيل النائب العام -** وما وظيفة امين درويش مأمون ؟  
**الشاهد -** سيد ناصر اخذوه مننا وجاء مأمون درويش مكانه .  
**وكيل النائب العام -** هل تعرف افراد هذه المجموعات وفى هذه المنطقة بالذات ؟

**الشاهد -** أنا قلتها فى التحقيق واذكر منهم محمد امام ابراهيم وسعيد عماره وعبد الوهاب البحرى وعبد السلام عماره ورضوان عزام زريق ومحمد بدر الدين قصبى وسيد المشتولى واحمد شعلان ودول اللى فاكرهم مع انى ذكرت ١٨ اسم فى التحقيق .  
**الرئيس -** مين اللى جند دول ؟

**الشاهد -** محمود يونس .  
**الرئيس -** هل كان يرأس هذه الفصيلة قبلك ؟  
**الشاهد -** احنا قسمناهم مع بعض ولا اعرف هل كانت هذه الفصيلة موجودة قبل هذا ولا ؟  
**الرئيس -** من الذى جمع لك هذه الاسماء ؟

**الشاهد -** محمود يونس .

**الرئيس -** وراح فين بعد كده ؟

**الشاهد -** كان اسماعيل عارف هو اللى يعطينا الاوامر لانه كان المسئول عن الانصال بقيادة الفصائل .  
**وكيل النائب العام -** والقيادة لمين ؟

**الشاهد -** لابراهيم الطيب وهو اتصل بى شخصيا . وانا بلغت عن جميع المخازن وقادة الفصائل التى اعرفها وذلك بعد أن اقتنعت انه لابد من حقن الدماء وخسيسة ان الشعب يضرب فى بعضه .

**الرئيس -** ولما تريت على الفصييلة ما عرفتس ايه واجباتها ؟  
**الشاهد -** كنا بنتدرب وام يصدر لنا اى امر والله على ما أقول شهيد ، أما ماهى مهمتنا او حنعمل ايه فحتى ان اعتقلنا فوالله والله على ما أقول شهيد لم يرد علينا بجواب وهذا مما دفعنى على أن اكتب هذا الخطاب الذى كتبته .

**وكيل النائب العام -** انت بررت وجود النظام السرى قبل الثورة فما معنى وجود سرية هذا النظام المسلح فى عهد الثورة ؟ خاصة وقد أعيد تنظيمه منذ ٥ شهور كما ذكرت ؟

**الشاهد -** أنا كمواطن طبعا لى عقل أفكر وطبعا لم اعمل أو أفعل مايضر بلدى ولن أفعل مايضر بلدى وهذا مما دفعنى الى الاعتراف على من اعتدوا على سيادة الرئيس واعتقدت انهم « يلبخوا » حينما سألت عن هذه الاشياء وقلتها بصراحة ، والذى كنت أفهمه هو اننا نخدم البلد وقد نحارب الانجليز وقد .. وقد .. وقد ..

**وكيل النائب العام -** اذا تمشيننا معك بالرغم من انك خرجت عن السؤال ومع اعتقادك ان الغرض من وجود النظام السرى هو محاربة الانجليز ، فهل قصرت الثورة فى حق البلد من هذه الوجهة

حتى يستلزم الامر وجود نظام سرى مسلح في جماعتكم ؟  
**الشاهد -** تنظيم الفصائل كان موجود قبل المفاوضات ، وعلى  
اية حال رأى الاخوان كان رأى جماعى وقالوا اننا غير موافقين على  
المعاهدة انما مش رأى افراد ولا اعتقد ان الثورة قصرت في حق  
البلد .

**وكيل النائب العام -** انت مش عارف ان فيه تدريب للحرس  
الوطنى فهل كان هذا التدريب سرى او علنى وسمح فيه لكل  
الافراد بالاندماج ، وهل كانت هناك استعدادات للمعركة اذا لم  
يتم الاتفاق أولا فما الذى دعاكم الى انشاء هذا النظام السرى ؟  
وخاصة في العهد الاخير الذى وضعتموه ؟ ألم تكن هناك  
مفاوضات كانت على وشك الانتهاء بالاتفاق فما المقصود اذا من  
عمل مثل هذا الجهاز السرى ؟

**الشاهد -** انا في هذا برضه كمواطن كنت احب الخير لبلدى  
ومش معقول اشترك كما ذكرت في شىء يضر بلدى .  
**الرئيس -** ماهو هدف الاخوان المسلمين الذى من اجله وجدت  
النظام السرى ؟

**الشاهد -** ذكرت فيما قبل ان ابراهيم الطيب قال حاجتين  
وهى اننا سنحارب الانجليز ونعرقل المعاهدة والثانية اذا الحكومة  
حلت الاخوان فنتخذ منها موقف ايجابى وانا شخصيا لم اوافق .  
**الرئيس -** كأن جماعة الاخوان تبلورت في شيئين الاول  
اذا ما كانش فيه معاهدة يبقى ماكانش فيه اخوان مسلمين لان  
الاخوان هدفهم عرقلة المعاهدة .

**الشاهد -** الجماعة لها رسالة وهى نشر الاسلام .

**الرئيس -** وجهاز سرى .

**الشاهد -** الحالات التى يجوز شرعا فيها قتل المسلم هـى

الزنا . .

**الرئيس -** لا داعى لهذا لان احنا شفنا اللي علموه لكم عن الاسلام انما انا باسأل هل تعليم الاسلام يكون بواسطة انشاء جهاز سرى مقسم الى فصائل ومخابرات وأسلحة وجهاز سرى ومخازن تجرد ورئاسات وسرية هل هذه هى الدعوة الاسلامية ؟  
**الشاهد -** لا

**الرئيس -** اذن ما هو الغرض من ايجاد هذا النظام باعتبارك انك أخ مسلم ومتعلم وانت من رؤسائه ، فليه هذا النظام كان موجود فى هذه الجماعة ؟

**الشاهد -** أنا فهمت الآن انه غلط وفهمى قبل كده كان خطأ.

**الرئيس -** قل لنا فهمكم قبل الآن كان ايه ؟

**الشاهد -** اللي كنت فاهمه ان هذا النظام لمصلحة الوطن لحرب الانجليز أو أى حاجة بعيدة عن البلد ولم أكن أفهم اطلاقا اننا نضر البلد .

**الرئيس -** اذا كنت عايز تحارب الانجليز فما هى الفكرة فى انك تعمله جهاز سرى، مكنش على ليه ؛ مع ان فيه منظمات عملتها الحكومة علنية زى الحرس الوطنى ، فليه السرية ومتى تجوز ؟

**الشاهد -** السرية تجوز كما علمت من التاريخ وانا شاب فى قسم التاريخ بكلية الاداب انها تجوز للثورة أو أى شىء من هذا القبيل .

**الرئيس -** لتغطية موقف ، وهذا الموقف غير مصرح به فايه الموقف اللي عاوزين تغطوه ؛ هل هو دعوة الدين اظن مفهش هذا هل هو محاربة الانجليز برضه مش عاوز تغطية فاذا كان لا هذا ولا ذلك فايه هو الموقف اللي انتم عاوزين تغطوه ويحتاج الى السرية وانت متعلم وفى الليسانس قسم التاريخ قل لنا ما الداعى

واحدنا نحب نسمع بقدر ماتفرضه عليك تعاليم الاسلام من صدق وأمانة .

**الشاهد -** أنا كما ذكرت من قبل يجوز أنا كنت فاهم غلط .  
**الرئيس -** مين فهمك غلط ؟

**الشاهد -** قيل لنا حينما كنت في المجموعات اننا نستعد لمحاربة الانجليز في القنال وفي النظام السابق كل الشعب خرجت الى القتال فاطمئنت الى اننا نعمل لمصلحة الوطن .

**الرئيس -** حرب القنال ما كانش فيها سرية وكنتم بتمونوا بالاسلحة وكانت الاسلحة اللي بتروح لكم بدل ما توردوها القنال كنتم تخزنوها .

**الشاهد -** والله أنا لأعرف شيئاً عن هذا وأنا مكنتش لغاية حركة القنال أعرف اني في النظام السرى .  
**الرئيس -** انت مكنتش تعرف انك في الجهاز السرى وبعد ما عرفت .

**الشاهد -** بعد هذا فهمونا اننا بنعمل لمصلحة البلد وخرجنا قبل هذا الى محاربة الانجليز في القنال .

**الرئيس -** ايه مصلحة البلد دي . حاجة تتاكل او تتشرب عاوز أعرف ايه معنى كلمة مصلحة البلد اشرح لي ايه مصلحة البلد ومدى انطباق هذا على التنظيم السرى المسلح وايه الدعوة الاسلامية هذه الاشياء الثلاثة لا يمكن فكهم من بعض فيينهم لى .  
**الشاهد -** ... ( لا يجيب )

**وكيل النائب العام -** اذن سأتلو أقوالك الآن أمامك وهي التي قلتها في التحقيق أمس فقد سئل عما هي أهداف هذا النظام السرى المسلح والذي لم ينشأ الا منذ خمسة شهور فأجاب « بأن ابراهيم الطيب عندما زار شعبة جبهينة وكان



هناك الصاقورى ومحمد سليمان الهضيبى وأمين درويش فى منزل اسماعيل الهضيبى بعد العصر قال اننا يمكن نتخذ اجراءات ايجابية ضد الحكومة لعرقلة الاتفاقية التى كانت المفاوضات جارية بشأنها وكذلك اذا حلت الحكومة الاخوان نتخذ ضدها اجراءات ايجابية لذلك صدرت بعد ذلك تعليمات التى بلغها لنا محمد يونس بتشكيل الجهاز السرى المسلح فلما اردت ان استفسر منه عن معنى الاجراءات الايجابية فأفصح وقال تعرقل اتمام الاتفاقية وذلك اما بضرب الانجليز او عمل ثورة مسلحة للقضاء على الحكومة الحاضرة .

اظن الاهداف حددها ، ( موجهها كلامه للشاهد ) هل هذه اقوالك ؟

**الشاهد - أيوه**

**الرئيس -** انت قلت فى الخطاب الذى أرسلته الى ابراهيم الطيب « انه اذا لم يكن هناك قوة فى الجيش او البوليس فان مأساة سنة ١٩٤٨ ستتكرر لان الشعب دائما مع القوى ولا وعى له ولا نضوج وفى رأى اذا كان الوعى فى داخل نفوسهم فانه لا يتعداه الى الخارج لذلك فهو سيقف موقف المتفرج ويصفق للغالب » هذا الكلام الذى ورد فى خطابك تقدر تفسره لنا وما كان يدور فى خلدك عند ما ذكرت القوة التى فى الجيش او البوليس .

**الشاهد -** انا كان غرضى الاول من ارسال هذا الخطاب ان يكون هناك ود بين الحكومة والاخوان وما يكنش فيه حزازات .

**الرئيس -** لكن هذا يتنافى مع ما قلته فى هذا الخطاب من أنك عاوز تعمل بينك وبين الحكومة معركة رأى حروان تقول بكل صراحة رأيك وتتحمل نتائجها ؛ هذا أولا وثانيا أقرت ان هناك معركة بينك وبين الحكومة ولكن عاوز قلبها الى معركة رأى حر

ومش عايز تبدأ بالعدوان .

**الشاهد** - كان غرضي الا اعتدى لان الاسلام لا يقر الاعتداء .  
**الرئيس** - يعنى انت مش عايز تبدأ بالعدوان الى ان تكون  
قوة في الجيش او البوليس حتى لا تتكرر مأساة سنة ١٩٤٨  
يعنى يا استاذ يابتاع الاداب ان ده مش مسالمة . يا اخوانا  
شوية منطق بين لنا بصراحة وببساطة .

**الشاهد** - قلت لحضرتك قبل هذا سبب كتابة هذا الخطاب  
من وجهة نظري حيننا او من وجهة نظرهم حيننا آخر وهو الا  
يكون هناك صدام هذا كل الذي أقصده من كتابة هذا الخطاب .  
**الرئيس** - لكن هذا ينفي كلامك في رابعا وهى ان « القوة التى  
في أيدينا لا تكفى في رأى لاحداث شيء كبير وقد تؤدي بعض  
الاعمال ولكنها لن تستمر ان لم يكن كما قدمت آنفا - لنا قوة  
في الجيش او البوليس » دى وجهة نظر مين ؟ لان ساعة تقول  
دى وجهة نظري وساعة تقول وجهة نظرهم ، عاوزين نعرف دى  
وجهة نظر مين فيكم ؟

**الشاهد** - الواحد لما يعرف نفسه ضعيف يجب الا يدخل  
معركة وقلت لحضرتك بعد هذا انهم عايزين يعملوا معركة  
مسلحة اذا الحكومة حلت جماعة الاخوان المسلمين .

**الرئيس** - آه . . معركة ايه اللى انت عايز تدخلها مع الحكومة  
**الشاهد** - اذا الحكومة حلت الاخوان .

**الرئيس** - تحلها ليه . ليه منتظرين الحل ؟

**الشاهد** - انا افرض فرض ؛ وكل هذا الفرض فرضته بيني  
وبين الله والله لم أقصد الا كده والله ما أقصد شيء أبدا .

**وكيل النائب العام** - تمشى شوية في أهداف الجهاز السرى  
قلت ان فصيلتك التى ترأسها انها تتلقى الاوامر من ابراهيم

الطيب عن طريق اسماعيل عارف . فهل يتصرف ابراهيم الطيب في شئون هذه الجماعة أو في هذه الفصائل السرية تلقائيا من نفسه دون رئاسة ؟

لقد سألناك هذا السؤال وأجبت عليه .

**الشاهد -** ابراهيم الطيب لا يمكن أن يتصرف من نفسه ولا بد فيه رئاسة أعلى .

**وكيل النائب العام -** مين

**الشاهد -** لا اعرف ولا بد أن تخضع لتعليمات الاستاذ المرشد .

**وكيل النائب العام -** اذا اصدر ابراهيم الطيب تعليمان الى رئاسة الفصائل للقيام بحركة مسلحة فهل في مكنته اصدار مثل هذا الامر دون أن يكون معه أمر من رئيس أعلى أو من المرشد .  
**الشاهد -** بحسب تسلسل القيادة لازم أخذ أمر قبل هذا .  
**وكيل النائب العام -** انت قلت في الحثة دى أن المرشد اصطدم بعبد الرحمن السندي وأعلن أن لا سرية في الدعوى ؛ وانتهى الامر بفصل عبد الرحمن السندي لانه اختلف مع المرشد وأبى أن يخضع لقيادته . فما هو السر في أن يلجأ المرشد مرة أخرى الى تشكيل جهاز سرى آخر بأفراد وبنظام جديد ؟

**الشاهد -** السر في كده انه عاوز يسيطر على الجهاز ..

**وكيل النائب العام -** جهاز ايه ؟

**الشاهد -** الجهاز السرى .. وهو أعلن ذلك من قبل ثم فصل

عبد الرحمن السندي وشكل الجهاز ..

**وكيل النائب العام -** ايه الغرض ؟

**الشاهد -** يسأل الاستاذ المرشد في هذا ..

**وكيل النائب العام -** انت فهمت من كده ايه ؟

**الشاهد -** حضرتك اقرأ الكلام بتاعى ..

**وكيل النائب العام -** قل انت الكلام ده .. اذكر الكلام اللي قلته في التحقيق ..

**الشاهد -** يجوز انى نسيت الكلام ده من امبارح لغاية النهار ده ..

**وكيل النائب العام -** انت مش نسيت ؛ بل انت قلت هذا الكلام فى جو بعدما شربت حوالى عشر كوبيات ميه .. ( ضحك ) .. بعد ان يعلن على الملأ أن لا سرية فى الدعوة ، لماذا يلجأ الى تنظيم سرى وبأسلحة أخطر من الاول ؟

**الشاهد -** لازم له أهداف .. يسأل هو فى هذا .. انا يمكن اقول ظن ، وانما هو عنده الخبر اليقين ..

**الرئيس -** جاء فى كلامك لابراهيم الطيب ، لقد حدد الامام الشهيد العدد الذى ندخل به المعركة كما قرره رسول الله صلى الله عليه وسلم وهو اتناشر ألف ؛ وقال المرشد فى المؤتمر الخامس اذا بلغ عددكم هذا فأمروني ان أخوض بكم البحار وأن أحارب بكم الدنيا جمعاء وانى لفاعلها .. تقدر تقولى الاتناشر ألف دول تدربوهم ازاي وتسليحوهم ازاي ؟  
**الشاهد -** بس حضرتك كمل الفقرة ..

**الرئيس -** ده كل ما ورد فى الفقرة « ثامنا »

**الشاهد -** ما هو « تاسعا » تتعلق بالنقطة اللي قبلها ..

**الرئيس -** « تاسعا » .. وفى رأى أن معاهدة تعقد اولاتعتقد تمضى او لا تمضى لا يغير من سياستنا فى شىء .. انكرناها ونحن سائرون فى طريقنا الى أن تبلغ دعوتنا مبلغها من النفوس ، وحينئذ فقط تبدأ المعركة التى لا هوادة فيها . أما أن تضطربنا الظروف لدخول معركة طارئة فهذا أمر مستحيل او تنفيذه يحتاج الى تفكير واخذ ورد والاتفاق .. على رأى نهائى فيه ..

الشاهد - مكنوب بعد كده ..

الرئيس - تحب أقرأ « عاشرا » ؟ ..

الشاهد - أيوه ..

الرئيس - أقرأ الجواب كله يعنى ؟

الشاهد - معلش يا فندم ..

وكيل النائب العام - أمال امبارح كنت بتتناقش فى ايه ؟ ..

( ضحك ) ..

الرئيس - والله أنا ما باشتغلشى مقرئ .. ( ضحك ) ..

الى كاتب الجواب ويضع خطة ويقدر موقف ، لازم يفهم معنى تقدير الموقف بتاعه . . ومع ذلك أنا حاقرا الجواب كله علشان اخواننا المواطنين جميعا يعرفوا . . باسم الله الرحمن الرحيم والصلاة والسلام على سيدنا محمد رسول الله . . . تقرير عن الموقف من الحكومة الحاضرة السيد الكريم . السلام عليكم ورحمة الله . . ربنا افرغ علينا صبرا وتوفنا مسلمين . . ربنا وآتنا ما وعدتنا على رسلك ولا تخزنا يوم القيامة . ربنا اهدنا سواء السبيل واجعل هذا خالصا لوجهك الكريم . . اخى الكريم . - بعد دراسة وافية للموقف الحاضر من جميع وجوهه خرجت بعدة نتائج ، ولكل نتيجة أسباب لا يسمح الوقت والمكان بذكرها ، أعرضها عليكم ، وعلى الله فليتوكل المؤمنون ده تقدير الموقف بتاع حضرتك ..

الشاهد - أيوه ..

الرئيس - وعارف تقدير الموقف وتقسيمة كويس اوى ..

ده ما هواش جواب غرام علشان تنساه .. بس أنا عاوز اطلع بالفكرة الى تناقض كلامك الى انت بتقوله داوقتى .. ده خطاب منسوخ ولم تكتبه أيام الاعتقال ، بل كتبه أيام أن كنت

حرا طليقا لابراهيم الطيب وجالك رد منه ثم ارسلت له رد  
آخر وهو موجود كذلك ..

قل لنا باه ايه الغرض من تكوين جهاز سرى فى الجماعة ..  
انت اقريت ان هذا مش للاسلام . واقريت باهه للانجليز  
والانجليز مش عاوزين سرية ، يبقى كان سرى ليه ؟

الشاهد - يبقى احنا وقعنا فى غلط ..

الرئيس - كويس .. كان يتبع مين هذا النظام ؟

الشاهد - كان يتبع الاستاذ المرشد ..

الرئيس - هل كان يجوز او هل يجوز ان يقوم هذا النظام  
بأى عمل بدون علم الاستاذ المرشد اللى هو يتبعه هذا  
النظام ؟

الشاهد - اللى افهمه مش ممكن طبعا ..

الرئيس - لين رياسة هذا النظام اللى بيشتغل مع الاستاذ  
المرشد ؟

الشاهد - لا أعرف ..

الرئيس - تعرف ابراهيم الطيب ؟

الشاهد - كمستول عن منطقة القاهرة ..

الرئيس - كام منطقة فى القاهرة ؟

الشاهد - ذكرت اننى اتصلت بهم وبلغت عن اسمائهم ، وأذكر

وعرب حلوان ومصر القديمة ووسط القاهرة والجيزة والعباسية  
وعرب جهينه وبلغت عن اسمائهم ومخازنهم وضبطت ..

الرئيس - قل لنا من باب المثال .. عرب جهينه كان لها فى  
المخازن ادايه ؟

الشاهد - ده مدون فى كشف ..

الرئيس - يعنى مش فاكرا ؟

**الشاهد -** يعنى مثلا . . كان فيه مثلا بنادق كاملة وبنادق غير كاملة .

**الرئيس -** بنادق غير كاملة ؟

**الشاهد -** يعنى من غير دباشك . .

**الرئيس -** عددها كام ؟

**الشاهد -** حوالى ١٧ بندقية كاملة . . مش عارف بييجى ٢٥

او ١٧ تانيين بدون دباشك . .

( وقد أثارت كلمة « دباشك » الانتباه ، ففسرها السيد رئيس

المحكمة بقوله « الدبشك يعنى ايد البندقية )

**الشاهد -** وماسورتين بتوع المدفع . . يمكن براوننج وله

ماسورتين تبريد وانما ماشفتش الجزء الكبير بتاعه . . شفت  
المواسير بس . .

**الرئيس -** وايه تانى ؟

**الشاهد -** مش فاكرك . . وهم عند حضرتك . .

**الرئيس -** انا عارف انهم عندى . .

**الشاهد -** بس مش فاكرك دلوقتى . .

**وكيل النائب العام -** انت تحدثت فى خطابك الذى كان يناقشك

فيه سيادة الرئيس مع ابراهيم الطيب عن مسائل تخص الجهاز  
السرى . . .

**الشاهد -** أيوه . . .

**وكيل النائب العام -** وطلبت فى النهاية اما ان يأخذ برأيك او

تبقى حتى تقابل المرشد اربط بين موضوع الخطاب وطلب مقابلة  
المرشد . . له ؟

**الشاهد -** لان المرشد هو المسئول عن الدعوة ، واعتقد ان

الاخوان لا يعملون شيئاً الا بأمر الاستاذ المرشد . . انا كنت عاوز

أقابل المرشد ولكنه كان مختفى . . رحت المركز العام فلم أجده . .

**وكيل النائب العام** — هل معنى هذا ان المرشد هو الذى يسيطر على هذا النظام ؟  
**الشاهد** — قطعاً . .

**وكيل النائب العام** — ولذلك أردت ان تقابله لتعرض عليه آراءك ؟

**الرئيس** — هو كان قطعاً ، وقبل كده قال انا عاوز اعرف ماهى الدماء التى ستحقن . .

**الشاهد** — فى هذا الموقف ستسيل دماء . .

**الرئيس** — ايه الموقف الايجابى اللى كنت تنتظره واللى اتكلم معاك عليه ؟

**الشاهد** — لو هو حب يعمل حاجة ضد الحكومة . .

**الرئيس** — ايه الحاجة دى اللى ضد الحكومة ؟

**الشاهد** — لاعرف ايه الاشياء اللى حتعمل . . لم اكن اعرف والله على ما أقول شهيد . .

**الرئيس** — نظام سرى وأسلحة تدريب وتدريب الجماعات مش كامل . . كل ده ماتعرفشى علشان خاطر يعملوا به ايه ؟ . . علشان يعملوا حلاوة طحينية ؟

**الشاهد** — لا يا فندم . .

**الرئيس** — علشان يعملوا به ايه ؟

**الشاهد** — لغاية تاريخ ماعتقلت لم اكن اعرف بالضبط الخطة اللى حيعملوها انا باقول هذا وانا صادق ، وانا اعترف على كل حاجة اعرفها ولم اعترف الا لمصلحة البلد وحقنا للدماء . .

**وكيل النائب العام** — انت قلت فى التحقيق ان المقصود هو ضرب الانجليز فى القنال او عمل ثورة مسلحة القصد منها القضاء على الحكومة الحاضرة فهل دى هى الاهداف ؟  
**الشاهد** — ولذلك انا عارضت فى ذلك . .



**وكيل النائب العام -** أنت قلت في التحقيق ان مخزن اسلحة جهينة . . مخزن الاسلحة هناك هو الذى كانت تجمع فيه جميع الاسلحة الخاصة بمنطقة القاهرة ، ثم توزع من هناك على المناطق أو على الفصائل الاخرى فلماذا اختيرت جهينة لتخزين السلاح فيها دون غيرها من أنحاء القاهرة ؟

**الشاهد -** طبعى انا استلمت السلاح فى جهينة . .

**وكيل النائب العام -** لماذا اختيرت جهينة بالذات لتجميع السلاح فيها ثم القيام بتوزيعه منها ؟

**الشاهد -** انا استلمت السلاح فى جهينة ؛ وطبعى هم اللى يقدرُوا هذا الموقف . . .

**وكيل النائب العام -** انت كنت فى الصورة . .

**الشاهد -** فى الصورة انهى ؟ . . انا كنت فى فصيلة عرب جهينة فاستلمت السلاح من هناك . .

**وكيل النائب العام -** ايه الحكمة . .

**الرئيس -** يعنى لا يمكن تجميع الاسلحة فى جهينة الا اذا كان الرجل المسئول عن عرب جهينة يعلم بجميع الاسلحة فى جميع المناطق بدليل انهم اعطوك الاشراف على جرد المخازن . .

**الشاهد -** انا قلت انهم كلفونى بجرد المخازن . .

**الرئيس -** ما اسس النظام السرية ؟

**الشاهد -** فيه غيرى يعرف . . اسماعيل الهضيبى يعرفها

**الرئيس -** اسماعيل الهضيبى مخزنجى . . ومحمود يونس

سلمك ونزل ، وابراهيم الطيب رئيس وبينك وبينه همزة وصل . .  
مين اللى يجيب الاوامر من ابراهيم الطيب ؟

**الشاهد -** اسماعيل عارف . .

**الرئيس -** وواحد تانى كمان . .

**الشاهد -** محمود يونس . .

**الرئيس -** وواحد ثالث كمان ..

**الشاهد -** فكرنى به يافندم ..

**الرئيس -** حسين شعبان ..

**الشاهد -** أيوه .. وأنا لم أتصل به إلا بخصوص الجواب ده

بس .. حتى الجواب الكبير أعطيته لعارف ومنه للطيب ثم

للاستاذ المرشد أما الجواب الثانى فاعطيته لحسين شعبان ..

**الرئيس -** ايه حسين شعبان ده ؟

**الشاهد -** كل صلتى به علشان الجواب ..

**الرئيس -** تعرف انه اخ ومن الجهاز السرى ؟

**الشاهد -** أيوه أعرف انه من الجهاز السرى ؛ وأصله كان معانا

فى بين السرايات ..

**وكيل النائب العام -** اختفى المرشد وبطائنه فجأة ، فما الذى

استشعرته من هذا الاختفاء وقد طال أمده ؟

**الشاهد -** ذكرت فى خطابى ان اختفاء المرشد لا اوافق عليه ،

لان هذا يؤدى الى توتر وصدام بين الاخوان والحكومة .

**وكيل النائب العام -** ما الذى استشعرته من هذا الاختفاء ؟

.. عباراتك فى الخطاب كان شعورك ايه .. ليه عملت هذا ؟

**الشاهد -** أحسبت ان الاختفاء فيه خطر وحيحصل توتر ..

**وكيل النائب العام -** ايه هو التوتر ده ؟

**الشاهد -** الاخوان يقولوا ليه يختفى الاستاذ المرشد ..

سيقولون ان الحكومة حتقبض عليه ...

**وكيل النائب العام -** ألم تطلع على البيانات المتتالية من جانب

الحكومة بأنها لم تصدر الامر بالقبض على المرشد وأنها لا تنتوى

ذلك مستقبلا ؟

**الشاهد -** قرأته فعلا ..

**وكيل النائب العام -** ايه شعورك ؟

**الشاهد -** يبقى في الامر شيء ..

**وكيل النائب العام -** وما هو هذا الشيء ؟

**الشاهد -** حاتبقى ثورة .. حتكون ايه ؟

**وكيل النائب العام -** اقرا لك كلامك ؟

**الشاهد -** أيوه ..

**وكيل النائب العام -** قلت .. سمعت ان الحكومة لم تصدر

امرا بالقبض على المرشد ثم قلت ان هذا الاختفاء يتعلق بهذه

الحركة المسلحة .. مش دى اجابتك ؟

**الشاهد -** أيوه ..

**وكيل النائب العام -** وبرضه سئلت - هل يفهم من تعبيرك

هذا ان المرشد كان يصدر تعليمات وهو في مخبئه .. « ج » نعم

مش ده جوابك ؟

**الشاهد -** أيوه ..

**الرئيس -** ذكرت في كلامك عبارة « حقنا للدماء » فهل هذا

الكلام في حقيقته حقنا للدماء او خوفا او التشكك من النصر في

دخولكم معركة مع الحكومة ؟

**الشاهد -** ده سؤال جميل وانبسطت منه ... ( ضحك )

**الرئيس -** الحمد لله رب العالمين .. ( ضحك ) آه يعنى

مبسوط منى علشان سألتك السؤال ده ؟

**الشاهد -** أوى ...

**الرئيس -** يعنى حتنام الليلة دى مستريح ؟

**الشاهد -** أيوه .. ان شاء الله ..

**الرئيس -** طيب ابسطنى زى انا ما بسطتك وسألتك السؤال ده

وجاوبنى اجابة تريحنى انا كمان .. ( ضحك )

**الدفاع -** يعنى تجاوب في وضوح واخلاص ..

**الرئيس -** انا باقولك انك قررت في كلامك انك انت قصدت

بهذا الخطاب اللى بعنه لإبراهيم الطيب حقن الدماء اللى هى ممكن أن تنتج من نشوب عراك بين الاخوان والحكومة اذا ما الاخوان بدأوا فى أى معركة .. بأقول هل حقيقة انك كنت تبتغى بهذا الجواب حقن الدماء ، أم كنت تبتغى تجنب المعركة لانك كنت متشكك فى النصر فيها ؟

**الشاهد -** أنا حقيقة كنت ..

**الرئيس -** انت انبسطت من السؤال ده .. فجواب عليه بصراحة ؟

**الشاهد -** أنا كنت أود حقيقة تجنب هذه المعركة والله على ما أقول شهيد وأنا مسئول عن هذا اليمين أمام الله فى يوم القيامة حين أقابله .

**الرئيس -** يا أخ يامسلم ياللى حتقابل ربنا يوم القيامة ، وبتدرس الاسلام وبتعلمه للناس ..

**الشاهد -** طيب اقرأ الجواب لو سمحت ..

**الرئيس -** بتقول فيه . خير لنا أن نستمر فى اعدادنا سنتين بهذا النشاط وبعدين مشطوبة ومكتوب فوقها .. فى نشر دعوتنا سنتين ونستعد من أن ندخل معركة قد لا تكون فى جانبنا .. ده واحد .. وبعدين .. التدريب لازال ضعيفا جدا جدا لايسمح بالقيام بمهام كبيرة ، وكان قد تقرر أن يدخل كل أخ معسكر للتدريب ولكن شيئا من هذا لم يتم .. ورجال بدون تدريب لا يكفون لاحتراز النصر .. افكر الشوية دول كفاية ؟

**الشاهد -** كفاية يافندم ..

**الرئيس -** ولكن ليس فى أيدينا ما يبغلنا هذا ، فأولى بنا أن نصبر ثم نصبر الثلاث فقرات اللى قراتهم دول .. الا نأوا بأيمان الله اللى حلفتها يا أخ يامسلم ياللى حتقابل ربنا يوم القيامة على انك كنت متشكك فى نتيجة المعركة ؟ .. فهل انت كنت

تقصد حقن الدماء أو التشكك في المعركة والأولى أن تنتظر الى ان  
تدرب رجالك حتى اذا وقعت المعركة يبقى النصر في جانبك ؟

**الشاهد** - نيتي ... يمكن التعبير خائني ..

**الرئيس** - التعبير خائنك ؟ .. أمال محمود عبد اللطيف يحصل  
له ايه ؟

**الشاهد** - نيتي ان تتجنب المعركة حقنا للدماء والله على ما أقول  
شهيد

**الرئيس** - يا راجل يا متعلم يا بتاع ليسانس الآداب ... ده  
انتم بتعلموا ناس بتوع ابتدائية وناس عمال مايعرفوش يكتبوا  
وتعلموهم ... تقول لى ان التعبير خائنك ، وتقول لى انك كنت  
تبتغى تجنب المعركة حقنا للدماء .. دى تعاليم ومبادئ الاسلام ؟  
.. انت بتتكلم وبتقول ايه ؟ .. اتكلم الكلام اللى يشرفك حتى  
وانت واقف أمام القضاء ..

**الشاهد** - يبقى علشان تجنب المعركة ..

**الرئيس** - واليمين اللى حلفته تعمل فيه ايه ؟

**الشاهد** - علشان أبرئ ذمتى كان غرضى تجنب المعركة  
حقنا للدماء ..

**الرئيس** - واليمين اللى حلفته كنت تقصد به التغرير بالمحكمة ؟

**الشاهد** - انا لا أقصد ذلك ..

**الرئيس** - والا دى الطريقة اللى بتتبعوها انكم تحلفوا على  
حاجة جزءها صح .. زى ويل للمصلين ..

**الشاهد** - لا .. أنا شاب وابويا من صغرى ..

**الرئيس** - انا مالى ومال أبوك .. سيب أبوك بره ارجوك ..  
الادعاء ..

**وكيل النائب العام** — تقدر تقول امام المحكمة . . تقدر تشرح للمحكمة عمليات نقلك للسلاح من المخزن بتاعك في جهينة للجهات الى نقلت لها وعدد وانواع هذه الاسلحة ؟  
**الشاهد** — ايوه يافندم . .

**وكيل النائب العام** — يعنى تقول لنا طريقة نقلها وعددها والفرق او الفصائل التى سلمت لها . .

**الشاهد** — نقلت مرتين اتنين . . المرة الاولى نقلت ١٦ بندقية في اربع لفات . . كل بندقية فيها اربعة وعشرين مشعل «مولوتوف» كل عشرة في ربطة علشان نوديههم لفصيلة مصر القديمة وفصيلة حلوان . . وصلنا بعربية . . قمنا من عرب جهينة وكان معنا واحد اسمه محمد فؤاد مكاوى والسواق ، وكان منتظرنا واحد عند مصر القديمة اسمه محمود ، فقلت له انا حاقابل واحد اسمه على صديق . . وبعدين رحنا وديناهم عند واحد اسمه السعدنى في حلوان . . في المرة الثانية محمد فؤاد مكاوى قلت له تستنى عند صديق في مصر القديمة علشان نودى السلاح لعللى . . فانتظرني وبعدين رحنا المعادى . . وقد ارشدت ايضا عن هذا المكان الذى كان في المعادى وقبض على صاحبه . . وطبعى الانواع كلها انا لأعرفها بالضبط وانما على طلع صندوق ذخيرة « ٣.٣ » واخذ قنبلتين . .

**الرئيس** — ما سبب الخلاف بين جماعة الاخوان والحكومة ؟

**الرئيس** — لم يكن هناك خلاف . .

**الرئيس** — هناك خلاف كان قايم او بالضبط او بالعربى علشان تكون عارف من رمضان الى قبل الى فات . . فما هو سبب هذا الخلاف ؟

**الشاهد** — مش فاكى بالضبط .

**الرئيس** — ألم يقل لك ابراهيم الطيب ان الحكومة طالبت جماعة  
الاخوان بحل الجهاز السرى ، لان مامعنى قيام جهاز سرى فى  
جماعة فى داخلية البلد فى الوقت الذى يصرح فيه مرشد هذه  
الجماعة ان ليس هناك سرية فى الدعوة ؟

**الشاهد** — ماسمعتش ...

**الرئيس** — ما قالكش ..

**الشاهد** — لا ..

**الرئيس** — يعنى هناك يعطوكم المعلومات اللى هم عاوزين  
يعطوها لكم وانتم ماتتناقشوش ...

**الشاهد** — انا ناقشت ..

**الرئيس** — انت ماناقشتش وانما قلت لهم ان هذه الطريقة  
لاتوصلنا للهدف بتاعنا ... طولوا بالكم علشان نستعد احسن  
لانى انا اللى ماسك السلاح وباقول لكم الفصائل مش مستعدة مش  
ده كلامك ؟

**الشاهد** — أيوه ..

**الرئيس** — اذن ده موقف الناصح الامين على نفس الاهداف  
ونفس الاغراض الا انك ترى تأجيل العملية لضمان الوقت ..

**الرئيس** — على نفس الاهداف والاغراض الا انك ترى فى  
الوقت ذاته تأجيل العملية لضمان النصر يعنى كنت تعرف ..

**الشاهد** — أعرف الخلاف بين الحكومة والاخوان ..

**الرئيس** — مش معقول أن واحد مطلع زيك مايكونش عارف ؟

**الشاهد** — ما كنتش أعرف ان الحكومة طلبت حل النظام السرى

**وكيل النيابة** — مطلوب من برنامجكم الحكم بالاسلام أن

برنامجكم اللى رسمتوه علشان تحكموا البلاد حكما اسلاميا ..

عاوزين نعرف حدوده وأسسـه ..

**الشاهد** — احنا من مبادئنا الحكم بالقرآن وان القرآن دستورنا ..

تحكم بالقرآن مفيش أكثر من كده . . . ومفيش خلاف الا أننا نعلن هذا الحكم فقط نحرم الخمر والربا مفيش غير كده .

**وكيل النيابة —** تعلنوا أن الحكم اسلامى . ؟

**الشاهد —** وتحريم الخمر والربا .

**وكيل النيابة —** . . . ده اللى موجود فى الدين يعنى مفيش تعديل للقانون المدنى والجنائى .

**الشاهد —** الكل يخضع لكتاب الله .

**وكيل النيابة —** طيب يبقى ايه نظام الحكم الاسلامى ؟

**الرئيس —** افرض انك جيت دلوقت فى الحكم وحطوك رئيس وزارة تعمل ايه ؟

**الشاهد —** مش ممكن اعمالها .

**الرئيس —** طبعا مادام فيه مبدأ الجهاز السرى لان لو جيتم الحكم كل واحد منكم رايح يعمل جهاز سرى وتبقى العملية رايح جاي مش كده . . هو كل الحكم بالقرآن انك تعلن الحكم بالقرآن وتحريم الخمر والربا .

**الشاهد —** أيوه .

**الرئيس —** القرآن حرم الخمر ؟

**الشاهد —** أيوه .

**الرئيس —** ومين القائم على تنفيذ هذا التحريم ؟

**الشاهد —** كل واحد مسؤول عن نفسه أولا وبعدين الحكومة والآية قالت « يا أيها الذين آمنوا انما الخمر والميسر والانصاب والازلام رجس من عمل الشيطان فاجتنبوه » . . ولما نزلت الآية دى خرج رسول الله الى السوق ومعه سكين وكان فيه قربة فيها خمر فمزقها فكان هذا ايذانا بأن الخمر حرام ويفهم من هذا ان الحكومة مسؤولة عن التحريم .

**المدعى —** يعنى الآية مش مهمة الى جانب ما فعله رسول الله ؟



**الرئيس —** يعنى تقصد ان عملية الرسول هى اللى بينت ان  
الخمير حرام ؟

**الشاهد —** لا كان ضرورى برضه حيجتنبوها .

**الرئيس —** مين علمك الديانة ؟

**الشاهد —** الاخوان .

**الرئيس —** مين فى الاخوان ؟

**الشاهد —** فى الأسر .

**الرئيس —** مين المدرس بتاعك ؟

**الشاهد —** ماكانش فيه مدرس خاص .

**الرئيس —** طبعا مفيش مدرس خاص لازم تشكيلة . . سلطة . .

اللى توصلك الى هذا الحد .

**وكيل النيابة —** يعنى ماكانش فيه دراسة خاصة بالنظم

اللى تتبع ؟

**الشاهد —** كان فيه لجان بتدرس كيفية تجنب الخلل الاقتصادى

الذى يحدث نتيجة لتجنب الربا .

**الرئيس —** ما المقصود بالربا فى الاسلام ؟

**الشاهد —** سعر الفائدة .

**الرئيس —** أليس الربا هو ان يكون لديك مال فائض وتعطيه

لدى حاجة بفائدة ؟

**الشاهد —** آه .

**الرئيس —** هذا هو الربا فى الاسلام أما ان تشترك بمالك فى

مشروع من المشاريع وتنال عنه ربا مثل الاشتراك فى الشركات

المساهمة فهذا ليس ربا .

**الشاهد —** أعمال البنوك ربا .

**الرئيس —** مال البنوك أين يوظف ؟

**الشاهد** - اذا وضعت ١٠٠ جنيه في البنك امانة آخذ عليهم  
فائدة .

**الرئيس** - منين جبت الكلام ده الامانة ماتأخدش عليها فائدة  
ولا الحساب الجارى كمان روح اتعلم التجارة واتعلم البنوك  
اعمالها ايه وبتشغل فلوسها فى ايه . البنوك بتشغل فلوسها فى  
الشركات المساهمة اللى بتلم منك ومن غيرك الفلوس علشان يعملوا  
بيها مشروعات والبنوك التجارية بتعمل فى التجارة والصناعة  
تشتغل فى الصناعة واللى قصدك تبطل الربا بتساع باروخ  
بتساع الصاغة ان كان اقصدك على ده فده محرم بأمر الحكومة  
**الدفاع** - ومعاقب عليه قانونا .

**وكيل النيابة** - القصد من هذه التوكيلات السرية المسلحة  
هو عرقلة اتمام الاتفاقية كما قلت فهل أنت درست  
الاتفاقية وقرأتها ؟

**الشاهد** - لم أقل هذا .  
**وكيل النيابة** - أنت مش قلت الغرض منها اتخاذ اجراءات  
ايجابية لعرقلة الاتفاقية .  
**الشاهد** - أيوه .

**وكيل النيابة** - أmaal بتقول لا ليه - أنت قرئت الاتفاقية  
واطلعت على بنودها وملحقاتها ؟

**الشاهد** - لا انا قرئت النصوص الاولى للاتفاقية والباقي  
قرئته فى المعتقل .

**وكيل النيابة** - يبقى على أى أساس جاريت التيارات وعارضت  
الاتفاقية قبل دراستها .

**الشاهد** - ما أنا قلت اننى كنت غلطان من الاول .

**الرئيس** - تعرف محمود عبد اللطيف ؟

**الشاهد** - لا ما اعرفوش .

الرئيس - هل تعلم بترتيب الثورة الشعبية ؟

الشاهد - لا يا افندم والله لا أعلم .

الرئيس - طبعاً .

الشاهد - والله انا قلت صح ولا اقصد الكذب ابداً .

الرئيس - أنت قسمك الأول كان كذب فكيف أثق فيك .

الدفاع - انت لك جوابين . . الجواب الثانى ذكرت فيه انك

لا تعرف ماذا يراد بك هل مجرد الفصل أو . . . أو . . .  
ما الذى تقصده بهذه النقط .

الشاهد - ده فى الجواب الصغير انا قصدت القتل . .

يمكن يقتلونى .

الدفاع - كنت تتوقع هذا ؟

الشاهد - أيوه .

الدفاع - اذا لم تطعمهم ؟

الشاهد - أيوه ومع ذلك لم اطعمهم .

الدفاع - رغم أنك كنت تتوقع القتل ؟

الرئيس - نحب نقرا الجواب معاك انت بتقول بلغنى عن

الأخ حسين شعبان انه يسألنى هل انت مستعد لتنفيذ غير

ماذكرته فى خطابك وافهم من هذا السؤال انه لا جواب على

ما ارسلته وانه اذا لم اجب بنعم وائى مستعد للسير معكم

فاننى اوقف مثلاً أو . . . أو . . . فأحب ان اقول ان هذه ليست

دعوتى أو دعوتك أو دعوة أبى . . . أمال دعوة مين ؟

الرئيس - أو . . . أو . . . دى معناها ايه . ؟

الشاهد - معناها انهم يعاقبونى .

الرئيس - يعاقبك ليه ؟

الشاهد - خوفا من ان افشى الاسرار يمكن يقتلونى وأنا

وفرت على نفسى هذا .

**الرئيس -** أنت منضم للاخوان من امتى ؟

**الشاهد -** من سنة ١٩٤٦ .

**الرئيس -** كنت طالب فين ؟

**الشاهد -** فى كلية الآداب .

**الرئيس -** فى سنة ١٩٤٤ ؟

**الشاهد -** كنت فى مدرسة الصناعات الزخرفية واشتغلت

فى مصلحة الدفعة والموازن وبعدين رحت فلسطين وبعدين  
اخذت الثقافة والتوجيهية ودخلت كلية الآداب .

**الدفاع -** هل قرأت المعذبون فى الأرض ؟

**الشاهد -** لا .

**الدفاع -** أنت طالب فى كلية الآداب وفى قسم التاريخ هل

كان لديك مقتضيات تجعلك تظن انهم قد يقتلونك . . من  
دراسة للاجهزة السرية ونظمها التى كانت تتبع كنت تعلم ان  
الذى يخالف يتعرض للقتل ؟

**الشاهد -** أبوه .

**الدفاع -** هل ده أيضا موقف محمود عبد اللطيف ؟

**الشاهد -** يسأل عن ذلك محمود عبد اللطيف .

**الرئيس -** ترفع الجلسة على أن تعود للانعقاد فى الساعة

العاشرة من صباح السبت الموافق ١٣ نوفمبر سنة ١٩٥٤ .

( رفعت الجلسة فى الساعة العاشرة والرابع مساء )

## **- ( محضر ) -**

### **الجلسة الرابعة لمحكمة الشعب**

المنعقدة علنا في الساعة العاشرة والرابع صباحا ، بمقر قيادة الثورة في الجزيرة ، يوم السبت ١٣ نوفمبر سنة ١٩٥٤ الموافق ١٧ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ أول نوفمبر سنة ١٩٥٤ الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برياسة قائد الجناح جمال مصطفى سالم عضو مجلس قيادة الثورة .

وعضوية القائم مقام انور السادات والبكباشي ( ا . ح ) حسين الشافعي عضوي مجلس قيادة الثورة .

وبحضور البكباشي سيد سيد جاد المدعي ، والاستاذ على نور الدين وكيل النائب العام ، عضوي مكتب التحقيق والادعاء .

وتولى تسجيل المحاكمات بالاختزال الاساتذة : ابراهيم فكرى احمد فودة وممدوح توفيق وطلعت الصبان مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب ) المتهم فيها محمود عبد اللطيف محمد .

**( حضر المتهم )**

**الرئيس -** فتحت الجلسة : الادعاء جاهز

**المدعى -** ايوه يا افندم

الرئيس - الشاهد

المدعى - الشاهد على عبد الفتاح نويتو

الرئيس - اسمك ايه

الشاهد - على عبد الفتاح نويتو

الرئيس - سنك كام سنة

الشاهد - ٢٦ سنة

الرئيس - بتشتغل ايه

الشاهد - موظف بمصلحة المساحة .

الرئيس - قرب واحلف اليمين : ردد الشاهد الحلف على

المصحف وراء الرئيس وهو « والله العظيم أقول الحق ولا شيء

غير الحق والله على ما أقول وكيل »

المدعى - هل أنت عضو في جماعة الاخوان المسلمين ؟

الشاهد - نعم

المدعى - فى أى شعبة

الشاهد - بالمنيرة بأمانة

المدعى - هل كان فى هذه الشعبة أية تنظيمات خاصة ؟

الشاهد - كان فيه أسر

الرئيس - متقول لنا على الجهاز السرى وتخلص على طول

وتيجى ناحيتنا شويه وتدينا ويشك زى اللى حيتصوروا .

الشاهد - هنداوى دوير كان قال لنا نعمل جيش اسلامى

وتدرس الاسلام والاسر .

الرئيس - مش عايزين نعرف حاجة عن الاسر عايزين الجهاز

السرى ايه هو التنظيم السرى وبتشتغل فيه ايه ومين رئيسه

وايه اهدافه وأغراضه ؟

الشاهد - كان هنداوى دوير كلمنا فيه عشان تدرس الاسلام

وتكون جيش اسلامى والاسر . والمفروض انها تدرس ....

**الرئيس -** قلت لك مش عاوزين نعرف حاجة عن الاسر اتكلم في الجهاز السرى .

**الشاهد -** كان هنداوى يختار بعض الاخوان ويجمعهم في أسر اخرى غير الاسر بتاع الاخوان المسلمين .

**الرئيس -** اسمهم ايه ؟

**الشاهد -** في مجموعات

**الرئيس -** ماتقول كده

**الشاهد -** الحكاية دى بقى لها سبعة اشهر وكنا ندرس سورة آل عمران ! والاحاديث .

**الرئيس -** اשמعنى تدرسوا سورة آل عمران ؟

**الشاهد -** ما اعرفش

**الرئيس -** ودرست فيها ايه ؟

**الشاهد -** من الاول

**الرئيس -** الجنة احسن من الدنيا

**الشاهد -** القرآن فيه الحاجات دى كلها

**الرئيس -** احسن من المال والفضة والذهب

**الشاهد -** الجنة احسن

**الرئيس -** انت عاوز تفهمنا القرآن هوه انا عندك في الاخوان .

**الشاهد -** المفروض ان سورة آل عمران من ضمن سور القرآن .

**الرئيس -** طيب كلمنا في الجهاز السرى .

**الشاهد -** هنداوى دوير كان يجمع الاخوان يا افندم من قيمة

حوالى شهر وقال لى انت حتكون الرديف بتاعى في الحاجات دى كلها ...

**الرئيس -** حاجات ايه ؟

**الشاهد -** في المجموعات الجديدة .

**الرئيس -** ايه المجموعات الجديدة دى ؟

**الشاهد -** اخوان نجمعهم مثلا سبعة

الرئيس — مثلا . . . ؟

الشاهد — لا

الرئيس — مثلا يصح يكونوا ه ؟

الشاهد — هم ثلاثين وهذا آخر تشكيل ويكونوا ثلاث مجموعات كل مجموعة فيها سبعة وكان فيها جماعة سبعة أو ثمانية أو أربعة لان لسه الامور ما استقرتش وكان فى المجموعات دى أخيرا حاجة جايبها ويدرس بنفسه وكلفنى بصفتى انى درست فى الحرس الوطنى قبل كده ، وفى الضباط الاحتياط سنة واحدة أعدتها .

الرئيس — كنت ضابط احتياط ؟

الشاهد — سنة ١٩٤٧ قعدت سنة لكن ماكملتش

الرئيس — الحمد لله رب العالمين

الشاهد — كان يفوت على الجماعات دى ويدربنا ويعطينا برنامج روحى والبرنامج الروحى اللى هو سورة آل عمران والاحاديث النبوية والرحلات وزادت عليها الحته دى اللى هى تشكيلات الجماعة والفصيلة .

الرئيس — ايه التشكيلات الموجودة دى ؟

الشاهد — ثلاث جماعات وجماعة مخبرات

الرئيس — الجماعات مكونة من مين . . . ومين . . .

ومين وبرياسة مين ؟

الشاهد — ثلاث جماعات وجماعة اسمها المخبرات وهنداوى

دوير ماسك الجماعات كلها .

الرئيس — اسمها ايه الجماعات ؟

الشاهد — فصيلة

الرئيس — اتكلم على طول والا مصلحة المساحة علمتك انك

تنضم الى الجهاز السرى وماتعرفش الكلام — اتكلم على طول .

الشاهد — هنداوى دوير ماسك الفصيلة وكان عاملنى

الرديف بتاعه .



**الرئيس -** يعنى ايه رديف .

**الشاهد -** ثانى واحد بعده ، وفيه جماعة من وراق العرب  
تتكون من صلاح عباس وكان رئيس الجماعة دى ومعاه عبدالقادر  
سليمان ومعاه حلمى عبد السلام ومعاه عبد الحميد البنا ومعاه  
محمود الفريرى وفاضل لسه واحد طالب انضم جديد واسمه  
صفوت وكان معاهم يوسف همام ومحمد رءوف دى جماعة  
وراق العرب .

**الرئيس -** مين ماسك الجماعة دى ؟

**الشاهد -** صلاح خليفة عباس

**الرئيس -** والجماعة الثانية ؟

**الشاهد -** أنا ماسكها وتكون منى ومن مصطفى الوردانى  
وعبد رب النبى عباس وسعد حجاج ...

**الرئيس -** كلمنى - ولا تتكلم مع أحد ثانى

**الشاهد -** حانر .. ومن عبد المنعم حفى ومحمد نجيب ..

**الرئيس -** رئيس الجمهورية ؟

**الشاهد -** محمد نجيب راغب الخردواتى . دى

الجماعة الثانية .

**الرئيس -** وبعدين ؟

**الشاهد -** والجماعة الثالثة كانت تتكون من محمود الصياد

وعبد العزيز شמים وعبد المنصف البحيرى ومعاهم واحد رابع  
تلت اسمه قبل كده ومش فاكره .

**الرئيس -** مين كان ماسك الجماعة دى ؟

**الشاهد -** مكنتش مستقرة وآخر واحد كان ماسكها إنا مؤقتا

لأنها ما استقرتش .

**الرئيس -** كنت ماسك جماعتين ، ومين كان رئيس الجماعة .

**الشاهد -** مره عبد العزيز ... وأنا كنت أروح للزيارة .

الرئيس — بالشورى .

الشاهد — ماكناش مستقرين ومفیش حاجة خالص ، وكان فيه جماعة المخبرات وكانت مكونة من يحيى سعيد وعبد القادر سليمان ومحمود عبد اللطيف ومن وراق الحضر واحد اسمه محمد زكى وفيه واحدة ثانية ماسكها حسن عبد المنعم وكان فيها يوسف السيد وحامد نويتو وحلمى عرفه وده بقاله ثلاثة اشهر مابقاش ييجى .

الرئيس — حلمى عرفة صنعتة ايه ؟

الشاهد — طالب

الرئيس — وحسين شعبان بيشتغل ايه

الشاهد — معرفش .

الرئيس — وحامد نويتو بيشتغل ايه ؟

الشاهد — أخويا .

الرئيس — تشرفنا ودى شغله ؟

الشاهد — مجلد فى جامعة فؤاد الاول

الرئيس — وانت بتشتغل ايه ؟

الشاهد — موظف فى مصلحة المساحة فى قسم التصوير .

الرئيس — بتشتغل فيه ايه ؟

الشاهد — أعمل التصوير

الرئيس — درجه ايه

الشاهد — درجه سادسة

الرئيس — واحمد خليل

الشاهد — عامل

الرئيس — وعبد المنصف البحيرى ؟

الشاهد — موظف فى وزارة التجارة والصناعة

الرئيس — درجه ايه

- الشاهد - معرفش  
الرئيس - وعبد القادر سليمان  
الشاهد - موظف بمصلحة السكة الحديد .  
الرئيس - يشتغل ايه ؟  
الشاهد - موظف  
الرئيس - درجه ايه  
الشاهد - معرفش  
الرئيس - وعبد الحميد البنا  
الشاهد - عامل في معامل وزارة الصحة  
الرئيس - وعبد العزيز شemis  
الشاهد - خردواتي  
الرئيس - يعنى الحمد لله كل الجهاز السرى خردواتيه  
وسمكرية وموظفين في الدرجات الصغيرة مالمقتش مهندس ولا  
واحد مدير ادارة .  
الشاهد - لا . ودى كانت الاسر ودول الجماعات .  
الرئيس - المجموعات دى غرضها ايه ؟  
الشاهد - قالوا انها نواة للجيش الاسلامى الذى سيحمى  
الاسلام من اى واحد يعتدى عليه او على الفكرة الاسلامية زى  
الانجليز واليهود .  
الرئيس - ودى حاجة سرية كل دولة لها جيش تحمى بيه  
نفسها .  
الشاهد - على ما قالوا لنا انها كانت موجودة قبل كده على  
ما اذكر .  
الرئيس - يعنى موجوده ؟  
الشاهد - ايام الشهيد حسن البنا كانت موجودة .  
الرئيس - كان سيدنا محمد الثانى .

**الشاهد - لا**

**الرئيس -** يعنى اذا كانت موجوده ايام حسن البنا تبقى لازم تكون موجوده على طول .

**الشاهد - لا**

**الرئيس -** الاسلام مفيش فيه سرية يبقى الجهاز كله سرى ليه والفكرة ايه ؟

**الشاهد -** كان نواة للجيش الاسلامى احماية الفكرة الاسلامية .

**الرئيس -** الاسلام مفيش سرية ولا بيشتغل تحت الارض .

**الشاهد -** المقصود ان جميع الاخوان يكونوا « كتوميين »

**الرئيس -** على مين ؟

**الشاهد -** على أنفسهم

**الرئيس -** تعلمت من سورة آل عمران ان تكون كتوم ؟

**الشاهد -** اللى أنا مقتنع بيه اللى خلانى انضم هو انى أذاع

عن الفكرة الاسلامية وحرب الانجليز فى القنال وحرب اليهود فى

فلسطين واسألوا اى واحد اذا كان فى نفسه حاجه غير دى .

**الرئيس -** وايه حكاية الانقلاب الشعبى .

**الشاهد -** أنا لا أعرف شيئاً عن هذا وجيبوا لى هنداوى وأنا

أقطع به بأيدى لانه غرر بينا وودانا فى داهية . وأنا واخويا مش

فى البيت .

**الرئيس -** مالناش دعوة بالبيت عشان تبقى تشترك فى الجهاز

السرى .

**الشاهد -** الدين يحضنا على الجهاد فى سبيل الله وأنا عشان

مادخلتش الجيش فجيت اشتركت فى الجيش الاسلامى عشان

أحارب .

**الرئيس -** عشان مادخلتش الجيش تعمل جيش تانى ؟

**الشاهد -** أنا دخلت الجيش الاسلامى عشان أساعد الحكومة .

**الرئيس -** والجيش الموجود جيش تركى ؟

**الشاهد** — لا يا افندم والحنة اللى انتم عملتوها ...

**الرئيس** — حنة ايه ؟

**الشاهد** — عملتم خيرا كثيرا بفكرة المؤتمر الاسلامى واتصلتم بالشعوب الاسلامية والاخوان لما كانوا يقعدوا ١٠٠٠ سنة ماكانوش يعملوها .

**الرئيس** — مين كان رئيس الجهاز السرى ؟

**الشاهد** — هنداوى دوير .

**الرئيس** — كان فيه فصائل ثانية ؟

**الشاهد** — مفيش عندنا حاجة ثانية

**الرئيس** — فى حنة ثانية

**الشاهد** — مفيش

**الرئيس** — مين تعرفهم موجودين فى فصائل اخرى غير الجهة الاخرى ؟

**الشاهد** — اللى اتصلت بيه حسين شعبان

**الرئيس** — فين ؟

**الشاهد** — فى بين السرايات

**الرئيس** — يعمل ايه فى بين السرايات ؟

**الشاهد** — ما اعرفش .

**الرئيس** — جاب لكم منشورات مرة ؟

**الشاهد** — ايوه مرة جاب منشورات

**الرئيس** — يقولوا فيها ايه ؟

**الشاهد** — يقولوا فيها عن خطاب للمرشد الى الاخوان

**الرئيس** — وايه كمان ؟

**الشاهد** — والخطاب اللى بعته المرشد للرئيس جمال عبدالناصر

**الرئيس** — وبعدين ؟

**الشاهد** — ايوه يا افندم ده اللى اعرفه من حسين شعبان .

**الرئيس** — تعرف ان حسين شعبان من الجهاز السرى ؟

**الشاهد -** أعرف انه من بين السرايات واتصل بى فى مرة من المرات وماكنتش أعرف انه فى الجهاز السرى .  
**وكيل النائب العام -** كان مفروض ان هذه الجماعات تدرب عسكريا ؟

**الشاهد -** مفروض يا افندم  
**وكيل النائب العام -** جت لكم أسلحة ؟  
**الشاهد -** لا يا افندم ، انما هنداوى جاب لنا أسلحة وقال لى شيلها .

**وكيل النائب العام -** أى أسلحة، بين للمحكمة واقعة الاسلحة .  
**الشاهد -** جاب شيله فيها قوالب ت. ن. ت وقنابل فاضبة ولفة ثانية لا أعرف فيها ايه أول مرة وثانى مرة بيعت شنطة ودى تاريخها قريب .

**الرئيس -** كان فيها ايه الشنطة ؟  
**الشاهد -** ما اعرفش لان أخويا هوه اللى أخذها .  
**الرئيس -** وقوالب الـ ت. ن. ت عشان ايه ؟  
**الشاهد -** يسأل عن هذا هنداوى  
**الرئيس -** ولا يسأل اللى أخذها .

**الشاهد -** هوه قال لى شيلها فى المخزن  
**الرئيس -** المخزن بتاع ايه ؟  
**الشاهد -** المخزن اللى حط فيه الشيله دى اللى جابها .  
**الرئيس -** والمخزن ده كنت مؤجرينه وكان على شكل مخزن .  
**الشاهد -** لا كان شقه وكان ساكن فيها واحد اسمه عبد الحميد البنا .

**الرئيس -** كنتم مخصصين للأسلحة مخزن عنده عشان الشيلة اللى جابها هنداوى .  
**الشاهد -** ايوه

**الرئيس -** يعنى كنتم منتظرين ان فيه شيلة حتيجى وعشان كده عملتم المخزن علشان تحطوها فيه .

- الشاهد - هنداوى قال لى  
الرئيس - الشيلة دى ايه ؟ ووديتوها فين ؟  
الشاهد - ودينا كفر حكيم  
الرئيس - عند مين ؟  
الشاهد - عند مصطفى الكومى  
الرئيس - يشتغل ايه ؟  
الشاهد - رئيس فى وزارة الزراعة  
الرئيس - رئيس ايه ؟  
الشاهد - رئيس فى قسم تربية النباتات - رئيس عمال .  
الرئيس - وكان ايه الغرض من هذه الاسلحة ؟  
الشاهد - هنداوى يسأل عنها لانها حاجات كثيرة ومنها  
قوالب الت . ن . ت كثيرة .  
الرئيس - وليه لايسأل الشخص الى شالها او اخذها ؟  
الشاهد - هنداوى قال لى شيلها فشيلتها  
الرئيس - الأوامر عندكم لازم تنفذوها - يعنى لما هنداوى  
يعطى لك امر لازم تنفذه ؟  
الشاهد - لا يا فندم انما هو قال لى شيل دى فى  
المخزن فشيلتها .  
الرئيس - انت بتقول انك كنت الرديف بتاع هنداوى .  
الشاهد - كنت جديد وده اخيرا  
الرئيس - وده مش يكون بناء عن ثقة ؟  
الشاهد - ايوه لازم يثق فى  
الرئيس - الشخص الى هنداوى يعينه الرديف بتاعه مش  
لازم يعلم ويعرف كل شىء ؟  
الشاهد - انا قلت كل الى اعرفه واللى علمت بيه .  
الرئيس - انت مافكرتش لما اداك الاسلحة عشان تحطها  
فى المخزن انك تسأله الاسلحة دى عشان ايه ؟

**الشاهد -** ماسألتوش ولم يتدرب الاخوان بتوعنا عليها .  
**الرئيس -** دى تبقى مصيبيه لو كان دريكم على استعمال  
قوالب الت . ن . ت  
**الشاهد -** أنا شفتها  
**الرئيس -** ازاي ؟  
**الشاهد -** فى الحرس الوطنى وضربوا هذه القوالب أمامى  
فى الميه .  
**الرئيس -** وعملت ايه ؟  
**الشاهد -** عملت انفجار جامد  
**الرئيس -** لكن انت ماقتلش الاسلحة دى عشان ايه  
وجاب الاسلحة دى منين ؟  
**الشاهد -** مفيش حد من الاخوان يعلم هذا .  
**وكيل النائب العام -** جاب منين الاسلحة دى ؟  
**الشاهد -** والله ما أعرف .  
**وكيل النائب العام -** فيه حد جه من خارج منطقة امبابه  
عشان يعاين الاسلحة أو يشيلها ومين ؟  
**الشاهد -** ايوه - سيد الرئيس .  
**وكيل النائب العام -** عشان ايه ؟  
**الشاهد -** علشان يشوف المكان وقال انه ما يصلحش .  
**وكيل النائب العام -** أى مكان ؟  
**الشاهد -** المكان اللي اتحط فيها السلاح  
**وكيل النائب العام -** الاول أو الثانى ؟  
**الشاهد -** الأسلحة دى كانت فى كفر حكيم ولما جينا ننقلها  
بناء على رغبة هنداوى راح شاف المكان فقال انه ماينفعش .  
**وكيل النائب العام -** اختصاص سيد الرئيس ايه ؟  
**الشاهد -** التفتيش على الاسلحة  
**وكيل النائب العام -** بناء على طلب مين ؟



الشاهد - معرفش .

وكيل النائب العام - ايه صفته في الجهاز السرى ؟

الشاهد - هو ه فات علينا وشفته

وكيل النائب العام - هل فهمت انه مكلف من رئيس الجهاز

السرى بانه يفنشى على الاسلحة .

الشاهد - معرفش يمكن من فوق

الرئيس - وابراهيم الطيب شغلته ايه ؟

الشاهد - محامى .

الرئيس - وايه عمله في الجهاز السرى ؟

الشاهد - معرفش .

الرئيس - لكن انت مش اعترفت في التحقيق على ان ابراهيم

الطيب رئيس مناطق الجهاز السرى في القاهرة ؟

الشاهد - لا . . . . محصلش . . . ماقلتش كده .

الرئيس - طيب شوف المحضر ( موجهها كلامه الى الادعاء ) ثم

قال للشاهد جاوب على السؤال الى اسالك عنه . احنا مش

بنبيع ترمس .

وكيل النائب العام - قلت في التحقيق اجابة على السؤال الخاص

بمتى كانت آخر مقابلة لك لابراهيم الطيب فقلت « في مكتبه من

شهرين ونص وكان هناك كثير من الاخوان كانوا حوالى ١٨ واحدا

من مختلف المناطق قاعدين وابراهيم قال ان كل حاجة ماشية

كويس والتعليمات ستصل لكم في الوقت المناسب » .

الرئيس - هل هذا حصل ؟

الشاهد - حصل يا افندم .

الرئيس - يعنى عارف ان فيه اعضاء جهاز سرى في المناطق

الاخرى ؟

الشاهد - انا شفت ناس تانيين عند ابراهيم الطيب .

**الرئيس -** والناس الثانين دول بيعملوا ايه عند ابراهيم الطيب ؟

**الشاهد -** طبعا رايعين زى ما أنا رايع

**الرئيس -** أمال بتقول ما تعرفش ليه ؟ وكلامك الاول قلت انك ما تعرفش ان فيه جهاز سرى فى مناطق أخرى ليه ؟  
**الشاهد -** فين يا افندم .

**الرئيس -** قلت انك ما تعرفش انه فيه جهاز سرى فى مناطق أخرى غير المنطقة بتاعتكم .

**الشاهد -** ما أعرفش عنه حاجة .

**الرئيس -** والناس اللى شفتهم .

**الشاهد -** أنا رحت فى مكان وأعدت فى أوده وقلت كل اللى شفته .

**الرئيس -** لما ابراهيم الطيب قال ايه الاستعداد بتاعكم والجماعات بتاعتكم وأسمائهم وان التعليمات حتصلكم فى الوقت المناسب كان يقول الكلام ده لك لوحدك ؟

**الشاهد -** كان معايا محمود الحواتكى وحسين شعبان

**الرئيس -** لما ابراهيم الطيب يقول لكم هذا الكلام أمام الحواتكى وحسين شعبان يفهم من هذا الكلام ايه ؟ يفهم ان حسين شعبان والحواتكى أعضاء فين ؟

**الشاهد -** يبقى كده على طول . وأنا قلت ان حسين شعبان فى بين سرايات والحواتكى فى الجيزة .

**الرئيس -** يبقى فيه جهاز سرى فى الجيزة ؟

**الشاهد -** المفروض لازم يكون فيه .

**الرئيس -** وتفهم ايه لما ابراهيم الطيب جمعكم يا أعضاء الجهاز السرى فى وراق العرب والجيزة وامبابة ويبقى ايه ابراهيم الطيب ؟

**الشاهد -** أنا قلت انه فوق هنداوى دوير .

الرئيس - استنتاج ؟

الرئيس - لكن أنت قلت ما أعرفش انه يشتغل الا محامى

الشاهد - لازم يكون رئيس لهنداوى .

الرئيس - الاجهزة السرية تبع جمعية ايه ؟

الشاهد - الاخوان المسلمين

الرئيس - وتتبع مين فى الرياسة بتاع الاخوان ؟

الشاهد - ما أعرفش لكن المفروض ان المرشد مسئول عن

كل حاجة فى الاخوان .

الرئيس - هل دخلت هذا الجهاز السرى دون ان تعرف

يتبع مين ؟

الشاهد - هنداوى رئيس من ناحية رئاسة المنطقة وكلامه

آخذه منه ثقة .

الرئيس - يعنى ماتناقشوش وتقوم تطيعه على طول ؟

الشاهد - اناقشه فى حدود المعقول .

الرئيس - ولما جاب قوالب الـ ت.ن . ت عشان تشيلها

فى المخزن كان كلامه معقول ؟

الشاهد - اللى شفته ان الاخوان راحوا فلسطين والقنال

وكنت مقتنع بالناحية دى ، لكن الحاجة اللى عملها استنكرها

استنكرها خالص وهو خرب بيوتنا لانه استغل فينا الحمية

الاسلامية واحنا ناس بنقرا القرآن وشفنا القرآن يحض على

الجهاد .

الرئيس - الجهاد ضد مين ؟

الشاهد - ضد الانجليز والكفار والمشركين والجماعة دى كان

غرضها ان الاسلام يتوسع وينتشر ويكون أهله أعزاء فيها

ولاشك ان خطوة المؤتمر الاسلامى كانت خطوة جميلة جدا .

والله العظيم لو كان الاخوان اعدوا ١٠٠٠ سنة ماكانوا يقدروا

يعملوا حاجة زى دى واللى كانوا بيحلموا بها فى نفوسهم لانهم

ما كانوا عارفين يصلحوا أنفسهم .

- الرئيس — ليه ؟  
الشاهد — كل يوم كان فيه خناقه .  
الرئيس — قل لنا شيئاً عن هذه الخلافات .  
الشاهد — النزاع اللي بينهم .  
الرئيس — زى ايه ؟  
الشاهد — كل يوم والتانى كان فيه نزاع وعبد الرحمن البنا كان فى ناحية وده فى ناحية .  
الرئيس — قول لنا خناقه .  
الشاهد — ضربوا بعض فى المركز العام زى ما قرانا فى الصحف .  
الرئيس — مارحتش هناك وماشفنش ؟  
الشاهد — لا  
الرئيس — يعنى تنضم لجماعة لاتعرف عنها شيئاً ولا تعرف أغراضها ولا الجهاز السرى الغرض منه ايه ،  
الشاهد — قبل كده اعرف أنهم راحوا فلسطين للجهاد والقتال .  
الرئيس — يعنى الاخوان بس هم اللي راحوا فلسطين ؟  
الشاهد — لا وغيرهم  
الرئيس — وغيرهم يطلع ايه ؟  
الشاهد — مصريين وطنيين يا افندم .  
الرئيس — راحوا عشان ايه ؟  
الشاهد — بدافع الوطنية . والاخوان بدافع الدين وده وطنى وده وطنى .  
وكيل النائب العام — اذا سمحت المحكمة نريد ان نواجهه بأقواله الواردة فى التحقيق .  
الرئيس — اتفضل  
وكيل النائب العام — انت قررت فى التحقيق عندما سئلت عن الاهداف التى يسعى اليها الجيش الاسلامى فأجبت بأنه لكى

تقاوم به الحكومة التى لاتحكم بالقرآن ولما سئلت عن طريقة المقاومة فقلت لما يجيبوا لنا الاسلحة وفعلا جابوا اسلحة عند عبد الحميد البنا . كما قلت بأنهم جابوا لكم خرائط لمدينة القاهرة ودرستم منطقة امبابه عشان تعرفوا كل الشوارع . ثم سئلت عن التعليمات التى قال ابراهيم الطيب انها حتجيلكم فى الوقت المناسب وعن الخطة اللى عملوها فقلت انهم كانوا يقولوا ان الشعب كان حيقوم بثورة لاسقاط الحكومة وقاب نظام الحكم مش كلامك ده ؟

الشاهد - مش كله الكلام ده مش تمام زى ما بتقوله .

الرئيس - ده القرآن اللى اتعلمته . علمك انك تمضى على اقوال وبعدين تقول انه مش كلامى .

الشاهد - كل حاجة اقول عليها يا افندم .

وكيل النائب العام - صفحة ٥ و ٦ فى التحقيق .

الرئيس - دى امضتك ( اطلعاه على امضاءاته فى محضر التحقيق ) . ؟

الشاهد - ايوه

الرئيس - ودى امضتك ؟

الشاهد - ايوه

الرئيس - ودى امضتك ؟

الشاهد - ايوه

الرئيس - وبتمضى على حاجة قبل ماتقرأها اولاً ؟

الشاهد - أنا يا فندم ماقريتش حاجة .

الرئيس - وليه مامضيت هوش على شيك بخمسة آلاف جنيه ؟

وكيل النائب العام - ياريت يا افندم .

الرئيس - ايه الخرائط اللى جابوها لكم ؟

الشاهد - جابوا لنا خريطة القاهرة وخريطة امبابه عشان

قدرسها كويس .

الرئيس - امبابه فيها يهود رايعين تحاربوهم ؟

- الشاهد** - قالوا لنا ادرسوا خريطة امبابة .
- وكيل النائب العام** - وهل كان الجيش الاسلامى سيحارب فى القاهرة ؟
- الشاهد** - لا ولكن كان من ضمن دراساتهم التكتيك العنيف .
- الرئيس** - ايه التكتيك العنيف ده .
- الشاهد** - النط والجري والقفز والرياضة عشان يربوا الجسم بتاعنا كويس .
- الرئيس** - ( ينظر الى الشاهد ) وهل هذا جسم كويس تدرب على التكتيك العنيف ؟
- الشاهد** - اصرى كنت باذاكر
- الرئيس** - فين ؟
- الشاهد** - بكلية الحقوق
- الرئيس** - سنة ايه ؟
- الشاهد** - فى سنة اولى
- الرئيس** - وقبل ان تدخل كلية الحقوق ؟
- الشاهد** - كنت باكمل بقية دراستى فحصلت على الثقافة والتوجيهية .
- الرئيس** - قلت ان اهداف الجيش الاسلامى مقاومة الحكومة التى لاتحكم بالقرآن .
- الشاهد** - ايوه
- الرئيس** - يعنى موافق ومقتنع بيه .
- الشاهد** - انا بقى لى فى الاخوان سنة ونصف وكان ساعة ماكلنا هنداوى عن الجهاز السرى من سبعة شهور كنت متفرغ للدراسة من اعدادى الى ثانوى .
- الرئيس** - لكنك قلت فى اقوالك ان من اهداف الجيش الاسلامى ان يقاوم الحكومة التى لاتحكم بالقرآن
- الشاهد** - هذا الكلام صح

الرئيس - يعنى موافق عليه ؟

الشاهد - تسمح يا افندم

الرئيس - لا ما اسمحش ... اسمح ترد على السؤال بس  
الى ا قوله لك انت مش علموك النظام فى الاخوان .

الرئيس - علموك النظام ولا لا فى جماعة الاخوان

الشاهد - ايوه .

الرئيس - ما كنتش بتناقش نويتو ليه ؟ . وما كنتش بتناقش

هنداوى ليه لما قال حط الاسلحة فى المخزن . . فرحت

حاططها زى الرطل فى المخزن من غير ماتناقشه . .

الشاهد - . . .

الرئيس - كلامك ده ولا لا ؟

الشاهد - ايوه يافندم . . . والله يافندم خطواتكم الى انتم

ماشيين فيها من أثبت ما يمكن . . . والله يافندم ماشيين فيها

بنظام دى من أحسن الخطوات . . .

الرئيس - كتر خيرك . . ( ضحك ) . . تعرف مجمود

عبد اللطيف ؟

الشاهد - ايوه . . .

الرئيس - آخر مرة شفت فيها مجمود عبد اللطيف كانت امتى ؟

الشاهد - أنا شفته صباح يوم الحادث . . .

الرئيس - امتى يعنى ؟

الشاهد - الساعة ستة الصبح . .

الرئيس - فين ؟

الشاهد - هو فات على فى منزلى . .

الرئيس - فات عليك علشان ايه ؟

الشاهد - هو قال لى أن هنداوى بعتنى لك . . ويقول لك

ادبنى خمسة جنيه وعشر طلقات . . .

الرئيس - علشان ايه ؟

الشاهد - ما أعرفش ..

الرئيس - ما سألتوش ليه عاوز الطلقات ؟

الشاهد - أنا وجدت أنه باين عليه الاضطراب فقلت له :  
فيه حاجة يا محمود فقال لا سيبنى أنا عاوز أمشى ..

الرئيس - طيب ماقتلوش انت عاوز الخمسة جنيه ليه ؟

الشاهد - هو قال لى ان هنداوى كان باعته وانه يقول لى  
اديله خمسة جنيه ..

الرئيس - عندك فلوس منين ؟

الشاهد - أنا أمين صندوق المنطقة ..

الرئيس - وهنداوى هو المسئول عن هذا المال ؟

الشاهد - أيوه ..

الرئيس - وايش عرفك أن هنداوى هو اللى قال له  
انه يروح لك ؟

الشاهد - أصل هو كان جانى قبل كده ..

الرئيس - شفت معاه ايه ؟

الشاهد - كان معاه مسدس ..

الرئيس - وطلب منك تديله طلقات علشان ايه ؟

الشاهد - ماأعرفش .. .. وأنا سألته علشان كان باين  
عليه الاضطراب وقلت له فيه حاجة .. فقال لا .. .. ماردش  
على بجواب .. وقعد فطر معايا وطلب منى أجيب له شينطه ،  
وقال لى أنا عاوز أمشى قبل الساعة ثمانية .. ..

الرئيس - كان رايح يحارب الانجليز ؟

الشاهد - ما أعرفشى ..

الرئيس - تفتكر انت ايه ؟

الشاهد - أنا استنتجت ...

الرئيس - واحد فات عليك واخذ خمسة جنيه من مال  
المسلمين ، وعشر طلقات ..



- وكيل النائب العام - وقعد فطر معاه ..
- الرئيس - وكان مرتبك ومستعجل ، وكان عاوز يمشى ..
- قبل الساعة كام ؟
- الشاهد - قبل الساعة تمانيه ..
- وكيل النائب العام - وطلب شنطه ...
- الرئيس - ما فكرتش ايه الحكاية ... رايح فين ؟
- الشاهد - أنا بالليل رحت لهنداوى فقال لى ..
- الرئيس - احنا هنا فى الساعة ثمانية الصبح ...
- مش بالليل ..
- الشاهد - ما اعرفش .. ده اللى حصل ..
- الرئيس - ما فكرتش فى حاجه ياللى بتدرس الدين الاسلامى ؟
- الشاهد - فكرت وسألته ..
- الرئيس - فى ايه ؟
- الشاهد - قلت له ، علشان ايه يا محمود عاوز الحاجات دى
- ... فيه حاجة فقال لى لا ... أنا عاوز أمشى ..
- الرئيس - طيب انت فكرت فى ايه ؟
- الشاهد - قبل كده ... فى مرة كان محمود قاعد فى جماعه
- معانا ، فهنداوى جه وأخذه وقال لى مالکش دعوه بيه ...
- الرئيس - أيوه .. انما انت لما تلاقى واحد معاه مسدس
- وطلقات تفتكر انه رايح يعمل ايه ؟ . . رايح يصطاد مثلا .. ؟
- ( ضحك ) .
- الشاهد - أن بعض الظن اثم ...
- الرئيس - أن بعض الظن اثم ؟
- الشاهد - أيوه يافندم ... ( ضحك )
- الرئيس - ما قلتش فى أقوالك انك فهمت منه أنه مسافر ..
- الشاهد - هو قال لى يافندم انه مستعجل وعاوز يسافر
- وأنه عاوز يمشى من عندى قبل الساعة تمانيه ..

- الرئيس - تعرف واحد اسمه عبد الحميد البنا ؟  
الشاهد - ده من جماعة الوراق .
- الرئيس - بيشتغل فين  
الشاهد - في معامل الصحة .
- الرئيس - بيشتغل ايه ؟  
الشاهد - ده من جماعة الوراق وبيشتغل .. واخترناه مخزنجى ..
- الرئيس - علشان تشيلوا عنده ايه . . ؟  
الشاهد - يسأل اللي جابه . . . هنداوى . . .
- الرئيس - طيب لما رحت لهنداوى بالليل- قال لك ايه ؟  
الشاهد - لما رحت له وجدته مضطرب ، فقلت له : فيه ايه فارتبك . . فانا ربطت بين القرائن بتاعة الصبح وبين نشرة الاخبار في الاذاعة بتاعة الساعة تمانية ونص . . . بصيت لقيت وشه عرق وقال لى انا مليش دعوة دول المسئولين هم اللي عملوا كده . . . فانا رحت قافل الباب ونزلت ده كل اللي حصل بينى وبينه .
- الرئيس - مين الناس المسئولين دول ؟  
الشاهد - المفروض انه اتصل بابراهيم الطيب . .
- الرئيس - ابراهيم الطيب كان بيعمل اجتماعات ؟  
الشاهد - أيوه . . ده كان محامى وكان بيعمل اجتماعات . .
- الرئيس - اجتماعات ايه ؟  
الشاهد - انا رحت اجتماع واحد . .
- الرئيس - اجتماع ايه ؟  
الشاهد - كان فيه اخوان من بين السرايات ومن الجيزة ، وانا رحت علشان هنداوى يعرفنى به لانى كنت جديد . .
- الرئيس - جمع رديف ايه ؟

الشاهد - ردائف ..

الرئيس - المرة دي حببت تصلح اللي قلتسه في المرة اللي فاتت ... انت قلت قبل كده في التحقيق ردفاء ... ردائف هي الصبح ؟

الشاهد - أيوه ..

الرئيس - على وزن ايه ؟ ( ضحك )

الشاهد - ما اعرفشى يافندم ...

الرئيس - طيب ... يعنى الاجتماع كان فيه الردفاء أو الردائف .. يعنى ماكنتش انت لواحدك . وانما كانوا كلهم من الرديف ؟

الشاهد - لازم يافندم كانوا كده ...

الرئيس - كنت رايح بصفتك الشخصية ؟

الشاهد - كنت رايح بصفتي رديف ...

الرئيس - يعنى كل الناس اللي هناك كانوا بتوع رديف ؟

الشاهد - ماعرفش ... يعنى هل حسين شعبان بتاع

رديف .. ماعرفشى ..

الرئيس - ايه الخطة اللي كانوا عاملينها ؟

الشاهد - ما اعرفشى حاجة عنها ..

الرئيس - هل ابراهيم قال لكم ان التعليمات حتيجي في الوقت

المناسب ؟

الشاهد - هو قال كده ...

الرئيس - انتم عندكم ماتسألوش عن حاجة ؟

الشاهد - لا مانسألشي ...

الرئيس - يعنى دكتاتورية ؟

الشاهد - لا ... والمفروض اننا نسأل ...

**الرئيس -** اشمعنى ما سألتش هنداوى لما سلمك الاسلحة  
علشان تحطها فى المخزن . . ليه ماسألتوش ؟

**الشاهد -** ماتحتاجشى لسؤال . . ده اللى أنا فاهمه والله . .

**الرئيس -** ايه اللى تعرفه عن الثورة اللى عاوزين يعملوها  
لقلب نظام الحكم ؟

**الشاهد -** والله ما اعرفشى حاجة . .

**الرئيس -** عاوزين يعملوا مؤامرة شعبية ؟

**الشاهد -** والله الحته دى ماعرفهاش . .

**الرئيس -** تعرف الحته بتاعة امبابة ؟

**الشاهد -** يافندم أنا أخويا قلت عليه . .

**الرئيس -** ماتعرفشى حته باب الشعرية ؟

**الشاهد -** رحتها مرة واحدة وأنا صغير . .

**الرئيس -** بس . . ؟

**الشاهد -** أيوه . .

**الرئيس -** قل لنا عن معلوماتك فى وسط القاهرة . . .

**الشاهد -** أنا ماعرفش الاسماء . .

**الرئيس -** انت راجل فى مصلحة المساحة وبت رسم خرط

وبتدرسها . . ازاي بأه ما تعرفشى ؟

**الشاهد -** ما أعرفشى يافندى . .

**الرئيس -** انت مش قلت فى التحقيق انهم كانوا يقولوا دائما

ان الشعب لازم يقوم بثورة لاسقاط النظام الحاضر ؟

**الشاهد -** لا اذكر . . .

**الرئيس -** ما تذكرشى ؟

**الشاهد -** لا . . .

**الرئيس -** تعرف واحد اسمه عبد المنعم عبد الرؤوف ؟

**الشاهد -** ايوه . . هنداوى مرة بعت لى فى العيد الكبير فانا رحت هناك فوجدته قاعد مع واحد . . فلما دخلت عرفنى به وقال لى ده اخوك احمد من شبرا . . قال اخوك الخضر . . وقال لى شيل ده عندك . .

**الرئيس -** زى ال T . N . T ؟ . . ( ضحك ) .

**الشاهد -** اخذته ونزلنا مشينا على التربة ومنها البيت . . وكان مصطفى الوردانى مسافر هو واسرته فى الوردان . . وكانوا سابوا المفتاح عند جارهم الاخ عبد المنعم الجفنى فانا رحت له واخذت منه المفتاح وقلت ما تجيش ، وبعدين رحت على شقة الوردانى فوجدت عبد المنعم عبد الرؤوف منتظرني ، وانا لغاية اللحظة دى ما كنتش اعرفه . .

**الرئيس -** وبعدين ؟

**الشاهد -** وبعدين حطيت عبد الرؤوف فى الشقة ثلاثة ايام لانه كان عيان . .

**الرئيس -** كنب بتخدمه ومخبيه ؟

**الشاهد -** المفروض كده . . .

**الرئيس -** يعنى كنت مخبيه ؟

**الشاهد -** هنداوى قال لى شيله عندك ، فشلته عندى . .

( ضحك )

**الرئيس -** هه . . . كنت مخبيه ليه ؟ . . برضه ما فكرتش

فيه . . زى حكاية ال T . N . T اللى ماسألتش عليها ؟

**الشاهد -** . . .

**الرئيس -** عبد المنعم عبد الرؤوف اخذته وشلته فى بيت

الوردانى علشان خاطر ايه . . . علشان الجيش الاسلامى ؟

**الشاهد -** هنداوى قال لى شيله لان ده أخ من الاخوان . . .

**الرئيس -** وعرفت امتى انه عبد المنعم .

الشاهد - عرفت بعد ما مشى ..  
وكيل النائب العام - كان يجتمع بحد في البيت ؟  
الشاهد - اجتمع بابراهيم الطيب مرتين ..  
وكيل النائب العام - ويحيى سعيد هل قابلته في البيت  
الشاهد - أيوه ..  
وكيل النائب العام - كانوا بيتكلموا في ايه ؟  
الشاهد - كانوا بيتكلموا عن تشكيل الفصيلة ، وهو كان  
بيحط عيدان تبريت ويشكلها تشكيلات عسكرية ... العيدان  
دى كانت تبين سهم أو خط منتشر .  
وكيل النائب العام - ألم تعرف طول المدة دى شخصيته ؟  
الشاهد - لا . . . . وانما كنت أعرف بس انه شخصية  
عسكرية ...  
وكيل النائب العام - خرج ازاي ؟  
الرئيس - قلت في اقوالك انك عرفت ان عبد المنعم عبد  
الرؤوف كان ضابط في الجيش وانه هارب من المحاكمة العسكرية  
... وانك انت كنت بتقوم بخدمته في تلك الايام ...  
الشاهد - أنا عرفت بعد كده ان عبد المنعم عبد الرؤوف كان  
بيتحاكم .. بعد ما خرج ... وهنداوى كان يحتاط دائما ان  
مفیش حد يعرفه .. حتى أنا ..  
الرئيس - الغرابة ربنا مديكم حجة لسان .. اكبر كذايين  
لو كان ربنا يديكم عقل زى ما اداكم لسان !!  
الشاهد - والله العظيم أنا باقول الحق دلوقتى .. أنا حالف  
على مصحف ..  
الرئيس - وبرضه انت حالف على ده وماضى عليه ( مشيرا  
الى محضر التحقيق ) ... وبعدين ...  
الشاهد - وبعدين أخذوه بالطريقة الآتية ...

**الرئيس -** كمل كلامك ...

**الشاهد -** ابراهيم الطيب قال لى حاجيلك عربية الساعة  
أربع صباحا لان المفروض الشقة حاجى فيها اصحابها بعد العيد  
قال لى حاجيلك عربية حيكون فيها محمود الحواتكى ...  
خرجنا الساعة اربعة صباحا ولكننا لم نلتق بهم .. والمدينة كانت  
اختفت اضواؤها .. ماوجدناهمش وماشفناش العربية فى المكان  
المحدد بعد ذلك انا ابلغت ابراهيم وقلت له ان ما حصلش التقاء ،  
وبعد كده جه ابراهيم واخده ونزل ومشى الساعة ثمانية مساء ..

**الرئيس -** الم يثر هذا فى نفسك التفكير ؟

**الشاهد -** واحد عاوزين يتحفظوا عليه ...

**الرئيس -** ليه ناس مخصوصين يتحفظوا عليه ؟

**الشاهد -** هو كان خايف ...

**الرئيس -** كان خايف ، وماكنش بيخرج وتأخذ العربية الساعة  
ثمانية مساء وتمشى من عند مدينة العمال ومخبى اسمه عليك  
.. كل ده ليه ؟ .. الحاجات ماثرش فى نفسك التفكير ؟

**الشاهد -** شخص مهم ...

**الرئيس -** شخص مهم يعنى ايه .. رئيس حكومة مستخبى  
عندكم .. ايه يعنى .. رئيس الحكومة المنتظر أو القائد العام  
المنتظر ؟ .. قل لنا ايه أهمية الشخص ده ؟

**الشاهد -** ما اعرفش ...

**الرئيس -** الى انت حتصوره ايه ... قول لنا ايه الى جال  
فى خاطرك ؟

**الشاهد -** عرفت انه شخص مهم ...

**الرئيس -** نهرو جه هنا ... ما شلتوهشى عندكم ليه .. ؟

( ضحك )

**وكيل النائب العام -** عارف ودوه فين ؟

الشاهد — راح كرداسة ...  
وكيل النائب العام — عمل ايه ؟  
الشاهد — كان فيه معسكر .  
وكيل النائب العام — معسكر ايه ؟  
الشاهد — الاخوان المسلمين علشان التدريب ...  
وكيل النائب العام — لتدريبهم يعنى ؟  
الشاهد — ده اللي استنتجته بعد ذلك ...  
الرئيس — ايه معسكر كرداسة ده ؟  
الشاهد — كان فيه معسكر وقالوا لنا انكم حاتروحوا فيه ..  
ولكن ما رحناش ...  
الرئيس — ليه ؟  
الشاهد — ما أعرفشى ...  
الرئيس — ما فكرتش في دى كمان وما سألتش ليه البوليس  
قفل المعسكر ؟  
الشاهد — يمكن حاجة غير مرغوب فيها ... المفروض ان  
الاخوان بيعملوا معسكرات في كل حته .. في حلوان .. وفي كل  
حته ..  
الرئيس — يعنى ما تعرفش ليه غير مرغوب في هذه  
المعسكرات ؟  
الشاهد — ما أعرفشى ..  
الرئيس — يعنى انت فهمت لما البوليس هجم على معسكرات  
رداسة ان هذه المعسكرات غير مرغوب فيها ؟  
الشاهد — أيوه .. وأنا رحت مرة في معسكر حلوان ...  
الرئيس — خفية ؟  
الشاهد — لا ... علنا .....  
الرئيس — المعسكرات دي كانت معمولة تحت ستار



الكشافة ؟

الشاهد - لا ...

الرئيس - ومعسكر كرداسة كان شكله ايه ؟

الشاهد - ما شفتوش ...

الرئيس - ولا سمعش عنه حاجة ؟

الشاهد - لا سمعت ...

الرئيس - الطلقات اللي اعطيتها لمحمود عبد اللطيف كانت  
منين .. ؟

الشاهد - من عبد الحميد البنا .. اخويا راح جابها باعجلة  
.. سبع دقائق رايح وسبع دقائق جاي ...

الرئيس - كان فيه كلمة سر بينكم ؟

الشاهد - ايوه ... قلت له يقول : « سيد كامل » ..

الرئيس - سيد كامل ... ؟

الشاهد - ايوه يافندم ...

المدعى - تعرف شخص اسمه سامى الكومى ؟

الشاهد - ايوه ...

المدعى - ايه علاقته ... ايه وظيفته فى الاخوان ؟

الشاهد - ده وكيل نيابة فى شمال القاهرة ، وكان ييجى  
معانا فى اجتماعات ادارة المنطقة ، ورايه استشارى لان وظيفته  
تمنعه من القعاد مع الاخوان .. ومثلا .. كان حاضر فى الاجتماع  
اللى تم فيه اجراء الانتخابات فى الاخوان ...

المدعى - كان بيحضر فى الجماعات ؟

الشاهد - ما اعرفشى ...

المدعى - وكان عارف حاجة عن الذخيرة اللي كانت فى بيت  
عبد الحميد البنا ؟

الشاهد - ايوه .. وأنا اللي قلت له عليها ...

وكيل النائب العام - لما جالك محمود عبد اللطيف الصبح  
وطلب منك العشر طلقات ، ألم تشك في الغرض اللى طلب من  
أجله الطلقات ؟ مش يجوز انه يروح يقتل واحد .. مش تخاف  
على نفسك من المسئولية ؟

الشاهد - اطلاقا ما أعرفشى ...

وكيل النائب العام - قعد محمود عبد اللطيف عندك أد ايه ؟

الشاهد - حوالى تلت ساعة ، وكان بياكل ...

وكيل النائب العام - قابلت يحيى سعيد بعد ما سمعت

بالحادث ؟

الشاهد - آه .. ليلتها ...

وكيل النائب العام - ليلتها قال لك ايه ؟

الشاهد - من أى ناحية ؟

الرئيس - أى ناحية تعرفها انت ...

الشاهد - قلت له ... أنا كنت قلت له الكلام اللى دار بينى

وبين هنداوى ، وقلت له أنا رحت لهنداوى وقلت لهنداوى ايه

ده .. ايه ده فهو وشه اتغير وعرق .. وقال الناس المسئولين

هم اللى عملوا كده مش أنا ...

وكيل النائب العام - وليه قلت ليحيى سعيد الكلام ده ؟

الشاهد - علشان أنا كنت بعث له محمود ياخذ منه

الشنطة ...

الرئيس - شعبة الجيزة مين رئيسها ؟

الشاهد - الدكتور مصطفى عبد الله .. وكان الحاج حسنى

قبله ...

الرئيس - كنت بتروح الهرم علشان ايه ؟

الشاهد - ما رحتش ...

الرئيس - ولا مرة ؟

الشاهد — لا يافندم . . .

الرئيس — مين كان بيحب لك المنشورات ؟

الشاهد — حسين شعبان . . والمرشد كان بيعطيها لهنداوى

وهنداوى يديها لشعبان . . .

الرئيس — باين من كلام أعضاء الجهاز السرى ان كل واحد

بيتنصل من المسئولية ويرميها على اخوه . . ده اللى تعلمتوه فى

« آل عمران ؟ . . » آل عمران علمتكم الجبن الادبى ؟

الشاهد — أنا باقول اللى كسبته . . أنا قلت اللى لى « واللى

على » . . وقلت عن اخويا انى بعته علشان يجيب الشنطة . .

الرئيس — وايه اللى كسبته ؟

الشاهد — يعنى الحاجات اللى عملتها . . .

الرئيس — وده اسمه مكسب ؟

الشاهد — كل نفس بما كسبته رهينة . . .

الرئيس — رهينة ؟

الشاهد — ايوه . . يعنى أنا اقصد المكسب من الناحية دى . .

الرئيس — الادعاء فيه اسئلة تانية ؟

المدعى — لا . . مفيش . . .

الرئيس — الدفاع . . .

الدفاع — ايوه . . لو سمح لى السيد الرئيس . . .

الرئيس — اتفضل . .

الدفاع — موجهها كلامه لشاهد — انت شاهد اتبأت على

محمود عبد اللطيف . .

الشاهد — ايوه . . .

الدفاع — محمود عبد اللطيف درس خريطة امبابه كما

درستها انت ؟

الشاهد — لا . . .

- الدفاع —** لماذا درست انت خريطة امبابه ..
- الشاهد —** المفروض ان الاخوان المسلمين يكملوا النقص اللى فينا .. يعنى تبقى عندنا معلومات عامة ...
- الدفاع —** انا لم أدرس خريطة امبابه ، فهل تعتبرنى ناقص المعلومات ؟
- الشاهد —** أنا عايش فى امبابه .. ودراسة الخرائط دى عبارة عن معلومات عامة فى أثناء دراستها الواحد يتعلم تاريخ وجغرافيا .. ده المفروض وأنا كنت بأدرس جغرافيا وتاريخ وحساب ، ودى معلومات عامة ..
- الدفاع —** هل واضح فى هذه الخريطة مركز قسم البوليس ؟
- الشاهد —** دى خريطة بتاعة مصلحة المساحة ..
- الدفاع —** ايه الاماكن اللى استقر نظرك عليها ؟
- الشاهد —** شوارع منطقة امبابه ..
- الدفاع —** التى تؤدى الى ايه ؟
- الشاهد —** انا مثلا كنت لمين الصندوق ، وكنت باروح فى المناطق دى ، وعلشان كده كنت بأدرس الاماكن كويس ..
- الدفاع —** أفهم من ذلك أنك درست الخريطة لتستطيع الوصول الى منازل الاخوان ؟
- الشاهد —** علشان أعرف السكة كويس ..
- الدفاع —** ما هى المبالغ التى أخذها محمود عبد اللطيف ؟
- الشاهد —** آخر مبلغ كان خمسة جنيهه ...
- الدفاع —** هل تستطيع — لمصلحة العدالة — أنك تقول لنا عن المبالغ اللى أخذها محمود عبد اللطيف لوحده ؟
- الشاهد —** مرة هنداوى قال لى اديله اثنين جنيهه .. ومرة خمسة جنيهه .. وهو متعود ياخذ فلوس ...
- الدفاع —** بياخذ من فلوسك ولا من فلوس الاخوان ؟

- الشاهد** — من فلوس الاخوان ...
- الدفاع** — انت عضو في الاخوان .. ألم تكلف نفسك التفكير .. ليه بيدوله من فلوس الاخوان ؟
- الشاهد** — لان محمود عبد اللطيف حالته بسيطة .. هو سباك وفقر وله ثلاثة اولاد ، وكان هنداوى بيساعده ..
- الدفاع** — في حدود تقديرك ... ما هي المبالغ التي أعطيت لمحمود عبد اللطيف ؟
- الشاهد** — خمسة جنيه مرة ، واثنين جنيه مرة .. وخمسة جنيه آخر مرة ...
- الدفاع** — المصروفات بتاعة الاخوان فيها بند خاص بالاحسان على اعضائها ؟
- الشاهد** — أيوه ...
- الدفاع** — عدد اللي بتحسنا اليهم اد ايه ؟
- الشاهد** — اربع افراد ..
- الدفاع** — مين همه ؟
- الشاهد** — محمود عبد اللطيف ، وعباس ...
- الدفاع** — عباس حجاج ؟
- الشاهد** — ما عرفشى بقيت اسمه ... وهو طالب فقير ...
- واحد من العمال مرة هنداوى قال لى اصرف له فلوس لانه بيان وعنده سل ، فاعطيته اثنين جنيه ...
- الدفاع** — والرابع ؟
- الشاهد** — لا اذكره ...
- الدفاع** — القيمة الشهرية اد ايه اللي بتصرفها احسان ؟
- الشاهد** — دى حاجة مش ثابتة ...
- الدفاع** — تختلف من كام لكام يعنى ؟
- الشاهد** — حسب الظروف وحسب الحالات المطلوبة ...

الدفاع - طيب ...

الرئيس - قول لنا ايه حكاية منشورات ؟ ... آخر منشور مثلا كان ليه ؟

الشاهد - ده كان من المرشد للاخوان ...

الرئيس - كان بيقول فيه ايه .. ؟

الشاهد - ده كان فيه خطاب للاخوان ، والخطاب اللي بعته

للرئيس جمال عبد الناصر ...

الرئيس - ايه خطابه للاخوان .. ؟

الشاهد - مش متذكر ...

الرئيس - ازاي مش كنت لازم تحفظه ؟

الشاهد - أظن الخطاب ده كان فيه معاني الصبر ..

الرئيس - ده كان منشور سرى جاى لك من المرشد العام ..

مش لازم تتذكره ؟

الشاهد - أصل أنا كنت مشغول خالص ...

الرئيس - كنت مشغول خالص ؟

الشاهد - أيوه . . . طيب شويه كده والله . . . بس أنا

عاوز اتذكره ...

الرئيس - على مهلك ... اجيب لك فنجان قهوه ؟

الشاهد - آه ... خطاب للهيئة التأسيسية ... كان بيقول

فيه ... على أى حال الخطابات دى كلها موجودة وممكن

سيادتك تطلع عليها .

الرئيس - أنا عارف أنها موجودة ، ولكن أنا عاوزك انت

تقول لى كان فيها ايه ؟

الشاهد - لا أذكر ...

الرئيس - طيب والمنشورات اللي قبل منه ؟

الشاهد - كان بتاع ... « هذه الاتفاقية لن تمر » ... وأنا

بعد مآقرآته تضآيقت جءآ وقطعته ...

الرئيس - كتر خيرك ... .. كآن فيه آيه ؟

الشآهء - كلام كله هراء وكذب

الرئيس - كلام الجماعة هراء وكذب .

الشآهء - لآ أعتقء انه بتآع الآخوان ...

الرئيس - كلام المرشد هراء ؟

الشآهء - كلام فارغ يآفءءم ...

الرئيس - مين اللى سلمهولك ؟

الشآهء - هءءاوى ... الواحد كآن أعمى فى الأول ...

الرئيس - نرجع للأول لما كنت مغمى ...

الشآهء - ءلوقت الواحد شآف الحققة كويس ...

الرئيس - عاوزين نرجع لما كنت أعمى لسه ..

الشآهء - كلام كذب ...

الرئيس - آيه هو الكلاء ءه .. .. عاوزين نعرف الكلام ءه

... آءنا مش بنقول ءافع عن هءآ الكلام ؛ وآلا آيه رآيك فيه ؟

آءنا عاوزين نعرف الكلام نفسه ..

الشآهء - آنا متءكر العءوان نفسه اللى هو « هءه الآءقآفة

لن تمر » ولكن الكلام لآ أءكره ...

الرئيس - وآيه ءانى فى المنشورات ءى ... ؟

الشآهء - ءى خطآبات كآئت بءىجى بكثرة من المرشء

للآخوان يوصيهم فيها بالصبر ...

الرئيس - وآيه ءانى فى المنشورات ءى ... ؟

الشآهء - ءه اللى أءكره .

الرئيس - والصبر ءه عاوز منشورات ولا مقآلة فى الجرنال ؟

الشآهء - على آى ءآل ؛ ممكن لسيآءتك آئك ءطلع على

المنشورات ءى ...

الرئيس — انا كنت باطلع عليها اول بأول ، وعارفها أكثر منك . .

الرئيس — والتعليمات سبقها . . الاوامر المستديمة

الشاهد — ايوه . .

الرئيس — ايه هي تقدر تقول لنا حاجة عنها ؟

الشاهد — . . .

الرئيس — عندكم تعليمات واوامر مش كده ؟

الشاهد — دى أول مرة اسمع عنها .

الرئيس — انت مش رديف لهنداوى ؟

الشاهد — انا بقالى شهر مع هنداوى وما أفهمش حاجة

وهنداوى أخذ محمود من جماعتنا وقال مالکش دعوه بيه واحنا

مظلومين والله العظيم وهات هنداوى علشان أقول له الكلام ده

فى وشه .

الرئيس — مين اللى كان بيفتش على الاسلحة ؟

الشاهد — سيد الرئيس .

الرئيس — منين ده ؟

الشاهد — من بين السرايات .

الرئيس — بيجى يفتش على الاسلحة ليه ؟

الشاهد — كان بيجى يشوف السلاح صالح أولا .

الرئيس — شغلته ايه ؟

الشاهد — ما اعرفش .

الرئيس — واحد بيجى يفتش على الاسلحة يبقى شغلته

ايه فى الجهاز ؟

الشاهد — يبقى لازم مفتش اسلحة .

الرئيس — عندك حاجة تانية عايز تقولها ؟

الشاهد — احنا مظلومين انا واخويا ووالدتى . . .

الرئيس — ما تقولش كده — انا مباليش دعوه بوالدك ووالدتك



- واخواتك .. هو الاسلام قال كده .
- الشاهد — انا واخويا ووالدى ميت .
- الرئيس — اتبعوا مبدا الاسلام علشان تطلعوا شرفا على الاقل
- الدفاع — الاسلام بيقول كل نفس بما كسبت رهينة .
- الشاهد — ربنا يخليكم ويؤيدكم ...
- الرئيس — مش عاوزين دعاك .. فيه مثل بيقول لا ام قويق
- طاهره .. ولا دعاها مستجاب اتفضل مع السلامة .

( انصرف الشاهد )

- الرئيس — الشاهد الذى يليه .
- المذمى — حامد عبد الفتاح نويتو .
- ( نودى على الشاهد فحضر )
- الرئيس — اسمك ايه ؟
- الشاهد — حامد عبد الفتاح نويتو .
- الرئيس — بتشتغل ايه ؟
- الشاهد — طالب ومطبعجى .
- الرئيس — طالب ومطبعجى ؟
- الشاهد — طالب فى النقافة .
- الرئيس — ومطبعجى فين ؟
- الشاهد — فى مكتبة الجامعة .
- الرئيس — سنك كام سنة ؟
- الشاهد — ٢٣ سنة .
- الرئيس — عارف ده ايه ؟
- الشاهد — ايوه مصحف .
- الرئيس — قل والله العظيم اقول الحق ولا شىء غير الحق
- والله على ما أقول شهيد .
- ( اقسم الشاهد اليمين ) .

الرئيس - المدعى .

المدعى - هل أنت عضو في جماعة الاخوان المسلمين ؟

الشاهد - ايوه .

المدعى - ايه عملك اللي بتقوم به في الجماعة ؟

الشاهد - لغاية مارس سنة ١٩٥٤ كنت عضو عادى خالص وبعدين مصطفى الوردانى نائب الشعبة ادانى معاد أروح له في البيت وكنت جاى من المعهد الساعة ٨.٣٠ ورحت له البيت لقيت حلمى وحسن عبد العظيم ويوسف السيد وجه بعد كده حسن عبد المنعم ومصطفى الوردانى قال لنا كلنا أن فيه نظام عندنا في الاخوان ننقى من الاخوان العاديين اخوان نحطهم في جماعات وندريبهم على أسلحة ونخفيهم لما الحكومة تحتاجهم في حرب فلسطين أو القنال فاحنا ندريبهم ونخليهم لوقت الحاجة والحكومة تساعدنا في الحاجات اللي نعوزها فقلت له طيب مادام دى حاجة فيها استشهاد في سبيل الله مفيش مانع .

الرئيس - يا سلام .

الشاهد - كده والله يابيه .

الرئيس - الاخوان بيعلموكم يابيه دى ؟

الشاهد - نعم .

الرئيس - الدين الاسلامى فيه يا بيه

الشاهد - لا .

الرئيس - أمال بتخالف الدين الاسلامى وتقول يا بيه ليه ؟

الشاهد - ماخدتش بالى يافندم .

الرئيس - طيب خد بالك من فضلك .

الشاهد - احنا كنا أخذنا مينعاد من حسن عبد المنعم ورحنا

في يوم معين عنده في البيت وكنت أنا ويوسف وحسن عبدالعظيم وحلمى عرفه واجتمعنا عند حلمى في اليوم ده . . مش فاكر

اجتمعنا عنده أو عند حسن فقال قبل أى حاجه لازم تقوى روحنا المعنوية ونحفظ سورة آل عمران وتفسيرها وناخذ سيرة ونخش فى البرنامج الروحى ده فى الاول ومشينا على كده اربع اجتماعات وبعدين انضم الينا سامى الكومى وهو وكيل نيابة وعبد الحى وأحمد حجازى وقال دول حيقوا معاكم فى الجماعة وسامى الكومى كان بيقوم بالتفسير وكانوا بيحبوا لنا منشورات ندرسها وبعدين جت فترة الامتحانات وأنا وحسن عبد المنعم وحلمى عرفه كنا بنذاكر فأخذنا اجازة شهر ونصف وبعدها اجتمعنا ثانى وكانت المنشورات بتيجى وكان فيها حاجات غامضة كان هندأوى ييجى يشرحها وجه مره واحد اسمه محمد عاكف علشان يتعرف علينا وقال كل واحد يقول اسمه وبishtغل فىن ومتجوز أو اعزب وعنده اولاد أو لا ومشى عاكف وبعدين حسن عبد المنعم جه بدانا نجتمع وحلمى عرفه اتخلف بعد اجتماعين أو ثلاثه وبقينا نروح عند أحمد حجازى ويوسف عند حسن عبد المنعم وعبد الحى ابراهيم ومره فى الاجتماعات جاب لنا حسن منشورات ومسندس وأنا كنت جيت فلقيت حسن ماسك مسدس وبيشرح فيه ولما خلص خده يوسف السيد وياه ومشينا وكانت بتجيلنا المنشورات ولغاية تقريبا قبل كده بشهر ونصف أو شهر ما اجتمعناش لان الاخوان كان فيه خلاف بينهم وبين الحكومة وضد بعضهم وكان جه ميعاد امتحان حسن عبد المنعم فى الجامعة وبقالنا شهر ونصف تقريبا زى كده وكانت المنشورات بتجيلنا نوزعها وفيها حاجات من المعاهده وحاجات زى كده . ده اللى أعرفه .

**المدعى -** ايه الغرض من التعليمات الروحية أولا ثم المسدسات؟

**الشاهد -** كانوا بيقلوا علشان حنحتاجكم فى حرب فلسطين

أو القنال أو خارج البلاد وبندربكم علشان تكونوا مستعدين لما نقول لكم واحنا بقالنا ٣ أشهر ونصف أو أربعة من مارس واخذنا اجازة شهر ونصف للامتحانات والله العظيم ما نعرف غير كده وهم صحيح قالوا لنا حندربكم ولكن ما حصلش .

**المدعى -** انت قلت في اجابتك على هذا السؤال في التحقيق ان الغرض كان شيل الحكومة دى وحكم البلد بالقرآن بأن تحصل ثورة ويستولى الاخوان على الحكم مش كلامك ده ؟

**الشاهد -** لا والله مش فاكرك .

**الرئيس -** ولا حد منكم فاكرك حاجه . . لا تعاليم القرآن ولا تعاليم الدعوه . . دى مش امضاءك ؟

**الشاهد -** أيوه .

**الرئيس -** انت راخر زى أخوك مضيت من غير ما تقرأ .

**الشاهد -** لا .

**الرئيس -** الحمد لله . . . وايه حكاية المسدس اللى جابوه وفكوه قدامكم ؟

**الشاهد -** أنا كنت ساعتها رحت اجيب قلمين من البيت ورجعت لقيت حسن بيشرح فيه ويعدين أخذه يوسف وروح فاستنتجت ان مادام يوسف أخذه يبقى بتأعه ولكن ما اعرفش ان كان حسين أو يوسف هو اللى جابه .

**وكيل النيابة -** تعرف ان فيه أسلحة جات للفصيلة فى امبابه ؟

**الشاهد -** مره كنت عند هنداوى وقال روح لمحمود عبد اللطيف آنده له فرحت ومعايا محمد نجيب .

**الرئيس -** محمد نجيب مين ؟ رئيس الجمهوريه ؟

**الشاهد -** محمد نجيب راغب ورحنا له فقال طيب ورجعت

فهنداوى ادانى شنطه وقال لى خد الشنطه دى روح بها المخزن

فقلت له مخزن ايه فقال بس روح قول لاخوك هنداوى باعت  
الشنطة دى وبيقول وديها المخزن واخويا قال لى روح الوراق  
عند واحد اسمه عبد الحميد البنا وقول له سيد كامل واعطيه  
الشنطة فرحت وقت العشا مالمقيتوش فى البيت فسبتله خبر  
ييجى عندنا وجهه واخذ الشنطة على بسكيت ورحت معاه  
وصلته والشنطة كان فيها ( برتين ) ومش معقول أبدا احنا  
نعملها ضد المصريين هنا بل فى فلسطين أو القنال وأنا رحت  
وصلته بالعجله ورجعت ودى اول مره رحت فيها .

**الرئيس -** عبد الحميد البنا بيقول انه كان عيان فى البيت  
وانت اللى رحت له .

**الشاهد -** لا . . حضرة المحقق يجيبه قدامى ويشوف اذا  
كنت كذاب . . يوم ما كان عيان ده مره ثانية وده كان فى الصبح  
الساعة سبعة الا ثلث صباحا ندهنى اخويا وقال لى خد الطلقه  
دى وهات زيها من عند عبد الحميد فرحت له . وماكنتش أعرف  
طريقهم وفتحنا الشنطة وقعدنا نفرزهم سوى ويومها كان  
محمود عبد اللطيف قاعد بياكل مع اخويا . وأنا سبتهم ورحت  
اكلت لوحدى ولبست وخرجت على شغلى .

**وكيل النيابة -** محمود عبد اللطيف كان عايز العشر طلقات  
علشان ايه ؟

**الشاهد -** ماقالش اخويا هو قال روح هات ١٠ زى  
دول وتعالى .

**وكيل النيابة -** اخوك كان عارف ؟

**الشاهد -** ما أعرفش .

**الرئيس -** مقالش لك ان محمود مسافر ؟

**الشاهد -** لا والله .

**الرئيس -** جالك من مشورات فى الاجتماعات ؟

- الشاهد - آیوه .  
الرئيس - زی ایہ ؟  
الشاهد - كانت تیجی حاجات نظریة وكان هندای  
بیجی یشرحها لنا .  
وكیل النیابة - عن ایہ ؟  
الشاهد - تكتيك حرب العصابات وهندای كان یشرحها لنا  
وشرح لنا البرتا .  
الرئيس - ما اتدربتش ؟  
الشاهد - لا ماكانش جه دوری فی التدريب .  
الرئيس - ماكانش فیہ منشورات سیاسیة ؟  
الشاهد - آیوه . . انا قلت ان فیہ منشورات بتیجی عن  
المعاهدة وحاجات زی دی  
الرئيس - كنت بتكلفوا بتوزيع المنشورات ؟  
الشاهد - آیوه .  
الرئيس - وانت وزعت منشورات ؟  
الشاهد - آیوه .  
الرئيس - فین ؟  
الشاهد - فی الجامعه .  
الرئيس - كام مره ؟  
الشاهد - ۳ مرات .  
الرئيس - كام منشور ؟  
الشاهد - حوالی عشرة .  
الرئيس - بتوزعهم ازای ؟  
الشاهد - بالید .  
الرئيس - كان فیها ایہ ؟  
الشاهد - حاجات ضد الحكومة وكنا بنوزعها .

- الرئيس — عندك دراية بالاسلحة ؟  
الشاهد — لا يا فندم .  
الرئيس — اش عرفك انها برتا ؟  
الشاهد — ماهو مدفع رشاش .  
الرئيس — اش عرفك ان البرتا تبقى مدفع ومدفع رشاش ؟  
الشاهد — انا اعرف ان فيه البرتا والبرن واللانكستر .  
الرئيس — عرفت الحاجات دي منين . . سمعتها منين ؟  
الشاهد — بنقرا في الجرائد كل يوم .  
الرئيس — الجرائد بتذكر اسماء الاسلحة وانواعها ؟  
الشاهد — بنقول عن الجيش وانه بيدرب على كذا . .  
وكيل النيابة — عبد الحميد البنا كان عنده اسلحة ثانية ؟  
الشاهد — ايوه كان عنده ٣ شنط .  
وكيل النيابة — ماتعرفش فيها ايه ؟  
الشاهد — لا .  
وكيل النيابة — هو كان عارف ان فيها سلاح .  
الشاهد — مااعرفش .  
وكيل النيابة — مين اللي راح جاب العشر طلقات ؟  
الشاهد — انا يا فندم وكان عنده عدة لفف .  
الرئيس — ايه هو الفرقان ؟  
الشاهد — هو القرآن .  
الرئيس — اشمعنى سموه الفرقان ؟  
الشاهد — علشان يفرق بين الحق والباطل .  
الرئيس — برافو . . وسورة آل عمران قالت كمان ؟  
الشاهد — في ايه يا فندم .  
الرئيس — ايه الدروس اللي طلعت بيها من سورة آل عمران ؟  
الشاهد — كنت حفظت ٣٠ او ٣٥ آية وماكملتش .

- الرئيس - ايه الدروس اللى طلعت بيها من الآيات دى ؟  
الشاهد - اننا تعامل ربنا كويس .  
الرئيس - وانت تقدر تعامل ربنا وحش ؟  
الشاهد - لا يا فندم .  
الرئيس - يعنى ماطلعش من ال ۳۵ آية الا بانك تعامل ربنا كويس وتعامله كويس ازاي ؟  
الشاهد - نصلى .  
الرئيس - وتشيلوا برتات ومدافع وتوزع منشورات .  
الشاهد - والله انا غلبان ولا كنت اعرف النظام ده واسرتى مالهش الا انا واخويا .  
الرئيس - ماتشد نفسك . . الظاهر انت واخوك طراى . . لو كنت اتعلمت التكتيك العنيف كنت جمدت .  
الشاهد - والله يا فندم ابدا ولو كنت اعرف انها كده ماكنتش دخلت فيها .  
الرئيس - شد نفسك امال واقف زى الناس .  
المدعى - ذكرت انكم جات لكم منشورات عن حرب العصابات وحسن ماقدرش يشرحها فجه هنداوى شرحها لكم ايه المقصود من حرب العصابات اللى درستوها ؟  
الشاهد - لما نخلص معركة فى قرية من القرى ونطهر البيوت والمباني من الالغام وحاجات زى دى يا فندم .  
المدعى - ده فى الدفاع او الهجوم ؟  
الشاهد - تفتيش المنازل او الحراسة .  
الرئيس - منازل مين ؟  
الشاهد - لما نكون خلصنا معركة فى قرية من القرى وفيها بيوت جماعة تقتحم وجماعة تطهر الالغام وحاجات زى كده . .  
الدفاع - كانوا بيدوكم فلوس ؟



- الشاهد — لا يا افندم والله كنا بندق اشتراكات شهرية .  
الرئيس — كنت بتجيب الفلوس منين ؟  
الشاهد — من القبضية بتاعتى  
الرئيس — بتاخذ كام ماهية ؟  
الشاهد — يوميتى ١٣ قرش .  
الرئيس — يعنى بتاخذ فى الشهر كام ؟  
الشاهد — حوالى ١٢ جنيه .  
الرئيس — والله ما تستاهل ١٢ مليم .  
الشاهد — كانت ماهيتى الاصلية ٩ جنيه وبعدين زدت  
واخذنا الكادر بتاعنا كده .  
الدفاع — وكنت بتدفع اشتراك كام ؟  
الشاهد — عشرة قروش فى النظام العادى وخمسة عشر  
قرشا فى النظام الخاص .  
الدفاع — اخوك كان فى ايده ميزانية ؟  
الشاهد — ايوه . . كان امين صندوق .  
الرئيس — بقى انت شكل واحد بياخذ من الدولة ١٢ جنيه .  
الشاهد — كنت بأخذ ٩ جنيه قبل كده وبعدين زدت بقالى  
حاجة بسيطة .  
الرئيس — بتشتغل ايه ؟  
الشاهد — مطبجى .  
الرئيس — مطبجى ايه ؟  
الشاهد — فى ورشة التجليد بمكتبة الجامعة .  
الرئيس — كنت بتجلد كام كتاب فى اليوم ؟  
الشاهد — كنا ثلاثة او اربعة فى العملية كان فيهم ٣ يقوم  
بالمرمى بتاع الكتب واثنين . .  
الرئيس — انتم خمسة او ثلاثة ؟

الشاهد - خمسة

الرئيس - طيب مع السلامة .

الشاهد - والله تعملوا معروف واراأفوا بحال الاسرة مالها

غيرى انا واخويا ربنا يخليكم .

الرئيس - كلمة واحدة . . مع السلامة .

( انصرف الشاهد ) .

الرئيس - ترفع الجلسة للاستراحة .

( رفعت الجلسة فى الساعة الحادية عشرة والدقيقة الاربعين

صباحا ) .

( أعيدت الجلسة فى الساعة الثانية عشرة والدقيقة الخامسة

والعشرين مساء ) .

الرئيس - فتحت الجلسة . . المدعى . . الشاهد الذى يليه

المدعى - اسماعيل محمود .

( نودى على الشاهد فحضر )

الرئيس - اسمك ايه ؟

الشاهد - اسماعيل محمود يوسف .

الرئيس - سنك كام سنة ؟

الشاهد - ٣٠ سنة .

الرئيس - بتشتغل ايه ؟

الشاهد - مدرس .

الرئيس - مدرس ايه ؟

الشاهد - مدرس مواد اجتماعية .

الرئيس - متخرج منين ؟

الشاهد - من كلية الآداب .

الرئيس - فى مدرسة ايه ؟

الشاهد - فى مدرسة عباس الاعدادية .

الرئيس — تعرف ده ايه ؟

الشاهد — مصحف .

الرئيس — قل والله العظيم اقول الحق ولا شيء غير الحق  
والله على ما اقول شهيد .

### اقسم الشاهد اليمين

الرئيس — المدعى .

المدعى — هل انت عضو فى جمعية الاخوان ؟

الشاهد — نعم .

المدعى — فى اى منطقة ؟

الشاهد — فى الجيزة .

المدعى — ايه العمل بتاعك اللى كنت بتقوم بيه ؟

الشاهد — من شهرين لم يكن لى عمل معين ولكن حينما  
اعتقل رئيس المنطقة الاستاذ يوسف هارون قمت بعمله .

الرئيس — زعق شويه .

الشاهد — حاضر

الرئيس — انت بتدرس ايه . . عندك كام تلميذ فى الفصل .

الشاهد — ٤٠ .

الرئيس — عايزين الاربعين واحد يسمعوا .

الشاهد — حاضر .

المدعى — ايه العمل اللى كنت بتقوم بيه ؟

الشاهد — كنت اشرف على الشئون الادارية فى المنطقة بدل

الاخ يوسف هارون . لما اعتقل .

المدعى — عملك كان ايه ؟

الشاهد — الناحية الادارية .

المدعى — يعنى بتعمل ايه ؟

- الشاهد — الاشراف الادارى .
- المدعى — يعنى مفيش نسطاط سري خاص بالجماعات والفصائل ؟
- الشاهد — كنت اعرف . . ولكن ماكنتش مسئول عنه .
- المدعى — ايه معلوماتك عنه ؟
- الشاهد — كنت أعلم أن فيه نظام خاص برياسة الاخ محمود الحواتكى .
- المدعى — كان عمله ايه ؟
- الشاهد — رئيس فصيلة .
- المدعى — مكونة ازاي الفصيلة ؟
- الشاهد — { مجموعات .
- المدعى — والمجموعة مكونة ازاي ؟
- الشاهد — المجموعة مكونة من ٧ افراد .
- المدعى — واجبهم ايه ؟
- الشاهد — ما أعرفش .
- المدعى — افراد المجموعات يعرفوا بعض ؟
- الشاهد — ما أعرفش .
- المدعى — الاخوان يعرفوهم ؟
- الشاهد — ما افكرش .
- المدعى — تعرف رؤساء المجموعات ؟
- الشاهد — أيوه أعرفهم .
- المدعى — مين هم ؟
- الشاهد — صلاح أبو الخير وتوفيق شلبى وعبدالفتاح موسى .
- المدعى — ايه نشاط الجماعات دى . . ماسمعتش أخبار عن نشاط حيقيم به الاخوان .
- الشاهد — أيوه سمعت كان فيه اخ فى يوم قال ان فيه نشاط

والاخ ده كان حلقة اتصال .

الرئيس — انت بتقول انك فى المنطقة بس .

الشاهد — أيوه .

الرئيس — اش عرفك برؤساء المجموعات ؟

الشاهد — من الاخ محمود الحواتكى عرفنى بيهم .

الرئيس — قال لك ايه ؟

الشاهد — محمود الحواتكى كان مشغول وقال لى تجتمع

بيهم .

الرئيس — علشان ايه ؟

الشاهد — اجتماعات أسبوعية علشان ماتنقطعش الصلة بينهم .

الرئيس — كنت بتجتمع معاهم علشان ايه ؟

الشاهد — الدراسات .

الرئيس — وبعدين ؟

الشاهد — وبس .

الرئيس — اشمعنى رؤساء المجموعات ؟

الشاهد — . . . . .

الرئيس — قول لنا ايه اللى فهمه لك ؟

الشاهد — عرفنى بيهم وقال لى دول رؤساء المجموعات فى

الجيزة وهو كان اتخرج من معهد التربية ومشغول فى مسألة

تعيينه واخذ اجازة علشان يخلص مسألة التعيين فقال لى خد

بالك منهم وبعدين يبقى يستلمهم ثانى منى .

الرئيس — وبعدين ؟

الشاهد — وبس . . . ده من حوالى شهر .

الرئيس — ومسكت محله ؟ وبعدين ؟

الشاهد — أيوه .

**الشاهد -** كنت التقى بيهم اسبوعيا لحفظ القرآن والدراسة  
وده كل اللي حصل في هذا الشهر .

**الرئيس -** ايه حكاية حلقة الاتصال ؟

**الشاهد -** كان فيه عضو معين مكلف بالاتصال .

**الرئيس -** اسمه ايه ؟

**الشاهد -** خليل .

**الرئيس -** خليل ايه ؟

**الشاهد -** ما اعرفش باقى اسمه وكان مكلف بالاتصال وتبليغ

اوامر الجماعة لنا وفي يوم ..

**الرئيس -** امتى ؟

**الشاهد -** قبل الحادث بخمسة ايام قال انه سمع من بعض  
الاخوان ان المسئولين يفكروا في القيام بحركة اغتيالات لأعضاء  
مجلس قيادة الثورة ويقوموا بحركة شعبية ... بعد كده انا  
قلت له ان دى مسألة خطيرة ونزلت رحت لمحمود الحوانكى وقلت  
له فقال ان دى مسألة خطيرة ولازم اروح اشوف ايه الحكاية  
فنزلت واتصلت ببعض الاخوان المسئولين ورجع ومعه الاخ  
عبد الفتاح القرشى وقال انه قابل احد الاخوان المسئولين فقال  
له ان هذا الكلام ليس له نصيب من الصحة وان المرشد لا يوافق  
عليه وبناء عليه انا اغلقت المنطقة ونبهت على الاخوان ان كل واحد  
يعود في بيته وما يتلقاش تعليمات ودى آخر حاجه عملناها في  
المنطقة .

**وكيل النائب العام -** خليل ده اللي كان يبلغك دائما التعليمات  
اللى تيجي من المركز العام عمله ايه او وظيفته ايه ؟

**الشاهد -** كان خليل حلقة صلة بين منطقة الجيزة وبين

المسئولين في المركز العام .

**وكيل النائب العام -** الكلام اللي يبلغه او التعليمات التى تبلغ

لكم من المركز العام بواسطة خليل وقال لك ان فيه خطة وضعت لاغتيال أعضاء مجلس قيادة الثورة . هل هذا عبارة عن تبليغ من المركز العام أو تعليمات ؟

**الشاهد** - لم يقل أن هذا تبليغ إنما هو قال انه سمع أن الاخوان حيعللوا كذا وكذا وأنا لم أستوضح منه هل هذا مبلغ لنا رسميا أو لا .

**وكيل النائب العام** - هل كان هو دائما يتصل بك للتبليغ ؟

**الشاهد** - هو المسئول عن التبليغ

**وكيل النائب العام** - وهو لما يقول ان فيه خطة أو تبليغ يبلغها منين أو كان ينقل رأى مين لك ؟

**الشاهد** - من المسئولين في المركز العام .

**وكيل النائب العام** - وهو كان ينقله لك أو يبلغه لك بصفتك رئيس المنطقة أو رئيس الفصيلة ؟

**الشاهد** - أنا مش رئيس فصيلة ورئيس الفصيلة كان الحوانكى .

**وكيل النائب العام** - كنت رئيس فصيلة بالنيابة عن الحوانكى وكان يبلغك التعليمات بصفتك ايه وايه اللي قال لك أو ايه الخطة التي بلغها لك خليل ؟

**الشاهد** - قال لي باختصار ان الاخوان ناويين يغتالوا بعض أعضاء مجلس قيادة الثورة وان الاخوان حيقيموا بحركة شعبية بعد هذا .

**وكيل النائب العام** - ماسألتوش ان الحركة الشعبية دي حتقوم ازاي ؟

**الشاهد** - قال لي أنا لسه معنديش تفصيلات أكثر من هذا .

**وكيل النائب العام** - قال لك أنا ماعنديش تفاصيل وفي الوقت المناسب الاخوان حيبلغوك .

الشاهد — أيوه .

وكيل النائب العام — مين المسئولين اللي يتصل بهم خليل ؟  
الشاهد — أنا لا أعرف المسئولين وإنما أعرف انه يتصل  
بالمركز العام وأشخاصهم لا أعرفهم .

وكيل النائب العام — طيب مين المسئولين عن النظام السرى ؟  
الشاهد — ما أعرفش .

وكيل النائب العام — ماتعرفش ابراهيم الطيب ؟  
الشاهد — أيوه .

الرئيس — وجه الكلام ليه . انتم مش علموكم النظام في  
الجهاز السرى ؟

الشاهد — أيوه .

الرئيس — وعلموكم انكم تسمعوا الاوامر بدون ان تناقشوها .  
الشاهد — فيه مناقشة وابداء رأى .  
الرئيس — وبعدين .

وكيل النائب العام — أين قابلت ابراهيم الطيب ومتى ؟  
الشاهد — هو دعا رؤساء المناطق في اجتماع عشان تنظيم  
لجان لمساعدة أسر المعتقلين وهذه كانت آخر مرة في منزل في  
العباسية قبل الحادثة بعشرة أيام .

وكيل النائب العام — انت ماكلمتناش عن الخطة .

الشاهد — هو كلمنا عن تنظيم لجان لمساعدة أسر المعتقلين  
وكيل النائب العام — بصفتك رئيس الفصيلة بالنيابة .  
الشاهد — معرفش انما محمود الحواتكى كلفنى ان أقوم  
مقامه الى أن يعين في الوظيفة .

وكيل النائب العام — هل من المفروض انه يخفى عليك الامر  
انت مش كنت قائم بعمل رئيس الفصيلة ؟



**الشاهد -** دى كانت حاجة خاصة بينى وبين محمود الحواتكى .

**وكيل النائب العام -** عملت رئيس فصيلة لمدة ايه ؟  
**الشاهد -** شهر الى ان تم تعيين محمود فى وزارة المعارف .  
**وكيل النائب العام -** ماتعرفش مين المسئول عن رؤساء المناطق ؟ او رؤساء الفصائل يتصلون بمين ؟

**الشاهد -** معرفش غير خليل الذى يبلغنا التعليمات .  
**وكيل النائب العام -** مين رؤساء المناطق الى حضروا اجتماع العباسية معاك ؟  
**الشاهد -** لا أعرفهم لان هذه كانت اول مرة وآخر مرة .

**وكيل النائب العام -** اشرح الخطة التى بلغت اليك من خليل بالبدء فى اغتيال أعضاء مجلس قيادة الثورة .

**الشاهد -** هوہ بلغنى باختصار أنه سسمع بعض الاخوان يفكرون فى اغتيال أعضاء مجلس قيادة الثورة وبعدين الاخوان يقوموا بحركة شعبية فقلت له دى مسألة خطيرة وأنا سمعت هذا الكلام فجيت أبلغك فأنا اتصلت بمحمود الحواتكى فقال لى دى مسألة خطيرة ولازم أروح أشوف ايه الحكاية فنزل وكان معاه عبد الفتاح القرشى عشان يتصل بالمستولين وبعدين رجع وقال لى ده كلام غير صحيح والمرشد لا يوافق عليه وبناء عليه أغلقنا المنطقة .

**وكيل النائب العام -** الحركة الشعبية أساسها ايه او ايه هدف الحركة الشعبية ؟

**الشاهد -** ما أعرفش لانه ما ادانيش تفاصيل خالص .  
**وكيل النائب العام -** تقوم ازاي الحركة الشعبية افرض انه حصلت الاغتيالات والخطة اتنفذت يحصل ايه ؟

الشاهد — الحركة الشعبية تهتف بشخصية معينة عظيمة .

وكيل النائب العام — مين ؟

الشاهد — استنتجنا أن الشخصية العظيمة دى هى اللواء

محمد نجيب .

الرئيس — ( لاحظ ان الشاهد ينظر الى الادعاء ) أعوج رقبتك

وبص لى .

وكيل النائب العام — استنتجت من ايه ؟

الشاهد — يقول الهتاف حيكون لشخصية عظيمة فاستنتجنا

ان الشخصية العظيمة ربما تكون اللواء محمد نجيب .

وكيل النائب العام — مقالش لك انه صدرت تعليمات

لشخص معين للبدء فى تنفيذ الخطة .

الشاهد — لا .

وكيل النائب العام — تعرف هنداوى دوير ؟

وكيل النائب العام — ألم تقابله قبل سماع التعليمات ؟

الشاهد — لا ما قابلتوش .

الرئيس — ايه فائدة النظام الخاص ؟

الشاهد — الذى أعرفه انه تربية الشباب تربية فيها شيء

من الخشونة وتربية من الناحية العسكرية بجانب التربية

الروحية كالنط والقفز والجرى هذا كل الذى نفهمه عن النظام .

الرئيس — النظام الخاص علنى أو سرى ؟

الشاهد — معظم الاخوان لا يعرفوه .

الرئيس — يعنى يبقى سرى أو علنى ؟

الشاهد — سرى .

الرئيس — النط والقفز والتربية البدنية ايه السرية

الى فيها .

الشاهد — مفهاش سرية ؟

- الرئيس** — يبقى سرى ليه ؟  
**الشاهد** — بقية الاخوان مايعرفوش هؤلاء الاعضاء .
- الرئيس** — ليه ؟ اذا كان الجهاز السرى يتنطط ويتربى تربية جسمانية سليمة فليه الاخوان الآخريين مايعرفوش .
- الشاهد** — الى اعتقده انهم كانوا ينقوهم ولايقولون للآخريين حتى لايقول الباقي اشسمعنى تنقوا دول وتدريبوهم تدريب خاص ويقومون برحلات .
- الرئيس** — يعنى كان فيه خيار وفقوس فى الدعوة الاسلامية ؟  
**الشاهد** — هذا ما استنتجته ليه عملوها سرية عشان الآخريين مايزعلوش .
- الرئيس** — يعنى كانوا يفضلوا أو يميزوا ناس على ناس ؟  
**الشاهد** — طبعا ده الى أعرفه .
- الرئيس** — ده الغرض من السرية .  
**الشاهد** — الى استنتجته .
- الرئيس** — وحضرتك مدرس ؟  
**الشاهد** — أيوه .
- الرئيس** — أهلا وسهلا . . . . . وايه الغرض من الفصائل والمجموعات ؟
- الشاهد** — أنا مكنتش فيها واللى أعرفه انها زى الشعب بتاعة الاخوان .
- الرئيس** — طيب ليه تبقى سرية مش يبقى الغرض الى فهمو هولكم عنها غير حقيقى ؟
- الشاهد** — أنا قلت لحضراتكم ان الشهر الى كنت فيه رئيس فصيلة مؤقت لم يحصل فيه الا أربع اجتماعات عادية .
- الرئيس** — ايه السرية فى هذا النظام من ناحية التربية البدنية فاستنتجت انها كانت سرية على الآخريين عشان مايقولوش

اشمعى وبعدىن اشتغلت شهر رئيس فصلة ومكنش فىسه  
تربية بدنية يبقى اذن مفيش ما يدعو للسرية .

**الشاهد** - انا لم اقم باى نشاط غير الاجتماعات العادية وعلى  
اساس انها حاجة مؤقتة لغاية ماييجى محمود ويستلمها .

**الرئيس** - ايه معلوماتك عن النظام السرى ؟

**الشاهد** - فيه شباب معين يختار من افراد الشعب . ويكون  
وصل الى مرحلة معينة من التربية الجسمانية فيدرب تدريب  
فيه شىء من الخسونة العسكرية وعلى الرحلات .

**الرئيس** - ايه الغرض من التربية العسكرية ؟

**الشاهد** - للجهاد

**الرئيس** - جهاد ايه ؟

**الشاهد** - فى القنال وفلسطين كما كنت اظن .

**الرئيس** - فى القنال وفلسطين كما كنت تظن امال كنت  
تفتكر ايه ؟

**الشاهد** - ده اللى كنا نفتكره لكن دلوقتى الانجليز .....

**الرئيس** - زعق

**الشاهد** - اعتقد ان الاخوان فى النظام بيستعدوا للقتال فى

فلسطين او القنال .

**الرئيس** - وهل الجهاد فى فلسطين او القنال يكون بالتربية  
البدنية ؟

**الشاهد** - والتربية العسكرية فى حينها ولم يدربوا عسكريا

**الرئيس** - التربية العسكرية . ويستلزم ايه التدريب  
العسكرى ؟

**الشاهد** - التدريب على اطلاق النيران .

**الرئيس** - منين تعرف انهم ما ادربوش على اطلاق النيران ؟

**الشاهد** - لانى ما ادربتش

الرئيس — اش عرفك

الشاهد — معنديش معلومات

الرئيس — احنا بنكلم عن الجهاز السرى

الشاهد — دى معلوماتى

وكيل النائب العام — كان فيه معسكر فى كرداسة

الشاهد — سمعت

وكيل النائب العام — مارحتش تدرب فيه

الشاهد — لا

وكيل النائب العام — هل كنت فى الحرس الوطنى ؟

الشاهد — لا ولم اطلق النار فى حياتى . ومعسكر كرداسة

كان يقام فى الصيف باشتراك . . .

وكيل النائب العام — انت كنت احد اعضاء الجماعة . والسلاح

جالكم اخيرا وكنتم بتدربوا دوريا فى معسكر كرداسة .

الشاهد — قلت انى سمعت ان فيه معسكر فى كرداسة وكانوا

بيدفعوا اشتراك خمسة قروش وهذا كل ما عرفناه عن كرداسة

وكيل النائب العام — مجموعتكم لم تدرب

الشاهد — لا .

الرئيس — لما كنت فى المجموعة كانت غرضها ايه ؟ المعروف ان

المجموعة الذى كنت فيها جزء من الفصيلة والفصيلة جزء من

المنطقة والمنطقة جزء من النظام العام للاخوان فهل الفصيلة وهى

جزء من المنطقة كانت من الجزء العلنى ؟

الشاهد — طبعا مش علنية .

الرئيس — يعنى سرية نظام خاص فتبقى جزء من النظام

الخاص وانت كنت احد اعضاء النظام الخاص امال ليه انت بتقول

انك مادخلتش الا لما مسكت بدل محمود الحواتكى .

الشاهد — حضر اجتماع رؤساء المناطق فى العباسية .

**الشاهد -** انما ما كنتش مسئول عن الفصيلة الا لما كنت بدل الحواتكى .

**الرئيس -** هو ده اللى علموكم عن الاسلام مش علموك ان تكون صريح وتبين كلامك ولا تغش ولا تدور .  
**الشاهد -** ايوه .

**الرئيس -** طيب ماتقول انك انت أحد أعضاء النظام السرى الخاص .

**الشاهد -** أنا قلت هذا فى أقوالى فى التحقيق

**الرئيس -** نحب نسمعه فى المحكمة

**الشاهد -** ايوه .

**الرئيس -** ايه التدريب العسكرى اللى ادربت عليه ؟

**الشاهد -** ما ادربتش عسكرى ، انما كان تدريب بدنى نروح معسكرات بس كده .

**الرئيس -** وايه التدريب البدنى ده وفى أى معسكر ؟

**الشاهد -** رحت معسكر كرداسة .

**الرئيس -** انت لسه بتقول انك ما رحتش كرداسة وانك

سمعت عنه بس .

**الشاهد -** كانوا بيعملوا اعلان فى الشعبة عن المعسكر وبعض

الاخوان كانوا يقضوا بعض أيام هناك بعد دفع الاشتراك .

**الرئيس -** والله انكم وصمتتم المسلمين وانكم وصمة فى جبين

المسلمين واعتقادى الشخصى ان الاسلام لم يصل الى هوة كما

وصل على يد جماعة الاخوان المسلمين لانكم كلكم كنايين

وكيل النائب العام - هل فهمت من خليل الذى بلغك الخطة

الموضوعة أن التعليمات ابلغت لمناطق أخرى ؟

**الشاهد -** ما قالش .

**وكيل النائب العام -** اليس هو المكلف بتبليغ الخطة من الرئاسة

الى المناطق ؟

**الشاهد -** ما أعرفش معنديش معلومات .

**وكيل النائب العام -** وايه اللي عملته بعد أن ابلفك خليل  
بالاغتياالات النى تدبر ؟

**الشاهد -** قلت للاخ محمود الحواتكى لانى شكيت فى الامر  
خاصة وان الخبر خطير فقال لى لما اروح استطلع الحقيقة ونزل  
هو وعبد الفتاح القرشى وقابل الاخ محمود والمسئولين .

**وكيل النائب العام -** هل سبق أن ابلفك خليل تعليمات او كلام  
ظهر بعد ذلك أنه كذب ؟

**الشاهد -** طبعاً لا .

**وكيل النائب العام -** أمال ليه شكيت ؟

**الشاهد -** لخطورة التعليمات ولما بلغتها لمحمود نزل مع عبد  
الفتاح القرشى ولما رجع قال لى أنه اتصل بأخ موثوق بيه ونفى  
الخبر .

**وكيل النائب العام -** احنا فى خليل هل سبق أن ابلفك كلام  
كذب وايه الاجراء اللى اتخذته لتمنع هذه الكارثة ؟  
**الشاهد -** امرنا الاخوان كل واحد يقعد فى بيته كل اخوان  
المنطقة .

**وكيل النائب العام -** هل بلغت رؤساء المجموعات ؟

**الشاهد -** لا .

**الرئيس -** أمال بلغت مين ؟

**الشاهد -** لايجيب

**وكيل النائب العام -** اليس المفروض أن النظام الادارى هو  
اللى يقوم بالحركة الشعبية وانت مسئول عن هذا النظام ؟

**الشاهد -** الاخ محمود كان موجود وقررنا أنا وهو . هو يبلغ  
الناحية الخاصة به وأنا أبلغ الناحية الخاصة بى .

**الرئيس** — أنت مش قررت دلوقت ان محمود كان فى اجازة من الفصيلة فهل يصح أنه يرجع فى الاجازة ويتراس الفصيلة ؟  
**الشاهد** — ماكنش فى اجازة ده كان مجرد اذن بالغياب

**الرئيس** — يعنى ألقى الاجازة ؟

**الشاهد** — كنت لسة متفاهم معاه .

**الرئيس** — لكن الى هذه اللحظة انت كنت مسئول عن الفصيلة فهل أبلغت رؤساء المجموعات ؟  
**الشاهد** — لا .

**الرئيس** — اسمهم ايه ؟

**الشاهد** — سعد ربيع وعبد الفتاح القرشى .

**الرئيس** — ودول من النظام الخاص والا لا ؟

**الشاهد** — أيوه

**الرئيس** — تبقى أنت بلغت ناس فى النظام الخاص

**الشاهد** — المسئولين عن الناحية الادارية غير المسئولين عن النظام الخاص

**الرئيس** — مين الوكيل بتاعك فى الشعبة ؟

**الشاهد** — مليش وكيل لانى رئيس منطقة مؤقت .

**الرئيس** — مؤقت هنا ولا تعرف شيئاً عن النظام الخاص رغم أنك عضو فى احدى المجموعات وقلت أنك سمعت عن معسكر كرداسة ومع ذلك ثبت أنك رحت معسكر كرداسة وتمرنت فيه  
**الشاهد** — مفيش تمرينات ده كان برنامج رياضى .

**الرئيس** — وأنا ما قلتش أنك اتمرنت على حاجة ثانية فليه شكيت فى التمرين اللى قلت عليه

**الشاهد** — مشكتش فى حاجة .

**الرئيس** — طيب بتنفى التمرين ليه ؟

**الشاهد** — كانت برامج رياضية بس



**الرئيس —** تدريب أو تمرين . كمل وبعدين  
**الشاهد —** بس قررنا غلق المنطقة وأمرنا ان ما حدش من  
الاخوان يتصل بأحد .

**وكيل النائب العام —** هل يجتمع النظام السرى فى المنطقة ؟  
**الشاهد —** لا

**وكيل النائب العام —** أمال بيجمع فين ؟  
**الشاهد —** فى البيوت

**وكيل النائب العام —** ايه علاقة قفل المنطقة والاخوان لا يتصلوا  
بأحد ويعدوا فى بيوتهم اذا كان المفروض أنهم يجتمعوا سرا .  
**الشاهد —** كانوا يجتمعوا بمجرد ...

**الرئيس —** هل يمكن لأحد أعضاء النظام الخاص أن يتصل  
بأحد أفراد المجموعات الأخرى عن غير طريق رئيس الفصيلة ؟  
**الشاهد —** لا .

**الرئيس —** اذن يبقى الحاجة المعقولة انك تسبب المنطقة  
مفتوحة أمال ليه انت قلت لهم اغلقوا المنطقة ؟

**الشاهد —** خوفا من أحد يعمل حاجة من نفسه .  
**الرئيس —** ما انت تقدر لما يدريك تعليمات ماتبلغهاش  
**الشاهد —** يصح ينفذ .

**الرئيس —** مش لما تقول له ماتلقاش أوامر مش ينتظر ؟  
**الشاهد —** واجب يقول .

**الرئيس —** المسألة تبقى تأدية واجب شكلية .  
**الشاهد —** من الناحية العملية هو المسئول عن كل تصرفاته  
من ناحية الاتصال . لكن احنا قررنا قفل المنطقة وما حدش  
يتصل بحد وكل واحد يقعد فى بيته .

**الرئيس —** لما يقعدوا فى بيوتهم ما يروحوش شغلهم ؟  
**الشاهد —** لا . بعد الشغل ما يتصلوش بحد .

الرئيس — وما يقعدون في القهوة ؟

الشاهد — لا يقعدوا في القهوة .

الرئيس — كان قبل الحادثة بأد ايه ؟

الشاهد — حوالى يومين .

وكيل النائب العام — هل تعرف على عبد المنعم ؟

الشاهد — نعم .

وكيل النائب العام — هل كان عضو في النظام الخاص ؟

الشاهد — أسمع انه من النظام الخاص .

وكيل النائب العام — وتعرف ايه عن الاسلحة التي ضبطت

عنده ؟

الشاهد — ما أعرفش .

وكيل النائب العام — مش انت رئيس فصيلة ؟

الشاهد — أنا كنت رئيس مؤقت بس ومعنديش معلومات .

وكان نشاطي مؤقت الى أن يتعين محمود وكنت اجتمع بالاخوان  
اجتماعات عادية .

وكيل النائب العام — لما سلمك الرئاسة معرفتش مكان

الاسلحة .

الشاهد — لا .

الرئيس — ايه نظام تسليح الجماعة ؟

الشاهد — ما عنديش معلومات واسعة في الحكاية دي .

الرئيس — لما كنت عضو في الجماعة مش كنت تعرف ان

الفصيلة مكونة من أربع جماعات وكل جماعة لها رئيس ورديف

الشاهد — كل معلوماتي أن الفصيلة مكونة من ٢٨ شخص

ومقسمة الى أربع جماعات كل جماعة تتكون من سبعة اشخاص

الرئيس — والرئيس والرديف يقولوا ٣٠ والا الرئيس والرديف

من ضمن الجماعات .

الشاهد - ما عنديش معلومات واسعة في الحنة دي

الرئيس - بتفرقوا ما بين الحنة والحنة ازاي ؟

الشاهد - حنة ازاي

الرئيس - كل حاجة عندكم حنة

الشاهد - ما عنديش معلومات

الرئيس - قلت في أقوالك في التحقيق ان خليل أبلغك ان

الخطة تبدأ باغتيال الرئيس جمال

الشاهد - أيوه

الرئيس - ماقلتش ليه هنا دلوقتي

الشاهد - قلت ان فيه فكرة لاغتيال بعض أعضاء مجلس

قيادة الثورة

الرئيس - اذكر لنا كل تفاصيل الخطة كما بلغت اليك

الشاهد - قال انه سمع من بعض المسؤولين هناك ان فيه

خطة لاغتيال أعضاء مجلس قيادة الثورة ومنهم الرئيس جمال

ثم قيام الاخوان بحركة شعبية وتهتف بأسم شخصية عظيمة

معينة .

الرئيس - تبدأ خطة الاغتيال بالرئيس جمال او يكون منهم

الشاهد - قال لي منهم الرئيس جمال ثم يقوم الاخوان

بحركة شعبية تهتف بأسم شخصية معروفة استنتجنا انها

محمد نجيب .

الرئيس - مين استنتج ؟

الشاهد - احنا كلنا

الرئيس - مين ؟

الشاهد - أنا ومحمود .

الرئيس - هل كان خليل حلقة اتصال بينكم وبين المركز العام ؟

الشاهد - أيوه

الرئيس - ما هي الأوامر التي أبلغها لكم قبل هذا ؟

الشاهد - أوامر إدارية

الرئيس - زى إيه ؟

الشاهد - زى الاجتماع بتاع رؤساء المناطق لرعاية أسر المعتقلين والأوامر دى كان القصد منها ان كل منطقة تكون لجنة من عدة أفراد لرعاية أسر المعتقلين ودرس حالتها وعما اذا كانت تحتاج لاي شئ وعلى المجموعات ان تحاول ان تساعد كل أسرة من هذا القبيل

الرئيس - وانتهيتم على إيه ؟

الشاهد - أخذنا هذه التعليمات وكنا بصدد تكوين هذه اللجان .

الرئيس - هل هذه هي المرة الوحيدة اللى اتصل بك فيها ؟  
الشاهد - أيوه

الرئيس - بس المرة دى اللى اتصل بك فيها فى مدة الشهرين بتوع رياستك للمنطقة .

الشاهد - أيوه بس

الرئيس - مين قال لك عليه انه ضابط اتصال ؟

الشاهد - هو خليل قدم لى نفسه وقال لى أنا فلان من اخوان بين السرايات والصلة بين المنطقة والمسؤولين فى المركز العام .

الرئيس - ازاي تثق فيه وانت لا تعرفه ؟

الشاهد - اتصلت بالحواتكى وقال لى انه فعلا من الاخوان .

الرئيس - هل تعرف محمود عبد اللطيف

الشاهد - لا

الرئيس - تعرف مين فى منطقة امبابة ؟

الشاهد - ما اعرفش حد

الرئيس - ما تعرفش هنداوى دوير ؟

**الشاهد** - قابلته مرة في اجتماع رؤساء المناطق  
**الرئيس** - تعرف ابراهيم الطيب ؟  
**الشاهد** - عرفته في اجتماع رؤساء المناطق ولم اكن اعرفه  
قبل ذلك .

**الرئيس** - مين اللي ضمك لجماعة الاخوان ؟  
**الشاهد** - من حوالى سنة ١٩٤٩ أو ١٩٥٠ بدأت انضم  
لشعبة الجيزة وكنت قبل هذا التاريخ اسمع محاضرات في  
المركز العام

**الرئيس** - ايه السبب في أنك حببت تتأكد من شخصية  
خليل وتروح تسأل الحواتكى ؟

**الشاهد** - لانه قدم لى نفسه وقال لى انه الصلة بينى وبين  
المركز العام ولم اكن اعرفه وكنت عايز اعرف ان كان أخ ولا لا  
**الرئيس** - آمال منتظر انه يقول لك ايه ؟

**الشاهد** - أنا حببت انى أتأكد انه اخ صحيح وان كان حد  
يعرفه من المنطقة أو لا

**الرئيس** - أخ أو مش أخ مسلم أو غير مسلم

**الشاهد** - محمود قال لى أيوه اعرفه

**وكيل النائب العام** - متى تشكل النظام الخاص بالوضع  
الجديد ؟

**الشاهد** - معنديش معلومات ومحمود هو الذى يعرف  
المعلومات .

**وكيل النائب العام** - مش كنت رئيس منطقة بقى لك أد ايه ؟

**الشاهد** - أنا عملت رئيس منطقة من شهرين ومعنديش  
معلومات

**وكيل النائب العام** - متى انضميت الى المجموعة ؟

**الشاهد** - من شهرين أو ثلاثة

**وكيل النائب العام** - لما تشكلت المجموعات قبل كده مش

كنت عضو فيها وعاصرت تشكيل المجموعات فى الاول ؟

الشاهد - أيوه

وكيل النائب العام - ألم تقم بأعمال رئيس المنطقة فكيف  
لا تعرف متى شكل هذا النظام ؟

الشاهد - معرفش

وكيل النائب العام - اشمعنى اختاروك رئيس منطقة وليه ؟

الشاهد - شبه توحيد فى العمل لانى كنت ماسك أعمالها

وكيل النائب العام - ماعمل محمود الحواتكى فى المنطقة ؟

الشاهد - قائد فصيلة

وكيل النائب العام - وهل قائد الفصيلة مستقل عن رئيس  
المنطقة ؟

الشاهد - أيوه

وكيل النائب العام - الحواتكى وصلاح توفيق قالوا انك  
شكلت الفصيلة مع الحواتكى وبعدين توليت رئاستها

الشاهد - لا أبدا الحواتكى هو المسئول واللى كان رئيس وانا  
كنت رئيس مؤقت الى ان ينتهى من مسألة التعيين

وكيل النائب العام - كان فيه منشورات تيجى لكم ؟

الشاهد - لا

وكيل النائب العام - اخوانك توفيق ثابت وصلاح أبو الخير  
قالوا انه جالك منشورات

الشاهد - لا

الرئيس - المفهوم ان رؤساء الشعب يكونوا اعضاء فى الفصائل

الشاهد - يصح بس انا ماعنديش خبر مؤكد .

الرئيس - اما ان يكون فيه تناسق او ان لا يكون هناك تناسق

الشاهد - يصح

الرئيس - يصح او مايصحش ؟

الشاهد - انا انكلم بالنسبة لما هو حاصل فى الجيزة لان ده

الى اعرفه

**الرئيس -** الدليل ان رئيس الشعبة لازم يكون عضو في  
المجموعة انك انت كنت عضو في المجموعة .

**الشاهد -** دا كان مؤقت

**الرئيس -** لماذا لم يختاروا غيرك ؟

**الشاهد -** الاخ يوسف هارون قال لى اذا اعتقلت فقم باعمالى  
فى الشعبة وهو كان مسئول ولما اعتقل انا عملت رئيس الشعبة .  
ودى كانت حاجة مؤقتة مدة الاعتقال .

**الرئيس -** ولماذا لم يختاروا شخصا اخر بدلا منك ؟

**الشاهد -** هم بلغونى بان أقوم مقام الرئيس مدة الاعتقال

**الرئيس -** مين قال لك ؟

**الشاهد -** يوسف هارون

**الرئيس -** ايه يوسف هارون ده ؟

**الشاهد -** المسئول عن الشعبة

**الرئيس -** هل كان عضو فى النظام ؟

**الشاهد -** معنديش معلومات

**وكيل النائب العام -** قلت انك لما ذكرت للحواتكى مابلغه اليك  
خليل من التعليمات الخاصة بخطة الاغتيالات . الحواتكى ذهب ثم  
رجع وقال انه اتصل باخ مسئول واكد له ان الخبرده غير صحيح  
فمن هو الاخ المسئول او من هم المسئولين الذين اتصل بهم  
الحواتكى ؟

**الشاهد -** مااعرفش وقبل مامسك بدله كان هو الذى  
يتصل بهم

**وكيل النائب العام -** المفروض انك تعرف من هو رئيس النظام  
السرى فمن تعتقد انه اتصل بهم ؟

**الشاهد -** محمود الحواتكى هو المسئول عن هذا النظام .

**وكيل النائب العام -** زى مين المسئولين دول ؟

- الشاهد - المسئولين في المركز العام  
الشاهد - طبعاً أحد أعضاء مكتب الإرشاد  
وكيل النائب العام - أليس من المفروض أنه يتناقش معه  
الشاهد - ودي كانت حاجة سريعة وهو نزل علشان يتأكد  
بسرعة .  
وكيل النائب العام - تعرف إبراهيم الطيب رئيس الجهاز في  
القاهرة .  
الشاهد - ما عرفش . .  
وكيل النائب العام - محمود الحواتكى قال لك كده ؟  
الشاهد - لا . .  
وكيل النائب العام - قلت ان محمود الحواتكى قال لك ان  
إبراهيم الطيب هو أحد أعضاء الجهاز السرى المسئولين . .  
الشاهد - قلت انه قال لى ان إبراهيم ده هو المسئول عن  
النظام .  
وكيل النائب العام - كان المفروض انك تقول للحواتكى روح  
اسأل إبراهيم الطيب  
الرئيس - وإبراهيم الطيب كان رئيس الاجتماع ؟  
الشاهد - ايوه  
الرئيس - على الأقل كان مفهوم انه رئيس رؤساء المناطق . .  
كان ضابط اتصال . .  
الشاهد - ما عرفش . .  
الرئيس - يعنى هو ضابط اتصال والا رئيس ؟  
الشاهد - هو كان رئيس الاجتماع . .  
الرئيس - هل يرأس اجتماع رؤساء المناطق ؟  
الشاهد - طبعى يرأسه . .  
الرئيس - يعنى على الأقل إبراهيم الطيب فهمولك على انه  
رئيس ؟



الشاهد - فهمت انه رأس الاجتماع  
الرئيس - ابراهيم الطيب شغلته ايه فى جماعة الاخوان  
المسلمين ؟

الشاهد - ما كنتش اعرف  
الرئيس - الشعبة والفصيلة تتبع مين ؟  
الشاهد - تتبع المركز العام طبعاً .  
الرئيس - مين رئيس المركز العام ؟  
الشاهد - مكتب الارشاد والمرشد .  
الرئيس - ومين المسئول عن ادارة هذا الجهاز ؟  
الشاهد - ما اعرفشى . .

الرئيس - ماتعرفشى مين المسئول عن ادارة هذا الجهاز ؟  
الشاهد - النظام العام او النظام الخاص ؟  
الرئيس - لا . . البلد ؟ . . مين المسئول عن الجهاز ؟  
الشاهد - مكتب الارشاد والمرشد

الرئيس - مين المسئول عن ادارة هذا الجهاز . . مين الرياسة ؟  
الشاهد - ما عنديش معلومات . .  
الرئيس - ماتعرفش رياسة الاخوان مين ؟  
الشاهد - مكتب الارشاد والمرشد .  
الرئيس - مالك عمال تلف وتدور . .  
الشاهد - لا والله . .

الرئيس - حدق اوى يعنى ؟  
الشاهد - لاحدق ولا حاجه . .  
الرئيس - طيب ماتقول . . مين رؤساء الاخوان ؟  
الشاهد - مكتب الارشاد والمرشد . . ده اللى اعرفه .  
الرئيس - لما تيجى لكم اوامر تصدر منين ؟  
الشاهد - باسم المركز العام .

الرئيس - ايه المركز العام ده . . مين الرياسة بتاعته ؟

الشاهد - مكنب الارشاد والمرشد العام .

الرئيس - لما تيجى أوامر تيجى باسم مين ؟ . .

الشاهد - . . .

الرئيس - هي الاوامر اللي تيجى لكم يصح ما يكونش  
المرشد العام صدق عليها ؟

الشاهد - ساعات تيجى الاوامر شفوية .

الرئيس - يعنى تيجى من غير ما يصدق عليها المرشد ؟

الشاهد - ما قدرش أجزم .

الرئيس - يعنى شاكك ؟

الشاهد - أيوه .

الرئيس - يعنى الاوامر الشفهية يحتمل أن تكون من عند  
المرشد أو من غيره ؟

الشاهد - أيوه . .

الرئيس - وتقطعها ليه ؟

الشاهد - ما قلت لحضرتك اننا قفلنا المنطقة .

الرئيس - من الذى أعطاك الأمر بإنشاء جهاز سرى ؟

الشاهد - ما أعرفش .

الرئيس - لماذا انضمت كأحد أعضاء الجماعة . . جماعة

الاخوان أنشأوا جهاز سرى مالكش صوت علشان تقول ايه  
النظام السرى ده ؟

الشاهد - طبعى سألت . .

الرئيس - بأمر مين أنشئ الجهاز ده ؟

الشاهد - ما أعرفش .

الرئيس - انت عضو فى الجماعة والجماعة صدر لها أمر . .

.. هذا الامر كان كتابى والا شفهى ايه شكل هذا الامر ؟

الشاهد - طبعاً شفهى .. .

الرئيس - الاوامر الشفهية بتقول انت لازم تتحقق منها ..  
هل تحققت من أمر انشاء الجهاز السرى أو النظام السرى انه  
أمر شفهى صادر من المرشد ؟

الشاهد - لم أتحقق .

الرئيس - لماذا انضمت الى هذا الجهاز ؟

الشاهد - على اعتبار انه بيقوم ببرنامج .. .

الرئيس - مخالفًا فى ذلك النظام بتاع الجماعة .. مش كده ؟

الشاهد - يصح .. .

الرئيس - .. ما تقولش يصح .. قل : آه أو لا .. .

يصح .. ده ايه ؟

الشاهد - .. .

الرئيس - ايه حكاية المنشورات ؟

الشاهد - ما اعرفش حاجة .

الرئيس - ماقرأتش منشورات طول وجودك فى جماعة

الاخوان المسلمين ؟

الشاهد - أيوه .

الرئيس - كذاب .. اختار عشرة من الافندية المحترمين

الموجودين فى الجلسة واسألهم تجدهم يقولوا لك انهم قرأوا

هذه المنشورات .

الشاهد - عملى فى المدرسة لم يكن يسمح لى

بقراءة المنشورات .

الرئيس - انت كنت مسئول عن المنطقة ؟

الشاهد - كنت باسمع عنها .. .

**الرئيس -** ألم تعط لك منشورات لتوزيعها ؟  
**الشاهد -** والله ما حصل وأنا مسئول عن هذا القسم .

**الرئيس -** انت مسئول عن كل شيء . . مسئول عن الفضيحة ومسئول عن الجماعة ومسئول عن السرية ومسئول عن الانضمام من غير ماتعرف ومسئول عن مخالفتك الاخوان المسلمين ومسئول عن الكذب بتاعك . . مدرس وكذاب ومنافق . . . مدرس بتدرس لاولاد صغيرين وأطفال تعلمهم من نشأتهم الكذب والنفاق باسم الاسلام .

**وكيل النائب العام -** كلمة واحدة اخيرة . . لما بلغت اليك الخطة او التعاون مع خليل ، انت قلت انك ما اتصلت بشي برؤساء المناطق في حين أن ماهو ثابت في التحقيق انك أبلغنه قبيل ارتكاب الحادث بأن يستوثق من أفراد جماعته وأن يكونوا مستعدين .

**الشاهد -** لم يحدث هذا .

**الرئيس -** نص الاخوان المسلمين على الاقل اللي وقفوا امامنا الآن كذايين . . على الاقل فيه نص صادق ونص كذاب . . يعني على الاقل فيه ٥٠ ٪ منكم كذايين و ٥٠ ٪ صادقين دي نسبة الدعوة الاسلامية ونشرها بين طبقة مخصوصة يعني شر الدعوة بتقوم بها جماعة نصفها كذايين .

**الدفاع -** ما هي الدراسات التي كنتم تبشأرونها في النظام الخاص ؟

**الشاهد -** دراسات اسلامية صرفة .

**الدفاع -** هل من ضمن هذه الدراسات دراسة القانون الجنائي ؟

**الشاهد -** لا يافندم .

**الدفاع -** ثبت في قضية معروفة اسمها قضية ( السيارة

الجيب ) ان النظام الخاص بـيـدرس بعض الاسس القانونية  
واهمها كيفية الدفاع عن النفس .

الشاهد - ما حصلش وما أدوناش حاجة من دى .

الدفاع - هل من ضمن هذه الدراسات أن الكذب حلال  
أمام المحقق ؟

الشاهد - لا يا فندم . . ما درسناش حاجة زى كده .

الدفاع - فيه وثائق ضبطت فى سيارة ومن بينها هذه التعليمات  
الشاهد - ما حصلش .

الدفاع - من المصلحة أن تقرر هذا اذا كان الامر صحيحا .  
الشاهد - لم ندرس هذا .

الدفاع - انت قررت بأنه بلغتكم خطة حاصلها الاعتداء على  
بعض حضرات الضباط ومنهم الرئيس جمال عبد الناصر فمن  
هم الذين كانوا سيقومون بتنفيذ هذه الخطة ؟  
الشاهد - ما بلغنيش حاجة .

الدفاع - ألم تفكر ؟

الشاهد - ما كناش فيه وقت للتفكير .

الدفاع - هل لدى جمعية الاخوان المسلمين جهاز سرى  
خاص بالتنفيذ غير الجهاز اللى انت فيه ؟

الشاهد - لا أعرف .

الدفاع - هل الاعتصام بالسلبية فى التحقيق من ضمن  
التعاليم اللى كنتم بتتلقونها ؟  
الشاهد - لا

الدفاع - ثابت ده فى القضية التى اشرت اليها . . الاعتصام  
بالسلبية والاجابة : لا أعرف ما اعرفش . .

الدفاع - ماهو مرتبك الذى تتقاضاه من الدولة ؟

**الشاهد - ١٩ جنية ..**

**الدفاع - بخلاف العلاوات ؟**

**الرئيس -** موجهها كلامه للشاهد - الى الخلف در

( وهنا أدار الشاهد وجهه ناحية النظارة وظهره الى هيئة

المحكمة )

**الرئيس -** موجهها كلامه لجمهور المنفرجين - مدرس يياخذ

١٩ جنية وبيعهم أولاد حضراتكم والاطفال بتوع حضراتكم الى

بتجبوهم وبتودوهم المدارس ..

ثم قال السيد الرئيس للشاهد : الى الخلف در ، فساد

كما كان ( ضحك )

**الدفاع -** دى مأساة .. مايمكنش تضحك .. بعد ان

عرفت الخطة اللي حينفذوها الاخوان المسلمين ، هل استمر

اعتقادك بان هذا الجهاز معمول للنط والقفز ؟

**الشاهد -** لا طبعى .

**الدفاع -** اذن اعتقدت ان هذا الجهاز للقتل والتدمير .. ؟

**الشاهد -** أيوه

**الرئيس -** الخطة اللي وصلتك على اعتبار انها خطة ..

جاية من رئاسة الاخوان ... أى رئاسة دى ؟

**الشاهد -** ما اعرفشى .. أنا كنت رئيس منطقة مؤقت .

**الرئيس -** كعضو .. بلاش رئيس .. كعضو لما يجيلك

أى أمر أو أى بلاغ عن نية موجودة فى جماعة الاخوان بخطة

موضوعة .. مين اللي يضع هذه الخطة ؟

**الشاهد -** المسئولين .

**الرئيس -** مين هم المسئولين ؟

**الشاهد -** كثير .. المركز العام مسئول ..



محكمة الشعب

الجزء الثاني

المحاكمات التي تمت في المدة من ١٢ إلى ١٥ نوفمبر ١٩٥٤





# محكمة الشعب

المضبطة الرسمية

لمحاضر جلسات محكمة الشعب

الجزء الثاني

١٩٥٤



## تقديم

وقفنا بك أيها القارئ في الجزء الاول من كتاب محاكمات الشعب عند شهادة المدعو اسماعيل محمود يوسف . وها نحن اولاء اليوم نقدم لك الجزء الثانى من هذا الكتاب الذى يشمل ماتم من محاكمات حتى الجلسة السادسة . .

فاذا كنت لم تقرأ الجزء الاول بعد وأردت الحصول عليه فاتصل بإدارة النشر والتوزيع ٦٨ شارع قصر العينى ، القاهرة



## بقية الجلسة الرابعة

### وتبدأ بشهادة محمود الخواتكى

الرئيس - الادعاء .. الشاهد الى بعده ..

المدعى - محمود الخواتكى ..

( نودى على الشاهد فحضر )

الرئيس - اسمك ايه ؟

الشاهد - محمود الخواتكى .

الرئيس - سنك كام ؟

الشاهد - ٢٣ سنة الا يوم

( ثم اخرج سيادة الرئيس مصحفا صغيرا من جيبه ووضع

على المنصة وطلب من الشاهد أن يقسم عليه اليمين )

الرئيس - قل : والله العظيم أقول الحق .. انت عارف ده

ايه ؟ ( مشيرا الى المصحف ) .. ده قرآن .

الشاهد - أيوه ..

الرئيس - قل : والله العظيم أقول الحق ولا شيء غير الحق

والله على ما أقول شهيد . ( حلف الشاهد اليمين )

الرئيس - بتشتغل ايه ؟

الشاهد - مدرس بمدرسة أبو الهول الاعدادية .. مدرس

كيمياء .

**الرئيس - متخرج منين ؟**

**الشاهد -** من كلية العلوم ومعهد التربية .. قسم الكيمياء والنبات .

**الرئيس - المدعى ..**

**وكيل النائب العام -** ماهى علاقتك بجماعة الاخوان المسلمين ؟

**الشاهد -** بدأت علاقتى بجماعة الاخوان المسلمين فى كلية العلوم حيث كنت طالبا بالسنة الثالثة ، فرشحت نفسى للاتحاد واراد الاخوان ان يكسبونى عضوا بجانبهم لانى كنت موقفا فى الاتحاد وقبلت ذلك واشتركت بأصواتهم وظللت عضوا بالاتحاد العام فى السنة الثالثة وفى الرابعة ، وكانت علاقتى بهم علاقة الاتحاد العام فى الجامعة .. وبعد ذلك اعتقلت عن طريق الجماعة فى المرة التى سبقت فى العامرية ، ثم بعدما خرجت قابلنى الاستاذ يوسف هارون رئيس منطقة الجيزة ودعانى لان اشترك فى النظام الخاص بالجيزة ، وكنت أنا قد سمعت عن هذا النظام فى سنة ١٩٤٨ وكنت أعارض فى أن يقوم هذا النظام فى الجماعة خاصة بعد ان ارتكبت عدة اخطاء فى سنة ١٩٤٨ ، ولكنى رايت انه من الواجب على ان أناقشه فى هذا الامر ، فناقشته واشتركت فى النظام الخاص فى هذا الحين على عدة أسس : الاساس الاول الا يقوم النظام بعمليات داخلية .. ثانيا - ان يكون الغرض منه تدريب الاخوان واعدادهم وتفهمهم القواعد الشرعية للجهاد . وقد قبل الاستاذ هارون رئيس المنطقة هذه الاسس وعملت بالنظام عدة شهور .. أربعة أو خمسة شهور ، وبعد ذلك جاءت المعاهدة .. معاهدة الجلاء فخرج المرشد العام الى البلاد العربية ورجع المرشد العام من البلاد العربية ، وبدأت العلاقة بين الثورة وبين الاخوان تتأزم ورايت أن هناك هوى يتحكم فى راعى الاخوان ، خاصة فى

المعامدة فقررت ترك النظام الخاص وتركته فعلا ، ويشهد بذلك رؤساء الجماعة بتوع النظام في الجيزة والمسئول عن النظام الجديد .. اسماعيل محمود .. بعدما رجع المرشد بفترة من البلاد العربية ، ومن هذا الحين ليست لى أية صلة رسمية بالجامعة .

الرئيس - بالجامعة ؟

الشاهد - بالجماعة ..

وكيل النائب العام - متى شكل النظام في الجيزة ؟

الشاهد - بعد الاعتقال بحوالى شهرين .. حدثنى يوسف هارون في هذا الامر ، واحنا كنا في مارس ، يبقى في أوائل يونيه او منتصف يونيه .

وكيل النائب العام - اذكر كيف شكل النظام في الجيزة ، وطريقة تشكيله ؟

الشاهد - شكل النظام في الجيزة بان اختير الاخوان الذين يفهمون الاسلام - كما نطن - فهما سليما وفي الجيزة بالذات كان الافراد الذين يختارون النظام يتفاهم معهم على الاسس التى يجب ان يشترك عليها الفرد وهى أولا - ان يكون عاقلا غير متهور .. ثانيا - ان يكون فوق ٢١ سنة .. ثالثا - الا يؤمن بعمليات داخلية داخل البلد .. رابعا - ان يكون مستعدا للجهاد فى القضايا العامة وقت ان تكون البلاد فى حاجة اليه .. وشكل النظام على اساس اربع جماعات .. الاربع جماعات .. كل جماعة سبع افراد ، منهم طبعا المسئول عنهم .. وبعد كده يبقى فيه ٢٨ واثنين بعد كده .. واحد الى هو قائد الفصيلة والرديف بتساعه .. وشكل هذا النظام فعلا ، وكنت انا حريصا على ان اكون قائد الفصيلة حتى اكون صمام امان يمنعها من حدوث اى شىء فى الاتفاق اللى تم بينى

وبين الاستاذ يوسف هارون .. وكان فيه تفاهم صريح وواضح بين الافراد ويشهد بذلك افراد النظام جميعا . الى ان حدث بعد رجوع المرشد من البلاد العربية ان شعرت بان موقفى جايئ يكون حرج ، فتركت هذه الفصيلة .

**وكيل النائب العام** — ما هو الغرض من تشكيل هذا النظام السرى ؟

**الشاهد** — الغرض من تشكيل هذا النظام السرى من قديم هو تمثيل فكرة الجهاد فى الجماعة ومفيش شك ان هذا الكلام كلام عام ممكن ان يفسر ويؤول حسب اهواء المسئولين عنه . قد يروا تمثيل الجهاد ، الجهاد فى فلسطين او القنال او غير ذلك من الامور وانما انا شخصا كنت مشتركاً فيه على هذا الاساس ...

**وكيل النائب العام** — على اساس ايه ؟

**الشاهد** — على اساس انه يمثل فكرة الجهاد فى الجماعة والا يقوم باية عمليات داخلية ...

**وكيل النائب العام** — ايه المفروض .. توجيه الجهاد لايه .. وايه الداعى للتشكيل ؟ .. فسر هذا ..

**الشاهد** — كان فيه طبيعى الانجليز فى القنال .. وامور اخرى .. او اسرائيل فيها يهود ، وبلاد المغرب فيها مستعمرين .. ايضا من الواضح ان جماعة الاخوان كانت ترعى ..

**وكيل النائب العام** — اذا كان الاخوان المسلمين يريدون الاشتراك فى معارك القنال اذا قامت او فى اى معركة تقوم فى الخارج ، فلماذا لم ينضموا الى المنظمات العلنية التى انشأتها الحكومة كالحرس الوطنى وغيره ؟

**الشاهد** — هذا السؤال لاستطيع ان اجيب عليه لانى لست مسئولا فى الجماعة ، ولكنى شخصا ..

**وكيل النائب العام** — انت درست الموضوع .. مالى فهمته



وايه الى خلاك بعد شهرين سبت الفصيلة ؟

**الشاهد** — الذى فهمته منذ انشاء النظام انه ليست له عملية سريعة ، وانما هو يدرب الافراد ويعلمهم لوقت الحاجة ..  
**وكيل النائب العام** — ممكن يكون هذا التدريب علنا بتصريح الحكومة فى منظمات الحرس الوطنى وغيرها ..

**الشاهد** — انا شخصيا كنت مشتركاً فى الحرس الوطنى ، ولم تسعفنى الفرصة لانى اعتقلت وقبل ذلك اخذت فترة كاملة مع الفدائيين لشعورى بان الواحد منا يجب ان يكون مدرباً بوصفه مواطناً صالحاً .. واظن ان الاخوان كانوا يريدون ان تكون لهم قواتهم الخاصة ليكونوا عساكر مسلمين ..

**وكيل النائب العام** — لاى غرض ؟ .. مفروض ان كل جماعة او اى حزب يكون له تدريب خاص وجيش خاص ؟  
**الشاهد** — لا طبعاً .. قد يكون الغرض اولاً — الذود عن ارض المسلمين .. ثانياً — الدفاع عن ..

**وكيل النائب العام** — يتحقق هذا اذا انضموا للمنظمات العلنية  
**الشاهد** — فيه فرق بين المنظمات العلنية و ..

**وكيل النائب العام** — ايه الفرق ؟

**الشاهد** — الفرق .. التربية .. فى الاخوان يربوا الفرد على اجمع النواحي .. خلقه ، وطريقة معاملته من الناحية الدينية والروحية ..

**وكيل النائب العام** — التربية دى مفروض انها تكون سرية ؟

**الشاهد** — مش مضبوط .. اذن يكون الغرض من هذا النظام هو حماية الفكرة الاسلامية داخل وخارج البلاد ، وانما انا شخصياً فى الوقت الذى اشتركت فيه فى هذه الفصيلة كنت اعتقد ان هذا اعداد كامل .. يعنى ان يعد الفرد اعداداً متكاملًا ..

**وكيل النائب العام** — لماذا تركت النظام ؟

**الشاهد —** عقب رجوع المرشد العام وجدت ان هناك عمليات تتجه داخليا . . اى اعداد للقيام بحركة يقصد منها القضاء على النظام الحالى وقيام نظام اخر غيره .

**وكيل النائب العام —** ما الذى فهمته وكيف وجدت الفكرة دى واساسها ايه ، ومين اللى وضعها ؟ . . اشرح كل هذا للمحكمة .

**الشاهد —** اول ماطلعت المعاهدة الاخوان المسلمين عارضوا فى هذه المعاهدة . . وبعدين كان من الجو العام بتاع الاخوان . . كان هناك حمس بالغ لتخريب المعاهدة والحيلولة دون ابرامها . . دى اول حاجة . . ثانى حاجه كان يظن او كان يوحى الى الاخوان عن طريق النشرات والمحاضرات والبرامج ان الدولة التى يعيشون فيها شىء والدولة الاسلامية شىء اخر ، وعليهم ان يعدوا انفسهم حتى يحققوا الدولة الاسلامية ، وهو الحلم الذى يحلمون به . . ده عبارة عن الاتجاه العام . . وهذه التصرفات ابسطها واوضحها ان الفضائل كان يحدث عليها تميم ، وبعض المسئولين كانوا يزوروا الجماعة ويحمسوها وكانت الفترة دى عبارة عن فترة تحميس والهيب مشاعر . .

**وكيل النائب العام —** تحميس والهيب مشاعر ، وبعض المسئولين يزوروا المناطق . . ده الجو اللى شفته ؟ . . فسر هذا .

**الشاهد —** يعنى مثلا محمد مهدى عاكف وهو كان مسئول عن التدريب فى القاهرة كان يزور بعض الجماعات فى الجيزة وفى أماكن أخرى ، وكان يقول لهم يجب ان تستعدوا وتؤهلوا انفسكم لانكم ستقومون بعمل قريب

**وكيل النائب العام —** ضد الحكومة ؟

**الشاهد —** طبيعى لازالة العهد الحاضر والقيام بحركة . . يعنى بانقلاب جديد . . ده لون من الوان الاستعداد . . ولكن كانت امكانيات النظام ضعيفة وهزيلة وتافهة وكان الشخص اللى بيدرب

في الحرس الوطنى أهو ييدرب ..

وكيل النائب العام — سمعت من محمد مهدي عاكف انه  
حاصل حركة او انقلاب .. ايه الى سمعته .. وايه الى في  
ذهن القادة بتوع النظام لتنفيذ الخطة ؟

الشاهد — اذا كان مطلوب تفصيل الخطة ..

وكيل النائب العام — قل ماتعرفه ..

الشاهد — انا سمعت هذا منه ومن غيره .. انا بعد ما تركت  
الفصيلة كانت علاقتى بالاخوان شخصية بحتة .. ففى يوم من  
الايام التقى بى اسماعيل محمود يوسف — وهو الان رئيس  
المنطقة بدل الاستاذ يوسف هارون — وقال لى ان الاخوان ناوية  
تقوم بحركة ، وان الحركة دى تبدأ بعملية فردية هى اغتيال  
الرئيس أركان الحرب جمال عبد الناصر .. وبعدين يحدث انه  
حايعجز اعضاء مجلس قيادة الثورة والضباط الاحرار او يقتلوا  
او يخطفوا .. وبعد كده تقوم حركة شعبية ثورية مسلحة .. وانا  
اول ماسمعت منه هذا الكلام ..

وكيل النائب العام — امتى كان الكلام ده ؟

الشاهد — كان قبل الحادث بحوالى اربع او خمس ايام .. فى  
الحدود دى ..

وكيل النائب العام — واسماعيل بلغه هذا الكلام منين ؟

الشاهد — هو رئيس المنطقة ..

وكيل النائب العام — مفروض تكون جت له تعليمات بصفته  
رئيس المنطقة ورئيس الفصيلة ؟

الشاهد — ايوه .. علشان يستعد للعمل الذى سيناط به ..

وكيل النائب العام — هل صدرت او وضعت خطة الاغتيال ؟

الشاهد — هو قال اغتيال الرئيس وبعدين اعجاز اعضاء مجلس  
قيادة الثورة والضباط الاحرار . ثالثا — القيام بحركة ثورية

مسلحة وقد أفهمنى أنه سيستغل اسم اللواء محمد نجيب في هذه الحركة أول حاجة قد يصدر بيانا يؤيد فيه هذه الحركة . وقد يمسك البلاد بعدما تنتهى الحركة دى وأنا عارضت في هذا . وكيل النيابة — سمع الكلام ده منين .

الشاهد — المفروض انه سمعه من المسئولين عنه ويبلغه بالطريق الرسمى .

وكيل النيابة — وبعدين

الشاهد — لما قال لى على الخطة عارضته فيها .

الرئيس — لكن أنت مالکش شأن .

الشاهد — اللى حصل انه عرضها عليه وأنا عارضته فعلا وبينت له انها حرام شرعا .

وكيل النيابة — ايه المكلف بيه اسماعيل بصفته رئيس فصيلة .

الشاهد — فصيلة الجيزة ضعيفة التدريب لجدة أفرادها وجدتهم فى النظام واذا كانت الجيزة حتقوم بحاجة فيكون شئ عام متلا يشتركوا فى الثورة الشعبية او اعمال حراسة . وكيل النيابة — تنظيمها سيكون ايه فى الثورة الشعبية المسلحة .

الشاهد — لم يذكر لى الا هذا وهو ان الاخوان حيقيموا بثورة شعبية مسلحة

وكيل النيابة — لما عمل النظام بعد خروج الاخوان من المعتقلات فى مارس كان مفهوم انه عمل لهذا الغرض ؟ الشاهد — ايوه

وكيل النيابة — اذا كانت الحكومة اعتقلت الاخوان وبعدين أفرجت عنهم ألا يفهم انه كان معمول للدفاع عنهم . . . لمقاومة الحكومة ؟

**الشاهد -** النظام كان معمول من زمان .

**وكيل النيابة -** وانتهى

**الشاهد -** انتهى لخلافات داخلية وكان مفروض ان يعاد تشكيله بقيادة جديدة والسندى كان مسئول عن النظام .  
القديم بعدين لما طرد السندى ومن معه من اخوانه كان لابد من تشكيل جديد فوجود نظام في الجماعة لا يحمل المعنى القاطع في انه مقاومة للحكومة .

**وكيل النيابة -** الا يفهم من الحادث تشكيل النظام بعد مارس سنة ١٩٥٤ وبعد ان صدر الامر بحل الجماعة وافرج من المعتقلين من اعضائها الا يفهم من هذا كله انه شكل خصيصا لمقاومة الحكومة !

**الشاهد -** في الفترة بعد خروج الاخوان من المعتقلات كنت افهم ان هناك تفاهم بين أعضاء مجلس قيادة الثورة وبين الاخوان وان هناك صمامات من شأنها الا تجعل هناك هوة سحيقة او خلافات كبيرة في وجهات النظر مما يؤدي الى حدوث انفجارين الثورة والاخوان ولكن بعد المعاهدة صار من الواضح جدا ان الاخوان بدأت تتجه اتجاها معاديا للثورة خاصة وانه قبل ذلك كانت فيه اتجاهات كثيرة في الاخوان والاخوان منقسمين على انفسهم وبعض أعضاء مكتب الارشاد يرى تأييد الثورة وبعضهم يرى ضرورة معارضة الحكومة لانه موتور منها وقبل عودة المرشد كان الموقف مائع .

**وكيل النيابة -** كنت في النظام ؟

**الشاهد -** أبوه

**الرئيس -** ايه اللي حصل بعد عودة المرشد .

**الشاهد -** صارت سيطرة المرشد على النظام والاخوان

سيطرة واضحة وصار تكوين النظام في الجماعة تكويناً ارهايبياً من شأنه أن يكتب الآراء الشخصية ويحدد من الإرادة التي يستطيع بها الإنسان أن يناقش ولعل هذا من الدوافع التي خلتنى أخرج وأنا كنت شاعر بأن ارادتي تنوب وتنحرف في تيار النظام الخاص وأنه أصبح رهيباً وسيقوم على الأقل بما من شأنه أحداث حرب أهلية في البلاد ولعل هذا من الدوافع التي أقنعت بها محمود اسماعيل مجرد نية القيام بأي شيء عام .

وكيل النيابة — كيف ظهرت سيطرة المرشد على الجهاز .  
كيف تبينت هذا ؟

الشاهد — تبينت هذا من كلام المسئولين أي مسائل ماتكونش ميكانيكيا وانما تأتي نتيجة ابحاثات من المسئولين لافراد الجهاز في كلامهم عن المرشد واثارة هالة حوله وابرازه في صورة قائد الجماعة المؤمنة والمجاهد الحريص على مصلحة الاسلام والاخوان وذلك للتحكم في مشاعر المنضمين الى النظام .

وكيل النيابة — مين المسئول عن النظام ؟

الشاهد — أنا في فترة وجودي . . كان المسئول أولا ابراهيم الطيب وهو مسئول عن القاهرة وأنا اتصلت به مرتين للتعارف . كان يوسف هارون اخذني ورحت مكتبه للتعرف عليه والمرة الثانية لامر من هذا القبيل تعارف او ما يشبه ذلك واتصلت كذلك بمحمد مهدي عاكف المسئول عن التدريب وطبعاً رئيس المنطقة يوسف هارون ومن بعده محمود اسماعيل .

الرئيس — ومين ؟

الشاهد — فيه هنا حاجة جديرة بالذكر وهي ان أعداء النظام الحديدي في الجماعة وهم بعض الافراد التي كانوا من اتصلاوا السندى هم التي كانوا يتكلموا وينسمعون منهم عن التيارات الدينية .  
وكيل النيابة — مش معقولة دي ياسيد حواتكي انك ماتعرفش

**الرئيس -** خلى الشاهد يكمل كلامه .

**وكيل النيابة -** حاضر ..

**الشاهد -** بعض افراد النظام القديم كانوا بيتكلموا وانا سمعت من يوسف طلعت على اساس انه حل محل السندي في النظام الجديد ومثلا الضباط اللى فصلوا من الجيش سمعت انهم يكونوا مامن شأنه ان يكون لجنة فنية تشرف على بعض النواحي في النظام دى الاسماء اللى سمعتها فعلا .

**الرئيس -** اتصلت بحد منهم ؟

**الشاهد -** لا .

**الرئيس -** اذكرهم لنا تانى من فضلك

**الشاهد -** محمد بهدى عاكف وابراهيم الطيب ويوسف ،

طلعت وبعض الضباط في الجيش .

**الرئيس -** زى مين ؟

**الشاهد -** صلاح شادى وعبد المنعم عبد الرؤوف .

**الرئيس -** مامنى انك قلت انك لاتؤمن بعمليات داخلية ؟

**الشاهد -** العمليات الداخلية حتكون بين المسلم والمسلم واذا التقى المسلمان بسيفيهما فالقاتل والمقتول يدخلان النار والعمليات الداخلية من مقتضاها ان يواجه المسلمون بعضهم وقتالهم لبعضهم محرم ويجب على من يريد ان يقاتل او يجاهد ان يكون متأكدا .. ١٠ / انه سيموت شهيدا هذا الى جانب وطنى وهو ان العمليات الداخلية من شأنها احداث انقسام وحرب اهلية مما يجر على البلاد الوبال وهذه هى القاعدة الاصلية بالنسبة للعمليات الداخلية

**الرئيس -** ايهما تفضل على الاخر .. الناحية الوطنية او

الناحية الدينية ؟

**الشاهد -** الاثنين يكملوا بعض .

**الرئيس -** واذا اختلفت الناحية الدينية والناحية الوطنية .

**الشاهد —** اختلافهما مستحيل .

**الرئيس —** لماذا خرجت عن الجماعة اذن ؟

**الشاهد —** خرجت من جماعة الاخوان مش خروج على الدين

**الرئيس —** لماذا خرجت عنها ؟

**الشاهد —** لانها خلت سبيل الدين و خلت السبيل الوطن .

**الرئيس —** نريد ان تفسر لنا كيف يمكن تحقيق حلم جماعة  
الاخوان المسلمين وكيف السبيل لانشاء دولة اسلامية عن طريق  
انشاء جهاز سرى وذلك بدون ما يحدث ان اثنين من المسلمين  
بتلاقوا بسيوفهم ؟

**الشاهد —** الى ذكرته ان هذا النظام . .

**الرئيس —** نريد ان تفسر لنا . . . انت تقول انه من الناحية  
الوطنية لايجوز الاتقسام ومن الناحية الدينية لايجوز ان يلتقى  
المسلمان بسيفيهما وان الناحية الدينية والناحية الوطنية لا يختلفان  
. . فسر لنا اراى وده مبداءك دخلت النظام والجماعة وانت تعتقد  
ان الجماعة من اهدافها اقامة حكومة اسلامية وفيه جهاز سرى  
بالجماعة يعد ويدرب . . كيف تقيم الجماعة بالنظام السرى حكما  
اسلاميا وفي الوقت نفسه لا تتعارض مع مبدئك فى الا يتقاتل  
المسلمان ؟

**الشاهد —** ذكرت لسيادتك ان اشتراكى فى التنظيم كان لمنع  
التلاعب بعقول افراد الجهاز فى منطقة اسكن فيها وكان وجودى  
عبارة عن صمام يمنع حدوث انحراف .

**الرئيس —** الم يكن من واجبك وانت فى تفكيرك وعقليتك دى الا  
تقف اعمالك الايجابية عند منع اهالى المنطقة من الانحراف فى  
النظام بل تذهب الى المسؤولين فى الحكومة وهى حكومة اسلامية  
وتروح تقول لهم لمصلحة الوطن والجماعة ان الجماعة خرجت عن  
المبدأ الاصلى ما رحتش ليه للمسؤولين ؟



**الشاهد -** ذكرت هذا للمسئولين في حينه .

**الرئيس -** قصدي المسئولين في الحكومة وانت على هذه الدرجة من العلم والثقافة والتحليل بتاعك وشفت ان النظام اصبح خطر وان فيه حيكون حرب اهلية وانقسامات ازاي يغيب منك ان تقف موقفا ايجابيا .

**الشاهد -** بالنسبة للجهاز . . . التبليغ عن هذا الموضوع قد ينتهى بضرر الاخوان فاذا كان فيه طريقة اسلم لعلاجهم فانا اتبعها اذا انا رايت شخص يرتكب جريمة فيه طريقتين الاولى انى المنع منه ودى فيها ضرر له والثانية انى امنع ارتكاب الجريمة وبالتالي امنع الضرر اللى يصيبه من ارتكاب الجريمة .

**الرئيس -** يعنى اقامت من نفسك حاكم لهذه البلاد .

**الشاهد -** لا . اقامت نفسى ناصح لابعدهم عن الجريمة .

**الرئيس -** يعنى اقامت من نفسك حاكم وناصح وراجل صاحب مبدأ . . كلمنى عن المبادئ . . انت مش راجل صاحب مبدأ . . ماردتش على سؤالى ليه . . بلاش لف يا استاذ جابوب

**الشاهد -** سؤال حضرتك ؟

**الرئيس -** انت لسه ما عرفتش ؟

**الشاهد -** اذا تكرمت سيادتكم من تانى .

**الرئيس -** انت اشتركت فى هذه الجماعة وانت تؤمن بأن المسلم والمسلم يجب الا يلتقيا بسيفيهما ده من ناحية الدين ومن ناحية الوطنية ما يصحش لان ده يوجد انقسامات وخلافات . . والجماعة تريد ان تقيم حكومة اسلامية بقى هى تعتبر ان الحكومة الحاضرة غير اسلامية وان الحكم الاسلامى مش قائم فى البلاد مش كده ؟

**الشاهد -** ايوه .

**الرئيس -** وفيه جهاز لتنفيذ مبدأ الدعوة ؟

**الشاهد — أيوه .**

**الرئيس —** عايز اعرف ازاي تنفذ الدعوة من غير مسلمين  
ما يلتقيا بسيفيهما ومن غير ما يحدث انقسامات او خلاف بين  
الواطنين ؟

**الشاهد —** اذن لابد ان يحصل تلاقى بالسيف .

**الرئيس —** ولازم تصلوا للحكم عن طريق ايه ؟

**الشاهد —** عن طريق النظام او غيره

**الرئيس —** وانت أحد أعضاء النظام السرى ؟

**الشاهد —** أيوه .

**الرئيس —** لماذا اشتركت وهذه افكارك ومبادئك ؟

**الشاهد —** لو فرض ان تفكيرى كان قاصرا فقد ثبت الى

رشدى من شهر ونصف .

**الرئيس —** يعنى لما تعجز عن الرد تقوم تلف وتهرب علشان

الدولة علمتك ارقى تعليم دفعت مصروفات كام فى كلية العلوم

.. كثير .

**الشاهد —** حوالى ٢٥ جنيه .

**الرئيس —** ٤ سنين تتعلم وتأخذ بكالوريوس كيميا ونبات

وشهادات عالية علشان تطلع فى جماعة وجهاز سرى يخالف

مبادئه المبادئ اللى بتقول بأنك تعتقدها اتعلمت تقف وتتكلم

علشان توجد مثل هذه الحرب الاهلية ومثل هذه الدعوة

الخاطئة وتعمل ضد الدولة .. مين رئيس الجهاز السرى ؟

**الشاهد —** يوسف طلعت .

**الرئيس —** مين رئيسه ؟

**الشاهد —** المرشد .

**الرئيس —** هل يجوز ان تصدر خطة او اوامر لاوافق

عليها القائد .

الشاهد - لا يجوز .

الرئيس - علمت أن فيه خطة علشان الاغتيالات الخطة دي  
مين مسئول عنها ؟

الشاهد - قيادة النظام كاملة .

الرئيس - هل صدق عليها المرشد العام ؟

الشاهد - لازم صدق عليها .

الرئيس - هل ممكن ان تصدر اوامر بدون تصديق من  
القائد العام .

الشاهد - طبعا لا .

الرئيس - تقدر تقول لنا ازاي اسماعيل قال لك عن الخطة  
رغم انك انفصلت عن الجماعة واشهرت المنطقة انفصالك  
عن الجماعة وانك غير موافق على ماتقوم به . . ازاي وانت في  
الاتجاه ده اسماعيل بعد ماتشهر هذا يدلك على معلومات سرية  
خاصة بجهاز سرى والنظام انت غير موافق ؟

الشاهد - لانه يعلم . .

الرئيس - يعنى اقامت من نفسك كمان محامى تحمى اسرار  
القتله بحكم مهنتك يعنى بقيت راجل بتاع كيميا ومحامى  
ومرشد وتناصح ؟

الشاهد - هو يعلم منى هذا الاتجاه .

الرئيس - حضرتك اخناتون الثانى ؟

الشاهد - هو يعلم منى هذا الاتجاه فراى ان يسمع راى  
فى الموضوع ويستفيد بيه .

الرئيس - ماهو سمع راىك عن انفصالك من الجماعة وانك  
مش موافق على الطريقة ازاي وهو عارف راىك يقول لك . .  
معقول ده ؟ الا اذا كان يعلم انك لازلت فى النظام وان الكلام اللى

قلته عن الانفصال غير صحيح وانك لا استقلت ولا حاجة ،  
ولذلك أنا رايح اجيب لك اسماعيل يواجهك .

الشاهد — طيب يا افندم .

الرئيس — الادعاء استدعى اسماعيل محمود ولما ييجى خلوه  
يستنى بره شويه .

المدعى — حاضر يا افندم .

الرئيس — فيه نقطة ثانية . . انت قلت لما قيادة الاخوان  
المسلمين حبت تغير الجهاز السرى القديم غيرت رياسته وجابت  
يوسف طلعت وجابت أعضاء جدد هل تؤمنون فى الاخوان  
بفكرة او بأشخاص ؟

الشاهد — بفكرة .

الرئيس — وأعضاء الجهاز السرى يؤمنوا بفكرة او بشخص ؟  
الشاهد — بفكرة .

الرئيس — اذا كانوا يؤمنوا بفكرة وهم الزبد المنتقاة من  
الجماعة ويختارون اختيارا دقيقا بعد اجتيازهم امتحانات  
شاقة فهل دخلوا الجهاز السرى معندين بفكرة او معتقدين  
بالسندى فاذا غلط السندى وغير وجه غير السندى ليه غير  
أعضاء الجهاز القديم الا اذا كان ارتباطهم بالأشخاص أكثر من  
ارتباطهم بالفكرة . . . أدى النتيجة الى وصلت بها الجماعة  
بأعضائها انهم يؤمنوا بالأشخاص لا بالمبادئ .

الشاهد — مضبوط .

الرئيس — هل يتفق هذا مع التعاليم الاسلامية ؟

الشاهد — لا . .

الرئيس — المدعى . . . هات لنا اسماعيل . . أدى مستوى  
المتعلمين فى الاخوان لمسلمين .

( حضر محمود اسماعيل ) وواجهته المحكمة بمحمود الحواتكى  
الرئيس - يا اسماعيل انت قلت انك اتوليت رئاسة الفصيلة  
مؤقتا لحد الحواتكى مايروح يشوف له شغلة والحواتكى بيقول  
انك كذاب وهو سلمك رئاسة الفصيلة نهائيا . . انت كذاب  
ولا هو الى كذاب ؟

الشاهد - محمود اسماعيل - هو كذاب .

الرئيس - قول له انت كذاب .

الشاهد - محمود اسماعيل - انت كذاب يا حواتكى .

الرئيس - اقسم انه كذاب .

الشاهد - محمود اسماعيل - اقسم بالله العظيم انه كذاب

وانه سلمنى الفصيلة لمدة الشهر الاخير لانه بيدور على شغل .

الرئيس - هل انفصل الحواتكى من الجماعة من شهر ونصف؟

الشاهد - محمود اسماعيل - لا يا افندم لم يحصل .

الرئيس - بيشتغل ايه فى الجماعة ؟

الشاهد - محمود اسماعيل - قائد الفصيلة .

الرئيس - ايه رايك يا حواتكى ؟

الشاهد - محمود الحواتكى - انا اطلب الاستماع الى اقوال

اعضاء الجماعات .

الرئيس - ايه رايك فى اقواله ؟

الشاهد - محمود الحواتكى - هو كذاب .

الرئيس - تقسم على ذلك ؟

الشاهد - محمود الحواتكى - اقسم بالله العظيم وبالقرآن

ان اسماعيل كاذب وانه قد استلم منى الفصيلة استلاما كاملا

وانه باشر هذا العمل فى الفترة الاخيرة .

الرئيس - ومين عينه ؟

الشاهد - محمود الحواتكى - انا رايت تسليمه الفصيلة

ووافقنى اسماعيل عارف على ذلك .

الرئيس — مين اسماعيل عارف ؟

الشاهد — مدرب القاهرة وعمل بعد مهدى عاكف .

الرئيس — يعنى أعلى من قائد الفصيلة ؟

الشاهد — محمود الحواتكى — ايوه

الرئيس — دلوقت مش فيه واحد منكم كاذب والثانى صادق

الشاهد — محمود اسماعيل — مفيش شك .

الشاهد — محمود الحواتكى — مفيش شك .

الرئيس — هذه هى نتيجة دعوة الاخوان المسلمين

ما بين اثنين متعلمين ارقى تعليم فى البلد واحد معاه بكالوريوس

كيميا ونبات ومعهد تربية والاخر ليسانس اداب وقواد فصائل

وبيضموا ناس اليها ويعلموا محمود عبد اللطيف وامثاله الذين

كان بييجى منشورات فى الجماعة اولاً ؟

الشاهد — محمود الحواتكى — ايوه عن طريق المناطق .

الرئيس — اسماعيل كان يشوفها او يقرأها .

الشاهد — محمود الحواتكى — ايوه ويوزعها .

الشاهد — محمود اسماعيل — هو غير صادق .

الرئيس — قول انت كذاب .

الشاهد — محمود اسماعيل — انت كذاب .

الرئيس — والله لولا احترام الادمية لكنت خليتكم انتم

الاثنين ضربتم بعض .

المضى — ارجو المحكمة ان تواجهه بما قاله الحواتكى من ان

الخطه بلغت للحواتكى وما قاله اسماعيل عكس هذا الكلام .

الرئيس — سيقول انه كاذب يا اسماعيل انت قلت ان الخطه

بلغت اليك عن طريق خليل ، فهل بلغت اليك رسمياً او غير

رسمى ؟

اسماعيل محمود — لم يقل لى انها رسمى .  
الرئيس — ولما قلت للحواتكى .  
اسماعيل محمود — قلت له ان خليل قال كذا وكذا .  
الرئيس — و خليل اذا بلغ شيئاً فهل يبلغه رسمى او غير رسمى ؟  
الشاهد — المفهوم ان رئيس المنطقة اذا بلغ اليه شىء فلا بد ان يبلغ اليه رسميا .  
الرئيس — ما تفاصيل الخطة التى قال لك عليها .  
الشاهد — اغتيال الرئيس جمال عبد الناصر واعجاز او اعتقال او اغتيال أعضاء مجلس قيادة الثورة ثم القيام بثورة شعبية مسلحة .  
الرئيس — وبعدين ؟  
الشاهد — ثم استغلال اسم محمد نجيب فى هذه الحركة ، بان تهتف الحركة يعيش محمد نجيب ثم يصدر محمد نجيب بيانا يؤيد فيه الحركة وقد يمسك البلد .  
« خرج اسماعيل محمود »  
الرئيس — انت يا حواتكى يا أخ يا مسلم ، هل تعرف محمود عبد اللطيف ؟  
الشاهد — « ينظر الى المتهم محمود عبد اللطيف » لم اره الا الآن .  
الدفاع — هو شافه قبل كده ، وعاوزين نواجههم لانهم عارفين بعض .  
الرئيس — خليها للآخر .  
الدفاع — طيب .  
الرئيس — تعرف مين فى المناطق الاخرى من النظام السرى غير منطقة الجيزة .

**الشاهد** - اعر ف المسئول عن منطقة بين السرايات والمسئول  
عن منطقة امبابة .

**الرئيس** - مين

**الشاهد** - المسئول عن منطقة بين السرايات سعد زغلول  
وكان في آخر فترة كنت اشتغل فيها كان قبله أحد الافراد  
اسمه خليل عبد الرحمن ورئيس منطقة امبابة هندواوى  
دوير .

**الرئيس** - ايه تسليح الجماعة بتاعة الجيزة ؟

**الشاهد** - لم يكن هناك أى سلاح خاص بفصيلة الجيزة .

**الرئيس** - والسلاح الذى كان فى المخزن بالجيزة الم  
تعلموا به ؟

**الشاهد** - على عبد المنعم كان عنده أسلحة .

**الرئيس** - بتاع تعليم .

**الشاهد** - أيوه .

**الرئيس** - كان بايظ ما بيضربش ، فليه يوضع فى جهة سرية  
مش كنت تعرف بيه ؟

**الشاهد** - أيوه .

**الرئيس** - وكيف وافقت أن يكون عندكم أسلحة يا صاحب  
المبادئ القويمة والاشتراطات التى اشترطتها على يوسف هارون  
قبل ان تشترك فى الجماعة ، ليه ما اشترطش انك تكون  
مرشد عام عشان الدعوة تقوم على اساس سليم يظهر ان دى  
فاتنسك ؟

**الشاهد** - الواحد يعمل فى حدود المنطقة بتاعته .

**الرئيس** - انت راجل صاحب مبادئ عامة وتعلم ان الاسلام  
يحرم تقابل سيف المسلم بسيف مسلم اخر . . وعارف . . .  
وعارف . . كما انك استاذ فى الوطنية وتعرف ان الانقسامات



الداخلية والحروب الاهلية هذه هل حلتها بالكيما بتاعتك  
يا صاحب المبادئ ؟

الشاهد - ( لا يجيب ) .

الرئيس - ما صلتك بهنداوى دوير ؟

الشاهد - ليس هناك أية صلة رسمية بينى وبينه الا انى  
التقيت به فى يوم من الايام وعلمت انه رئيس منطقة بعد استقالة  
الدكتور حسن باشا ؟

الرئيس - وهل تعرف انه رئيس الجهاز السرى فى امبسا به  
او لا ؟

الشاهد - طبعا رئيس المنطقة هو رئيس الجهاز السرى .

الرئيس - قاعدة اتوماتيكية .

الشاهد - ايسوه .

الرئيس - آخر مرة شفت هنداوى امتى ؟

الشاهد - قبل الحادث بأربعة ايام .

الرئيس - ليه .

الشاهد - التقيت به فى يوم من الايام وكان معاه على رياض  
وهو مدرس بمدرسة الخديوى اسماعيل الثانوية وقال لى ان  
فيه اتجاه للقيام بحركة واعلم ان المرشد مش موافق على  
الحركة دى بتفاصيلها فقلت له جيت الحكاية دى منين فقال  
لى ان اللى قاله فتحى البوز فانا اتصلت بفتحى البوز فى مساء  
ذلك اليوم فقال لى انه سمع ولم يذكر لى ازاى هو سمع ان  
المرشد مش موافق على الخطة فانا وجدت فى هذا الخبر فرصة  
اخيرة لا قناع من لم يقتنع بالدليل المنطقى بحرمانية هذه  
الحركة كما انى وجدت فيها فرصة لاسكات من يؤمن باشخاص .

الرئيس - ومين اللى ما اقتنعش ؟

الشاهد - انا وجدت فى هذا الخبر هذه الفرصة ، وانه من

الواجب ان اكون ضد هذه الحركة وان احول دون قيام هذه الحركة والخطة التى رسمتها فى ذهنى هى الاتصال برؤساء المناطق فى حدود مديرية الجيزة وبين السرايات وامبابه ، فاتصل برؤساء هذه المناطق واذكر لهم الحدود الشرعية .

**الرئيس -** كيف تفسر اختلاف المنطق فى النقطة الخاصة بأن اسماعيل لما جبه الامر ابلغه لك وأن هذا الامر لما جاله وهو بلفظه يبقى رسمى ولا بد أن يكون صدق عليه القائد العام لان الاوامر التى تصدر من الرئاسة الى الجهاز لا تبلغ الا بعد تصديق المرشد ، والمنطق الثانى انك بتقول الان ان واحد قال لك ان المرشد مش موافق على تفاصيل هذه الخطه .

**الشاهد -** لا يوجد الا تحليل واحد وانا اميل اليه وهو ان بعض الافراد بدأوا منذ اختفاء المرشد وعدم امكان الاتصال به يستغلون هذه المسألة ويزعمون ان المرشد موافق على اشيء وقد يكون هو غير موافق عليها .

**الرئيس -** أو ...

**الشاهد -** أو اشيء غير موافق عليها ويقولون انه موافق  
**الرئيس -** أو ان ده عذر للمرشد لايجاد حالة الخلخلة بان يكون هناك حلين بحيث يكون هذا مخرج له فى حالة اذا ما فشلت الخطه فيكون له عذره هو انه غير موافق .

**الشاهد -** مضبوط صح .

**الرئيس -** كمل وبعدين .

**الشاهد -** كنت اقول انى وجدت هذا الخبر يفسدنى فى اقناع الاشخاص الذين لم يقتنعوا وبانى اسكتهم بهذا الكلام وذهبت الى هنداوى دوير وكان معاه عبد الفتاح القرشى وحدثته فى عدم شرعية هذا الامر .

**الرئيس -** اشرحه .

**الشاهد -** ذكرت له ان قتل الحاكم المسلم غير جائز ، كما ذكرت له في هذا بعض قراءات كنت قراتها في هذا الموضوع من انه حتى في حالة ما يؤخذ الفرد ويضرب بالسوط فانه يكون على الرعية المسلمة ان تسمع لمثل هذا الحاكم وتطيعه والى جانب هذا فان الرئيس جمال عبد الناصر لم يفعل ما من شأنه ان يباح دمه .

**الرئيس -** عمر قتل . عارف عمر ؟

**الشاهد -** عمر بن الخطاب .

**الرئيس -** من قتله ؟

**الشاهد -** احد المسلمين .

**الرئيس -** كان يمثل جماعة او يمثل نفسه ؟

**الشاهد -** يمثل فرقة .

**الرئيس -** ايه حكم الاسلام على هذه الفرقة ؟

**الشاهد -** اعتقد ان الشخص الذي قتله في النار .

**الرئيس -** سيبنا من النار والجنة لان دى مش بتاعتنا .

**الشاهد -** يبقى عمل غير اسلامي وخائن للدولة الاسلامية .

**الرئيس -** وما حكمك على جماعة ورؤيسها وافقوا على خطة

لقتل حاكم مسلم ؟

**الشاهد -** القائد والجماعة عملوا عمل غير اسلامي .

**الرئيس -** اذن لماذا لم تبلغ الحكومة ؟

**الشاهد -** لم ابلغ لسببين ، كنت حابـلـج حاجة من اثنين

اما الاخوان ...

**الرئيس -** قاضى .

**الشاهد -** حاجة من اثنين ..

**الرئيس -** هل انت فنان تعيش في اوهام ؟

**الشاهد -** كان حاجة من اثنين اما ان ابلغ ان الاخوان في

فيتها القيام بحركة دون ذكر تفاصيل أو ذكر تفاصيل معينة  
بانهم سيفعلون كذا وكذا .

الرئيس - يعنى حبيت تعمل ضابط مخابرات لحساب  
الحكومة الحاضرة ؟

الشاهد - هذه الاعمال مجهولة ولدى .....

الرئيس - أين قبض عليك ؟

الشاهد - انا ذهبت وسلمت نفسى يوم السبت ٣٠ سبتمبر  
الماضى .

الرئيس - سلمت نفسك فى اى مركز .

الشاهد - مركز الجيزة

الرئيس - بناء على ايه ؟

الشاهد - سمعت انى مطلوب كما علمت ان البوليس قبض  
على والدى ووضعوه فى القسم .

الرئيس - مارحتش يوم الحادث ليه ، والا لما عرفت ان  
والدك مقبوض عليه فسلمت نفسك ولماذا لم تتطوع يوم  
الحادث وقلت للحكومة ان خطة الاخوان كذا وكذا وان هذه  
اول شرارة فالحقوا .

الشاهد - الذى كنت اعتقده ان الحكومة لديها خبر بذلك .

الرئيس - آه .. انت بتخمن كمان .. بتضرب رمل ولا  
بتفتح كتشينة ؟

الشاهد - اتجاه الاخوان كان معروف لدى الناس والصاغ  
صلاح سالم قال فى مجلة التحرير ما معناه ان ما سيفعله الهضيبى  
هو اما مسدس يمتد فى الظلام او قنبلة تلقى .

الرئيس - مارحتش ليه ابلغت عن الجهاز السرى وانه موجود  
فى الحته الفلانية وان بالجيزة اربع جماعات ولكل جماعة رئيس  
وفصائله التى بالقاهرة وعلى رأسها ابراهيم الطيب ويوسف

طلعت وبعض الضباط مكوّنين من كذا وان نفوس الاخوان تشحن  
ضد الحكومة وان الجهاز قد يقوم بعمل خطير . لماذا لم تذهب ؟  
الشاهد — قد تكون هذه غلطة منى .

الرئيس — قد تكون .

الشاهد — أيوه .

الرئيس — وقد يكون انضمامك الاخوان والجهاز السرى غلطة  
وقد يكون تفكيرك كله غلط . . . قد يكون .

الرئيس — السيد المدعى .

- وكيل النائب العام — نريد أن نسأله عن الشخص المسئول  
والى يتصل به بصفته قائد الفصيلة ويبلغه التعليمات اى  
ضابط الاتصال .

الشاهد — ضابط الاتصال كان مره محمد عاكف وفى فترة  
اخرى اسماعيل عارف وفى فترة ثالثة خليل وهو اتصل بى مره  
فى مره سعد زغلول واسماعيل محمود .

وكيل النائب العام — منين ؟

الشاهد — خليل عبد الرحمن .

وكيل النائب العام — منين .

الشاهد — من بين السرايات وكان اتصل بى مره زمان .

وكيل النائب العام — ايه عمل خليل عبد الرحمن فى النظام  
السرى .

الشاهد — كان مسئول عن فصيلة بين السرايات .

الدفاع — اشرت الى اخطاء ارتكبت سنة ١٩٤٨ نفرتك من  
الاخوان ما هى هذه الاخطاء ؟

الشاهد — اشرت الى اخطاء وقعت من النظام السرى فى النظام  
للهديم مثل اغتيال النقراشى ومثل نسف المحكمة .

**الرئيس —** الادعاء مش معناه انه يقعد يتكلم بصوت مرتفع في الجلسة .

**الدفاع —** هل اغتيال الخازندار من ضمن هذه الاخطاء ؟  
**الشاهد —** نعم .

**الدفاع —** الذين ارتكبوا هذه الاخطاء مسلمين أو غير مسلمين ؟  
**الشاهد —** انخلعت عنهم ربة الايمان .

**الدفاع —** هل تعتقد ان الذين يقرونهم ويوافقون على هذه الجرائم مسلمين أو غير مسلمين ؟  
**الشاهد —** غير مسلمين .

**الدفاع —** وبما ان الاخوان المسلمين كهيئة اقرت هذه الاخطاء فهل تعتبر هيئة اسلامية أو غير اسلامية ؟

**الشاهد —** الاخوان المسلمون كان فيها أكثر من اتجاه فكان فيها فريق كبير أو فريق من الشباب يعتقد بعدم صلاحية مثل هذه الوسائل وهؤلاء ينسرجون تحت قسم المسلمين والبعض الآخر الذى يؤمن بصلاحية هذه الوسائل قطعاً يكونوا غير مسلمين .

**الدفاع —** كيف استوثقت من العدول عن هذه الخطط ؟

**الشاهد —** بالعهود التى قطعت امامى من المسئولين بعدم القيام بأية عمليات داخلية .

**الدفاع —** من هم المسئولون وهل تأكدت من صحتها ؟

**الشاهد —** يوسف هارون مثلاً .

**الدفاع —** هل يعتبر يوسف هارون مسئول فى مكتب الارشاد ؟

**الشاهد —** مسئول فى المنطقة .

**الدفاع —** ومن ثانياً ؟

**الشاهد —** ابراهيم الطيب وهو من الاشخاص الذين قابلتهم

وافهمونى هذا .

**الدفاع -** هل تعرف المرشد الشيخ حسن الهضيبي شخصيا ؟  
**الشاهد -** لا أعرفه شخصيا .

**الدفاع -** لم تلتق به قط ؟

**الشاهد -** التقيت به في اجتماعات . مرة مع اخوان الجامعة  
ومرة مع تقباء الاسر في الجيزة ولكن مليش اتصال شخصي به .  
**الدفاع -** هل من ضمن الدراسات التي لقنتموها ضرورة  
انكار الصلة بالجماعة عند التحقيق معكم او انكار الصلة بالمرشد  
بوجه خاص ؟

**الشاهد -** مش فاهم .

**الدفاع -** هل من ضمن الدراسات التي لقنتموها في الاجهزة  
السرية ضرورة انكار الصلة وقت التحقيق بالمرشد او الجماعة  
عن طريق زعم الاستقالة منها ؟

**الشاهد -** لم نكن نلقن هذا .

**الدفاع -** قلت ان سيطرة المرشد على الجهاز السرى كانت  
سيطرة واضحة جدا فما هى المصادر التي أوحى اليك بهذا  
والعقيدة دى من ايه ؟

**الشاهد -** من تصرفات الافراد أنفسهم حين يقرأون شيئا  
عن المرشد او يسمعون اخباره او بياناته ولكن تتبعهم لهذه  
التصرفات وقراءتهم لهذه البيانات تدل على أنهم متأثرين بها  
وهو يؤثر عليهم فعلا .

**الدفاع -** قلت ان ارادتك كانت تذوب وتنحرف في النظام  
الخاص فما هى عوامل الدوبان والانحراف التي تجعلك غير  
مسئول ؟

**الشاهد -** النظام الخاص سرى والسرية من شأنها انها  
لاتسمح للفرد ان يفعل بما يؤمن وفي بعض الاحيان يكون للفرد  
مرأى خاص يخالف الاتجاه العام ثم بعد ذلك يأتى التيار الجارف

للاتجاه العام للنظام فيرى الانسان انه لا يستطيع مجابهة هذا الاتجاه العام ولا يستطيع أن يقف موقفا خاصا خوفا من ان يرمى بالجبن خاصة وانه قطع على نفسه بأن ينفذ التعليمات أو الاوامر عن هذا الطريق فيرى الشخص نفسه مندفعاً للاقتناع بوجهة النظر الخاصة بالنظام .

**الدفاع -** هل يفهم من هذا أن هناك أشياء تهددك لو أنك خرجت على النظام ؟

**الشاهد -** أشياء تهددنى لا . ولعل هذا من ضمن المسائل الرئيسية التى تحدثت فيها فى اليوم الذى اردت أن اشترك فيه فى النظام الماضى وهو أن من يخرج عليه يقتل وكان هذا فى فترة ما قبل سنة ١٩٤٨ لان هذا ليس له سند من الاسلام أو المنطق فكان من ضمن المسائل الرئيسية التى تحدثت فيها هى أن من يخرج على النظام يخرج على الجماعة شأنه شأن أى واحد يعجبه أن يسير مع ناس أو لا يعجبه أن يسير معهم .  
انما الذى يسلب الفرد ارادته هو الشعور العام الذى يسيطر على المجموع كله فاذا اراد شخص أن يتخلف ولو انه على حق فانه سيظهر بمظهر الشخص الذى يخاف فهذا هو الذى يحول دون اعلان رايه والافصاح عنه .

**الدفاع -** هل نفهم من هذا أنه قبل سنة ١٩٤٨ كان الشخص الذى يخرج على النظام الخاص يقتل ؟

**الشاهد -** المفروض ان يكون ذلك .

**الدفاع -** هل اتخذتم قاعدة بعد سنة ١٩٤٨ تخالف هذه القاعدة .

**الشاهد -** ذكرت لسيادتكم تأكيدات بأن هذا عدل عنه فى الفترة التى اشتركت فيها وان من يخرج على النظام لن يصيبه أى سوء .



**الدفاع - ممن تأكدت ؟**

**الشاهد -** من ابراهيم الطيب ويوسف هارون .

**الدفاع -** وهل كنت مطمئنا ان خروجك لن يؤثر عليك بعد هذه التاكيدات وانت حر في ان تبقى اولا تبقى في الجهاز .  
**الشاهد -** مسألة الاطمئنان لم تكن متوفرة لى بمائة في المائة لسبب ، وهو ان هناك اشاعات تقول انهم قتلوا سيد فايز لانه كان يحارب جبهة معينة في النظام . فاذا كان الامر كذلك فيجوز يوجد من يفعل هذه الفعلة ويفعل ما يشاء .

**الدفاع -** يعنى حرية تصرفك لم تكن كاملة قط حتى الان

**الشاهد -** لم تكن كاملة حتى الان .

**الرئيس -** حتى اللحظة التى انت فيها .

**الشاهد -** من يدري قد اخرج من هنا ويحدث شيء .

**الرئيس -** يقتلوك .

**الشاهد -** جايز .

**الرئيس -** يعنى انت فى اعتقادك ان الحكومة غير قادرة على حفظ الامن بالنسبة للأفراد الموجودين ؟

**الشاهد -** ليس هذا خوف انما الشخص الذى يريد ارتكاب جريمة يحاول ان يسلك اليها السبيل الذى يستطيع انه يفعله وهذا لا يتصل بقدرة الحكومة على حفظ الامن .

**الدفاع -** لغاية بدء هذه المحاكمة التاريخية كنت تعتقد انك تخاف على حياتك لو خرجت على النظام الخاص .

**الشاهد -** كنت افضل الا اعرض نفسي لعداء النظام بعد ان اشتركت فيه .

**الرئيس -** مادام لحد دلوقتى يبقى جايز عندك بعض المعلومات مش عاوز تقولها او مخبيها لسه وخايف تقولها .

**الشاهد -** انا ذكرت كل شيء والاختفاء التى ارتكبتها

لاشتراكى فى النظام وقد قلت كل ما اعلم وبعد ذلك فانى لا  
أخشى القتل واذا قتلت فانى اقتل شهيد .

الدفاع — لو قتلت على يد من تكون شهيد ؟

الشاهد — لو قتلت مظلوما على يد مسلم أو كافر .

الرئيس — مفيش داعى للكلام فى الحاجات المعنوية دى .

الدفاع — نستطيع أن نخلص من هذا وهو ان النظام الخاص  
من شأنه أن يذيب ارادة أعضائه .

الشاهد — هذا أمر ملازم للنظام السرى أن يذيب الشخصية .

الدفاع — هل هذا فهمك وحدك أو هو فهم باقى الاعضاء ؟

الشاهد — كثير من الاعضاء يغرر بهم .

الرئيس — الدفاع كان يريد أن يواجه الشاهد بأنه سبق أن

قابل محمود عبد اللطيف .

الدفاع — هل لم تقابل محمود عبد اللطيف قط ؟

الشاهد — أنا لا اذكر انى قابلته ولم أره الا اليوم .

الدفاع — متأكد أو غير متأكد .

الشاهد — من الجائز أن أكون قد رأيت فى مبنى مجلس قيادة

الثورة فى مكتب الادعاء .

الدفاع — محمود عبد اللطيف يقول انه قابلك .

الشاهد — متى وأين وكيف . لم يحدث هذا ؟

الرئيس — احنا فى رواية من روايات شكسبير بتاع البكالوريا

بتاع زمان .

الشاهد — هذا لم يحصل .

الرئيس — قل لى — هل تعرف حسن الهضيبى ؟

الشاهد — عرفته على المنبر ومن الاجتماعات العامة .

الرئيس — تعرف انه هو ايه ؟

الشاهد — المرشد العام أو القائد العام

**الرئيس -** القائد العام للجهاز السرى يعنى يتريس فيه ولا بد أن يصدق على جميع الاوامر التى تصدر اليه وملازم للنظام السرى هذا ...

**الشاهد -** ( يكمل ) انه يذيب شخصية الافراد

**الرئيس -** ولا تعرف الرياضات الا يادوبك خطف .

**الشاهد -** ايوه

**الرئيس -** كنت ذكرت فى كلامك انك اخذت ضمان من ابراهيم الطيب على حرية الفرد فى ترك النظام السرى وهذا كلام عميق مع انك ذكرت انك قابلت ابراهيم الطيب للتعارف مع ان هذا يدل على انك دخلت معه فى تفاصيل اكثر من التعارف الذى قلت انه هو كل ما بينك وبينه . اذكر لنا تفاصيل اكثر .

**الشاهد -** الذى دار بينى وبين ابراهيم الطيب فى اول مقابلة انى كنت اعرض له الاسباب التى من اجلها اعارض النظام القديم ، وهذا مشهور عنى للدرجة ان بعض الافراد ينظرون الى على اتى شخص غير كفاء مع ان اعمالى فى الجامعة ونشاطى فيها كان معروف .

**الرئيس -** تخرجت سنة كام ؟

**الشاهد -** سنة ١٩٥٣ من الجامعة . والتحق بمعهد التربية سنة ١٩٥٤ .

**الرئيس -** وبعدين ... ؟

**الشاهد -** وفى هذه الجلسة تعرضنا لمسائل من شأنها الاتفاق على امور رئيسية تسمح لى بالاشتراك فى هذا النظام ... منها مثلا ان جماعة الاخوان ليست زى جماعة المؤمنين ... طبعى فيه فرق كبير بين الاثنين .. لانه لو كانت جماعة الاخوان زى جماعة المؤمنين يبقى الامير يباعها ملزم اما اذا كانت جماعة

الاخوان كجماعة للارشاد فلا يكون الامر ملزما فالخارج على جماعة المؤمنين يقتل انما الخارج على جماعة الاخوان المسلمين فلا يقتل .

**الرئيس -** قلها تانى .

**الشاهد -** كل من يخرج على جماعة المؤمنين جزاؤه القتل في الاسلام . . وجماعة الاخوان ماهياش جماعة مؤمنين بل جماعة كجماعة ارشاد ، وبالتالي فالخارج عليها لا يقتل . . وهذا التفكير ماكنش واضح لدى النظام القديم . . . . . الحاجة الثالثة : عدم القيام بعمليات فردية . . الحاجة الرابعة : ضرورة الوثوق من أن القيادة كلها موافقة على كل عمل يقوم به هذا النظام . . ودار الكلام حول هذه النقاط وعدم فرض أفراد معينين ، واحترام حرية الفرد ، وعدم الازدواج في الشخصية .

**الرئيس -** الكلام باين كده أنكم كنتم بتتكلّموا على سلطات . . . . . يعنى ان رئيس الفصيلة يكون عنده سلطات وتكون عنده الحرية في اختيار الافراد المكونة منهم الجماعات وان الرئيس الاعنى للفصيلة يتدخل في امور الفصيلة يعنى تنظيم عسكري . . . . . يعنى كان باين ان الحاجة اللي تناولها هذا الكلام وكانت خاصة بتسليح الجماعة . . يعنى سلطات واختصاصات . . زى الجيش

**الشاهد -** هو ذكر طريقة تنظيم الافراد وقال ان كل فرد من الافراد حيكون معاه قطعة

**الرئيس -** قطعة ايه ؟

**الشاهد -** قطعة سلاح

**الرئيس -** زى ايه ؟

**الشاهد -** حيثما اتفق على حسب امكانيات النظام ما تسمح

**الرئيس -** على أن مين اإلى يمدّهم بها ؟

**الشاهد -** القيادة بالطبع . .

الرئيس - عن طريق مين ؟

الشاهد - عن طريق المسئولين .

الرئيس - مين هم المسئولين ؟

الشاهد - المفروض ان اللى كان مسئول عن التدريب محمد

مهدى عاكف . . فهو كان مفروض انه يسلم الفصيحة السلاح . .

الرئيس - وسيد الرئيس . . كان مسئول عن ايه ؟

الشاهد - قد يكون مسئول فى مثل هذه الناحية وانما

الاتصال بهذا الشخص كان محظور . .

الرئيس - مين اللى حظر ذلك ؟

الشاهد - المفروض ان الاتصال يكون مع محمد عاكف وهو

المسئول الاول والاخير عن السلاح . .

الرئيس - ايه السلاح اللى قال لكم عليه ابراهيم الطيب ؟

الشاهد - فيه « ستن ، وبرن . . . ش ف . . »

الرئيس - انت تدريبت تدريب عسكرى ؟

الشاهد - اخذت فرقة تدريب لمدة شهر . . كل يوم

ساعتين .

الرئيس - تدريبت على ايه ؟

الشاهد - على ايه ازاي ؟

الرئيس - يعنى ايه سلاح التدريب اللى انت تدريبت عليه ؟

الشاهد - البرن والبندقية « لى انفيلد »

الرئيس - حسن الهضيبي كان يشتغل ايه قبل جماعة

الاخوان ؟

الشاهد - مستشار وقاضى . .

الرئيس - مستشار الاول والا قاضى الاول ؟

الشاهد - قاضى الاول وبعدين بأه مستشار . .

**الرئيس -** كان يحكم بآيه لما كان قاضى او مستشار .. كان يحكم بأى قانون ؟

**الشاهد -** بالقانون الوضعى ..

**الرئيس -** اللى هو موجود فى البلد النهارده ؟  
**الشاهد -** ايوه

**الرئيس -** احيل على المعاش امتى ؟  
**الشاهد -** لما بلغ سن الستين

**الرئيس -** يعنى احيل على المعاش لما بقى عنده ستين سنه وبعدين اصبح مرشد عام الاخوان ؟  
**الشاهد -** ايوه

**الرئيس -** مين اللى عينه مرشد عام ؟  
**الشاهد -** حدث كلام كثير فى هذا الموضوع ، وقيل ان الملك  
**الرئيس -** ملك مين ؟

**الشاهد -** الملك فاروق .. قيل انه كان له راي فى تعيين  
حسن الهضيبي مرشد عام ..  
**الرئيس -** ازاي ؟

**الشاهد -** كان عاوز شخص هادىء مايتعبوش ..  
**الرئيس -** وازاي نفذت هذه الارادة ؟

**الشاهد -** ده اللى سمعته .  
**الرئيس -** مع مين اتكلمت ؟

**الشاهد -** دى قراراتى اللى انا طلعت بها من مختلف وجهات  
النظر فى داخلية الجماعة يعنى مثلا الحاج صالح العشماوى  
والجماعة بتوعه كانوا بيقلوا .. عاوز اقول انى سمعت انه كان  
فيه اتصال بمنير الدله وحسن العشماوى على اساس انهم  
يتصلوا بالهضيبي .. ويتصلوا باعضاء الهيئة التأسيسية علشان

يختاروا حسن الهضيبي مرشد . . . وبعدين الى حصل انهم لم يجمعوا الهيئة التأسيسية ، وانما لقوا على اعضائها في الاقاليم واخذوا الموافقة منهم على تعيينه . . . وبالتالي اختير المرشد العام حسن الهضيبي .

**الرئيس -** لما حسن الهضيبي النهارده رئيس جماعة الاخوان والمرشد العام لها وقائد القوات المسلحة السرية بتاعة الجهاز او النظام الخاص بتاع جمعية الاخوان المسلمين وقعد لغاية ماطلع على المعاش يحكم بالقانون الوضعي كقاض وكمستشار . . . الم تثر في نفسك طريقة تعيينه والم يثر في نفسك الشك في ان هذا الرجل مش كل قلبه للدعوة ؟

**الشاهد -** لم اكن اثق في الهضيبي ثقة مطلقة بل ثقة نسبية تتصل بالكلام الذي يقوله

**الرئيس -** اذن ماتاخذوا به قانونا في جماعة الاخوان هو الكلام ومظهره الفعلي ؟

**الشاهد -** انا لا اقصد هذا . . .

**الرئيس -** لما تكون هناك حوادث ثابتة الا تكون محل اعتبار ؟

**الشاهد -** كل ينضح بما عنده .

**الرئيس -** عنده ايه ؟

**الشاهد -** يعنى الشخص الكويس تبقى الصفة بتاعته

كويسه . . .

**الرئيس -** تعتقد الهضيبي شكله ايه ؟

**الشاهد -** كانت فيه فترة ما كانش يقال فيها شيء عن

الهضيبي ، وانما بعد ما ظهرت هذه الحقائق بدأ الانسان يتخذ منه موقفا اخر . . . وقد تحدثت بشأن الهضيبي مع اثنين اذكرهما جيدا وذكرتهما في اوراق التحقيق هما احمد نصير وعلى فايز كامل وكنا متفقين على ان الهضيبي . . . سياسته الاخيرة

حيال الثورة كانت خاطئة وانه لا يصلح أن يكون مرشد عام  
ويجب أن ينحى عن منصب الارشاد .

الرئيس — الكتكوت الفصيح فى بطن أمه يصيح .. ( ضحك )  
.. لو كان الهضيبى بيدعى الاسلام صحيح كان احتج على  
القانون الفرنسى اللى بيطبق .. ولكنه فضل ساكت لغاية ما طلع  
على المعاش ، وطلع مستشار واتحط مرشد عام وانتم ماشيين  
وراه وتذوب شخصياتكم فيه ... آهى دى الحقائق ..  
الواقعة دى تنكروها ؟

الشاهد — .....

الرئيس — اظن يعنى الاسلام ما وصلش الى هوة فى مختلف  
العهود بقدر ما وصل على ايديكم والحمد لله رب العالمين .. مش  
كده والا ايه ؟

الشاهد — مضبوط .

الدفاع — من الذى يحدد الخارج على جماعة المؤمنين  
فيستحق القتل — كما قلت فى معرض كلامك — من غير الخارج  
فيستحق الحياة ؟

الرئيس — والله السؤال تانى لو سمحت .

الدفاع — من الذى يحدد الخارج على جماعة المؤمنين  
فيستحق القتل — كما قلت شرعا من غير الخارج على جماعة  
المؤمنين فيستحق الحياة ؟

الشاهد — ولى أمر الدولة طبعاً ...

الدفاع — يملك هذا .. يعنى انت بتعطى لولى أمر الدولة  
هذا الحق .. يعنى ترى أن الدين يعطيه هذا الحق ؟

الشاهد — أبوه ..

الدفاع — من ولى أمر الدولة فى مصر ؟

الشاهد — الحكومة



**الدفاع - من في الحكومة ؟**

**الشاهد - رئيسها ...**

**الرئيس - من ؟**

**الشاهد - جمال عبد الناصر ..**

**الدفاع - أنت تعتقد كمسلم أن جمال عبد الناصر له الحق في أن يحدد المؤمن الذي يستحق الحياة من غير المؤمن الذي يستحق الموت ؟**

**الشاهد - طبعاً ...**

**الدفاع - كيف دنت بالطاعة والولاء لمرشد عينه فاروق فيما تقول ؟**

**الشاهد - قلت سابقاً انه مرت علينا فترة لم يدر فيها كلام حول حسن الهضيبي وفي الفترة التي كثر فيها الكلام واستبان فيها الامر انا شخصياً كانت لي مواقف فيها الحيرة والحذر الشديد من هذا الرجل وأعلنت ذلك وتفاهمت مع بعض الافراد التي اثق فيهم في الجماعة . وانا ذكرت اسمين من هذه الاسماء الآن واذا طلب منهم أن يتكلموا فسيتكلموا .**

**الدفاع - سؤال آخر كده على الماشي ، تنصحنا به نصيحة لوجه الله ، ما الفرق بين المؤمن وغير المؤمن ؟**

**الشاهد - المؤمن ..**

**الرئيس - يعني احنا عاوزينك تعرف المؤمن وغير المؤمن ..**

**الشاهد - المؤمن هو الذي يؤمن بالله وملائكته وكتبه ورسله واليوم الآخر والقدر بخيره وشره ..**

**الرئيس - وغير المؤمن ؟**

**الشاهد - هو من لا تتوافر فيه هذه الامور ..**

**الرئيس - والمسلم ؟**

**الشاهد - فيه بعض آراء ..**

الرئيس - لا ... احنا عاوزين رأيك انت .. انت رايح  
تسمعنا كتب ؟

الشاهد - انا ارى ان المسلم ..

الرئيس - احنا برضه نقدر نجيب واحد يقرأ لنا الكتب دي ..  
الشاهد - ارى ان المسلم هو المؤمن مادام ينفذ ما يملى به  
عليه الايمان .. يعنى ما يوصى به الايمان بالله وملائكته وكتبه  
ورسله .

الرئيس - اليهود الذين يؤمنون بالتوراه .. يدخلوا فى اى  
درجة ؟

الشاهد - اهل الكتاب ...

الرئيس - مؤمنين او مسلمين ؟

الشاهد - مؤمنين من نوع تانى .. هم ثلاث انواع ...

الرئيس - ايه الانواع الثلاثة ؟

الشاهد - مؤمنين وأهل كتاب ومشركين ..

الرئيس - والمسلمين هنا فين ؟

الشاهد - من المؤمنين .. قد يكون الانسان مؤمنا ولكنه غير  
مسلم ، لانه مش ينفذ ما يوصى به الاسلام ..

الرئيس - أشكرك على الدرس العظيم ده .. أما اجابتك دي  
فاحنا حاسبيها لجميع المسلمين فى العالم علشان يردوا هم  
عليها لان احنا عسكريين مانقدرش نرد عليك ... ( ضحك )

الدفاع - انا مدنى فاسمحوا لى بسؤال لانى عاوز اطمئن على  
مصرى ... ( ضحك )

الرئيس - اتفضل ..

الدفاع - هل المسلم الذى لا يعطى لرئيس الدولة الحق ..  
وهو حق المؤمنين الذين يستحقون الحياة من غير المؤمنين الذين  
يستحقون الموت .. هل مثل هذا المسلم اللى ما يعطيش لرئيس

الدولة هذا الحق يعتبر مسلم والا غير مسلم ؟

الرئيس - اظن ظاهر جدا انه يعتبر ..

الشاهد - يعتبر ان اسلامه ناقص ...

الرئيس - طيب يا الله ياسيدي .. كتر الف خيرك ومع

السلامة .. ابقى والله ادعوا لنا وانت بتصلى الظهر ، يمكن ربنا

يستجيب دعوتك .. ( ضحك ) ..

الدفاع - هي أم قويق قالت ايه؟! .. ( ضحك ) ..

( وعلى اثر ذلك انصرف الشاهد )

الرئيس - والآن .. ترفع الجلسة على أن تعود للانعقاد في

الساعة الخامسة والنصف من مساء اليوم .

( رفعت الجلسة في الساعة الثانية والدقيقة الخامسة والاربعين

بعد الظهر ) .

## مخضر

### الجلسة الخامسة لمحكمة الشعب

المنعقدة علنا في الساعة الخامسة والدقيقة الخامسة والخمسين مساء السبت ١٣ نوفمبر سنة ١٩٥٤ ، الموافق ١٧ ربيع الاول ١٣٧٤ ، المؤلفة وفقا للامر الصادر من مجلس قيادة الثورة بتاريخ اول نوفمبر ١٩٥٤ ، الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو مجلس قيادة الثورة .

وعضوية القائم مقام أنور السادات ، والبكباشي ( ا.ح ) حسين الشافعي عضوي مجلس قيادة الثورة .

وبحضور البكباشي ابراهيم سامي جاد الحق المدعي ، والاستاذ عبد الرحمن صالح عضوي مكتب التحقيق والادعاء .

وتولى تسجيل المحاكمات بالاختزال الاساتذة : طلعت الصبان وممدوح توفيق و ابراهيم فكرى فودة ورمسيس عبد الشهيد مندوبو مصلحة الاستعلامات .

قدمت القضية رقم (١) لسنة ١٩٥٤ ( محكمة الشعب )

التهمة فيها محمود عبد اللطيف محمد .

( حضر التهم )

الرئيس - فتحت الجلسة .. المدعي .. الشاهد ..

وكيل النائب العام - الشاهد موجود .. صلاح الدين على

ابو الخير .

( نودى على الشاهد فحضر ) .

الرئيس — اسمك ؟

الشاهد — صلاح الدين على أبو الخير .

الرئيس — عمرك قد ايه ؟

الشاهد — ٢٢ سنة واربع شهور .

الرئيس — بتشتغل ايه ؟

الشاهد — مهندس معمارى . .

الرئيس — ده ايه ؟

الشاهد — مصحف .

الرئيس — قل والله العظيم اقول الحق ولا شىء غير الحق

والله على ما اقول وكيل .

( اقسم الشاهد اليمين ) .

الرئيس — المدعى . .

وكيل النائب العام — هل انت عضو فى جماعة الاخوان ؟

الشاهد — نعم . .

وكيل النائب العام — منذ متى التحقت بهذه الجماعة ؟

الشاهد — حوالى سنة ١٩٤٨ بالتقريب

وكيل النائب العام — فى اى منطقة باشرت نشاطك فى جماعة

الاخوان ؟

الشاهد — فى منطقة الجيزة

وكيل النائب العام — هل كنت مشتركاً فى النظام السرى الخاص ؟

الشاهد — نعم .

وكيل النائب العام — اشرح للمحكمة اسباب انضمامك لهذا

النظام وكيف التحقت به والتنظيمات الخاصة به .

الشاهد — كنت فى الاخوان وكنت تقيب أسرة عادية وكنا

بنحفظ قرآن وحديث وندرس اسلام والكلام ده استمر لغاية

آخر السنة قبل الامتحان بأربع شهور فتركت الاسرة لواحد زميلي وتفرغت لامتحان البكالوريوس .. وبعدين لما خلصت من الامتحان .. طبعا أنا كنت عارف بأن فيه نظام خاص .. . وانه كان فيه نظام قديم وكان فيه عيوب .. ذلك ان تصرف أفرادہ كانت تصرفات غير اسلامية صحيحة .. جالى الاخ محمود الحواتكى وقال احنا حنكون نظام جديد وحنكون حذرين ملشان ما نقعشى فى الاخطاء القديمة .. وستكون تصرفاتنا بروح اسلامية وساعة ما يطلب منا أى عمل غير اسلامى نسيبهم ونتركهم .. فايہ رايك .. فقلت له مفيش مانع .. ووقتها كنت خالى شغل ومنتظر النتيجة .. فملكنى مجموعة وادانى اسماء سبعة وقال دول تجتمع معاهم فى اى مكان وربطنى بيهم علشان نعمل مجموعة وكان البرنامج بتاعنا فى النظام له ناحيتين .. ناحية تربيه روحية ودراسات اسلامية .. وناحية عسكرية اللى هى تدريب على التشكيلات العسكرية والاسلحة للى مش مدرب .. وكان معظمنا مدرب فى الحرس الوطنى .. بس وبعدين بدانا نجتمع وفى الوقت ده كنت بادور على عمل .. . وقدمت فى الحكومة وفى الشركات وبعدين سافرت اسكندرية .. فقعدت هناك حوالى ثلاث اسابيع مع عائلتى .. وبعدين بعد ما رجعت جاني جواب من شركة تعمير المساكن الشعبية واتعينت بعد يومين من وصول الجواب .. وكان الشغل فى الشركة بيشغل وقتى كله لانى كنت بأعمل مهندس تنفيذى أباشر تنفيذ العمل .. ويدوب ارجع بيتى اتشطف واتعشى وان كان فيه مشوار اقضيه .. وأنا ماكنتش انام .. وبرضه فى الجماعة وكنا نختار البرنامج الروحى اللى نمشى عليه والنظام .. والعسكرى كان متساخر .. وقالوا لنا لسه بدرى عليه .. واستمرينا مدة على هذا الاساس .. وبعدين حصلت الظروف

بتاعة الحكومة والايخوان وبدأت الحالة تتأزم شوية .. وبدأ فيه هجوم او شبه هجوم من الحكومة على الاخوان في الصحف وبدأنا نقول لهم ايه الحل وايه الطريقة .. حتملوا ايه .. وايه الخطة .. فكان الجواب لسه .. وكانوا بيقيموا برحلات ولكن انا كنت مشغول وقمت برحلة واحدة الى الهرم وكانت رحلة رياضية .. جرى وتنطيط .. وبعدين جات الحادثة بتاعة محاولة اغتيال الرئيس جمال عبد الناصر وفي الوقت ده كنت شوية زهقت منهم لان البرنامج متأخر .. ومفيش حاجة جات .. وفعلا جات لى شغلة فى الحجاز .. مهندس هناك فى شركة حسن فتوح وبدأت اعمل الترتيبات الخاصة بالسفر زى استخراج شهادة المعاملة وفى وقت الحادث ده اتضايقت .. وتانى يوم قابلت الحواتكى وقلت له ايه اللى عملوه الاخوان .. فقال لى الظاهر هما اللى عملوه .. ولكن انا اتضح لى ان العمل ده فردى وبدون علم اللجنة المسئولة عن النظام .. فانا قلت له دى فوضى .. انتم حتضيعونا .. انا مش حشتغل معاكم .. سلام عليكم .. فهو قال لى تمام دى فوضى وانا اللى ادخلتك النظام .. وانت حر علشان اكون برىء من ذنبك .. فقلت له وايه الحل .. فقال .. فهم اخوانك ان منطقة الجيزة تعتبر مغلقة .. لا تأخذ أوامر ولا تعطى أوامر .. ده اللى حصل بالضبط .. فيه أسئلة تانية ؟

**وكيل النائب العام - سألتك بالامس عن علاقتك بجماعة**

**الاخوان اول ما سألتك فيماذا أجبتنى ؟**

**الشاهد - أنكرت ...**

**وكيل النائب العام - أنكرت كل علاقة لك بجماعة الاخوان**

**.. اليس كذلك ؟**

الشاهد — مش كل علاقة . . ولكن أنا قلت أنا لي فيها اصدقاء .

وكيل النائب العام — لقد انكرت والمحضر الاول امامي . . حصل . .

الشاهد — ايوه . . .

وكيل النائب العام — هل استمررت في انكارك طيلة المحضر الاول ؟

الشاهد — رجعت غيرت اقوالى . . .

وكيل النائب العام — امتى ؟

الشاهد — بعد ما اتضح ان اللى معايا اعترفوا على . .

وكيل النائب العام — يعنى كلامك فى المحضر ماكنش صحيح . .

الشاهد — ايوه . . .

وكيل النائب العام — طيب . . نتناقش فى المحضر الثانى . .

مين كان رئيس الفصيلة اللى كنت رئيس احدى مجموعاتها ؟

الشاهد — فى الاول محمود الحواتكى . . واخيرا اسماعيل محمود

وكيل النائب العام — كام مجموعة فى فصيلة الجيزة ؟

الشاهد — اربعة . .

وكيل النائب العام — مين رؤساؤها . . ؟

الشاهد — توفيق ثابت . . وتوفيق شلبى . . والثالثة

رئيسها ماكنش ثابت . . . مرة عبد الكريم . . وبعدين

ماحضرش حد من الجماعة . .

وكيل النائب العام — ومين كان رئيس الجماعة الرابعة ؟

الشاهد — أنا . . .

وكيل النائب العام — قلت فى مستهل اقوالك الآن انك

كنت بترأس اسرة . . .



الشاهد — أيوه . . .

وكيل النائب العام — هل كانت الأسرة بتبأشر نشاطها علنا  
أو بطريقة سرية ؟

الشاهد — علنا . . .

وكيل النائب العام — هل كان أفرادها معروفين ؟

الشاهد — أيوه . . .

وكيل النائب العام — عند ما تراست المجموعة في النظام  
السري . . هل كان الأعضاء اللي تحت إشرافك هم نفس  
الأعضاء في أسرتك العلنية . . ؟

الشاهد — لا . .

وكيل النائب العام — يختلفوا كل الاختلاف ؟

الشاهد — تقريبا . . .

وكيل النائب العام — عشيري عبد السلام ومصطفى عبد الله  
وسعيد الراجي وعبد الظاهر سليمان ومحبي هلال . . . وغيرهم ؟  
الشاهد — مش فاكرا .

وكيل النائب العام — والعناني ؟

الشاهد — أيوه . . .

الرئيس — شغلتهم إيه ؟

الشاهد — عشيري في كلية العلوم . . . وأنا في كلية الهندسة  
وكذلك محمد عبد الظاهر ومصطفى عبد الله في كلية التجارة . .  
وسعيد الراجي طالب توجيهي ومحبي هلال طالب توجيهي . . .

الرئيس — هل كان أفراد المجموعة معروفين كأعضاء في المجموعة ؟

الشاهد — لا طبعا — محدش بيسأل التاني انت فين . . . .

الرئيس — تقدروا تعلنوا عن اسمائهم ؟

الشاهد — لا . . .

- الرئيس** - لماذا غيرت أفراد النظام عن أفراد الاسرة ؟
- الشاهد** - لأن الغرض من النظام يقتضى السرية ...
- الرئيس** - ايه الغرض من النظام ؟
- الشاهد** - الغرض الظاهر أو الاساس هو تكوين مجموعة مسلحة مؤمنة .. تدرب تدريب كويس علشان تخدم الاسلام وتدافع عنه فى أى وقت وفى أى مكان
- وكيل النائب العام** - وهل هذا يستلزم السرية ؟
- الشاهد** - فيها مجموعة مخبرات مثلا .. ومفروض انهم ما يعرفوش يجيبوا اخبار لو كانوا معروفين .. والحديث يقول استعينوا على قضاء حوائجكم بالكتمان ..
- وكيل النيابة** - لماذا لم تلتزموا السرية فى الاسر العلنية .. الم تكن لها أهداف ؟
- الشاهد** - تقصد سرية بالنسبة لىن ؟
- وكيل النيابة** - بالنسبة للاخوان - ... هل أعضاء المجموعة كانوا معروفين ؟
- الشاهد** - كان معروف أن دى أسرته ...
- وكيل النيابة** - ده اللى قلته امبارح ؟
- الشاهد** - أيوه ... مفيش فرق ...
- وكيل النيابة** - يعنى كان فيه نظام علنى للاسر يساعد على اخفاء النظام السرى ..
- الشاهد** - أيوه .. أنا قلت ان فيه سرية ولكن مش للدرجة دى ..
- الرئيس** - فيه رد جاهز وتنظيم علنى يساعدك على اخفاء التنظيم السرى ؟
- الشاهد** - أيوه ...
- وكيل النيابة** - هل اذا سألت رئيس مجموعة أخرى عن

- افراد مجموعة يرشدك عنهم . . ؟  
الشاهد - لا طبعاً . . ولكن لما واحد يسأل يقول دى أسرتك  
يقول آه أسرتى . .  
الرئيس - محمود اسماعيل يشتغل ايه ؟  
الشاهد - مدرس .  
الرئيس - فى الجماعة ؟  
الشاهد - رئيس منطقة قبل مايرأس الفصيلة . .  
الرئيس - وقبل رئاسته للفصيلة كان مين ؟  
الشاهد - محمود الحواتكى وبعده محمود اسماعيل . .  
الرئيس - وفى مدة تولى محمود الحواتكى الرئاسة كان محمود  
اسماعيل ايه . . ؟  
الشاهد - رديف له . .  
الرئيس - السرية كانت علشان ايه ؟  
الشاهد - أنا قلت المخابرات مثلاً . .  
الرئيس - أنا عاوز على سبيل الحصر مش المثال . .  
الشاهد - كمان الاسلحة مفروض أن المنضمين يكونوا مدربين  
تدريب عسكري وقوانين مصر ماتسمحش باستعمال الاسلحة  
ولا تصرحش بها فعلى شان نتجنب هذا يجب أن تكون فيه سرية .  
الرئيس - عايزين تستعملوا السلاح فى ايه ؟  
الشاهد - فى التدريب . . .  
الرئيس - فيه بنادق ومسدسات متضربش بتستعمل فى  
التدريب ودى لا تعتبر سلاح ليه ماتستعملوهاش ؟  
الشاهد - ما أعرفش . .  
الرئيس - وطبعاً سلاح التدريب له ذخائر ؟ .  
الشاهد - طبعاً . .  
الرئيس - علشان تتدربوا عليها ؟

الشاهد — أيوه ...

الرئيس — وتستعملوها امتى ؟

الشاهد — لاستعمالها وقت ما يطلب منا ..

الرئيس — ايه الاوقات التى تعتقد أنه يطلب منك استعمالها  
و ضد مين ؟

الشاهد — على حسب الظروف ... فى القنال مثلا ..

الرئيس — حرب القنال مقصورة على المسلمين ؟

الشاهد — لا ... للمصريين كلهم ..

الرئيس — والحكومة عملت استعدادات أو لا .. ؟

الشاهد — عملت ...

الرئيس — يبقى ما الدافع علشان عمل جهاز سرى .. علشان  
تحارب الانجليز ولا الحكومة ؟ ... يصح تعملها معادلة دى  
يا باشمهندس ..

الشاهد — أنا أعتقد أن الاسلحة لازمة .. ومن مستلزمات  
النظام وعلشان يكون له قوته لا بد أن يكون مسلح ...

الرئيس — ليه يكون مسلح ؟

الشاهد — علشان يخدم الاسلام ..

الرئيس — الاسلام عقيدة وفكرة والا مادة ...

الشاهد — عقيدة وفكرة ...

الرئيس — العقيدة تفدى بالسلاح ؟

الشاهد — لا .. جازى الاخوان يحاربوا فى أى مكان خارج مصر  
والعربى لا بد أن يكون مستعدا بالسيف للدفاع عن نفسه .

الرئيس — ما يروحوا يتطوعوا .. ولا الاخوان دولة داخل  
دولة ..

الشاهد — لا مش دولة ... احنا بقدر الامكان بنحافظ على  
كيان الدولة ..

**الرئيس -** وهى دى المحافضة . . مادام قوانين الدولة ما تسمحش بالسلاح وتخزينه ولا السرية والاغراض اللى انت بتقول عنها ممكن أن تؤدى بالتطوع ويوم ما تحب تروح تحارب فى الجزاير مثلا . . تقدر تروح متطوع هو مش فيه ناس بتروح تتطوع من بلاد تانية ؟

**الشاهد -** على كل حال اللى اعرفه انه ماكنش يقصد به اى شىء ضد مصلحة البلد او الحكومة . . وما يقصدش به أبدا محاربة المصريين .

**الرئيس -** تقدر تقول لنا الاخوان كانوا حقيقوا حكم اسلامى ازاي ؟

**الشاهد -** ما أعرفشى . .

**الرئيس -** امال انضمت للجهاز السرى ليه ؟

**الشاهد -** أنا هدفي طبعا انتشار الاسلام وتطبيقه . . وده مش بالقوة او بالعنف أبدا . . .

**الرئيس -** سيدنا محمد لما كان ينشر الاسلام كان يعمل جمعيات سرية ويخبي فيها اسلحة ؟

**الشاهد -** . . .

**الرئيس -** ماترد على . .

**الشاهد -** كان فيه سرية فى الاول فى الدعوة . . ولكن الموقف ده غير ده . . .

**الرئيس -** فيما بينه وبين انصاره كان فيه جماعة اخرى سرية لايعلمها باقى اتباعه ؟

**الشاهد -** لا . . واللى اعتقده ان النظام السرى فعلا فقد اسباب وجوده بعدما انطرد الملك وبعد الانجليز خلاص ماخارجوا . . وهو فعلا حتى او كان موجود ماكنشى حيعمل اى شىء من الحاجات دى ابدا لان اسباب وجوده زالت . . ولكن

الى حصل انه كان موجود ومجاش في ذهن الاخوان ان اسباب وجوده زالت ...

**وكيل النيابة -** سألتك سؤال صريح عن موقف الاخوان من الحكومة في اجتماعات الفصيلة فقلت ان كان هناك منشورات بتصدر من جانب الاخوان ضد الاتفاقية والحكومة ثم اختفاء المرشد من غير سبب ظاهر زاد الجو تلبدا وقلت ظللنا نسأل باذا تفعل فقالوا انتظروا تعليمات ... مش ده كلامك ...

**الشاهد -** بس الشوية الاولانيين مش كلامى .. ولكن مفيش مانع اوافق عليهم ..

**وكيل النيابة -** احنا مابنساولمش .. كلامك ولا لا .. ؟ مش ده توقعك ؟

**الشاهد -** أيوه توقعى ..

**الرئيس -** طيب رد على السؤال ..

**الشاهد -** حصل فعلا مناقشات في نطاق الفصيلة السرية التى تتبعنى بشأن تطور الموقف بين الاخوان والحكومة .

**الرئيس -** ايه محور الكلام ؟

**الشاهد -** الاتفاقية ..

**الرئيس -** قلتوا عليها ايه ... حلوة ودمها خفيف ؟

**الشاهد -** كنا بندرس نصوصها ونشوف ايه اوجه النقص فيها .. ونقط الضعف

**الرئيس -** وبعدين ؟

**الشاهد -** ولا قبلين ..

**الرئيس -** أنت حتخشلى قافية ولا ايه .. أنت تعرف لو غلطت قدام المحكمة ممكن أنها تصدر عليك حكم غير الجريمة الى مقدم بيها ... **مقدر هذا ياباشمهندس .. ؟**

**الشاهد -** متأسف ..

- الرئيس — اتكلم ..
- وكيل النيابة — مين كان بيصدر لك التعليمات ؟
- الشاهد — رئيس الفصيلة .. وكان الحواتكى .. وبعدين .. اسماعيل محمود
- وكيل النيابة — بيصدر الاوامر من تلقاء نفسه او له رياسة .
- الشاهد — له رئاسة طبعاً ..
- وكيل النيابة — رياسة من ؟ مين يتلقى الاوامر ويرسلها اليكم ولرؤساء الجهاز ؟ مين المسئول ؟
- الشاهد — لا اعلم ولكن هناك سلسلة متصلة بقائد النظام .
- وكيل النيابة — مين هو رئيس النظام ؟
- الشاهد — فيه قيادة .. وهذه القيادة تخضع فى تصرفها أو اعمالها .. او قبل ان تعمل اى عمل ، تأخذ رأى المرشد العام ومكتب الارشاد ..
- وكيل النيابة — يعنى يجب ان تعرض على المرشد العام فاذا اقرها تصدر ..
- الشاهد — نعم ..
- وكيل النيابة — واذا لم يقرها ؟
- الشاهد — لا اعرف ..
- وكيل النيابة — هل تأتى التعليمات اذا لم يوافق عليها المرشد ؟
- الشاهد — لا ...
- وكيل النيابة — يعنى كل معلومات تصدر للجهات من الرياسة يجب أن تكون بموافقة المرشد ؟
- الرئيس — كنت منتظر ايه من جماعة الاخوان فى التوتر بينها وبين الحكومة فى مسألة الاتفاقية ؟ ما موقف الاخوان ؟
- انتم منتظرين الاخوان تعمل ايه ؟

**الشاهد -** تصلح الموقف مع الحكومة وتحل المشكلة حل ودى . .

**الرئيس -** اللى كان حيصلح الموقف مع الحكومة الجهاز السرى بصدور تعليمات له ؟

**الشاهد -** كنا بنسأل ماموقف الاخوان ؟ وما راى الاخوان . .

**الرئيس -** يفهم من كلامك ان الجهاز السرى حيسوى الخلاف مع الحكومة بصدور تعليمات اليه . .

**الشاهد -** بما انى فى الجهاز السرى . . وهم مسئولين عنى . . آخذ منهم الاخبار . .

**الرئيس -** والاخبار اللى تأتى من الدولة عامة . . لا تعتبرها ؟

**الشاهد -** لا . . . . اعتبرها طبعاً . .

**الرئيس -** يعنى بالنسبة للاتفاقية مقيّد نفسك عضو فى الجهاز السرى ؟

**الشاهد -** أنا كنت أعتبر التعليمات دى من جهة ودى من جهة ثانية . .

**الرئيس -** واذا اختلف الاثنين . .

**الشاهد -** احكم عقلى واحكم الاسلام . .

**الرئيس -** وصل بك التعليم بعد البكالوريوس اللى أخذته ان كل شخص يقيم دولة لنفسه . . ؟

**الشاهد -** لا . . .

**الرئيس -** مجموعة القوانين والاوامر التى تصدر باسم المجموع لا تطاع ؟

**الشاهد -** الاوامر مطاعة يا فندم

**الرئيس -** وليه لم تطع امر الحكومة ان مفيش اجهزة سرية ؟

**الشاهد -** الحكومة قالت كده ؟



**الرئيس -** كأن الحكومة تسمح بقيام أجهزة سرية .. ازاي  
تقدر تتحكم فيها الحكومة اذا سمحت بيها ... سرية والحكومة  
تعرف ... تبقى سرية على مين ؟ .. اتكلم يلباش مهندس شوفا  
في اللوغاريتمات .. وقلبها على مختلف النظريات اللي اتعلمتها ..

**وكيل النيابة -** اعترفت الان امام المحكمة بأن الغرض من  
السرية ، او بأن النظام يجب ان يكون سرى بطبيعته لان أعماله  
ممنوعة قانونا كحمل سلاح بدون ترخيص .. واحراز مفرقات  
.... الخ . أليس هذا مخالفا لأوامر الدولة وقوانينها ؟

**الشاهد -** ايوه انا قلت ان هذا النظام فقد أسباب وجوده  
بعد الثورة .. انا مقتنع بهذا الكلام ..

**الرئيس -** في اول الكلام قلت ان الجهاز السرى ليحارب اعداء  
الاسلام في تونس والجزائر وفلسطين ... هل أسباب قيام  
تونس والجزائر وفلسطين ما زالت بعد قيام الثورة ؟

**الشاهد -** لا .. .

**الرئيس -** هل هذا السبب من الاسباب التي تدعو لانشاء  
الجهاز الخاص ؟

**الشاهد -** لا داعى للسرية بعد ذلك .. .

**الرئيس -** وليه بقيت منضم للجهاز السرى بعد قيام الثورة ؟

**الشاهد -** أنا انضمت بعد يونيه وفكرت اتركه ..

**الرئيس -** أنت منضم من يوم حسن البنا ..

**الشاهد -** لا .. أنا منضمتش الا في يونيه الماضي فقط ...

**الرئيس -** تناقض نفسك ؟

**الشاهد -** أنا قلت كده ...

الرئيس - ازاي تكون مقتنع ان السرية لا وجود لها بعد الثورة وتنضم للجهاز بعد الثورة ؟ انت مقتنع ان ده غلط وتعمله ؟  
الشاهد - يصح الشخص يقع في غلط ..

الرئيس - واللى يقع في غلط ..

الشاهد - يتحمل نتيجة خطئه ..

وكيل النيابة - انت مش انشأت هذه المجموعة ؟

الشاهد - لا ...

وكيل النيابة - كان قبل منك موجود ؟

الشاهد - لا ..

وكيل النيابة - اذن انت انشأت اول مجموعة ..

الشاهد - هي سلمت لى .. مش انا الى انشأتها ..

وكيل النيابة - قلت ان حصل اجتماع لرؤساء المجموعات بقواد الفصائل وحصل مناقشة في موقف الاخوان من الحكومة ..  
يعنى الاجتماع كان خاص بالنظام السرى .. ماهى التعليمات الى كنتم تتعجلوا ارسالها في هذه الظروف ؟

الشاهد - حل الموقف ..

وكيل النيابة - اشرح هذه النقطة للمحكمة ..

الشاهد - حل الازمة بين الاخوان والحكومة ..

الرئيس - ايه هي الازمة اللي بين الاخوان والحكومة واللى تطلبوا ان تحلها ؟

الشاهد - الذى اراه ان هناك سوء تفاهم بين الاخوان والحكومة ..

الرئيس - ولازم يحل هذا سوء تفاهم .. ايه سببه ؟

الشاهد - يصح يكون له اسباب لاعرفها انا ..

الرئيس - وازاي تتدخل في موضوع لا تعرف اسبابه ؟

الشاهد - انا لا تدخل .. انا اطلب الحل فقط ..

الرئيس - حل ايه .. الحكومة ؟

الشاهد - لا .. حل الازمة ..

الرئيس - ليه هي الازمة بين الحكومة ودولة بجانبها ؟

الشاهد - لا ...

الرئيس - ماهو كيان جماعة الاخوان المسلمين داخل الدولة ؟

الشاهد - جماعة من الناس ..

الرئيس - مثل اى جماعة من الجماعات الاخرى .. ؟

الشاهد - نعم ..

الرئيس - وايه حقوقها على الدولة ..

الشاهد - مكتوبة فى القانون ..

الرئيس - باعتبارك عضو فى الجماعة من سنة ١٩٤٨ وسنة

١٩٥٥ دخلت النظام السرى متعرفش القوانين اللى تعطى الجماعة

دى حقوق وماهى بالنسبة للدولة .. ؟

الشاهد - ان تزاول نشاطها حسب القانون العام للدولة ..

الرئيس - القانون العام للدولة يسمح لها ان تقف ضد

الحكومة وتعمل اشكال مع الحكومة .. هل قانون الدولة يسمح

بهذه الجمعيات ؟

الشاهد - لا ..

الرئيس - هل تسمح لجمعية وتعطيها حقوق لتعمل جهاز

سرى ؟

الشاهد - لا ...

الرئيس - هل تسمح للجمعيات ان تحمل اسلحة وتخزنها فى

اماكن سرية ؟

الشاهد - لا ..

وكيل النيابة - هل يمكن لفصائل الجهاز السرى ان تقوم باى

عمل ايجابى من غير ان يكون هناك امر من قياداتها التى تنتهى انى

المرشد ؟

الشاهد - لا ..

وكيل النيابة - واذا قامت بعمل ايجابى .. فهل معناه ان  
امرا صدر من القيادة العليا .. وتسلسل حتى وصل اليها ؟  
الشاهد - هذا مفروض ..

وكيل النيابة - وهل يمكن ان تقوم من تلقاء نفسها بعمل  
ايجابى ؟

الشاهد - يجوز ..

الرئيس - مخالفة للاوامر ؟ ..

الشاهد - نعم ..

الرئيس - ايه ضمان مخالفة الاوامر ؟ والضمان اللى يأتى من  
الرؤساء ؟

الشاهد - لا اعرف ...

الرئيس - دخلت الجماعة وسلمت نفسك للجهاز السرى ..  
وقيادة تطيع اوامرها فيما يصدر لك من اوامر .. ولا تعرف  
هذه الاوامر آتية من القيادة ام لا ... ما الضمان الذى اخذته  
فى هذا ؟

الشاهد - الناس المسئولين عنها اثق فيهم .. وكمان الاوامر  
اللى تاتى الواحد وتكون غير مطابقة للاسلام الواحد لا يطمئن عليهم  
الا بعد ما يتحقق منها ويفكر فيها ..

الرئيس - هل يمكن الخروج من الجهاز السرى بخلافك فى  
الاراء مع اوامر صادرة اليك .. ؟

الشاهد - ممكن وانا دخلت على هذا الاساس ..

الرئيس - ومع من كان الاساس ده ؟

الشاهد - مع محمود الحواتكى وهو نفسه كان على هذا ..

الرئيس - وهو اخذ العهد على مين .. مقالكش ؟ ..

الشاهد - لا ..

الرئيس - افرض محمود الحواتكى اعطاك الضمان ان تخرج

في أي وقت .. ولما جيت تخرج ماقدرتش ..

الشاهد - ماقدرش ازاي ... ممكن الخروج في أي وقت ..  
الرئيس - محمود الحواتكي قرر غير كده ... تحب تسمع  
قال إيه ؟

الشاهد - أيوه ...

الرئيس - قال ان كل شخص يدخل النظام السري شخصيته  
تدوب في النظام السري ولا يمكن أن يخرج بدون أن يتعرض  
للضرر ويعاقب .. وهذا العقاب يصل الى حد القتل .. وضرب  
مثلا على ذلك بالسيد فايز ...

الشاهد - معرفش الحكاية دي ... دخلت على أساس أن  
في أي وقت أو أي أمر أو شيء غير مطابق للاسلام أخرج ...  
الرئيس - كيف تطبقه على الاسلام ؟

الشاهد - ....

الرئيس - حافظ القرآن ؟

الشاهد - نعم ...

الرئيس - كيف تطبقه ؟

الشاهد - بقدر علمي ..

الرئيس - واذا كان فيه مسألة متعرفهاش ؟

الشاهد - أسأل اللي يعلمها ..

الرئيس - محمود الحواتكي مثلا ؟

الشاهد - لا .. يوجد علماء للاسلام ...

الرئيس - زى مين ؟

الشاهد - عندنا في الاخوان فيه علماء ... مقدرش أحدد

بالذات ولم أفكر في أي واحد منهم ..

الرئيس - يعني مهندس معماري ومش عارف توضع تصميم  
لحياتك ...

**الشاهد** — على كل حال هي زي ماتقول ... طيش شباب .  
**الرئيس** — اذا كان طيش الشباب ينتهى الى هذا . حتكون  
مصيبة فى العالم ..

**الشاهد** — الواحد منا الحاجات السرية تجذبه .. ويجب  
الحاجات اللى فى السر .. وأنا فعلا بدأت أفكر أسيبهم وكنت  
مسافر فعلا يوم الاربع وأعتقلت يوم الثلاثاء ..

**الرئيس** — كنت مسافر فين ؟

**الشاهد** — الحجاز ...

**الرئيس** — علشان تكمل بقية الشغلة ... ؟ ( ضحك )

**الشاهد** — لا ... أنا رايع اشتغل ...

**الرئيس** — هل تعرف محمود عبد اللطيف ؟

**الشاهد** — لا ....

**الدفاع** — ما هي التصرفات التي كان يرتكبها النظام الحالى  
ولم تكن اسلامية صحيحة من وجهة نظرك كما قررت .. ؟  
**الشاهد** — الاغتيالات ...

**الدفاع** — رايك الشخصى ان الاغتيالات لا تتصل بالاسلام  
بصلة ...

**الشاهد** — نعم ..

**الدفاع** — ما هي الاغتيالات التي أخذتها على النظام السرى ؟

**الشاهد** — قتل الخازندار وقتل النقراشى ..

**الدفاع** — ما هي مظاهر هجوم الحكومة على الاخوان ..

**الشاهد** — كانت جريدة الاخوان اتقفلت ...

**الدفاع** — الحكومة قفلت جريدة الاخوان ؟

**الرئيس** — الحكومة قفلتها ولا هي فلست ؟

**الشاهد** — لا اعرف ..

الرئيس - ازای تقول ان الحكومة كانت تهاجم الاخوان ومش  
هاتف ازای ..

الشاهد - هي كانت ماشية وبعدين وقفت ..

الرئيس - لما الواحد يفلس .. يفلس قبل ما يشتغل ولا بعد  
ما يشتغل ؟

الشاهد - يجوز انا غلطان ..

الرئيس - مين فهمك كدة ؟

الشاهد - الاخوان ..

الرئيس - مين فيهم ؟

الشاهد - مش متذكر بالضبط .. ولكن اللي سمعته كده ..

الرئيس - يعنى الكلام اللي يدور بينكم حاجه ثابتة لاتحتاج  
الى جدل ولا نقاش ..

الشاهد - لا .... ازای ...

الرئيس - الجزء الثانى من المصحف .. الكلام اللي يدور بينكم  
زى مصحف ثانى ....

الشاهد - لا ...

الرئيس - هي دى عقلية تناقش الموضوع اذا كان اسلامى ام  
غير اسلامى

الدفاع - هل هجوم الحكومة على الاخوان فى نظرك هو غلق  
الجريدة ؟

الشاهد - فيه اشياء اخرى ...

الدفاع - ما هي الاشياء الاخرى ؟ تسمح لى المحكمة اقدم له  
نصيحة ؟ الآن انت هنا فى حماية المحكمة ... فلا تخاف من اى  
شئ .. ثم ثانيا صراحتك قد تنجيك .. فتكلم كرجل .. ماهى  
الاشياء الاخرى ... ماهى الوان هجوم الحكومة على الاخوان ؟

**الشاهد -** الصحف الاخرى حملت على الاخوان واتهمتهم بأنهم ضد الثورة

**الدفاع -** وهل الحكومة هي التي تتولى تحرير هذه الصحف؟

**الشاهد -** وكمان سمعت ان مرة في الجامع حسن دوح كان بيخطب .. والعساكر اخذوا حسن دوح واعتقلوه ..

**الرئيس -** ايه السبب .. ؟

**الشاهد -** ما عرفش السبب ..

**الرئيس -** انت انضميت للاخوان المسلمين بناء على فكرة ومبدأ .. أم وراء شخص هو حسن دوح .. ؟

**الشاهد -** على مبدأ ..

**الرئيس -** حسن دوح ينضرب ولا ما ينضربش .. لايهم الا اذا عرفت السبب اللي كان يستحقه على الضرب .. هل حققت هذه المسألة اسلاميا ؟

**الشاهد -** لا ..

**الرئيس -** وتصدر حكمك على انه هجوم من الحكومة لان العساكر ضربوا حسن دوح لانه كان بيخطب .. ولا تسأل هل خرج عن حدود القانون .. كان بيشتتم مثلا .. لم تسأل عن هذا وأصدرت حكمك ان الحكومة تهاجم الاخوان ..

**الدفاع -** هل توجد ألوان أخرى من الهجوم ؟

**الشاهد -** لا ..

**الدفاع -** هل من حق الدول في نظرك ان الحكومة تغلق جريدة اذا خالفت النظام أم لا .. ؟

**الشاهد -** يجوز لها هذا ..

**الدفاع -** وهل من حقها أيضا اذا تعرض انسان للنظام والأمن ان تعتقله أم لا ؟

**الشاهد -** نعم ..



**الدفاع** — ماذا يفضبك مادام الحكومة تصرفت في حدود  
حقها ؟ ما الذى يفضبك في هذه التصرفات ؟

**الشاهد** — . . .

**الدفاع** — من هم الذين اتصلت بهم وسألتهم عن الحل عندما  
استفحل الخلاف في نظرك بين الحكومة والاخوان .

**الشاهد** — كنت أسأل كل واحد . .

**الدفاع** — سمى شوية منهم . . لازم يكونوا أكبر منك مرتبة  
في الإخوان

**الشاهد** — محمود الحواتكى مثلا . . واسماعيل محمود . .

**الدفاع** — حد غير اللى اسمه هنا ؟

**الشاهد** — مفيش حد . .

**الدفاع** — لم تسأل أحد . . من توسط لك للعمل لدى الشركة  
التي التحقت بها عقب تخرجك . . ؟

**الشاهد** — لا أحد . .

**الدفاع** — ما اسمها ؟

**الشاهد** — شركة تعمير المساكن الشعبية . .

**الدفاع** — أعضاء اللجنة المشرفة على النظام . . واللى تقول ان

العمل تم بدون علمك . . مين هم . . ؟

**الشاهد** — لا عرفهم . .

**الدفاع** — ولكن تعرف تدافع عنهم . . وتقول تم دون علمي !!

**الشاهد** — لأدافع . .

**الدفاع** — تقول ان الغرض الظاهر من التدريب العسكرى

الخاص هو خدمة الاسلام . . . فما هو الغرض الحقيقى مش  
الظاهر . . ؟

**الشاهد** — انا قلت الغرض الحقيقى خدمة الاسلام . .

**الدفاع** — انت قلت الظاهر . .

**الشاهد -** وهو الباطن برضه ..

**الدفاع -** عمل قسم الاخبار عندكم هو ايه ؟

**الشاهد -** انا ماشتغلتش فيه .. ولكن اللى أعرفه انه كان يجمع الاخبار المهمة اللى تهتم الجماعة .. وبرضه يشوف مثلا اى حاجة .. افرض فيه خلية شيوعية .. او واحد جاسوس ضد مصلحة البلد ..

**الدفاع -** الاخوان كانوا بيحاربوا الشيوعية .. ؟

**الشاهد -** طبعا لانها ضد مصلحة البلد ..

**الدفاع -** ما مظاهر هذا النشاط ؟ .. وكم خلية ضبطت من خلايا الشيوعيين ؟

**الشاهد -** لا أعرف .. أعرف ان الاخوان ضبطوا خلايا مش دلوقت .. من مدة ..

**الدفاع -** هل كنتم تتجسسون على النشاط الصهيونى فى مصر ؟

**الشاهد -** لا أعلم ..

**الدفاع -** اذن .. قل لى نشاط قسم الاخبار ايه .. ؟

**الشاهد -** لا أعرف عنه شىء .. اللى أعرفه قلته ..

**الدفاع -** وفرقتك اليس فيها قسم اخبار .. ؟

**الشاهد -** لا ..

**الدفاع -** ماهى أسباب وجود النظام السرى قبل طرد الملك مش بعده ؟

**الشاهد -** نفس الاسباب ... الغرض هو .. هو ..

**الدفاع -** أغراضكم قبل طرد الملك هى أغراضكم بعد طرده ..

**الشاهد -** قصدى خدمة الاسلام والبلد فى الوقت نفسه ..

وبعد كده مقدرش أقدر اللى يحصل .. حسب الظروف والاحوال

.. يصح تكون هناك حاجة له .. ويصح لا يكون له اى نشاط ..

حسب الظروف والاحوال الموجودة .. ولكن فى الوقت نفسه انا  
اللى اعرفه أن الناس دول ميعملوش حاجه ضد مصلحة البلد ..  
يعنى لايمكن مثلاً فى يوم من الايام يقوموا بثورة ويقتلوا المصريين ..  
الرئيس - ليه ماسمعتش من محمود حواتكى الخطط اللى  
كانت موضوعة ؟

الشاهد - لا ..

الرئيس - ولا بعد حادث الاعتداء ..

الشاهد - لا ..

الرئيس - خالص .. ؟

الشاهد - خالص ..

الدفاع - ماهى مناسبة تولى محمود اسماعيل رئاسة الفصيلة  
بدلاً من محمود الحواتكى ؟  
الشاهد - لا أعرف ..

الدفاع - سؤال آخر .. هل تدين كمواطن حتى اليوم  
للدولة بالولاء ؟

الشاهد - نعم ..

الدفاع - وهل من مقتضيات هذا الولاء .. الثقة ؟

الشاهد - طبعاً ..

الدفاع - واذا تعارضت ثقتك بالدولة مع ثقتك بالجماعة  
فأيهما أولى بالولاء ؟

الشاهد - الدولة طبعاً .. بس فيه حاجات خاصة بى .. لى  
أن اتصرف فيها وأفكر فيها لوحدى .. وفيه حاجات ما أقدرش  
اتصرف فيها مادام الدولة أرادت كده خلاص ... ولكن الحرية  
الشخصية لى ان اختار حسب تفكيرى ..

الرئيس - الادعاء يريدك شىء ؟

وكيل النائب العام - لا .....

الرئيس — اتفضل مع السلامة ... ( مين بعده .. )  
وكيل النائب العام — عبد العزيز أحمد حسن ..  
( نودى على الشاهد عبد العزيز أحمد حسن )  
الرئيس — اسمك ايه ؟  
وكيل النائب العام — عبد العزيز أحمد حسن ..  
الرئيس — بتشتغل ايه .. ؟  
الشاهد — موظف بالمركز العام للاخوان المسلمين ..  
الرئيس — بتشتغل ايه يعنى ..  
الشاهد — كاتب ..  
الرئيس — ايه مؤهلاتك .. ؟  
الشاهد — دبلوم الاقسام الصناعية والسيارات ..  
الرئيس — متخصص فى السيارات ؟  
الشاهد — أبوه ..  
الرئيس — اللي متخصص فى السيارات يشتغل كاتب فى  
المركز العام ؟  
الشاهد — انا أخذت الدبلوم من سنة ١٩٣٨ ..  
الرئيس — سنك كام سنة .. ؟  
الشاهد — ٣٦ سنة ..  
الرئيس — قول والله العظيم اقول الحق والله على ما أقول  
شهاد .

( حلف الشاهد اليمين )

وكيل النائب العام — منذ متى وابتعضو فى جماعة الاخوان  
الرئيس — اسمع السؤال ووجه الاجابة الى .  
الشاهد — حاضر التحقت بجماعة الاخوان المسلمين سنة

١٩٣٢

وكيل النائب العام — فى اية منطقة باشرت نشاطك ؟

**الشاهد -** في منطقة الفسطاط .

**وكيل النائب العام -** هل كانت لك وظيفة محددة ؟

**الشاهد -** في أوائل هذه السنة كلفت ان اكون رئيس منطقة الفسطاط .

**الرئيس -** ما هي منطقة الفسطاط ؟

**الشاهد -** منطقة الفسطاط تشمل شعب حلوان وطره والمعادي ومصر القديمة وجزيرة الروضة .

**المدعى -** ما مدى نشاطك ، أنت الآن قلت أنك عينت رئيس منطقة ، فمن الذي عينك رئيس منطقة ؟

**الشاهد -** كلفني الاستاذ محمود عبده رئيس مكتب ادارى القاهرة .

**المدعى -** محمود عبده هو الذي كلفك ان تكون رئيس منطقة ، فمن هو محمود عبده وما هي وظيفته ؟

**الشاهد -** محمود عبده يعمل رئيس مكتب الشكاوى بوزارة المعارف .

**المدعى -** هل لك نشاط في النظام الخاص او النظام السرى الذى انشئ في منتصف هذا العام تقريبا ؟

**الشاهد -** لما كلفت برياسة منطقة الفسطاط علمت ان هناك فصيلتين عندي في المنطقة ، فصيلة برياسة على صديق واخرى برياسة فتحى البوز وان هذه الفصائل هي التى تعتبر هذا النظام وقد تكونت اساسا للقتال في القنال .

**المدعى -** قول كل معلوماتك للمحكمة ؟

**الشاهد -** هذه الفصائل كل فصيلة منها تتكون من ٣٠ عضو منهم قائد الفصيلة واربع اشخاص رؤساء مجموعات وفي كل مجموعة سبعة افراد تقريبا .

**الرئيس -** كل كلامك تحط فيه تقريبا وحوالى فهل هذه

الكلمات لازمة عند الاخوان ؟

الشاهد - ساعات العدد مايكملش .

الرئيس - عشان ماتتكملى قوى وتبقى مزقلطة يعنى تنفع ان

يكون عدد الجماعة ٥٧

الشاهد - لاعدد الجماعة ٧

الرئيس - والفصيلة

الشاهد - ٣٠

الرئيس - ماتبقاش تقريبا ؟

الشاهد - اذا ماكملتش يبقى العدد اقل .

الرئيس - واذا كملت ؟

الشاهد - يبقى العدد ٣٠

المدعى - كمل كلامك .

الشاهد - وتسليح هذه الفصائل ؟ بنادق ومدفعين ستن

وبرن وكل واحد قبلتين .

الرئيس - يعنى كل واحد فى السبعة ، اربعة منهم معاهم

بنادق واثنين منهم معاهم ستن والسابع معاه برن وكل واحد

معاه قبلتين ؟

الشاهد - ايوه .

المدعى - كمل ، كيف كانت الفصائل تسليح ؟

الشاهد - قائد الفصيلة يجيله السلاح مباشرة دون علمي ؟

وانا مكنتش أعرف الاسلحة دي بتيجي ازاى .

الرئيس - انت مش كنت قائد عليهم ؟

الشاهد - أنا كان عملى ادارى .

الرئيس - الفصائل دي تنظيم سرى او علمي ؟

الشاهد - تنظيم سرى .

الرئيس - مش المفروض ان الذى يراس التنظيم السرى ان

يكون مطلعاً على أمره أو أن يكون واحداً لا يعلم من أمره شيئاً ؟  
الشاهد - أنا ككاتب في المركز العام ماكانش عندي وقت وده  
مش اختصاصي .

الرئيس - يعني كنت مسلم دقنك، ومين حطك رئيس منطقة؟  
الشاهد - الاستاذ محمود عبده .

الرئيس - قول هل كان عندك فصيلتين أو لا ؟  
الشاهد - الاستاذ ابراهيم الطيب اتصل بي وقال لي انت  
مندك فصيلتين ودول النظام اللي عندك وحتشتغل في المنطقة .  
الرئيس - ابراهيم الطيب ومحمود عبده سلموك القسم العام  
وابراهيم الطيب كلمك على القسم الخاص ، ولما عينك على القسم  
الخاص كان يثق فيك والا مكنش يثق فيك ؟  
الشاهد - لا طبعاً يثق في

الرئيس - طيب لما واحد يثق فيك ويعينك رئيس منطقة مش  
كان لازم تعرف ايه هو النظام ؟  
الشاهد - أيوه .

الرئيس - انت جيت البوز وصديق المرءوسين لك ؟  
الشاهد - أيوه .

الرئيس - قلت لهم ايه ؟

الشاهد - هم عارفين عملهم ، لان واحد منهم كان في حرب  
فلسطين والآخر كان في القنال ، وهم متخصصين في الشغل ده  
لكن مشغلتهمش لاني كنت رئيس اداري .

الرئيس - مش انت مسئول لانك القائد .

الشاهد - أنا اعتبر نفسي مسئول اداري ، أدبر لهم المساعدات  
المالية يعني فلوس .

الرئيس - وكان على ايه النظام السري يطلع شخص على

فصيلتين سريتين بس عشان يمدهم بالمساعدات المالية ما كان  
ابراهيم الطيب يديهم الفلوس على طول ؟

الشاهد - هذا كان وضعى ، وأنا كنت رئيس منطقة بس .  
الرئيس - الاوامر التى كانت تصدر هل كنت تنفذها على  
طول ؟

الشاهد - كنت ابلغها لهم .

المدعى - ممن كانت تصدر الاوامر للفصائل ؟

الشاهد - من ابراهيم الطيب .

المدعى - وهل كان ابراهيم الطيب يتصرف من نفسه والا  
له رئيس ؟

الشاهد - اعتقد ... ..

المدعى - المحكمة مش عاوزة اعتقاد ، عاوزة الواقع ، هل  
ابراهيم الطيب له رئيس يتلقى منه الاوامر او لا ؟  
الشاهد - أيوه ، طبعا له رئيس .

المدعى - مين ؟

الشاهد - فيه ناس تانيين ، وضمنت فى اقوالى ان المسئول  
عن النظام يوسف طلعت .

الرئيس - مسئول عن النظام الخاص بتاع ايه ؟

الشاهد - المسئول عن النظام الخاص بتاع الاخوان يوسف  
طلعت وأنا عملت هذا بعد الحوادث الاولى او حوادث الفترة  
الاولى اللى حصلت لما كان ابراهيم السندى رئيس النظام ،  
وبعدين حصل خلاف بينه وبين الاستاذ حسن الهضيبي فكلف  
واحد تانى اسمه حلمى عبد المجيد ان يكون مسئول عن النظام  
ولما ما قدرش يمشى كلف يوسف طلعت .

الرئيس - مين اللى كلف يوسف طلعت او غيره ؟

الشاهد - الاستاذ المرشد حسن الهضيبي .



**الرئيس —** كان الهضيبي بيكلف الشخص الى يمك ادارة النظام الخاص ؟  
**الشاهد —** أيوه .

**الرئيس —** أنت في جماعة الاخوان من سنة ١٩٣٢ وافتكر انك انت تكون متأكد من الكلام الذي تتكلمه وخصوصا انك تعمل في المركز العام .  
**الشاهد —** أيوه .

**الرئيس —** ومحل ثقة كبيرة من النظام الخاص لانك رئيس فصيلتين .  
**الشاهد —** أيوه .

**الرئيس —** المرشد هو الذي يعين الرجل الذي يمك النظام الخاص ؟  
**الشاهد —** أيوه .

**الرئيس —** ما هي وظيفة او شغل ابراهيم الطيب في النظام الخاص ؟  
**الشاهد —** مسئول عن منطقة القاهرة .

**الرئيس —** يعنى ايه ؟  
**الشاهد —** مسئول عن النظام الخاص في القاهرة .  
**الرئيس —** النظام الخاص في القاهرة يتكون من ايه ؟  
**الشاهد —** مسئول عن النظام الموجود في القاهرة .  
**الرئيس —** كام منطقة في القاهرة ؟

**الشاهد —** عشرة . القاهرة قسمت الى عشرة مناطق .  
والتقسيم بتاعها اعرفه وهي منطقة شرق القاهرة والمرج ومنطقة شمال القاهرة وشبرا وقلوب ووسط القاهرة اى قلب القاهرة الى هي الازبكية والموسكى والازهر وبعدين جنوب القاهرة الى

هى السيدة زينب والفسطاط والجيزة وامبابه وبين السرايات .  
الرئيس - مين رؤساء هذه المناطق ؟

الشاهد - رؤساء المناطق دى، انا مسئول عن منطقة الفسطاط  
وكمال السنائيرى عن جنوب القاهرة ومحمد شديد عن شمال  
القاهرة ومحمود يونس عن شرق القاهرة ، ومحمود يونس برضه  
عن المرج وهنداوى دوير عن امبابه وفريد عوض عن وسط  
القاهرة وحسين شعبان عن بين السرايات ويوسف هارون عن  
الجيزة .

الرئيس - ودول كانوا برياسة ابراهيم الطيب وفوقه ؟

الشاهد - اعرف يوسف طلعت .

الرئيس - يبقى رئيس للقاهرة وغير القاهرة ؟

الشاهد - ايوه .

الرئيس - ماهو التنظيم فى غير القاهرة ماتعرفش، ماقال لكش  
ابراهيم الطيب او يوسف طلعت ؟

الشاهد - لا اعرف ، وانا مليش صلة بيوسف طلعت وهو كان  
بييجى فى المركز العام بس

الرئيس - جنرال مايقول لكش ؟

المدعى - مفيش تنظيم خارج القاهرة يعنى فى الاقاليم ؟

الشاهد - بعد التغيير الذى حصل فى النظام علمت انه فيه  
ناس عينوا مع يوسف طلعت ويكونوا مسئولين عن الاقاليم زى  
مصطفى مشهور واحمد حسنين .

الرئيس - واسكندرية ؟

الشاهد - معرفش .

الرئيس - والقنال ؟

الشاهد - معرفش انما يوسف طلعت نفسه من القنال .

الرئيس - مسئول عن الكل ، يعنى رئيس النظام كله ؟

المدعى — مكنش ليوسف طلعت معاوتين له في ادارة هذا النظام؟

الشاهد — أنا سئلت عن هذا .

الرئيس — قول تانى — والاسر — قول الاجابة اللى ترضاها .

الشاهد — تأكيد لا أعلم ولكن استنباطا أعلم .

الرئيس — استنباطا يعلم .

الشاهد — من الجائز ان يكون محمود عبده باعتباره رئيس

مكتب ادارى القاهرة .

الرئيس — ومين ؟

الشاهد — وعبد المنعم عبد الرؤوف باعتباره ضابط من

الاخوان وكان هرب .

المدعى — هرب منين ؟

الشاهد — هرب من القضية التى كان يحاكم عليها .

الرئيس — هل تعرف عبد المنعم عبد الرؤوف ؟

الشاهد — لا . . . . . والشيخ محمد فرغلى لانه زميل يوسف

طلعت في الاسماعيلية وكان من ضمن الاخوان اللى كانوا في فلسطين

كان قائد الاخوان في فلسطين والاستاذ صلاح شادى باعتباره كان

مسئول عن وحدات البوليس والجيش في يوم من الايام .

الرئيس — ايه التنظيمات الموجودة في الجيش والبوليس ؟

الشاهد — ما عرفش .

الرئيس — انت مش تعرف ان فيه وحدات في الجيش

والبوليس ؟

الشاهد — اعرف ان فيه بعض الاخوان كانوا في البوليس

وكانوا يحضروا الى المركز العام .

الرئيس — هل عمل في الجيش والبوليس تنظيمات سرية زى

المدنيين ؟

الشاهد — والله لا أعلم .

**الرئيس -** لو مكنش يحصل تنظيم سرى فى العسكريين مش كانت تبقى غريبه ان يكون فيه تنظيم سرى للمدنيين وما يقاش فيه فى العسكريين ؟

**الشاهد -** معرفش .

**الرئيس -** اذا كان المدنيين بيعملوهم عسكريين ، فيبقى العسكريين مايعملوش تنظيم سرى ؟

**الشاهد -** انا اقسمت ان اقول الحق .

**الرئيس -** كلكم شطار فى القسم .

**المدعى -** محمود عبده رئيس مكتب ادارى القاهرة مش هو اللى عينك رئيسا لمنطقة الفسطاط .

**الشاهد -** ايوه .

**المدعى -** وهو اللى جعل لك الاشراف على الفصيلتين ؟

**الشاهد -** هو كلفنى للاشراف على المنطقة .

**المدعى -** يعنى ما كانش فيه الفصيلتين دول . ؟

**الشاهد -** علمت بعد ذلك ان المسئول عن الفصائل ابراهيم

الطيب ويوسف طلعت

**المدعى -** هل كنت تتعاون مع رؤسائهم ؟

**الشاهد -** ايوه .

**المدعى -** يبقى محمود عبده ما يعرفش هذا النظام، والا هو كان على علم بهاتين الفصيلتين بتوع الجهاز السرى او لا ! انت فى التحقيق قلتها فليه تحور فى الالفاظ ؟

**الشاهد -** لا يا افندم - لابد انه يعلم .

**المدعى -** مين كان يجيب السلاح للفصائل فى منطقتك ؟

**الشاهد -** شفت مرة سيد الرئيس يتصل بعلى صديق

ويتحدث معه فى الاسلحة

**المدعى -** سيد الرئيس ماجابش اسلحة لعلى صديق

- الشاهد** - لم أشاهد شيئاً .
- المدعى** - من أين كان سيد الرئيس يجيب الاسلحة التى كانت توزع على الفصائل ؟
- الشاهد** - أنا ماشفتش حاجة انما اللى شفته ان على صديق كان بيكلم سيد الرئيس فى الاسلحة ولكنى لم أشاهد سلاحاً .
- الرئيس** - ايه كلامهم ؟
- الشاهد** - بيتكلموا فى السلاح ونجيبه ازاي .
- الرئيس** - طيب ماتقول لنا .
- الشاهد** - هذا ماسمعه .
- الرئيس** - قالوا ايه ، مدخلتش فى الحديث ليه ده مش حديث شيق ، والا كان الحديث سرى ، مش كان أحد المتكلمين مرعوس لك .
- الشاهد** - أنا كنت تارك الموضوع لعل صديق ، وأنا فى هذا اليوم كنت خارج ولم انتظر .
- الرئيس** - تارك له الموضوع للثقة المتبادلة .
- المدعى** - قلت ان المقصود من هذا الجهاز السرى هو الجهاد .
- الشاهد** - ايوه .
- المدعى** - فكيف أو بماذا تعلق جلب السلاح الى بطن القاهرة وتخزينه فيها لحساب هذه الفرق المنتشرة فيها ؟
- الشاهد** - أساساً والذى أعلمه ان هذا النظام متكون للجهاد فى فلسطين وفى القنال وبعد هذا حصل ان هذه الفصائل بقت سرية وتجيب الاسلحة فى القاهرة .
- المدعى** - ليه مادام حيكون الجهاد فى الخارج ، فليه تخزنوا الاسلحة فى مصر ان صح قولك . ؟
- الشاهد** - كل كلامى بعد كده حيكون استنتاج ، مفيش حاجة بالذات معينة كنت أعلمها عن هذا .

**الرئيس —** أنت أحد جنرالات الجهاز السرى وترأس منطقتين كل واحد رئيس منطقة وانت اثنين ولا تعرف .

**الشاهد —** والله لا أعرف ، ولم يعمل شيء أمامى ولا أعرف تفاصيل .

**المدعى —** اشرح للمحكمة فى هدوء وترتيب موضوع الاتفاق على قلب نظام الحكم .  
**الشاهد —** والله ...

**المدعى —** لقد فصلته فى التحقيق وفى أقوالك وتقريرك وكلها أمامى وهو بخطك .

**الشاهد —** كان حضرة الضابط نصير سألنى بعض حاجات عن الخطة التى اتفق عليها فأنا قلت له أنا لأعلم خطه .

**الرئيس —** مش عاوز تقول لى فلان سالك ، قول لى هنا الإجابة على السؤال ، ومش عاوز أقول لك بامية تقول لى فاصوليا ، لاتخرج عن الموضوع ، بامية يعنى بامية اتكلم معايا فى البامية الطبخ الوسخ بتاعكم ، ايه الخطة التى كنت تتكلم عنها ؟  
**الشاهد —** أنا قلت ...

**الرئيس —** قول لى ايه الخطة . الكلام ده مش بتاعك ساقراهك ؟ انت عنتيل من عناتيل النظام السرى القديم ، هل تذكر أنك كنت بتروح لحسن البنا لمشتري أسلحة أدام أنور السادات وكنت بتشتغل زمان فى الجيش وكنت بتسلم أسلحة لحساب حسن البنا أمام أنور السادات ؟

**المدعى —** احنا بدأناه بأول سؤال حول الاقرار الذى كتبه على نفسه وسجل فيه الاجتماع الذى دبرت فيه الخطة وقال اسماء رؤساء المناطق ، فاذا سمحت المحكمة تقرأ هذا الاقرار .

**الرئيس —** اقرأ التقرير .

**المدعى —** يتلو من ورقة فى يده ( اقرار ) انعقد اجتماع فى أواخر

مستجير للمكتب الإدارى فى منزل صلاح وهو قريب الاستاذ رئيس المنطقة محمد شديد رئيس منطقة شمال القاهرة ، وهذا المنزل كائن بغمرة فى الدور الخامس شقة رقم ١٢ بالعمارة المعلق عليها اعلان هوليوود ، وهى أعلا عمارة هناك وحضره بعض رؤساء المناطق وهم الاستاذ ابراهيم الطيب رئيس مناطق القاهرة ومحمد شديد رئيس منطقة شمال القاهرة والاستاذ حسين شعبان رئيس منطقة بين السرايات والاستاذ فريد عوض رئيس منطقة وسط القاهرة والاستاذ كمال السنائيرى رئيس منطقة جنوب القاهرة والاستاذ عبد العزيز أحمد رئيس منطقة القسطنطينية والاستاذ محمود عبده رئيس مكتب ادارى القاهرة ، والاستاذ محمود يونس رئيس منطقة شرق القاهرة وتناول حديثنا موضوع العمل على تأخير الاتفاقية والحيولة دون توقيعها وكان من رأى الاستاذ محمد شديد المسارعة الى عمل ايجابى ، وتناقشنا جميعا فى هذا الرأى وكان من رأى الاغلبية أن على المجموعات أن تتخذ أحد موقفين .

اولا - اجراء محاولات سريعة للتفاهم مع الحكومة لتهيئة الجو والاتاحة للاخوان بأن يبدوا رأيهم فى عدم صلاحية الاتفاقية فى عدة نقاط .

ثانيا - القيام بعمل ايجابى وذلك باتخاذ كافة الاجراءات التى يقرها المسئولون فى جماعة الاخوان للعمل على ايقاف التوقيع على الاتفاقية حسبما يتراءى لهم اتخاذ من الاجراءات . واى اجراء لا يتم الا بموافقة المرشد او من ينوب عنه .

وقد اخرج هذا النقاش الاستاذ ابراهيم الطيب الذى انهى الاجتماع واعد بالحدز والتريث حتى يبحث فى الامر ويأتى فيه بنتيجة فى اجتماع قريب وفعلا عقد بنفس المنزل بعد الاجتماع

الاول بيومين وحضره نفس الاشخاص وقد وضع الاستاذ ابراهيم الطيب انه اتصل بالمسئولين وان المعروف منهم الاستاذ المرشد والشيخ فرغلى والاستاذ يوسف طلعت وقد حضر هذا الاخير هذا الاجتماع وشرح الموقف وابلغنا بأن الاخوان سائرين فى خطة المقاومة وان المسئولين منهم يتابعون دراسة الموقف بحسب ما اثر فى الاجتماع الاول ، واذا استقر الامر على عدم وجود تفاهم مع الحكومة فلا بد من المقاومة .

وانفض الاجتماع

( ملحوظة ) الجارى عليه العمل فى الجهاز السرى انه لا يتخذ اى اجراء فردى خارج عن الجماعة ، وأن اى اجراء لا يتخذ الا بموافقة المرشد او من ينوب عنه

ثم التاريخ وكان اول نوفمبر سنة ١٩٥٤

( ثم تابع المدعى كلامه ) وكان اول سؤال سألته له هو هل هذا الاقرار مكتوب بخطك فقال ايوه بخطى وأصر على ما فيه من معلومات وهى اجابة قاطعة مانعة ، ولما ناقشته فى موضوع الاتفاق على قلب نظام الحكم قال ان هناك خلاف بين الحكومة الحاضرة والاخوان .

الرئيس - هل هذا خطك ، وهل هذه امضاؤك التى على التقرير ؟

الشاهد - ايوه .

المدعى - هذا اجتماع الجهاز السرى باقرار منه ، وقد سألته عن موضوع الاتفاق على قلب نظام الحكم فى مصر والقيام بحركة اغتيالات فردية او جماعية ومسألة التخريب والتدمير واحداث الاضطراب فى جميع أنحاء البلاد فاقرا ايضا بأن هناك خلافا بين الحكومة الحاضرة والاخوان ....

الرئيس - تقدر تكمل لنا الباقي ؟



**الشاهد -** مشى فاكروا أنا ذاكرتى ضعيفة جدا .  
**الرئيس -** اذا كنت مسلم أو مؤمن كنت تموت كمسدا على  
قلة الايمان وقلة الاسلام . الى انت معتنقه .. يعنى كان حقا  
تموت بالسكتة القلبية احسن حاجة .. ده اسلام .. القرار  
ده كلام بتاع اسلام

**وكيل النائب العام -** وبعدين قال « هناك خلاف واضح بين  
الحكومة .. بين حكومة الثورة والاخوان بشأن نظام الحكم فى  
البلاد ، لان الاخوان يريدون تطبيق احكام القرآن بحيث يكون  
هناك اثر ظاهر ملموس . ويبدو ان الاخوان لم يلمسوا اطلاقا  
اى اثر لذلك ، مما جعلهم يعتقدون ان الوسيلة تكون باجراء  
حركة انقلاب فى جميع أنحاء البلاد تهدف الى تولى الحكومة  
الحاضرة ، واحلال محلها حكومة أخرى من الاخوان ، متخذين  
فى ذلك طريق العنف .. وهذا العنف يشمل اغتيالات ومظاهرات  
مسلحة .. (س) فسر عبارة « اغتيالات ومظاهرات مسلحة » ..

**الرئيس -** ( موجهها كلامه للشاهد ) - الكلام ده مضبوط  
**الشاهد -** الكلام ده كنت بأقوله وحضرة المحقق يسألنى ..  
**الرئيس -** وانت دايروا فى أجواء السماء زى بتهوفن .. بتطلع  
نفحة وقصة لطيفة قصة الادب المصرى .. بتضارب جملة  
الادب بتوع الغرب ..

**وكيل النائب العام -** فسر عبارة « اغتيالات ومظاهرات  
مسلحة » .. (ج) كان المفهوم اغتيال الرئيس جمال عبد الناصر  
والمظاهرات المسلحة كانت لتولى السلطة بالقوة .. ( س ) اذن  
هناك رابطة قوية بين التنظيمات السرية وتسليحها وبين محاولة  
اغتيال الرئيس جمال عبد الناصر

.. ( ج ) منطقيا الرابطة موجودة ، وقد نبئت هذه الفكرة فى  
عهد معاصر لتوقيع الاتفاقية بالحروف الاولى .. ( س ) ومن

الذى سيقوم بتنفيذ هذه الفكرة .. ( ج ) الذى يقوم بتنفيذ  
هذه الفكرة هو جهاز التنظيم السرى السابق الاشارة اليه ..  
هذه هي أقواله وقد وقعها بعد أن تليت عليه ..

( ثم ناول السيد وكيل النائب العام ملف التحقيق الذى  
وردت فيه أقوال الشاهد الى السيد رئيس المحكمة فأخذ  
سيادته يقلب صفحات الملف صفحة صفحة ، ثم عرض الملف  
على الشاهد وقال له ) :

— دى امضتك

الشاهد — أيوه ..

الرئيس — ودى

الشاهد — أيوه ..

الرئيس — ودى

الشاهد — إيوه ..

الرئيس — الجهاز السرى يؤتمر بأمر مين ؟

الشاهد — رئيسه ..

الرئيس — رئيسه

الشاهد — أيوه ..

الرئيس — رئيسه مين ؟

الشاهد — يوسف طلعت ..

الرئيس — ومين رئيس يوسف طلعت ؟

الشاهد — المفروض ان الجهاز السرى لا بد أن يرأسه ...

الرئيس — ماتقولشى المفروض .. انت كأحد أعضاء الجهاز

السرى ده .. مين رئيسك الاعلى ؟

الشاهد — انا أعلم ان الاستاذ المرشد هو رئيس الإخوان

الاعلى ...

الرئيس — المسألة تأكيد او ظن ؟

- الشاهد - هذا ما أعلمه ..
- الرئيس - يعنى ممكن انه يكون فيه ضابط فى الجيش
- الشاهد - لا ..
- الرئيس - انت كنت فى الجيش ؟
- الشاهد - انا كنت ملكى فى الجيش ..
- الرئيس - كنت تعرف مين قائد الجيش ؟
- الشاهد - ايوه كنت اعرف ...
- الرئيس - باعتبارك مشترك فى الجيش بتاع الاخوان ...
- مش المفروض انك تكون عارف مين القائد بتاعه ؟
- الشاهد - معقول ..
- الرئيس - طيب قل لنا باه مين كان قائد الجيش بتاع الجهاز السرى ؟
- الشاهد - القائد هو المرشد .. ولما كان موجود حسن
- البناء رضى الله عنه كان كل شىء ما يتمش الا بأمره هو ..
- الرئيس - وبعد ما حسن البناء رضى الله عنه مشى ؟
- ( ضحك ) ..
- الشاهد - الى افهمه ان اى وضع ييجى بعد كده لازم يكون بالشكل ده ..
- الرئيس - ومين الى جه بعد حسن البناء رضى الله عنه ؟
- الشاهد - حسن الهضيبى ..
- الرئيس - حسن الهضيبى حل محل ..
- الشاهد - حسن البناء ..
- الرئيس - يعنى مسبك ..
- الشاهد - كل اختصاصاته ..
- الرئيس - ومن ضمنها ..

- الشاهد — مسئولية النظام السرى ..  
الرئيس — يعنى النظام السرى مش تابع لمكتب الارشاد ؟  
الشاهد — والله أنا ما اعرفشى ..  
الرئيس — أيام حسن البنا كان الوضع ايه .. كان تابع لمكتب الارشاد ؟  
الشاهد — ما أظنش ..  
الرئيس — كان تابع لحسن البنا على طول ؟  
الشاهد — اعتقد ..  
الرئيس — قل « آه او لا .. »  
الشاهد — أيوه ..  
الرئيس — اش عرفك انه كان تابع لحسن البنا .  
الشاهد — لان الأستاذ كان هو ..  
الرئيس — هو ايه ؟  
الشاهد — كلنا عارفين انه حسب فكرة الجهاد ..  
الرئيس — يعنى هو اللي بيعطى الأوامر ..  
الشاهد — هو اللي كان بيصرف عليه .. حسن الهضيبى جة واخذ كل اختصاصاته . وأنا كنت افهم كده وانما ما كنتش بأشوف منه حاجات عملية ...  
الرئيس — انت تعرف المراءوغ .. أهو انت .. عمال تلف وتدور وتلف وتدور زى الثعلب لغاية ما تدوخ ..  
الشاهد — والله أنا بأقول الحق ..  
الرئيس — من ناحية الحق ، والله انت ماتعرف الحق هو ايه وكيل النائب العام — اختفى المرشد فى وقت معاصر للاجتماعات التى اشترت اليها فى اقرارك فهل تعرف السبب فى اختفائه ؟  
الشاهد — كان قيل ان فيه حد يفكر فى اغتياله ، وبعدين

قيل ان اختفاء المرشد معناه اشارة أو ايدان بأن فيه حاجة بين الاخوان والحكومة وأن يعنى الاخوان .. عاوز اقول زى ايدان بيد حركه او حاجة زى كده ...

**وكيل النائب العام -** فهمت ايه .. انت لقيت كده .. ايه الى فهمتوه يا أعضاء جهاز سري من اختفاء المرشد في ذلك الوقت

**الشاهد -** فهمنا ان اختفاء المرشد كان اختفاء مخصوص ..  
**كان مختفى علشان خاطر بدء العمل ..**

**وكيل النائب العام -** بدء عمل يعنى ايه ..

**الشاهد -** يعنى يكون وراه حاجات تتعمل .. اوامر تيجي حاجات زى كده

**الرئيس -** كنت تعتقد انت ايه ؟

**الشاهد -** ان اختفاء المرشد ايدان بيد عمل ..

**الرئيس -** اشارة يعنى ..

**الشاهد -** كان فيه أقوال كثيرة بأن المرشد .. اغتياله أو حد عاوز يغتاله لما جه اختفى ، المعنى ده كان موجود .. والمعنى الثانى ان ده اختفاء مخصوص وحتى لما طالت المدة حصل الاجتماع الى انا كتبت عنه الاقرار .. يعنى طالت المدة ولم يحدث شئ ، ولما اجتمعنا قلنا لازم يظهر ..

**الرئيس -** آه .. اما أن يظهر وبيان وعليه الامان يا ديننا أوامر .. مش كده ؟

**وكيل النائب العام -** ماهو البدء بالعمل .. ماذا تقصد بكلمة البدء بالعمل ؟

**الشاهد -** المفهوم أو الحاجات الى تحت يدي انها مظاهرات ومنشورات .. وفعلا كانت بتنزل منشورات .. والمظاهرات الاخوان كانوا مستعدين انهم يعملوها .. أو أى حاجة ثانية ..

**الرئيس -** مظاهرات ومنشورات .. منشورات كانت فعلا بتنزل .. والاخوان مستعدين يعملوا أى حاجة تانية .. ايه الحاجة التانية اللى الاخوان مستعدين يعملوها ؟

**الشاهد -** ماكانش فيه حاجة محددة ..

**الرئيس -** ايه الحاجة اللى تتصورها ؟

**الشاهد -** الفصائل تؤمر بأعمال ، فتشتغل ..

**الرئيس -** تؤمر بأعمال جنسها ايه ؟

**الشاهد -** ....

**الرئيس -** أعمال زغزغة .. يعنى تنزل تزغزغ الناس بالاسلحة بتاعتها والقنابل اليدوية والاستنات والبرقات .. . تعمل ايه .. تاكل حلاوة بالنيشان .. ( ضحك ) .. ايه يعنى .. منظور الفصائل دى لما تيجى لها الاوامر تنزل تعمل ايه ؟

**الشاهد -** ماكنتش أعرف ..

**وكيل النائب العام -** هو أجب اجابة صريحة .. اذا سمحت المحكمة نتلوها .. هو له اجابة على هذا السؤال بالذات .. . انا كنت سألته .. اذا ثبت انه لم يكن هناك أمر بالقبض على المرشد ، فبماذا تعلل اختفاؤه ... ( ج ) فى بادىء الامر كان الاخوان يعتقدون فى صحة ما اشييع انه مطلوب القبض عليه . ولما طال اختفاؤه ، اعتقد الاخوان انه مختفى للبدء فى عمل ايجابى هو احداث انقلاب على الوجه الذى شرحته فى الاول .. . وقد عقت على هذا بسؤال آخر هو .. . ولما شرع فى قتل الرئيس جمال عبد الناصر ، ماذا كان الاعتقاد .. (ج) .. خطر فى بالنا انه من تدبير الجهاز السرى ، رغم ما أشاعه الاخوان من انه حادث مدبر ... أقواله صريحة فى النقطة دى ..

**الرئيس -** طيب .. ترفع الجلسة للاستراحة لمدة ربع ساعة ..

( وقبل أن يبرح الرئيس القاعة قال للشاهد « اقعد كده  
استريح وروق وفوق وماتجيليش داخ )  
( رفعت الجلسة في الساعة السابعة والدقيقة الخامسة  
والعشرين مساء )

( أعيدت الجلسة في الساعة الثامنة والدقيقة الخامسة  
والعشرين مساء )

**الرئيس -** أعيدت الجلسة ... الادعاء ..

**وكيل النائب العام -** فصل للمحكمة مدار في الاجتماع التي  
كتبت عنه التقرير الذي عرض عليك الليلة ...

**الشاهد -** تذكرت ما دار في هذا الاجتماع ... أولا هما  
اجتماعين .. تذكرت ان الاستاذ محمد شديد قال انه علم من  
بعض المسؤولين في الجماعة بأن اختفاء المرشد كان غلط ، وأن  
الاخوان غير مستعدين وانه مادام الامر كده يبقى هم يدبروا  
تهريب المرشد للخارج وتدير تراجع كريم للاخوان ... وده  
كمان من ضمن الكلام اللى ذكرته وبرضه مسألة تانية كانت  
اثرت في الاجتماع ، وهى مسألة الذى كان السبب في اختفاء  
المرشد ، كان أشيع أن صلاح شادى هو السبب في اختفاء  
المرشد فكيف يتصرف صلاح شادى فى شىء كهذا .. وهذا  
الكلام لم يستطع أن يبرره الاستاذ ابراهيم الطيب ، فلما حضر  
في الاجتماع الثانى يوسف طلعت رد على مسألة صلاح شادى  
بأن صلاح شادى ماهواش السبب في اختفاء المرشد ، وانما  
السبب في اختفاء المرشد أن الاخوان علموا علم اليقين أن هناك  
حادث يدبر لاغتياله وأن صلاح لا يعدو موقفه الا أنه بوسطجى  
مع الاستاذ ... وليس له عمل رئيسى معاه .. ورد يوسف  
على الكلام الخاص بأن الاخوان غير مستعدين ، فقال أن الاخوان  
فعلا أمكانياتهم مش قوية وان فيه ضعف في استعداد الاخوان .

وان هذا الضعف يتلانى ، وان المسألة دى كلها بتبحث ولازم  
تقدروا ان الظروف تحتاج الى استعداد وتدريب وحاجات زى  
كده ، وان المسائل اللي انتم تفاهتم فيها والخاصة بأن يكون  
هناك صلح مع الحكومة او مع القيادة .. هذه المسائل بتبحث  
مع المسئولين فى الاخوان وحيقروا فيها ما يرونه .. ده تقريبا  
يعنى جملة ما دار فى الاجتماع ..

**الرئيس -** الضعف اللي كنتم بتكلموا عليه واللى بيحاولوا  
يتلافوه .. والاستعداد تفتكر بتستعدوا علشان خاطر تعملوا  
ايه ..

**الشاهد -** يعنى أنا فاهم من كده انه يعنى ده خاص بالفصائل  
.. يعنى استعداد خاص بالتدريب .. استعداد الفصائل ..  
**الرئيس -** بتستعدوا علشان خاطر تعملوا ايه .. انت بتقول  
الفصائل تتدرب ، الفصائل تتدرب علشان خاطر تعملوا ايه  
**الشاهد -** فى هذا الاجتماع ما قالوش شىء من هذا ...

**الرئيس -** انت كنت قاعد طرطور فى الاجتماع والا كنت قاعد  
كأحد الاعضاء فى الاجتماع  
**الشاهد -** كأحد الاعضاء فى الاجتماع . . ولكن مادرشى فى  
هذا الاجتماع تفصيل شىء ؟

**الرئيس -** اللي يدير هذا الاجتماع الاعضاء والا يديره واحد  
والباقيين يبقوا ماشيين وراه ؟

**الشاهد -** فى هذا الاجتماع الكلام دار بهذه الصورة ..  
**الرئيس -** دار بهذه الصورة .. قال لازم تفهموا أننا مش  
مستعدين علشان نعمل حاجة . . . الحاجة دى ايه ؟  
احنا بنكمل استعدادنا علشان نعمل حاجة ...  
**الشاهد -** جه فى الاقرار انه لعل ايجابى ..  
**الرئيس -** ايه العمل الايجابى ده ؟



الشاهد - العمل الايجابي هو المظاهرات والمنشورات ..

الرئيس - ودي عاوزه فصائل ؟

الشاهد - دي بيعملوها الاخوان كلهم ...

الرئيس - احنا بنتكلم عن العمل الايجابي بتاع الفصائل .  
باعتبارك أحد أعضاء الاجتماع اللي كان قائم علشان خاطر  
يدرسوا هذه المسألة واللى حضرت فيه باعتبارك رئيس  
فصيلتين ..

الشاهد - انا اعتبر اني مش مختص بهذا ..

الرئيس - امال حضرت الاجتماع ليه مادام مش مختص  
ما هو سبب تواجدك في هذا الاجتماع وانت غير مختص ؟

الشاهد - هذه اجتماعات ادارية ...

الرئيس - لا ... دي اجتماعات رؤساء الفصائل بتاعة  
الجهاز السري ...

الشاهد - لا ....

الرئيس - قلت ان شديد ده رئيس فصيلة . . .

الشاهد - دول رؤساء مناطق ...

الرئيس - وانت رئيس فصيلتين ...

الشاهد - ما ليش صلة مباشرة بالفصيلتين ..

الرئيس - مش رئيسك ابراهيم الطيب قال لك ؟

الشاهد - لاحظ سعادتك ان الفترة اللي تسلمت فيها

العمل كانت بسيطة جدا ..

الرئيس - ان شاء الله ساعة .. زي بعضه .. من ساعة

ما تسلمت العمل ..

الشاهد - انا كنت في عملي اللي في المركز العام وبعدين

حصل لي ...

الرئيس - من ساعة ما استلمت الفصيلتين تكون مسئول

ابراهيم الطيب قال لك ان الفضيلة الفلانية رئيسها صديق  
والفضيلة الفلانية رئيسها البوز ..  
الشاهد - انا في الفترة دي ...  
الرئيس - الكلام ده من كام شهر ؟  
الشاهد - انا في ابريل حصل لى حادث فى رجلى وقعدت  
ثلاثة اشهر عيان والجبس فى رجلى ..  
الرئيس - لا بأس عليك ... ( ضحك )  
الشاهد - الله لا يورك بأس يا فندم ...  
الرئيس - ورجلك كويسة دلوقتى ؟  
الشاهد - أيوه يا فندم ...  
الرئيس - الحمد لله ..  
الشاهد - وبعدين قعدت شهر واحد وبعدين اعتقلت ..  
الرئيس - قعدت شهر .. ثلاثين يوم ...  
الشاهد - الشهر ده هم كانوا يجتمعوا فيه ...  
الرئيس - وعملك اللى انت مسئول عنه امام ابراهيم الطيب  
الشاهد - انا كنت مريض يا فندم ...  
الرئيس - فى مدة الشهر ده ، ابراهيم الطيب ما قالكش  
الفصائل دي ماشية ازاي ..  
الشاهد - ....  
الرئيس - هه ..  
الشاهد - العمل كان ماشى ... مستمر بواسطة قواذ  
وهم كانوا متصلين به مباشرة ...  
الرئيس - يعنى يتبين منك الآن امام هذه الاعترافات انه  
كان فيه اجتماع دار فيه نقاش حول اتخاذ عمل ايجابى ...  
هذا العمل الايجابى يتخذ علشان خاطر اختفاء المرشد باعتباره  
ايدان لعمل ... والعمل الايجابى ده عبارة عن عمليين - عمل

تقوم به الجماعة اللى هو منشورات ومظاهرات ، وعمل تقوم  
به الفصائل . . والفصائل غير مستعدة وحتستعد لهذا . .  
العمل الايجابى بتاع الجماعة عرفنا انه مظاهرات ومنشورات .  
ولذلك تركت على جنب العمل الايجابى بتاع الفصائل . . ايه هو  
الشاهد - ما اعرفش والله العظيم . . . انا ما اعرفشى  
خالص ، وليس فى ذهنى اى عمل من الاعمال خالص والله  
العظيم . . .

الرئيس - المظاهرات الشعبية كان الغرض منها ايه ؟  
الشاهد - . . . .

الرئيس - ماهو الغرض من المظاهرات الشعبية ؟  
الشاهد - كان علشان خاطر تنبيه الناس ان الاتفاقية مش  
كويسة . . يعنى فيها اضرار حسب البيان . .

الرئيس - وايه اللى كان حايجرى من وراء هذه المظاهرات ؟

الشاهد - احراج الحكومة . . .

الرئيس - احراج الحكومة . .

الشاهد - ايوه . . .

الرئيس - ايه نتيجة احراج الحكومة ؟

الشاهد - . . .

الرئيس - افرض الحكومة اخرجت . . . نتيجة الاحراج ايه

الشاهد - تفكر فى الاتفاقية . . .

الرئيس - يعنى انت عاوز تملى وصاية الاخوان على  
الحكومة . ؟

الشاهد - ده اللى كان يعنى تقديرى . .

الرئيس - ده تقديرك . .

الشاهد - ايوه . . .

**الرئيس -** يعنى تملى وصاية الاخوان على الحكومة باخراج الحكومة بعمل مظاهرات ضدها ..

**الشاهد -** ....

**الرئيس -** الحكومة دى مش المفروض انها تحافظ على النظام ، والا تسبب الدنيا فوضى . ؟

**الشاهد -** لا ... تحافظ على النظام ...

**الرئيس -** طيب ... الحكومة تمنع المظاهرات ازاى .

**الشاهد -** بالقوة ...

**الرئيس -** يعنى تعمل عمل علشان تطفى الحكومة تضرب فى الناس .. ايه نتيجة ذلك ؟

**الشاهد -** .....

**الرئيس -** هه

**الشاهد -** نتيجه ضارة ..

**الرئيس -** وليه فكرت فى العمل اللى نتيجه ضارة ؟

**الشاهد -** والله الواحد ماكانش يبصر ...

**الرئيس -** التعاليم الدينية من سنة ١٩٣٨ باعتبارك عضوا فى جماعة الاخوان وارتقيت فيها الى ان اصبحت قائد منطقة وقائد فصيلتين .. ألم تبصرك هذه الدروس الدينية كلها

**الشاهد -** سبق للاخوان انهم قاموا بعدة مظاهرات فى العام الماضى ، وهذه المظاهرات كان يلمس أثرها فى تغير ..

**الرئيس -** تغير ايه ؟

**الشاهد -** حصلت مظاهرات أيام صدقى بخصوص معاهدة ( صدقى - بيفن ) فالحكومة غيرت رايها .. .

**الرئيس -** الاخوان عملوا مظاهرات فى العهد السابقه ؛ واثرت على رأى الحكومة .. أيام صدقى - فى معاهدة ( صدقى - بيفن ) ..

**الشاهد** - تقديرنا في هذا ان ده كان عمل صائب ..  
**الرئيس** - يعنى كنت عاوز ترجع بالعهد ده الى ما قبل الثورة  
ملشان هذه الطريقة نجحت قبل الثورة فانت عاوز تطبقها  
دلوقتى ؟

**الشاهد** - ده كان عمل خاطيء منى ، وانا نادم على التفكير  
فى هذا ...

**وكيل النائب العام** - بعد الاجتماعين موضوع التقرير ايه  
الى حصل . .

**الشاهد** - اعتقلت يا فندم ..

**وكيل النائب العام** - بعد التقرير على طول .

**الشاهد** - على طول ..

**وكيل النائب العام** - ما حصلشى وانتم فى صدد هذه  
الاجتماعات ، انه حصل كلام بخصوص القيام بالحركة الايجابية  
المسلحة ..

**الشاهد** - لا ... لم يحصل ...

**وكيل النائب العام** - انت ماسئلتش فى هذا الصدد واجبت  
عنه ، وانا رددت لك اجابتك يعنى نرجع نعيد تانى  
**الشاهد** - لا اتذكر ...

**وكيل النائب العام** - انت قلت الليلة . . . من  
الجهاز السرى ولا مش من الجهاز السرى - تقدر تقول ؟

**الرئيس** - هو لايتذكر ده ، وانما يتذكر اذا كان شديد يقول  
لنا حاجة عن المنشورات اللي نزل منها كثير .. ايه كانت  
المنشورات دى ، وماذا كان الغرض منها ؟

**الشاهد** - فيه منها البيان ...

**الرئيس** - ده واحد ...

**الشاهد** - وواحد تانى الى هو بتاع « هذه الاتفاقية لن تمر »

الرئيس — أدى اثنين ..

الشاهد — وواحد عنوانه « المؤامرة » ...

الرئيس — ايه ده ؟

الشاهد — كان متوقع ان تدريب حايدبر للهجوم على المركز العام والمنشور اللى اتعمل كان لتنبية الراى العام لهذه المؤامرة

الرئيس — مؤامرة من مين .

الشاهد — واللى كان بيقال ان هيئة التحرير هى اللى

مدبرة ده ..

الشاهد — كان معروف ان هناك اختلاف فى وجهة نظر

هيئة التحرير مع الاخوان ..

الرئيس — والاخوان دول يعنى متخاتقين مع الحكومة ومع

هيئة التحرير ، ومع كل الناس .. متخاتقين مع مين تانى ..

الشاهد — ...

الرئيس — يعنى يكفى انكم تشكوا فتعدوا بعض المسائل ؟

وتعملوا لها تنظيمات علشان تلبسوا بها الآراء وتنزلوا

منشورات ..

الشاهد — ...

الرئيس — كانت بتطبع فين المنشورات دى . ؟

الشاهد — ما اعرفشى ..

الرئيس — مين اللى كان بيوصلها ؟

الشاهد — اللى كان يوصلها هو حسين شعبان ..

الرئيس — وكان بيوصلها لك انت ؟

الشاهد — لا ... كان بيوصلها لمحمد يوسف الهواش ..

الرئيس — يعنى باعتبارك رئيس منطقة ... لا انت مسئول

عن الفصيلتين ، ولا انت مسئول عن المنطقة ، وسايها الهواش  
وصديق والبوز ... بس انت راجل متحمل المسئولية وما

بتعملشى حاجة وقاعد تدبر فوق آمال ازاي رحت العمارة  
بتاعة هوليوود اللي في غمرة ؟

الشاهد - يا فندم أنا كل وقتي تقريبا كنت امضيه في  
المركز العام ...

الرئيس - ايه شغلتك ؟

الشاهد - سكرتير ادارة ... كنت مسئول عن الموظفين  
بتوع المركز العام ...

الرئيس - فيه كام موظف في المركز العام ؟

الشاهد - حوالي عشرة ...

الرئيس - ودول بياخدوا منك شغل في النهار كام ساعة ؟

الشاهد - من تسعة صباحا لواحدة ونص بعد الظهر ، ومن  
ستة مساء لحوالي عشرة مساء ...

الرئيس - كل ده شغل علشان خاطر عشر موظفين ...  
تاخذ ثمانية ساعات ونص علشان تشتغل سكرتير اداري لعشر  
موظفين ..

الشاهد - كنت باشتغل كمان في الرد على خطابات الاخوان .  
وطلبات الاخوان ...

الرئيس - ايه طلبات الاخوان ؟

الشاهد - مثلا اخ عنده مشكلة .. يعنى مشاكل الاخوان  
ومصالحهم . . مثلا اخوان جاين من الاقاليم ، وعاوزين يقدموا  
لاولادهم في كلية من الكليات ، او في مدرسة من المدارس ، تقوم  
تكتب لهم توصية ..

الرئيس - توصية لين ؟

الشاهد - مستمر .. لواحد يكون استاذ او موظف او شيء

من هذا القبيل

الرئيس - موظف في ايه ؟

الشاهد - في اي وزارة وانا كنت مباشر مصالحهم ومشاكلهم  
الرئيس - زي ايه ؟

الشاهد - واحد جى يقدم لابنه في الجامعة جماعة جاين من  
الاقاليم لهم مصلحة اشوفها لهم واديهم توصية ..  
الرئيس - والاستاذ من الاخوان طبعاً ؟  
الشاهد - معارف

الرئيس - الحكومة بتقضى على الواسطة والجهاز السرى  
للاخوان ماشى على شغل الواسطة

الشاهد - دى حاجة ماشية من زمان  
الرئيس - والفساد ما هو من زمان

الشاهد - احنا كنا بقدر الاستطاعة بنسهل اعمالهم ..  
الرئيس - يعنى بقدر الاستطاعة كنتوا بتعملوا وسايط ، هو  
ده الاسلام ؟

وكيل النائب العام - انت قلت في التحقيق ان من ضمن  
البرنامج اغتيالات ويبدأ بعدها الانقلاب ..

الشاهد - حضرتك سألتنى هذا السؤال وانا قلت ان سمعت  
هذا من كلام الاخوان

وكيل النيابة - يعنى دى كان من ضمن الخطة ؟

الرئيس - سمعت ايه من الاخوان ؟

الشاهد - سمعتهم يقولوا حتى الاخوان يعملوا اغتيالات ..

الرئيس - كان مين من الاخوان يقول الكلام ده ؟

الشاهد - عموم الاخوان .

الرئيس - يعنى كنت قاعد في اوده فيها ميكروفون وناس

بتتكلم وانت سامعهم ومش شايفهم .

الشاهد - دى اشاعات ..



**الرئيس -** هي الحكومة مش بتحارب الاشاعات لما واحد يعمل اشاعة مش تروج عنه .. ايه الاشاعة ؟

**الشاهد -** كانوا بيقلوا حقه يحصل اغتيال لرئيس الحكومة واغتيالات عامة وان الاخوان يعملوا حركة ..

**الرئيس -** حركة ايه ؟

**الشاهد -** يعنى يقوموا بحركة ..

**الرئيس -** ضد مين ؟

**الشاهد -** ضد الحكومة

**الرئيس -** بقى سمعت الناس بتتكلم كلام عرضى وبيقولوا انقلاب واغتيالات .. واغتيال رئيس الحكومة وده كله ما يسترعاش فكرك وتقول دى اشاعة .. ده كلام يقبله ناس عاقلين ؟

**الشاهد -** انا سمعت الكلام ده فى كثير من المجالات ولكن خطة او حاجة زى دى مفيش ..

**الرئيس -** هل يمكن للجهاز السرى ان يقوم بعملية لم يصدر بها امر عن الرئاسة ؟

**الشاهد -** لا اعتقد هذا ..

**الرئيس -** واذا قام الجهاز بعملية مفروض الامر ييجى منين

**الشاهد -** مفروض انه ييجى من قائد الجهاز

**الرئيس -** يعنى من مين ؟

**الشاهد -** من الاستاذ المرشد ..

**الرئيس -** ليوسف طلعت .. ومن يوسف طلعت لين ؟

**الشاهد -** ابراهيم الطيب ..

**الرئيس -** وابراهيم الطيب يكلف مين ؟

**الشاهد -** يكلف من يراه وده ما افهمه ..

وكيل النيابة - امتى نبتت فكرة الاغتيالات والانتقالب فى  
جماعة الاخوان فى نطاق الجهاز السرى ؟

الشاهد - اظن ان ذلك من بدء الاتفاقية ..

وكيل النيابة - هى الاتفاقية لها بداية ونهاية

الشاهد - من بدء الاتفاقية يعنى من وقت التوقيع بالحروف  
الاولى ...

وكيل النيابة - يعنى من وقت الاتفاق المبدئى .

الشاهد - اظن ذلك ..

الرئيس - تعرف ايه عن ابو المكارم

الشاهد - كان بكباشى فى الجيش ..

الرئيس - وبعدين .

الشاهد - علمت انه فصل من الجيش ...

الرئيس - ليه ؟

الشاهد - لانه من الاخوان ...

الرئيس - وبعدين

الشاهد - انا اعلم انه سبق له العمل مع عبد الرحمن السندى

ولما حصل الخلاف وطرد عبد الرحمن السندى ماعرفشى بعد  
كده حاجة ...

الرئيس - ما تعرفش ايه ؟

الشاهد - ما أعرفش ابو المكارم ايه ..

الرئيس - هو فين دلوقت ؟

الشاهد - ماعرفشى ...

الرئيس - كان بيشتغل ايه ؟

الشاهد - فى الجيش ...

الرئيس - بيعمل ايه ؟

الشاهد - ليتصل بالعسكريين ..

الرئيس - علشان ايه ؟  
الشاهد - علشان خاطر النظام . .  
الرئيس - علشان يعمل نظام سرى  
الشاهد - أيوه . . .  
الرئيس - فى داخل ايه ؟  
الشاهد - فى داخل الجيش . . .  
الرئيس - ومين اللى حل محله ؟  
الشاهد - ماعرفشى مين حل محله ولكن انا استنتجت انه  
عبد المنعم عبد الرؤوف  
الرئيس - نباهة . . . كل حاجة استنتاجات ماتخليكش  
تشوف حاجة ابدا . . .  
الشاهد - انا ماعرفشى ولكن ده تقديرى . .  
وكيل النيابة - مين اللى كان حيقوم بتنفيذ الانقلاب اللى كنتم  
فى سبيل اجرائه . . اى هيئة فى جمعية الاخوان كانت ستتولى  
تنفيذ الانقلاب الذى كنتم تزمعون اجراءه ؟  
الشاهد - الاخوان كلهم . . .  
وكيل النيابة - عرضتم الخطة على الاخوان كلهم . . .  
الشاهد - مفروض النظام طبعا . .  
وكيل النيابة - النظام ايه ؟  
الشاهد - النظام السرى هو اللى حيقوم بعملية الانقلاب . .  
وكيل النيابة - طيب نسألك سؤال كمان - ايه اللى فهمتوه  
يااخوان أو أعضاء الجهاز السرى من اختفاء المرشد فى المدة  
المعاصرة للاتفاقية . . بين المحكمة الامر على النحو الذى قلته  
فى اجابتك ؟  
ايه اللى كان بيدور فى نطاق الجهاز السرى عن موقف المرشد  
الشاهد - كان المفهوم ان المرشد لما اختفى كنا فاكرين ان

المرشد اختفى خوفا من الاغتيال لانه اشيع ذلك وبعدين لما طالت  
المدة كان مفهوما بين النظام ان اختفائه بنى على خطة وانه يبدان  
بأن فيه عمل راح يكون . . .

وكيل النيابة — عمل ايه

الشاهد — عمل ايجابى . . .

وكيل النيابة — فسر كلمة عمل ايجابى دى اللى انت دايم  
تقولها عايزينك تفسرها للمحكمة

الشاهد — يبقى مظاهرات ومنشورات ودى كانت ماشية  
فعلا . وبعدين لما حصل الاجتماعين دول كلام يوسف كان مفهوم  
منه ان فيه أعمال حتقوم بيها الفصايل . . .

وكيل النيابة — أعمال مسلحة

الشاهد — أيوه مسلحة طبعا

وكيل النيابة — ضد مين ؟

الشاهد — ضد الحكومة

الرئيس — منقول يا أخى ان يوسف قال لكم ان الجهاز او  
الفصايل حتقوم بعمل مسلح ضد الحكومة .  
الشاهد — أيوه . . .

الرئيس — امال مش راضى من الصبح تقول كده ليه ؟

الشاهد — منا قلت . . .

الرئيس — ايه اللى اتعلمته فى الاخوان من سنة ١٩٣٨ لغاية  
دلوقت قول لنا بعض الدراسات اللى انت اتعلمتها ؟

الشاهد — اتعلمت العبادة وكنت باستمع المحاضرات فى المركز  
العام .

الرئيس — اتعلمت العبادة وسمعت شوية محاضرات هيه  
دى النتيجة اللى طلعت بيها

الشاهد — انا لما انضمت للاخوان فى سنة ٣٨ كنت فى الكشافة

وبعدين الشيخ حسن البنا قال لى تعالى امسك الجِوالة واستمررت فيها لغاية سنة ٤٠

**الرئيس -** همه مش كانوا بيعلموكم ايه النتيجة اللي طلعت بيها

**الشاهد -** كنا بنأخذ دروس فى التاريخ الاسلامى والسيرة...  
**الرئيس -** طيب قول لنا شويه فى الفقه والا فى التاريخ الاسلامى...

**الشاهد -** أنا معلوماتى طفيفة لانى كان وقتى كله بيضيع فى الجِوالة والكشافة...

**الرئيس -** يعنى انت كنت عضو فى الجِوالة وملكش فى الدعوة ؟

**الشاهد -** أيوه وفى سنة ٤٣ أنا استقلت من سلاح الإشارة واشتغلت سواق وكنت بسوق عربية الاستاذ المرشد وبعدين كان فيه خلاف فى شركة المعاملات الاسلامية فانتدبونى لادير الشركة...

**الرئيس -** سواق ومفتش توزيع ومدير شركة .. ايه شركة المعاملات الاسلامية دى ؟

**الشاهد -** دى شركة اقتصادية للاخوان المسلمين ..

**الرئيس -** كانت بتعمل ايه ؟

**الشاهد -** بدأت بأعمال بقالة وتطورت الى مشروع المناجم والمهاجر ومصنع بلاط ومصنع نحاس ومسكتها فترة بسيطة جدا...

**الرئيس -** آمال ايه حكاية الراديوهات بتاع فيلبس اللي فتحوها لك ؟ ودفعوا لك رأس المال ؟

**الشاهد -** لا يا فندم دنا إستلفت المبلغ من عبد الجواد شاكِر وكان عضو فى شعبة الجمعية لما خرجت من الاعتقال فى سنة

١٩٥٠ وقال لى انا عندى مبلغ مستعد أساعد بيه أى واحدنا  
يعمل عمل تجارى فأخذت منه مبلغ ٢٠٠ جنيه - ١٠٠ جنيه لى  
و ١٠٠ جنيه لجمال نصر وفتحنا المحل شركة وأشتغلنا ولما  
خرجوا اخواننا المتهمين فى قضية الجيب قلدى الحاج ومشهور  
والصباغ كانوا عايزين يعملوا شركة فأنضمينا مع بعض وضمينا  
عبد الجواد شاكر شريك فى الشركة بالمبلغ بتاعه ..

الرئيس - وأنتم شركة بالمكسب « وهو ده الاقتصاد  
الاسلامى » - سجلوا ان الاقتصاد الاسلامى حسب ما يقرن  
السيد عبد العزيز احمد حسن أحد أقطاب الإخوان المسلمين هو  
انك تستلف مبلغ تشغله والمكسب تعتبره رأس مالك وأصل  
المبلغ لا يرد لصاحبه ثم تدخل صاحب رأس المال الاصلى  
كشريك ..

وكيل النيابة - انتم اجمعتم بعد مازهقتم من حكاية الاتفاقية  
وانها لازم تقف ورتبتم على ذلك انكم تعملوا انقلاب فهل عملتم  
برنامج الحكم بعد نجاح الانقلاب لا قدر الله ..  
الشاهد - انا لا اعرف شىء من هذا ...

وكيل النيابة - هو الواحد يعمل فركشة واغتيالات  
ومظاهرات وانقلاب وبعدين .. ايه برنامجكم للحكم ؟  
الشاهد - معرفش ...

وكيل النيابة - متعرفش ازاى هو مجرد معارضة للاتفاقية  
توصل لعمل اغتيالات وانقلاب . ؟  
الرئيس - طبعا انت اللى كنت بتدبر الشئون الاقتصادية  
للإخوان ؟

الدفاع - ماهو مرتبك الشهرى فى المركز العام ؟  
الشاهد - كنت بأخذ ٢٥ جنيه فى الشركة ولما جيت فى المركز  
العام قلت ما أقدرش آخذ أقل من كده ..

**الرئيس -** قلت لمن ؟

**الشاهد -** قلت للدكتور خميس ..

**الدفاع -** وقت بدء عملك كنت بتاخذ كام ؟

**الرئيس -** لما كنت سواق يعنى ؟

**الشاهد -** أنا لما كنت فى سلاح الإشارة كان مقروض اكون فى

الثامنة الفنية ولكن ماكنش فيه درجات فكنت خدمة سايرة

( درجة تانية ) باخذ أربعة جنيهات ونصف وبعدين الشيخ حسن

البناء عمل لى ٦ - ٧ جنيه ...

**الدفاع -** كنت شهر بتاخذ ٦ وشهر بتاخذ ٧ ؟

**الشاهد -** لا .. أقصد كنت بسته وبعدين بقيت بسبعة

وفضل المرتب يزيد ...

**الدفاع -** شركة المعاملات الاسلامية دى شركة معروفة وانت

كنت مديرها رأسمالها كام ؟

**الشاهد -** ١٠ آلاف جنيه

**الدفاع -** ثم زاد ؟

**الشاهد -** بقى ٢٠ الف جنيه ...

**الدفاع -** ثم زاد ؟

**الشاهد -** ما عرفشى بالضبط ...

**الدفاع -** متعرفشى ازاي دائن رافع عليك قضايا بصفتك

مدير الشركة ... هل من مبادئ الاقتصاد الإسلامى ان يعمل

سائق سيارة مدير الشركة يزيد رأسمالها على العشرين ألف

جنيه ؟

**الشاهد -** الشركة دى كانت لها ظروف خاصة فقد كان فيه

خلاف بين اعضاء مجلس الادارة ..

**الرئيس -** كانت تعبانة الشركة وعاوزينك تنقذها .. تدوس

فرامل ...

- الشاهد - كانوا عاوزين واحد يتوسط بينهم ..
- الدفاع - ما هي معلوماتك عن ميزانية الاخوان بصفتك كاتب الحسابات ؟
- الشاهد - مش اختصاصي الحسابات ..
- الدفاع - في حكومة مابعد الانقلاب لا قدر الله كان معمول الترتيب ان سائق السيارة ومفتش التوزيع ومدير الشركة يبقى وزير للتجارة والصناعة والا ماكانش ده في الحساب . ؟
- الشاهد - لا ..
- الدفاع - بقى ماكنش في الحساب ؟
- الرئيس - تعرف محمود عبد اللطيف ؟
- الشاهد - لا ...
- الرئيس - تعرف هنداوى دوير ؟
- الشاهد - أيوه ...
- الرئيس - ايه مركزه في الاخوان ؟
- الشاهد - رئيس منطقة امبابه
- الرئيس - كنت بتقابلته ؟
- الشاهد - في المركز العام ...
- الرئيس - ماكنتش بتتكلم معاه ؟
- الشاهد - كلام عام ...
- الرئيس - قل لنا بعض الكلام اللى اتكلمته معاه ...
- الشاهد - كلام عام وبس ...
- الرئيس - تعرف انه هو اللى قال لنا عنك انك رئيس الفصيلتين في منطقة القسطنطينية وانت ما تعرفش انه رئيس فصيلة امبابه ؟
- الشاهد - أنا اعرف انه مسئول عن اخوان امبابه ..
- الرئيس - وعن الجهاز ؟



الشاهد - طبعاً ...

الرئيس - هو المسئول عن اخوان المنطقة يبقى هو المسئول  
عن الجهاز ؟

الشاهد - ايوه لأن اللي ماينفعش لرياسة الجهاز ماينفعش  
لرياسة المنطقة ...

الرئيس - يعنى كان الاجتماع فى العمارة اللي عليها اعلان  
هوليوود كان اجتماع خاص بالنظام السرى ؟  
الشاهد - ايوه ...

الرئيس - طيب قول لنا الخطة اللي قال لكم عنها يوسف  
طلعت ...

الشاهد - ماقالش ..

الرئيس - ابلغ ريتك وقول ..

الشاهد - ماقالش حاجة ...

الرئيس - من فضلك قول لنا خلىنا نخلص .. انت مش  
قلت ان الفصائل حتقوم بعمل ايجابى ضد الحكومة .. انت  
مش قررت ان يوسف طلعت قال كده ... ماسالتوش من باب  
المعرفة خصوصاً وانت رئيس الجهاز ورئيس فصيلتين ماقلش  
... ماسالش وانت راجل اقتصادى وتعرف تحسبها كويس ..  
الشاهد - ماسالتوش ...

الرئيس - ماتتهربش ... طيب اجتماعاتكم تكون ليه فى  
الدور الخامس فى شقة واحد وما تكونش فى المركز العام ...

الشاهد - كانت فى الاول بتعقد فى المركز العام ...

الرئيس - يعنى كنتم بتجتمعوا فى المركز العام ...

الشاهد - لا ..

الرئيس - ليه ؟

الشاهد - المركز العام فيه اخوان كثير ...

- الرئيس - يعنى كانت الاجتماعات سرية ؟  
الشاهد - أيوه ...  
الرئيس - ايه السر فيها ؟  
الشاهد - النظام كده والأصل فى فكرته كده ...  
الرئيس - ليه ؟  
الشاهد - لأنه كان فى بدء تكوينه أيام فاروق كان فيه رقابة شديدة جدا جدا ولو عرفوا الاعضاء ماينفعلش ...  
الرئيس - يعنى كان لمحاربة فاروق ؟  
الشاهد - أيوه ...  
الرئيس - وبعد فاروق ؟  
الشاهد - خطأ ...  
الرئيس - ولما هو خطأ ما استقلتش ليه ؟  
الشاهد - كان فيه بلبلة فى الإخوان وكان فيه اخوان من رأيهم مايكونش فيه نظام ...  
الرئيس - ده أيام عبد الرحمن السندى وصدر قرار بأن مفيش سرية فى الدين علشان تبينوا للناس ان النظام الغي ويفصل عبد الرحمن السندى وتعملوا نظام جديد يتحط عليه يوسف طلعت ...  
الشاهد - بكل أسف هذا حصل وأنا فى الفترة دى ماكنتش موافق عليها ...  
الرئيس - ايه ظروف تعيين المرشد ؟  
الشاهد - كان فيه خلاف على من يخلف الاستاذ البناسين عبد الحكيم عابدين وصالح ع شماوى والشيخ فرغلى ...  
الرئيس - بين أعضاء مكتب الارشاد كل واحد عايز يبقى مرشد علشان لما يموت يقولوا رضى الله عنه ولذلك كانوا بيتخانقوا وهم فى المعتقل على الخلافة .

**الشاهد -** فبعض الاخوان سعوا ان يحل هذا الاشكال وذلك بانهم يشوفوا شخصية اخرى تحل في هذا المكان ورشح الاستاذ الهضيبي لانه من زمان متصل بالاستاذ البنسا ويزوره كثير ، فراحوا الاخوان وكلموه في هذا ...

**الرئيس -** مين كان يسعى ؟

**الشاهد -** منير الدله وفريد عبد الخالق وصلاح شادى ... وقد سعوا واتصلوا به وحاولوا يقنعوه وهو اعتذر كثير عن تولى هذا المنصب وقالوا له انت تحل الاشكال . وكان معترض . وبقي الاعتراض ست اشهر او كما يقال سنة .

**الرئيس -** كما يقال زى الحديث .

**الشاهد -** بعدين جه عملوا اجتماع وكانوا مختلفين فيه على مركز المرشد وافهمهم على هذا الموضوع علشان يكون الاختيار رد اعتبار الدعوة باعتبار ان فيه متاعب للاخوان قبل كده . وبعدين هم وافقوا بالاجماع على ان يعتبروا هذا زى حل . فراحوا للمرشد في الاسكندرية وقالوا له ...

**الرئيس -** تسلم . المرشد مش كان رئيس الجهاز السرى ؟

**الشاهد -** ايوه .

**الرئيس -** والجهاز السرى مش كان معمول علشان يحارب فاروق ؟

**الشاهد -** ايوه .

**الرئيس -** ازاي انتم ترضوا ان الرئيس يروح يقدم الولاء لفاروق ؟

**الشاهد -** المرشد راح زار الملك وقعد معه تقريبا ساعة وجاء المرشد العام وقال ان المقابلة لم يعرفها احد . واتفقوا على ان فرضها يكون سرى وقال انها زيارة كريمة لملك كريم .

**الرئيس -** وهو رئيس الجهاز السرى الذى أنشأ لمحاربة الملك الكريم . تفتكر ده منطق . يعنى خلصنا من شهادة منيادتك انك لم تتعلم حاجة من الاخوان المسلمين عن الدعوة الاسلامية . تعليمك فى الفقه بسيط . وتعليمك فى تاريخ الاسلام بسيط . وانت رئيس من رؤساء الجهاز . ورئيس فصائل وكنت الرجل الاقتصادى الذى يحل مسائل الجمعية ويحل مشاكل الشركة صاحبة رأس مال عشرة آلاف جنيه والذى علا الى عشرين ألف وجه رئيس من رؤساء الجهاز السرى وانتم تعقدوا اجتماعات وتحضرها وتعلم ان هناك فصائل . وفصائل مسلحة . وترأس فصيلتين ورئيس الجهاز قال فى أحد اجتماعاته أنا سسنقوم بعمل ايجابى مسلح ضد الحكومة . مرحتش بلغت الحكومة عن الكلام ده ليه ؟

**الشاهد -** كنت خايف

**الرئيس -** خايف من ايه ؟ الراجل الذى اشتغل فى النظام السرى يخاف ؟ الرجل المؤمن المتعلم الاسلام من ٣٨ الى الآن يخاف ؟ هو الدين يعلم الخوف ؟ والايمان ؟ والا الايمان يعلم الشجاعة ؟

**الشاهد -** الشجاعة .

**الرئيس -** خايف من ايه ؟ خايف من الاخوان ؟ مفيش غير كده ..

**الشاهد -** نعم .

**الرئيس -** يعملوا فيك ايه ؟

**الشاهد -** يخرج عن النظام .

**الرئيس -** ويحصل له ايه ؟

**الشاهد -** يتخلصوا منه .

**الرئيس -** زى فايز .

**الشاهد -** معرفش حقيقة حكاية فايز .

الرئيس - طبعاً . اذا كنت جبان للدرجة انك خائف تبلغ الحكومة عن الانقلاب تقوم تشهد امام المحكمة عن حداث السيد فايز . انت مسمعتش عنها خالص ؟

الشاهد - سمعت عنها .

الرئيس - فين . في الاخوان ؟

الشاهد - أيوه .

- يعني الاخبار تأتي لكم عندكم جاهزة ؟

الشاهد - لا . نشرت في الجرائد .

الرئيس - وانتم بتقروا جرائد الناس الغير مسلمين ؟ مش

ده يبقى ضد نظام الجماعة هل توجد اسئلة اخرى للادعاء ؟

وكيل النائب العام - لا .

الرئيس - اسئلة اخرى للدفاع ؟

الدفاع - لا .

الرئيس - مع السلامه يا سيد عبد العزيز . هات الشاهد

الى بعده .

( ونودى على الشاهد الذى يليه السيد أبو سالم )

الرئيس - اسمك ؟

الشاهد - السيد حسين أبو سالم .

الرئيس - عمرك .

الشاهد - ٣٠ سنة ونصف .

الرئيس - بتشتغل ايه .

الشاهد - مأمور ضرائب المنصورة .

الرئيس - متخرج منين ؟

الشاهد - كلية التجارة .

الرئيس - سنة كم .

الشاهد - سنة ١٩٤٧ .

الرئيس — قرب .. ايه ده .

الشاهد — مصحف .

الرئيس — قول والله العظيم اقول الحق والله على ما اقول  
شهيد .

وردد الشاهد القسم .

الادعاء — انت عضو في جماعة الاخوان .

الشاهد — ايوه يا فندم .

الادعاء — من امتى وانت في الاخوان ؟

الشاهد — من سنة ١٩٤٠ .

الادعاء — ايه مركزك في النظام السرى ؟

الشاهد — حاليا مش عضو في النظام السرى . ولكن كنت  
رئيس منطقة وسط القاهرة الى ان نقلت الى المنصورة في الـ  
يونيو سنة ١٩٥٤ .

الادعاء — مين عينك في النظام ده ؟

الشاهد — انا رئيس منطقة وعينى مكتب ادارى القاهرة

الادعاء — مين ؟

الشاهد — رئيس المكتب الادارى الدكتور حسين كمال الدين  
وحل محله محمود عبده .

المدعى — مش ابراهيم الطيب ؟

الشاهد — ابراهيم الطيب مسئول عن النظام السرى في  
القاهرة وطلب في اول شهر يونيو ان اكون فصيلة في القاهرة .  
فشرعت في تكوينها على ان اسلمها اليه وتصبح مستقلة عن  
المنطقة . وقبل تكوينها نقلت الى المنصورة وحل محلى منصور  
موض .

الادعاء — وتشتمل على ايه ؟

**الشاهد** - ثمان شعب . بولاق . التوفيقية . عابدين . درب  
سعادة . الجمالية . الدراسة . الموسيقى .  
**الادعاء** - ما تنظيم هذه المناطق ؟

**الشاهد** - طلب منى تكوين الفصيلة من ثلاث أو أربع  
مجموعات وشرعت في تكوينها واخذت بعض الاسماء التي ذكرتها  
في التحقيق .  
**الادعاء** - قلهم .

**الشاهد** - عثمان عبد الله . اسماعيل عبد المعطى . صالح  
عطا . محيى محمد ابراهيم . محمد محمود احمد . فؤاد  
ججاج . صالح الحديدى . نجدى صالح . على قناوى . رفعت  
بحسين . دول اللى متذكرهم .

**الرئيس** - كانوا في كم مجموعة . ؟

**الشاهد** - في ثلاث مجموعات . وبعد ان سافرت كل الفصيلة  
محمد فريد عوض .

**الادعاء** - هو قال ٢١ واحد في التحقيق . اين كانت توجد  
اسلحة هذه الفصائل ؟

**الشاهد** - الى ان نقلت لم تكن الفصيلة قد سلمت ولا ادرى  
عن تسليمها بشيء .

**الادعاء** - من المسئول عن الاسلحة ؟

**الشاهد** - ابراهيم الطيب مسئول عن القاهرة ويتصل  
بالفصيلة مباشرة ويسلمها لها بعد ان يقوم بتدريبها .

**الادعاء** - وفريد عوض مش مسئول ؟

**الشاهد** - هو حل محلى في المنطقة بعد سفرى .

**الادعاء** - وماذا كان مركزه قبل ذلك ؟

**الشاهد** - رديف المنطقة .

**الادعاء** - مين قائد النظام ؟

**الشاهد -** أعرف إبراهيم الطيب اللى كان مسئول عن منطقة القاهرة .

**الرئيس -** ومين يعاون إبراهيم الطيب ؟

**الشاهد -** عبد العزيز أحمد وكمال السناتيرى ومحمود يونس . عبد العزيز كان لمنطقة الروضة غرب القاهرة .

**الرئيس -** الفسطاط .

**الشاهد -** سميت أخيرا الفسطاط بعد ضم حلوان إليها .  
والسناتيرى لجنوب القاهرة وأنا وسط القاهرة . ومحمود يونس  
المرج ومحمد عبد المعز منطقة العباسية ومحمد شريف منطقة  
شبرا .

**الرئيس -** وكنتم تتصلم بمن ؟

**الشاهد -** إبراهيم الطيب الرئيس .

**الرئيس -** وكل واحد رئيس المنطقة بتاعته ؟

**الشاهد -** هو طلب منى تكوينها وتسليمها له بعد ذلك .

**الرئيس -** تكوينها يعنى تجهز له ناس ؟

**الشاهد -** نعم .

**الرئيس -** على أى قاعدة تجهز ؟ مثلا فى الجيش تدخل ؟

كشف طويل وعريض وعينيك وصحتك .

**الشاهد -** هو طلب منى اختيار الأشخاص الصالحين للخدمة

العسكرية . . ويشكلوا سبعات ثلاث سبعات . تتكون معهم

فصيلة . وتسلم له وهو بعد ذلك يقوم بتدريبها مع ناس آخرين

**الرئيس -** مين كان متولى رئاسة فصيلتك ؟

**الشاهد -** عثمان عبد الله .

**الرئيس -** تحت إشراف مين ؟

**الشاهد -** إبراهيم الطيب .

**الرئيس -** وانت ؟



**الشاهد** - أجند الناس .

**الرئيس** - وانت مش في النظام السرى ؟

**الشاهد** - كنت فيه وبعد فصل السندي تقرر الغاء النظام السرى . ثم طلب منا بعد ذلك تكوين جهاز جديد لا ندخل فيه ولكن تعاون في توجيهه .

**الرئيس** - يلغى نظام قديم ويعمل جهاز جديد علشان القديم لا يعرفه القديم كان يخاف من حزب عبد الرحمن السندي لانه مختلف مع الهضيبي . فلما الهضيبي يعمل نظام جديد برياسة ابراهيم الطيب . يعمل أعضاء جدد . علشان ابراهيم السندي لا يعرفه .

**الشاهد** - طلب منا ان نجتمعهم ونسلمهم ولا نشتغل معهم .

**الرئيس** - وليه طلب منكم عدم الاشتراك ؟

**الشاهد** - يسأل عن ذلك ابراهيم الطيب والمرشد العام .

**الرئيس** - وانت ملكش رأى ؟

**الشاهد** - كانت رغبتى الشخصية انى لا اشترك معهم فى هذه الاجهزة لما ثبت لى أنها ضد الجماعة .

**الرئيس** - لما بتقول كده - عاوت فى تأليفها ليه ؟

**الشاهد** - بالامر .

**الرئيس** - والامر لا يخالف ؟

**الشاهد** - الامر الصادر يجب تنفيذه .

**الرئيس** - وايه اللى يتم اذا خالفته ؟

**الشاهد** - افصل من الجماعة .

**الرئيس** - وما عقاب الفصل من الجماعة ؟

**الشاهد** - لا شىء .

**الرئيس** - لما انت شايف انه ضار ليه مرفضتش ؟

**الشاهد** - اخبرونى انه لا يتبع طريق السندي وانه سيكون

نواة لجيش اسلامى يحارب اما فى القنال او يحارب الاستعمار فى البلاد العربية .

الرئيس - وليه مدخلتش فيها اذن ؟

الشاهد - لان مقدرتى الشخصية انى ابتعد عن هذه النواحي اطلاقا .

الرئيس - ما الدافع ؟

الشاهد - اخشى ان تخالف هذه الاوامر فيما بعد . وكذلك رؤساء المناطق . ونظام الفصائل لما وضع وضع على اساس ان يكون مستقلا تمام الاستقلال عن المناطق .

الرئيس - اخوانك قرروا ان رئيس المنطقة لازم يكون رئيس فصيلة . ولو منفعش رئيس فصيلة ينشال من المنطقة يعنى رئيس الفصيلة يجمع بين رئاسة المنطقة ورئاسة الفصيلة .

الشاهد - يجوز هذا قرر بعد نقلى .

الرئيس - مش نقلت فى يونيو ؟

الشاهد - بدانا تكوين الفصائل فى مايو ونقلت قبل ان تكمل

الرئيس - والتكوين بدا قبل يوليو . فى ابريل .

الشاهد - الفصائل بدا تكوينها فى آخر يونيو . وانا لمسا

ابدت الرغبة وقلت انى مقدرش اشتغل فى الجهاز السرى قالوا لى استمر لغاية ما يحل محلك محمد عوض .

الرئيس - مادام انت معتقد ان هذا الجهاز يضر المصلحة .

وانك لو خالفت هذا الجهاز ستفصل من الجماعة . والفصل لا يترتب عليه اى ضرر . . .

الشاهد - ماكنتش اعتقد اول الامر ان هذا الجهاز بالنظام

الجديد سيعمل هذه الاضرار .

الرئيس - انت قررت ان هذه الانظمة السرية ضارة بالجماعة

فلماذا اخذت دور ايجابى فى تكوين الفصيلة فى وسط القاهرة من

ناس تثق فيهم وهم يعتمدوا على ثقتك في الناس لتكوين الجهاز السرى المكون من جماعات وفصائل ورؤساء فصائل .

الشاهد - نفذت امر ابراهيم الطيب .

الرئيس - وما الذى يدعو الى السرية في هذا الجهاز ؟

الشاهد - تسليح الافراد وتدريبهم في اى وقت .

الرئيس - واحراز السلاح مش يعتبر جريمة ؟ فلماذا ترتكب هذه الجريمة ؟

الشاهد - انا لم اكن في هذا .

الرئيس - مش انت في الجهاز السرى ؟

الشاهد - انضممت لهذا الجهاز كان لفترة بسيطة جدا .

الرئيس - تعلم ان ممنوع حمل السلاح تقوم بعمل جماعة تحمل السلاح ؟

الشاهد - الجماعة مسئولة عن ذلك والفرد لما يقبل يكون مسئول هو ايضا عن نفسه .

الرئيس - مدير ادارة التجنيد مش مسئول عن الافراد اللى يجندهم ؟

الشاهد - ادارة التجنيد هيئة رسمية .

الرئيس - وهى رسمية داخل الجماعة .

الشاهد - اذن الجماعة مسئولة عنى .

الرئيس - وانت مسئول داخل الجماعة .

الشاهد - انا اخلت نفسى من هذه الجماعة .

الرئيس - لما الواحد ينفذ امر مخالف لقوانين الدولة يبقى

مسئول ؟ والا الدولة تعفيه ده مركز القانونى في هذه الشهادة .

متحاولش ترمى التبعة على حد . فهمنى الموضوع .

الشاهد - اللى حصل معاى بالضبط انى كلفت فجمعت

الاشخاص وعاوننى في ذلك فريد عوض وكيل المنطقة . واستمر

- اتصاله بابراهيم الطيب . وانا تخليت ثم نقلت .
- الرئيس — وابراهيم الطيب تتبع المرشد راسا والا بينهم شخص آخر ؟
- الشاهد — لا بد بينهم شخص آخر ولكن طبيعة النظام السرى أن كل شخص يتبع الى فوقه فقط .
- الرئيس — امال عرفت المرشد ازاي ؟
- الشاهد — لان الاوامر جميعها لا تصدر الا من المرشد العام .
- الادعاء — هل وصلت اليكم تعليمات بالاستعداد ؟
- الشاهد — قبل النقل أم بعده ؟
- الادعاء — قبل النقل .
- الشاهد — ان الاستعداد كان دائما يتجدد باستمرار .
- الادعاء — يجب أن يكون الاخوان المسلمين دائما على استعداد تام لمواجهة أى حادث يحدث .
- الادعاء — زى ايه ؟
- الشاهد — يستعدوا للجهاد فى القنال . أو اذا قامت الحكومة بعمل يعتبره المركز العام مخالف لمصلحة الوطن يكون الاخوان مستعدين لمواجهة الحكومة .
- الادعاء — كان ايه نوع الاستعداد قبل نقلك مباشرة ؟
- الشاهد — أنا نقلت فى يونيو .
- الادعاء — وقبل اعتقالك ؟
- الشاهد — الاوامر كانت تصدر بالاستعداد فقط . أما نوعه فلم يوضح كل واحد يستعد باللى يقدر عليه .
- الرئيس — زى ايه ؟
- الشاهد — يتدرب . ينضم لمعسكرات التدريب ويكون جسمه روحيا ويطلعوا رحلات مع بعض واشياء من هذا القبيل .
- الرئيس — والزجاجات الفاضية ؟

**الشاهد** - كان طلب من بعض الناس من المناطق أن يجهزوا زجاجات فاضية علشان اذا احتاجوا لها يعبئوها كزجاجات مولوتوف .

**الرئيس** - وتستعمل ليه ؟

**الشاهد** - فى الاوامر التى تصدر لهم . فى المظاهرات وفى شىء من هذا القبيل .

**الرئيس** - مظاهرات ضد الحكومة ؟

**الشاهد** - المفروض أن اللى يفض المظاهرات هو البوليس . فهى ترمى على من يفض المظاهرات ؟

**الرئيس** - ترمى على البوليس ؟

**الشاهد** - قطعاً .

**الرئيس** - مخالفة لقوانين الدولة ؟

**الشاهد** - قطعاً .

**الرئيس** - وتعلم بهذا ؟

**الشاهد** - علمت به صدفة عن طريق وكيل المنطقة لانى كنت منقول ، كنت فى هذه الفترة فى المنصورة وكنت أتردد على القاهرة لزيارة أهلى . ولانى كنت أمين صندوق جمعية تعاونية لبناء المساكن . وكانوا يقولوا الاخبار اللى عندهم . ومن ضمنها كل هذا .

**الرئيس** - كنت تتردد على الجمعية .

**الشاهد** - نادر . يوم الخميس أجهز حسابات الجمعية ويوم الجمعة يكون فيه مجلس ادارة أو مفيش .

**الادعاء** - ما هى آخر تعليمات خاصة بالخطة المدبرة والتى بدأت باغتيال الرئيس جمال عبد الناصر ؟

**الشاهد** - ...

**الادعاء —** قلت في التحقيق انك قابلت فريد عوض وقال احنا منتظرين تعليمات . ماهى التعليمات ؟

**الشاهد —** لم يقل لى طبيعة هذه التعليمات .

**الرئيس —** انت قلت التعليمات بالاستعداد حسب اللى يقدر عليه كل واحد . قلت أى حاجه ومن ضمنها الزجاجات اللى صدر بها تعليمات قبل كده .  
**الشاهد —** أيوه .

**الرئيس —** ايه الغرض منها ؟

**الشاهد —** معلمش اشيء رسمية فى هذا الموضوع ولكن اللى لمسته ان الازمة بين الحكومة والايخوان تشتد . فالوامر كانت تصدر من الاخوان بالاستعداد اما لمواجهة الحكومة او نوع من الارهاب علشان تبدأ تتفاوض مع الاخوان .

**الرئيس —** يعنى علشان تخوف الحكومة . تقول لها بخ ؟  
**الشاهد —** شعورى الشخصى انهم كانوا قوتين واقفين امام

بعض .

**الرئيس —** ماسبب هذا الخلاف يا حامل شهادة 'لبكالوريوس' ؟  
**الشاهد —** يوم ما بدأت الثورة كان هناك تعاون كامل مع الاخوان  
**الرئيس —** يعنى الحكومة كانت تتعاون مع الاخوان .

**الشاهد —** قصدى الاخوان تعاونوا مع الحكومة ثم بدأت بوادر خلاف وقالوا ان الحكومة طلبت تعيين ناس من الاخوان فى الوزارة والايخوان امتنعوا .

**الرئيس —** الحكومة اللى طلبت ؟

**الشاهد —** هذا ماسمعه . والمرشد كان يقول ان الاخوان يجب ان لا يشاركوا فى الحكم وانهم دائما يبعدوا عنه لان الشخص اللى يكون كده تسلط عليه الانوار وتحدث منه اخطاء والجماعة لا تريد هذا .

**الرئيس -** وماذا كنتم تنتظروا يا أصحاب البكالوريوس لما تخرج مظاهرات من الاخوان مستعدة بزجاجات مولوتوف واسلحة رشاشة وبنادق وقنابل وديناميت ويصطدموا مع الحكومة ؟  
والحكومة خافت وجريت . وهم مش عايزين يمسكوا الحكم .

**الشاهد -** يحصل فوضى .

**الرئيس -** ايه البروجرام بتاعكم بهذه الفوضى ؟ اللى يعمل شىء مش يتحمل مسئوليته ؟

**الشاهد -** قطعاً السياسة العامة للجماعة يعرضها المرشد ومكتب الارشاد .

**الرئيس -** وانت لك انك تسلم رقبتك ؟

**الشاهد -** انا نقلت للمنصورة ؟

**الرئيس -** وقبل نقلك للمنصورة ؟

**الشاهد -** انا قطعت كل شىء . وقبل ما اسافر مكانش فيه

استعداد .

**الرئيس -** مكنش فيه نوع من استعداد فى الوقت ده ؟

**الشاهد -** ابتداء الاستعداد فى منطقة الوسط فى اواخر مايو

**الرئيس -** والنبي منتش مكسوف من كلامك ده اللى مش لامم

بعضه باعتبارك واحد معاه بكالوريوس تجارة وتتكلم امام محكمة

وناس مواطنين سامعين .

**الشاهد -** انا اقرر ما علمته

**الرئيس -** ده اللى علمك اياه الدين ؟

**الشاهد -** انا اقسمت ان اقول الحق ، وهذه هى الحقيقة التى

علمتها .

**المدعى -** انت تدربت فى معسكر الفدائيين من نفسك او كان

بناء على تبليغ من القيادة .

**الشاهد** - عندما بدأ فتح معسكرات التدريب العسكري للفدائيين ، لم نذهب الى هذه المعسكرات وبعدين الدكتور حسين كمال الدين اخبرنا ان الصاغ كمال الدين حسين قال له انتم مقاطعين المعسكرات دى ليه ، والدكتور حسين كمال الدين قال لنا الى عاوز يدرب يروح هذه المعسكرات يدرب بصفته الشخصية فسارعت الى الانضمام الى هذه المعسكرات .

**الرئيس** - انت شايف الاسمين بتسوع كمال الدين حسين وحسين كمال الدين مقلوبين ازاي اهو كلام الدكتور حسين كمال الدين متشقلب كده ومنطقه متشقلب .

**الشاهد** - وبلغنا ان الصاغ على فوزى الكاشف المشرف على المعسكر اتصل به وقال له خلى الاخوان ييجوا يدربوا  
**الرئيس** - قال له الاخوان ييجوا يدربوا !! عدد الاخوان كام باعتبارك راجل بتاع تجارة وتعرف احصائيات .  
**الشاهد** - اعتقد انهم لايزيدون عن ٢٠٠ الف فى القطر المصرى كله .

**المدعى** - فى المنطقة بتاعتك ، هل كانت توزع عليكم منشورات ؟  
**الشاهد** - قبل نقلى من القاهرة كانت المنشورات لم تبدأ تظهر بعد ، واول ما عرفت شروط الاتفاقية بدأت سيول من المنشورات تنهار على المناطق والشعب .

**المدعى** - من الذى كان يوزع هذه المنشورات  
**الشاهد** - سمعت من فريد عوض وكيل المنطقة ان ابراهيم الطيب هو الذى كان يسلم هذه المنشورات لرؤساء المناطق وهؤلاء الرؤساء يتولون توزيعها على الشعب والشعب يتولون توزيعها على الشعب .

**المدعى** - من كان مسئولاً عن توزيع هذه المنشورات فى منطقتك ؟  
**الشاهد** - فريد عوض



الرئيس - ومن الذى كان يتولى توزيع المنشورات قبل شهر  
يونية .

الشاهد - ماشفتش منشورات

المدعى - كان فيها ايه المنشورات ؟

الشاهد - مهاجمة للحكومة والاتفاقية .

الرئيس - ما الغرض من مهاجمة الحكومة ؟

الشاهد - قيل فى اول الامر ان ...

الرئيس - مين اللى قال

الشاهد - المستولون

الرئيس - بين . . ابنى للمعلوم بدل المجهول

الشاهد - المستولون هم رئيس مكتب ادارى القاهرة والاستاذ

محمود عبده والدكتور حسين كمال الدين وابراهيم الطيب قالوا

ان هذه الاتفاقية فيها بعض تقط ضعف ويحسن اتنا نلفت انتظار

الشعب اليها وسمعت فى المركز العام ان الاخوان قد رفعوا بها

مذكرة الى مجلس الوزراء ، وأرادوا نشر هذه المذكرة ولكن الرقابة

منعت هذا النشر فطبعت المذكرة بتاعة المركز العام فى منشور

ووزع على الشعب ، وبعد كده المنشورات اللى شفتها شخصيا

كانت فيها نوع من الاستفزاز وانا شخصيا كنت غير راضى عنها .

الرئيس - الـ ٢٠٠ الف بتجمعوا منهم اشتراكات اد ايه كل

شهر ؟

الشاهد - فى المتوسط الشخص بيدفع عشرة قروش .

الرئيس - يبقى كام

الشاهد - ٢٠٠ جنيه

الرئيس - كده !!

الشاهد - ايوه

الرئيس - احسبها كده ٢٠٠ الف فى عشرة على مائة

**الشاهد -** يبقى ٢٠٠٠٠ جنيه - عشرين ألف جنيه  
**الرئيس -** يابتاع الضرائب ، أمال إيرادات الحكومة انخربت من  
شوية من امثالك ليه مامسكتش اقتصاديات الجماعة بدل عبء  
العزیز احمد شفت اذك ما تعرفش تحسب كويس .

**الشاهد -** انا موظف حكومة لكن هو كان موظف في المركز العام  
**الرئيس -** يعملوا ايه بالعشرين ألف جنيه دول  
**الشاهد -** كانت ايجارات اماكن الشعب تستنزف مبالغ كبيرة  
والباقي كان يصرف منه على الحفلات في المواسم اعانات للاخوان  
الذين يتعطلوا عن اعمالهم

**الرئيس -** وشراء سيارة ليوسف طلعت  
**الشاهد -** لا . دي تموينهم لوحدها لان المشترك في النظام  
الخاص كان يدفع اشتراكات مستقلة عن اشتراكات الشعب مالية  
الشعب مستقلة عن مالية النظام الخاص وله حسابات مستقلة .  
**الرئيس -** النظام الخاص كان يدفع اشتراكات فوق الاشتراكات  
الثانية عشان تشتروا منها العربيات

**الشاهد -** ايوه لشراء العربيات والاسلحة  
**الرئيس -** اطلعك الدقيق على هذا النظام ومعرفتك بان له  
مالية مستقلة ثانية وعاوز تقول انك ماتعرفش حاجة عن النظام ده .  
**الشاهد -** اشتراكات النظام الخاص بدأت منذ ايام عبد الرحمن  
السندی ای من حوالی سنة ١٩٤٤ او سنة ١٩٤٥ .  
**الرئيس -** وانت اعدت ايام عبد الرحمن الى قبيل تقلك على  
حد تعبیرك .

**الشاهد -** انا اعدت ثلاثة او اربعة اشهر واعرف انهم يأخذون  
اشتراكات مستقلة عن اشتراك الشعب واستمر هذا الوضع حتى  
الان .

**الرئيس -** بتطلع لكم منشورات عن صرف هذه المبالغ ؟

الشاهد - لا مانع فاش عنها حاجة

الرئيس - تدفعوا بس

الشاهد - ايوه . . لان دي سرية

الرئيس - سرية في كل شيء ؟

الشاهد - ايوه

الرئيس - هل بين ابراهيم الطيب والمرشد يتدخل مكتب

الارشاد ؟

الشاهد - لا ، مكتب الارشاد ليس له صلة بالجهاز السرى وفي

الايام الاخيرة لا اعرف ان كان لهم صلة به أو لا ، انما قبل هذا

كان المرشد هو المسئول عن النظام ، فالمسئول عن النظام اللي . .

الرئيس - اللي كان لحد مامشيت

الشاهد - اعرف المرشد و ابراهيم الطيب .

الرئيس - قول الاسماء

الشاهد - الاستاذ حسن الهضيبي و ابراهيم الطيب اما

الاشخاص اللي بينهم فما اعرفش .

الرئيس - هل تعرف ان هناك تنظيم عسكري بجانب التنظيم

الخاص السرى ؟

الشاهد - الاخوان اللي في الجيش او في البوليس دايم من يوم

ما اصبحت فيه اخوان في الجيش والبوليس تنظيمهم يعتبر بالنسبة

للجماعة تنظيم سرى لان طبيعة عملهم كضباط في الجيش او

البوليس تجعله لا يتردد على شعب الاخوان .

الرئيس - هل الدين يسمح لك انك تروح تغرى الراجل اللي

طبيعة عمله تجعله لا ينضم الى الشعب وتجذبه في نظام سرى ، هل

هذه هي دعوة الاسلام ؟

الشاهد - دي عملية مانع فاش عنها حاجة

الرئيس - وانت عضو ولك صوت ؟

**الشاهد -** دول يعتبروا اخوان مستقلين زى الاخوان في القضاء لا يصح ان يتردد على الشعب وهكذا ، ودول كانوا في نظام الاسر مع بعض مستقلة .

**الرئيس -** مين كان مسئول عن اسر الضباط ؟

**الشاهد -** مكناش لنا بهم صلة اطلاقا

**الرئيس -** مابتسمعش

**الشاهد -** زى ماقلت في التحقيق سمعت عبد المنعم عبد الرؤوف .

**الرئيس -** ده انت متأخر قوى وكان كمان مكتب الارشاد ملوش دعوة ؟

**الشاهد -** لا

**الرئيس -** المرشد مسئول عن النظام الخاص ؟

**الشاهد -** المرشد مسئول عن كل شىء في الجماعة

**الرئيس -** يعنى النظام الخاص دكتاتورى تابع للمرشد ؟

**الشاهد -** لا يرد

**الرئيس -** توصفه بايه النظام الخاص ده ديموقراطى او توتوقراطى او فاشى ؟

**الشاهد -** يعتبر تشكيل جهادى يتبع المرشد العام مباشرة

**الرئيس -** تشكيل جهادى ! ماسمعناش عنه

**الشاهد -** ويعلم عنه مكتب الارشاد ولا يتدخل في شئونه .

**الرئيس -** من يدير سياسته ؟

**الشاهد -** المرشد العام والسلسلة بتاعته .

**الرئيس -** ايه سلسلته ؟

**الشاهد -** سلسلة النظام البعيد عن مكتب الارشاد

**الرئيس -** من المسئول عن نتائج هذا الجهاز ؟

**الشاهد -** المرشد العام ومكتب الارشاد يتحمل هذه النتائج  
لانه اذن يتكوين هذا .

**الرئيس -** بارك الله فيك .

**المدعى -** كنت بتدرب افراد منطقتك فين ؟

**الشاهد -** كنا بنخرج في الاعياد والمواسم والعطلات في رحلات  
رياضية في الصحراء اما في صحراء العباسية او المعادي او حلوان .

**المدعى -** ما كنتش تدربهم على التكتيك العنيف ؟

**الشاهد -** ماهي الرياضة زي القفز وتسلق الجبال  
والحاجات دي .

**المدعى -** هل هذه هي الرياضة ؟

**الشاهد -** ايوه .

**الرئيس -** هل تعرف محمود عبد اللطيف ؟

**الشاهد -** لا يا افندم .

**الرئيس -** بص له وقد تكون قابلته مرة .

**الشاهد -** ( ينظر الى المتهم محمود عبد اللطيف ) لا .

**الرئيس -** هل تعرف هنداوى دوير .

**الشاهد -** ايوه .

**الرئيس -** بيشتغل ايه ؟

**الشاهد -** محامى .

**الرئيس -** وفي الاخوان .

**الشاهد -** انا تعرفت به في المركز العام وعرفت انه محامى ؟  
وكان جميع رؤساء المناطق مع المحامين عشان كل واحد يأخذ  
الى عنده ويضمهم للشعب بتاعته .

**الدفاع -** بتقول كانت تصدر الينا الاوامر او كلفنا وما الى  
ذلك ، فما معنى الامر الذي تعنيه من صفة الامر او التكليف ؟  
كلام يقوله انسان فمن اين جبت صفة الامر او التكليف ؟

- الشاهد** - مستمدة من مركز الامر في الجماعة .
- الدفاع** - هل للجماعة قانون يشبه قانون الدولة يعطى للشخص حق اصدار الامر الى الاخرين .
- الشاهد** - ايوه قانون الجماعة يسمح أن كل مسئول يأمر من يليه .
- الدفاع** - ما حدود تنفيذ هذا الامر فيما عرفت في النظام السرى وهل ايا كان نوع الامر يجب تنفيذه ؟
- الشاهد** - في النظام السرى يجب تنفيذ كل أمر .
- الدفاع** - ومن يعصى هذا الامر أو يخرج عليه يترتب عليه ايه وما هي النتائج للخارج على الامر أو العاصين .
- الشاهد** - اعتقد لا يترتب عليه اى نتائج شخص امتنع عن تنفيذ أمر يفصل من الجماعة أو يستمر فيها تبقى وظروفها في الجماعة .
- الدفاع** - كلمة التحميم جبتها منين ؟
- الشاهد** - قانون الجماعة يحتم عليه اطاعة الامر واذا استشعر أنه غير قادر يخطر قيادته بانه ما يقدرش ينفذه .
- الدفاع** - وماذا استشعرت من الاسلوب المتوى للجهاز السرى وليه ما استقلتش ؟
- الشاهد** - كنت نقلت الى المنصورة وفي نفس الوقت صلتى بالنظام السرى تعتبر منقطعة .
- الدفاع** - ولو بقيت في القاهرة كنت تستقيل أو تستمر ؟
- الشاهد** - اعتقد كنت استقيل .
- الرئيس** - انت كنت بتقول في تحميم الامر في الجهاز السرى ان الفرد اذا ماحبش ينفذه يفصلوه كيف تفصل شخصاً من جهاز سرى لديه بعض المعلومات بشأنه وكيف تأمن عدم اباحته لهذا السر ؟

**الشاهد** - هذا يتوقف على ايمان الشخص نفسه .

**الرئيس** - واذا كان عديم الايمان ؟

**الشاهد** - يبوح .

**الرئيس** - واذا باح ؟

**الشاهد** - تضار الجماعة .

**الرئيس** - وما هي الاجراءات لضمان عدم اباحة هذا السر ؟

**الشاهد** - لم أشعر أن هناك اجراءات معينة وفيه اشخاص

في الجهاز السرى فصلوا ولم يترتب على فصلهم أى شىء .

**الدفاع** - زى مين ؟

**الشاهد** - احمد زكى ومحمود الصباغ واحمد عادل كمال .

**الرئيس** - ألا يجوز أن يكون الفصل لتغطية عمل يكلفوا به ؟

**الشاهد** - لا أعتقد ، ولكنى علمت ان الاشخاص اللى كانوا

يكلفوا بعمل أو يراد تكليفهم بمهام معينة - وده كان موجود أيام

عبد الرحمن السندى - كان يبعد عن الجماعة بدون فصل ، وكل

شخص يكلف أنه يقعد فى بيته ولا يتصل بالاخوان دون صدور

قرار فصل .. ويشاع أنه بعيد عن الجماعة .. فالاخوان يزعلوا

منه ..

**الرئيس** - طبعا ده كله تحت ارهاب الجماعة ، لان الجماعة

بتعمل قنابل مولوتوف وكل واحد يعد العدة التى يقدر يعدها

هشان استعداد لارهاب الحكومة والشعب ..

**الشاهد** - ده ارتجال من الاخوان لا اكثر ..

**الرئيس** - الارهاب اللى كان معمول للدولة كلها والحكومة

والشعب لازم يرهب الاعضاء ؟

**الشاهد** - ربما ..

**الرئيس** - ربما آه ... وربما لا ...

**الشاهد -** اللى حصل فى فصل عبد الرحمن السندى ان ناس كثير من اللى كانوا معاه فصلوا ...

**الرئيس -** عبد الرحمن السندى لم يفصل وانما حل الجهاز ... فوظيفته انتهت ..

**الشاهد -** والافراد اللى معاه . . وانا اعتقد ان الجهاز الجديد استمرار للجهاز القديم ..

**الرئيس -** انت قلت ان الجهاز القديم انحل للتخلص من عبد الرحمن السندى واتباعه واقامة جهاز جديد سرى على عبد الرحمن السندى واتباعه ينضم اليه أعضاء جدد غير أعضاء عبد الرحمن السندى وانت لم تبين لنا - وانت من أعضاء جهاز عبد الرحمن السندى - لماذا تكلف بواسطة الجهاز الجديد ان تجند له اشخاص ؟

**الشاهد -** انا استمريت فى الاخوان ولم افصل . .

**الرئيس -** ليه . . انت ماكنتش فى جهاز عبد الرحمن السندى اللى انحل وفصل اعضاؤه ... والا انت ماكنتش من اتباعه ؟

**الشاهد -** لا ... مش من اتباعه ..

**الرئيس -** تبقى من اتباع حسن الهضيبى ..

**الشاهد -** انا كل امر يصدر من عبد الرحمن السندى كنت لازم اناقشه ..

**الرئيس -** كنت تناقشه ... !! جرىء ..

**الشاهد -** ايوه . . وده كان سبب سوء التفاهم بينى وبين السندى .

**الدفاع -** من هم رؤساء الفصائل الذين خرجوا بخروج عبد الرحمن السندى ؟



**الشاهد -** أيام عبد الرحمن السندى ما كنش فيه فصائل ..  
كان نظام سرى للجماعة وكان الرؤساء العاملين له الذين عرفناهم  
بعد فصل عبد الرحمن السندى هم أحمد زكى .. وأحمد عادل  
.. ومحمود الصباغ .. ويليهم رؤساء مناطق وهكذا .. كان  
للنظام رؤساء غير رؤساء مناطق الشعب .

**الدفاع -** أى مجلة تعنى تلك التى أشرت اليها وكان يراد نشره  
نقد الاتفاقية فيها ورفضت الرقابة ؟

**الشاهد -** مجلة الإخوان المسلمين .

**الدفاع -** بس فى المجلة دى اللى حاولتوا نشر هذا النقد فيها ؟

**الشاهد -** أيوه يا فندم .. هذا ما علمته من المركز العام ..

وهو انهم أرسلوها الى جميع الصحف ...

**الدفاع -** أشرت الى أن القضاء فيه اخوان ، فهل فى القضاء  
اخوان ؟

**الشاهد -** اعتقد ذلك ..

**الدفاع -** هل تعرف منهم أحد ؟

**الشاهد -** لا .. ولكن اعتقادى جاء عن حادثتين وهى أن

الاستاذ حسن الهضيبي كان مستشارا .. وكان فى الإخوان

قبل أن يعين مرشد عام .. وقد سمعت هذا منه شخصيا ..

**الدفاع -** كان فى القضاء وعضو فى الإخوان .. وعرفت هذا  
منه شخصيا ..

**الشاهد -** أيوه .. وكان متصلا إتصالا وثيقا بحسن البنا ..

وكذلك عبد القادر عوده كان فى القضاء وفى الإخوان ..

**الدفاع -** هل تعرف بحكم قوانين الدولة أن القضاء بعيد عن

أى شبهة سياسية ؟

**الشاهد - قطعاً ..**

**الدفاع -** هل تعرف ان ما نسبته الى القضاء قد أسأت الى سمعته لان القضاء محرم عليه العمل في السياسة وانت تحمل بكالوريوس تجارة .. ؟

**الشاهد -** الاخوان ما كنتش هيئة سياسية ..

**الرئيس -** ازاي دي .. !! مش بتنتقد الاتفاقية ..

**الشاهد -** لكن الحكومة حلت الاحزاب السياسية .. وبقي الاخوان بعد حل الاحزاب وتركهم يشتغلوا بجميع الامور .. وأنا أعتقد ان حل الاخوان كان يخللي الاغلبية في الاخوان تعرف موقف الجماعة بالضبط ...

**الرئيس -** سمعت الرد ؟

**الشاهد -** نعم كان يجب على الحكومة أن تحل الاخوان بعد عقد الاتفاقية لانها تعتبر خارجة على أهدافها ..

**الرئيس -** أنا سمعت واحد يقول ان حل الجماعة مش معناه انه يحل الجهاز السري ... وكان الحل انك تسبب الجماعة .. مش تستنى لحد ما تطلع بعد الحل أو تضرب قنابل مولوتوف وتعمل محاكمة .. هذه هي الطرق اللولبية بتاع الاخوان ..

**الشاهد -** حل الاخوان المسلمين يخللي أغلبيتهم تعرف موقف الجماعة بالضبط ..

**الرئيس -** انت تقدير ك من اجمل ما يمكن .. ماتيحي تعمل رئيس وزارة ..

**الشاهد -** أنا شخص على قدي خالص ..

**الرئيس -** لكن لك تقديرات كويسه زى حكاية المائتين جنيه .  
**الشاهد -** ...

**الدفاع -** ماهي الحجة التي تذرع بها الاخوان للإبقاء على

انفسهم كهيئة حتى تتخلص من قانون حل الاحزاب السياسية عليهم ؟ .

الشاهد - قالوا اننا هيئة دينية لا تشغل بالسياسة . . .  
الدفاع - واذا اشتغلت الجماعة مع ذلك بالسياسة ويسرون على ذلك . . فيماذا تسمى هذا . . دينا . . ولغة ؟  
الشاهد - خروج على العهد . . .

الدفاع - والخروج على العهد . . ليس أحد الصفات الثلاث التي تساوى الكفر أولا ؟

الشاهد - جاز . . لكن مش كفر . .  
الدفاع - ازاي . . مش فيه حديث شريف . .  
الرئيس - هذا يدل على الدعوة الدينية لم تحصله هو الآخر . . يظهر ان فقهه ضعيف . . قول لنا شوية في الفقه . .  
الشاهد - . . .

الرئيس - ماتعرفش حاجة . . طيب قول لنا شوية الدروس ماذا كان يعلموكم في الجماعة ؟

الشاهد - القرآن . . والاحاديث . . والسيرة . .

الرئيس - وايه ؟

الشاهد - والسيرة . . .

الرئيس - طيب . . قول لنا شوية في السيرة . .

الشاهد - . . .

الرئيس - هل الادعاء يريد سؤال الشاهد . . ؟

المدعى - لا يافندم . . خلاص . .

الرئيس - وهل الدفاع له أسئلة أخرى يريد توجيهها للشاهد ؟

الدفاع - أنا مكتفى بذلك . .

الرئيس - ما تعرفش هنداوى دوير . . ؟

الشاهد - أعرّفه ..

الرئيس - فين هو .. هنا في الجلسة ؟

الشاهد - ( أخذ يبحث عنه في القاعة بين الحاضرين ) مش

موجود ..

الرئيس - انتهت الجلسة الان على أن تعود للانعقاد في صباح

يوم الاثنين ١٦ نوفمبر ٥٤ الساعة العاشرة صباحا .

( رفعت الجلسة حيث كانت الساعة العاشرة وعشر دقائق

مساء )

## محضر

### الجلسة السادسة لمحكمة الشعب

المنعقدة علنا في الساعة العاشرة والدقيقة الخامسة عشرة صباحا ، بمقر قيادة الثورة في الجزيرة ، يوم الاثنين ١٥ نوفمبر سنة ١٩٥٤ الموافق ١٩ ربيع الاول سنة ١٣٧٤ المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برياسة قائد الجناح جمال مصطفى مسائم عضو مجلس قيادة الثورة .

وعضوية القائمقام انور السادات ، والبكباشي ( ا.ح ) حسين الشافعي ، عضوى مجلس قيادة الثورة .

وبخضور البكباشي محمد التابعى والاستاذ مصطفى الهلباوى عضوى مكتب التحقيق والادعاء .

وتولى تسجيل المحاكمات بالاختزال الاساتذة طلعت الصبان ، وممدوح توفيق و ابراهيم فكرى فوده ورمسيس حنا مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب ) المتهم فيها محمود عبد اللطيف محمد

( حضر المتهم كما حضر محاميه الاستاذ حمادة الناحل )

الرئيس — فتحت الجلسة . . الشاهد جاهز ؟  
البكباشي محمد اتابعي — المدعى — الشاهد جاهز يافندم . .  
اسماعيل عبد المعز عبد الله . . .

( نودى على الشاهد فحضر )

الرئيس — موجهها كلامه للشاهد — اسمك ايه ؟  
الشاهد — محمد عبد المعز محمد عبد الله  
الرئيس — بتشتعل ايه ؟  
الشاهد — معاون فنى فى قسم مكافحة البلهارسيا بوزارة  
الصحة

الرئيس — انتم اللى بتجيئوا عندكم حقن الانكستوما  
والبلهارسيا علشان تحقنوا بها فى البيوت ؟  
الشاهد — لا

الرئيس — امال فين ؟  
الشاهد — فى الترغ والمصارف .  
الرئيس — سنك كام سنة ؟  
الشاهد — ٣٢ سنة يافندم  
الرئيس — متخرج منين ؟  
الشاهد — من مدرسة الصناعات الزخرفية . . دبلوم ثانوى .  
( ثم اخرج السيد رئيس المحكمة مصحفا صغيرا من جيبه  
ووضعه على حافة المنصة وطلب من الشاهد ان يحلف اليمين عليه )  
الرئيس — تعرف ايه ده ؟  
الشاهد — ايوه يافندم  
الرئيس — قل : والله العظيم اقول الحق ولا شئ غير الحق  
والله على ما اقول شهيد .

( حلف الشاهد اليمين )

المدعى — انت من جماعة الاخوان ؟

الشاهد - ايوه يافندم .  
المدعى - من سنة كام ؟  
الشاهد - من اول ٤٢ او ٤٤ . . على وجه التحديد مش قادر  
اتذكر

( وكان المتهم يوجه حديثه الى السيد المدعى )

المدعى - كلم المحكمة . .  
الشاهد - من ٤٢ او ٤٤  
الرئيس - يعنى ٣ ساقطة من الحساب  
الشاهد - مش قادر اتذكر .  
الرئيس - مركز ايه فى الجماعة ؟  
الشاهد - حاليا ؟  
الرئيس - ايوه حاليا . .  
الشاهد - قائم بأعمال رئيس منطقة شرق القاهرة .  
المدعى - فين . . فى النظام السرى والا فى النظام العلنى ؟  
الشاهد - فى النظام السرى والنظام العلنى  
المدعى - دخلت النظام السرى ازاي ؟  
الشاهد - انا كنت صديق . .

المدعى - اشرح للمحكمة كيف دخلت هذا النظام ومنذ متى ؟  
الشاهد - حاضر يافندم . . بعد مادخلت الاخوان حوالى ٤٢  
او ٤٤ انا تخرجت وكنت معين فى الارياف وعدت فى حوالى سنة  
١٩٤٩ الى القاهرة وكنت صديق لاحمد عادل كمال وفى يوم قال  
لى . . ايه رأيك فى اعمال الاخوان اللى هى التنظيمات السرية  
والاعمال اللى شفتها فى القنال وفلسطين . . قلت له كويسه قال  
لى . . عندك مانع تنضم معانا قلت لا لما رايت من بطولة الاخوان  
فى فلسطين وفى القنال ضد المعتلدى .  
الرئيس - مش عاوزين اشادة ببطولات من فضلك . . قل  
الشهادة حاف . . مش عاوزينك تقارن . .

الشاهد — أيوه .. منذ سنة ١٩٥٠ أو ١٩٥١ دخلت في هذا النظام .

المدعى — وبعدين ؟

الشاهد — كان معايا مجموعة من ثلاث افراد .. محمود ابو رية وعبد المنعم ابراهيم وحسن كامل .. وبعد مدة ..

الرئيس — يشتغل ايه حسن كامل ؟

الشاهد — نجار .

الرئيس — وابورية ؟

الشاهد — خردواتى ..

الرئيس — هيه .. واحد نجار والتانى خردواتى والتالت ايه ؟

الشاهد — سساعاتى ..

الرئيس — اهلا وسهلا تشرفنا .. كمل ..

الشاهد — وبعدين حصلت الاحداث الاخيرة اللي هى بتساعة

السيد فايز والخبطة في صفوف الاخوان ..

الرئيس — اخترتهم الثلاثة دول ازاي ؟

الشاهد — أحمد عادل هو اللي قال لى اشتغل معاهم ..

الرئيس — بتسمع كلامه على طول ؟

الشاهد — هو قال لى دول من الاخوان ..

الرئيس — يعنى ( باس )

الشاهد — . . . .

الرئيس — اكمل . . .

الشاهد — بعد الحوادث الاخيرة تركنا النظام السرى وقتلنا لهم

مش هي دي الطريقة اللي . . .

الرئيس — كان في سنة كام الكلام ده ؟

الشاهد — سنة خمسين واحد وخمسين تقريبا ..



الرئيس - انت كله عندك بالتقريب .. زى الدين مابتتعلموه  
بالتقريب ...

الشاهد - لا يافندم .. انا ذاكرتى ضعيفة ..

الرئيس - وذاكرتك ضعيفة فى الدين كمان ؟

الشاهد - . . . .

الرئيس - اكمل ..

الشاهد - وبعدين حصل حل فى سنة ١٩٥٣ .. الحل الاخير  
بتاع الاخوان المسلمين وبعد ما حصل ان احمد عادل كمال فصل  
جه زارنى فى البيت صديق يدعى صلاح العطار ..  
الرئيس - بيشتغل ايه ؟

الشاهد - مش عارف يافندم بالضبط .

الرئيس - صديق ومش عارف بيشتغل ايه ؟

الشاهد - هو شخص من الاخوان ..

الرئيس - وكان جاي يكلمك علشان تتعاون معاه فى النظام  
السرى وما تعرفش بيشتغل ايه ؟

الشاهد - . . . .

الرئيس - اتكلم . . .

الشاهد - هو كان معاه واحد .. اللى هو يوسف طلعت ..  
دول جم فى البيت وقالوا لى احنا عارفين انك كنت مع احمد  
عادل كمال وفيه ناس تانيين كمان .. دول احنا عاوزين نضمهم  
الى النظام الجديد .. قلت له لما استشرهم لانهم تعبانين من  
الحاجات اللى حصلت . وفعلا قلت لهم على الحكاية فقالوا لى  
ان الجو ملخبط ..

الرئيس - قلت لهم ايه ؟

الشاهد - قلت لهم ايه راىكم .. فيه جماعة جم وقالوا احنا

عاوزين نحدد النظام القديم ..

**الرئيس -** النظام القديم كان يعمل ايه ؟  
**الشاهد -** المفروض ان الاخوان يتدربوا علشان الدفاع عن  
البلد ضد المعتدى ..

**الرئيس -** والا علشان يقتلوا النقراشى ؟  
**الشاهد -** ما أعرفشى .. ما كنتش لسه انضمت لهم ..  
**الرئيس -** كمل ....

**الشاهد -** فقالوا لى اتركنا شوية ، فتركتهم فعلا شوية  
وبعدين حدث الحل .. بعد الحل ..  
**الرئيس -** حل ايه ؟

**الشاهد -** حل الاخوان الاخير ..  
**الرئيس -** فسر كلامك ..

**الشاهد -** بعد حل الاخوان سنة ١٩٥٣ اللى هو فى يناير  
سنة ١٩٥٣ حضر لى ابراهيم الطيب فى البيت وقال لى احنا كنا  
كلمناك علشان تشتغل تانى فى التنظيم الجديد .. على اننا  
سنعمل على اسس سليمة ونحاول ان نتفادى كل الاخطاء ..

**الرئيس -** ما هى هذه الاسس السليمة ؟  
**الشاهد -** قال لى ان الغرض من التنظيم الجديد هو تكوين  
جماعات من الفاهمين الدعوة ضد التيارات المتقلبة فى البلد ..

**الرئيس -** ماهى الاخطاء التى كنتم سوف تتلافونها ؟

**الشاهد -** الاخطاء اللى هى مقتل النقراشى ..

**الرئيس -** انت ما كانشى عندك خبر عن مقتل النقراشى ؟  
**الشاهد -** . . . .

**الرئيس -** يعنى النظام هو اللى قتل النقراشى ؟  
**الشاهد -** اعتقد هنا ..

**الرئيس -** امال انكرت ليه فى اول الحديث وقلت انك ماتعرفشى  
منه حاجة وانك ما نضميتش له ؟

- الشاهد - في هذه الفترة ما كنتش منضم .  
الرئيس - طبعى عرفت أخيرا ؟  
الشاهد - لما قرئت فى الجرائد ..  
الرئيس - كمل ....  
الشاهد - ايوه يافندم .. الاسس السليمة اللى هى اتنا  
نعمل على اسس الاسلام الصحيح بدون اى تحوير ..  
الرئيس - وما هى هذه الاسس ؟  
الشاهد - ومايكونشى كذاب ..  
الرئيس - ومايكونشى كذاب ..  
الشاهد - ومايكونشى كذاب ..  
الرئيس - ومايكونشى ..  
الشاهد - ومايكونشى مرأى ..  
الرئيس - ومايكونشى مرأى .. كمل ..  
الشاهد - وعلى هذا الاساس قلت له حاضر .. حاقول  
للاخوان .. وبعدين اتصلت به وقلت له ان الاخوان وافقوا على  
انهم يعملوا فى النظام الجديد على الاساس السليم ..  
الرئيس - ايه الضمان ان الجهاز السرى حىشتغل على الاساس  
السليم ؟  
الشاهد - كل الضمان هو انى يعنى لمست ان النظام اللى  
يبتكلموا عليه ... يعنى لمست انهم صادقين فى كلامهم ..  
الرئيس - كيف تعرف ان الشخص اللى بيكلمك بيكلمك بصدق ؟  
الشاهد - كان كل الكلام بالقرآن والحديث وان احنا ناس  
بنبايع الله ...  
الرئيس - ما الذى يثبت ان الحديث الذى يتكلمه انسان هو  
ماينويه فى داخلية نفسه ؟  
الشاهد - شعور بس يافندم ..

الرئيس - شعور .. يعنى شعرت ان كلام الشخص الذى  
ماتعرفتى يشتغل ايه وهو صديق لك ودخلت معاه فى النظام  
السرى .. شعرت انه صادق وسمعت كلامه ؟

الشاهد - اصل دعوة الاخوان المسلمين ..

الرئيس - انا لا اتكلم فى الدعوة .. مش علموك فى النظام الطاعة ؟

الشاهد - السمع والطاعة فى الدعوة ..

الرئيس - يعنى على اد ما قول لك ترد على بس

الشاهد - حاضر يا فندم ..

الرئيس - والا يعنى عاوز تتغالب شوية ؟

الشاهد - لا يا فندم .. وعلى هذا الاساس كان انضمامنا يا فندم

الرئيس - وبعدين ..

الشاهد - انا رديت على السؤال يا فندم .

الرئيس - كمل كلامك الى انت بتقوله ..

الشاهد - ...

الرئيس - كمل الحدوته .. قل لنا قصة رية .. مش رية

كان يشتغل معاك ؟

الشاهد - ايوه ..

الرئيس - قل لنا قصته ..

الشاهد - هو احد الاخوان وانضم معانا ..

الرئيس - ما معلوماتك عن الجهاز السرى باعتبارك كنت رئيس

منطقة ورئيس الجهاز السرى فيها ؟

الشاهد - كل معلوماتى انهم انتدبوني فى الاربع الاشهر الاخيرة

لان اعمل فى هذا النظام .

الرئيس - كنت بتعمل فيه قبل كده مع السندى ؟

الشاهد - فترة بسيطة جدا ..

الرئيس - اربعة وعشرين ساعة يعنى ؟

الشاهد - لا .. حضرت يمكن اربع خمس اجتماعات ..

الرئيس - فى خلال مدة ... ؟  
الشاهد - فى خلال مدة شهرين ثلاثة ...  
الرئيس - عاوز تقول لى انك قعدت تشتغل فى النظام ستة  
اشهر ولا تعرفشى ماهو هذا النظام ؟  
الشاهد - ...  
الرئيس - مامعلوماتك عن النظام السرى ؟ .. كمل ..  
الشاهد - القديم او الحديث ؟  
الرئيس - القديم والحديث .. والا اى واحد .. زى  
مايعجبك ...  
الشاهد - ..  
الرئيس - قل معلوماتك عن الحديث .. هو ده النظام  
الامريكاني ؟

( ضحك )

الشاهد - لا ... ده بعد الحل الاخير .. بعد اعادة الاخوان .  
الرئيس - هه ! ؟؟  
الشاهد - كما ذكرت الان .. مفروض تكوين جماعات من  
الصف الاول فاهمة دعوة الاخوان المسلمين والمحافظة عليها ضد  
التيارات .. ده مافهمته ..  
الرئيس - كيف كان يتكون هذا النظام ؟  
الشاهد - كان يتكون من مجموعة الصف الاول من كل شعبة ..  
الرئيس - ايوه ..  
الشاهد - تكونت الجماعات ، وبعد ماتكونت ..  
الرئيس - الشعبة فيها كام مجموعة ..  
الشاهد - ...  
الرئيس - الشعبة بتاعتك كان فيها كام مجموعة ؟  
الشاهد - مجموعة واحدة ..

الرئيس - من كام فرد ؟

الشاهد - من سبع افراد يافندم . .

( الشاهد يصمت قليلا )

المدعى - اتكلم . . اشرح على طول الموضوع . . كبت  
تختاروا افراد المجموعة ماهو تنظيم الجهاز السرى . . ماهو تنظيم  
المنطقة . . اشرح للمحكمة . . .

الرئيس - ذاكرته ضعيفة . . .

الشاهد - انا باجيب على اد السؤال . .

الرئيس - دى نفس الطريقة اللى بتدرسوا بها الدين . . .  
اما اناك تنطلق يا تحوش نفسك من الكلام !!!

الشاهد - طلبوا منا تكوين الصف الاول وجمع معلومات  
بعدد افراده فى المنطقة فجمع الصف الاول من نواب الشعب . .  
وبعد ذلك قالوا لنا : عاوزين نكون الجماعة دول مجموعات  
سبعات . . . كل اربع سبعات تكون فصيلة . . .

الرئيس - مين اللى قال لك ؟

الشاهد - ابراهيم الطيب يافندم . . . فقمنا بعمل هذا  
التنظيم وجمعنا المعلومات المطلوبة من نواب الشعب وكونا ثلاث  
فصائل فى منطقة شرق القاهرة . .

الرئيس - ثلاث فصائل . .

الشاهد - ايوه يافندم . .

الرئيس - يعنى ثلاثة فى اربعة باتناشر مجموعة فى سبعة  
ثمانية واربعين ؟

الشاهد - اظن كده يافندم . . ثلاث فصائل . . .

الرئيس - والله جدول الضرب بيقول كده . . والا عاوز  
تعيد الحساب على ؟

الشاهد - لا يافندم . . .

**الرئيس —** والا نجيب لك عبد المقصود احمد ؟ ( ضحك )  
**الشاهد —** وكانت الفصيلة الاولى برياسة وائل شاهين ،  
والثانية برياسة عبد المنعم ابراهيم والثالثة برياسة عبد الرحمن  
البنان .. عبد الرحمن البنان كانت مجموعته مكونة من شعب  
سراى القبة وحمامات القبة ومصر الجديدة وكان اغلب الاعضاء  
من الطلبة ...

**الرئيس —** انت كنت رئيس مجموعة والا فصيلة ؟  
**الشاهد —** انا كنت ماسك المنطقة ..

**الرئيس —** قلت ان رئيس المنطقة مسئول عن الجهاز السرى ؟  
**الشاهد —** انا با اتكلم عن تنظيم الجهاز السرى ..  
**الرئيس —** الجهاز السرى كان كام فصيلة ؟  
**الشاهد —** ثلاثة ...

**الرئيس —** وانت قلت ان الراجل بتاع الإخوان المسلمين  
مايصحش يكون كذاب بينما انت قلت فى اول كلامك انه كان  
عندك مجموعة واحدة ...

**الشاهد —** سعادتك قلت شعبتك بتاعة الحداثى كان فيها  
كام مجموعة فقلت فيها واحدة ...  
**الرئيس —** كمل ...

**الشاهد —** وكانت فصيلة عبد الرحمن فى دور التكوين ..  
يعنى كانت لسه عبارة عن ترشيحات أسماء ..

**الرئيس —** مين اللى يرشح الاسماء ؟

**الشاهد —** نواب الشعب يافندم ..

**الرئيس —** مين هو النائب اللى يرشح .. اسمه ايه ؟

**الشاهد —** ....

**المدعى —** ايه هى أسماء نواب الشعب اللى بيرشحوا ؟

**الرئيس —** ماتعرفشى الناس اللى بيشتغلوا معاك فى الشعب ؟

- الشاهد - لا ما أعرفشى ..  
الرئيس - ماتعرفشى ؟  
الشاهد - فيه سبب ..  
الرئيس - السرية ...  
الشاهد - لا ... اصل انا قعدت أربعة اشهر ... الى  
اشتغلت فيهم في المنطقة .. يعنى مركزى كان مختلف عن الى  
قاعد بقى له عشر سنين ...  
الرئيس - يعنى كنت جديد ؟  
الشاهد - أيوه ...  
الرئيس - كنت جاي منين ؟  
الشاهد - من الصف يافندم ...  
الرئيس - من الصف ؟  
الشاهد - أيوه ...  
المدعى - اشرح للمحكمة كيف كنت تدرب هذه الجماعات  
وما هو تسليحها ... ازاي كنت بتدربها وازاي كنت بتسليحها  
وايه تسليح الجماعة وايه تسليح الفصيلة ؟  
الشاهد - نظام التدريب لما سألنا ابراهيم الطيب عنه قال  
ان هناك لجنة فنية خاصة ستقوم بتدريب جماعات الفصائل  
وكذلك ستقوم بتسليحها ... ونظام التسليح اداانا فكرة  
ان المجموعة سيكون الرئيس بتاعها مثلا سيكون معاه مثلا  
مسدس ...  
الرئيس - مثلا والا على وجه التحديد ؟  
الشاهد - على وجه التحديد .. من باب العلم ..  
الرئيس - الكلام ده الظاهر انتم حافضينه اكر من القرآن لا  
مابلاش الكلام العايم ده .. بلاش مثلا واظن واتكلم على طول ..  
الشاهد - واتنين مدفع ستن وثلاثة بندقية .. كل فصيلة



فيها ثلاث مجموعات حتكون مجهزة بهذا الجهاز . . . .

الرئيس - بهذا الجهاز او بهذا السلاح ؟

الشاهد - بهذا السلاح . .

الرئيس - خليك دقيق في تعبيرك . . انت راجل فاهم الدعوة

الشاهد - حاضر يافندم . .

الرئيس - هه !

الشاهد - وكذلك فان نظام التسليح كما ذكرت لسيادتكم

حيكون عن طريق اللجنة الفنية الخاصة باتصال مباشر برؤساء

الفصائل . . بس يا فندم .

المدعى - ايه الاسلحة اللى كانت فى المنطقة بتاعتك ؟

الشاهد - لم ار اسلحة مطلقا لانهم قالوا لى ان انت رئيس

ادارى . . .

الرئيس - والا كانت محرمة ؟

الشاهد - ما اعرفشى يافندم بالضبط . .

الرئيس - ما كانتش محرمة ؟

الشاهد - ما اعرفشى بالتحديد . . انا باقول لسيادتك اللى

انا اعرفه . . .

الرئيس - وانتم تعرفوا حاجة خالص !! !

المدعى - تدريب الجماعة كان بيتم فين ؟

الشاهد - علمت من ابراهيم ان . .

الرئيس - ابراهيم مين ؟

الشاهد - ابراهيم الطيب .

الرئيس - هه . .

الشاهد - ان فيه مكان فى كرداسة بيعد للتدريب وانا رحت

معاه فعلا علشان اشوف هذا المكان ، علشان هو كان رايح يعاينه

. . وتقريبا هو كان فى حديقة او فى جنيئة . . فى مكان كده جنب

.. يعنى عند حدود الزراعة والجبل بتاع كرداسة ..  
الرئيس — دول الناس اللى فى الصف الاول ، بعد ما تعلموا  
الدعوة وحفظوا القرآن ... مش عارف تعبر باللغة العربية ..  
مش عارف توصف مكان عاينته .. أهو ده من هيئة ابراهيم  
الطيب .. القرآن والدعوة الم يعلموك البيان والا ما حفظتش  
غير سورة آل عمران ؟ ... لان الظاهر ان هذه السورة هى التى  
تدخلك الجهاز السرى .. اتكلم ..

الشاهد — فى هذا المكان ..

الرئيس — هنا يعنى ؟

الشاهد — لا .. هناك .. فى كرداسة ..

الرئيس — آه .. يبقى فى ذلك المكان ..

الشاهد — فى كرداسة كان اقترح التدريب وهناك لم يتم  
تدريب فصائل من منطقة الشرق لان البوليس كان قد عثر على  
هذا المكان وفض المعسكر بتاع كرداسة .

الرئيس — ليه البوليس فض المعسكر بتاع كرداسة ؟

الشاهد — لا اعلم شيئاً ...

الرئيس — بالعقل كده ..

الشاهد — كان ممنوع التدريبات ..

الرئيس — ما قبضشى على جمعية الشبان المسلمين ليه ..  
ماقبضشى على نادى بوكولينى ليه !

الشاهد — ما اعرفشى عنهم حاجة .. ما اعرفشى اذا كانوا  
يعلموا تدريبات والا لا ...

الرئيس — تعرف النادى الاهلى ؟

الشاهد — ايوه

الرئيس — فيه تدريب والا لا ..

الشاهد — ...

الرئيس — ماتعرفش فرقة الكورة ؟

الشاهد — أيوه اعرف ...

الرئيس — يبقى معسكر كرداسة يتدربوا فيه على ايه ؟

الشاهد — تدريبات عسكرية ...

الرئيس — تدريبات عسكرية ؟

الشاهد — أيوه يافندم ...

الرئيس — بأه مش كشافة ؟

الشاهد — ماعرفش ...

الرئيس — كده بالعقل .. أنا بكلامك بالعقل .. يا راجل  
يا صاحب الدعوة .. الدعوة الاسلامية .. ده بالعقل مش بالحفظ  
البوليس هاجم معسكر كرداسة ليه ؟

الشاهد — لازم يكون شايف حاجة غير شرعية وغير مشروعة ..

الرئيس — غير شرعية وغير مشروعة ... طيب كويس ...  
والدين الاسلامي يقول لكم تعملوا حاجة غير شرعية وغير مشروعة ؟  
الشاهد — طبعا لا ..

الرئيس — طبعا لا ... طيب وازاي تعملوا الحاجات دي ؟

الشاهد — دي شيء ماعرفش عنه حاجة ..

الرئيس — بأه يعني لاتعرف اللي دخلك ولا تعرف اللي شغلك  
ولا تعرف اللي بتشتغل معاهم .. بس تعرف ان واحد منهم  
يشتغل نجار والثاني خردواتي والثالث ساعاتي ، وماشفتش  
اسلحة وبتنظم وبتعمل ثلاث فصائل وحافظ سورة آل عمران ..  
دي كل مؤهلاتك في الدنيا ؟

الشاهد — انا مش حافظ سورة ال عمران ... ( ضحك )

الرئيس — ومش حافظ سورة ال عمران كمان ؟! ( ضحك ) ..  
يبقى انت ماتصلحش انك تدخل في الجهاز السري لانك مش حافظ  
سورة ال عمران ( ضحك ) ..

**الشاهد** - انا قلت لهم كده . . انا قلت لهم ان مركزى لا يسمع بذلك . . يعنى انا قلت لهم انى مش كفاء وما أقدرشى انى أحل محل الاستاذ محمود الخضرى . .

**الرئيس** - ورغم هذا عملت ثلاث فصائل . .

**الشاهد** - كلها شوية تنظيمات على ورق . .

**الرئيس** - مابليتوش وشريت ميتة 'يه ؟

**الشاهد** - . . .

**الرئيس** - مين اللى بيتولى التدريب فى المعسكر ؟

**الشاهد** - كان فيه واحد اسمه الخضرى . .

**الرئيس** - وايه المعسكر ده ؟

**الشاهد** - كان لسه ارض فضاء . . كان فيه زرع ومكان فاضى

**الرئيس** - مزروعة ؟ . .

**الشاهد** - كان فيه زرع فى الوسط فى مكان محصور بسيط

يسع حوالى اربع خيام . . هو ده مكان المعسكر . .

**الرئيس** - الارض كانت مزروعة ايه ؟

**الشاهد** - حديقة تقريبا . . .

**الرئيس** - ايه الحديقة ده . . كانت مزروعة ايه ؟ . . فل

وورد وياسمين والا برتقال ويوسفندى . . .

**الشاهد** - اهو كان تقريبا كده يافندم . . . .

**الرئيس** - يعنى كان ورد على يوسفندى ؟!

**الشاهد** - كان فيه فواكه يعنى . .

**الرئيس** - نوعها ايه الفواكه دى ؟

**الشاهد** - ( بصمت قليلا ) . . . لا استطيع ان اعبر . .

**الرئيس** - لا تستطيع أن تعبر . . انما يعنى ماتعرفشى شكل

الفواكه دى . . . مش كده . . علشان أنت جاي من الصف ، ودى

بلد صناعية مش زراعية وعلشان كده ماتعرفش شكل الفواكه وذا

شكل الاشخاص بأه ده كلام يقبله العقل بتاع المخ بتاع الدعوة  
الإسلامية ؟

الشاهد - اصل انا قعدت ساعة واحده بس ..

الرئيس - وطبعى كنت مغمى عنيك ومتعصب ؟؟

المدعى - كنت رئيس منطقة .. فهل كانت هناك مناطق أخرى

.. وماهى هذه المناطق ، وماهى اسماء رؤسائها ؟

الشاهد - منطقة شمال القاهرة رئيسها محمد شديد والمرج

محمود يونس وجنوب القاهرة كمال السنائيرى والفسطاط عبد

العزیز احمد .

الرئيس - عبد العزيز احمد ده بيشتغل ايه ؟

الشاهد - ما عرفشى ..

الرئيس - ماتعرفشى ؟

الشاهد - ايوه ..

المدعى - ايه المناطق الثانية ؟

الشاهد - ووسط القاهرة سيد ابو سالم .

الرئيس - بيشتغل ايه ؟

الشاهد - مأمور ضرائب .. انا عرفت اخيرا .

المدعى - وهل كانت بتحصل اجتماعات لرؤساء المناطق ؟

الشاهد - ايوه

المدعى - ايه اللى كان يدور فيها ومين رئيسها ؟

الشاهد - اللى كان يدور فى هذه الاجتماعات كما ذكرت هو

تنظيم الصف الاول وتشكيل هذه المجموعات وتنظيمها حسب

التشكيل الاخير اللى هو الفصائل .

الرئيس - ماهى القاعدة التى تتخذها لنفسك فى حياتك ..

ان تتعاون مع انسان تعرفه او لاتعرفه .. القاعدة كاساس ..

الشاهد - القاعدة كاساس .. لازم اعرفه ..

الرئيس — طيب . . عبد العزيز أحمد ماتعرفوش . . بتتعاون  
معاه فى نظام سرى ليه ، مخالفًا بذلك القاعدة اللى راسمها لنفسك !

الشاهد — اقول لسعادتك . . لسيادتك . . .

الرئيس — تقول لسعادتك . . تقول لسيادتك . . قول زى  
ما انت عاوز . .

الشاهد — . . . .

الرئيس — سعادتك دى اتعلمتها فى سورة آل عمران ؟

الشاهد — لا . . .

الرئيس — ازاي تتعاون مع انسان ما تعرفوش فى حين أن  
خطتك اللى أنت راسمها لنفسك أنك ماتتعاونش الا مع انسان  
نعرفه ؟

الشاهد — دعوة الاخوان المسلمين هى اللى علمتنا اننا نثق  
فيه . .

الرئيس — على اعتبار انه من الاخوان المسلمين ؟

الشاهد — ايوه . . .

الرئيس — يعنى بقية الناس اللى فى البلد مش مسلمين ؟

الشاهد — مسلمين . .

الرئيس — يعنى تتعاون معاهم ؟

الشاهد — ايوه . . .

الرئيس — ازاي تتعاون معاهم وانت قاعد تعمل نظام سرى . .  
وتعمل زجاجات فاضية وقتسابل وستنات وبرنات ومدافع . .

هل ده التعاون مع المواطنين ؟

الشاهد — كما ذكرت لسيادتكم ان هذا النظام الذى انضمنا  
اليه أخيرا قيل لنا . . .

الرئيس — قيل لنا . . هه . . كيف وثقت فيما قيل لك ؟ . .

الشاهد — . . . . .

الرئيس - والا وثقت علشان ماتزعلهمش !!  
الشاهد - كما ذكرت لسيادتكم ان الثقة يجب ان تكون متبادلة  
بين افراد الاخوان ...

الرئيس - من غير معرفة ... كارت بلانش ... الثقة دي  
تدوبها في كوية مية وتشربها من غير ماتعرفهم ...  
الرئيس - تجيب ورقة مكتوبة عليها من غير ماتعرفها وتخس  
معاهم في النظام السرى وتمسك الاسلحة .  
الشاهد - ما مسكتش الاسلحة ولا شفتها .

الرئيس - انت عالم وشفتها .  
الشاهد - انا شفتها في معسكر التدريب وما شفتهاش  
قبل كده ..

المدعى - ما ذكرتش تفصيل الخطة او تنظيم الانقلاب الى  
آخر ما في الخطة .  
الشاهد - ذكرها لنا ابراهيم الطيب في عمارة غمره في الدون  
الخامس .

المدعى - كان مين موجود .. عبد العزيز وهنداوى ..

الشاهد - هنداوى ماكانش موجود

المدعى - امال مين كان موجود ؟

الشاهد - كان عبد العزيز ومحمود يونس ومحمد شديف  
ومحمود عبده .

الرئيس - بيشتغل ايه ده .

الشاهد - رئيس مكتب ادارى القاهرة .

الرئيس - بيشتغل ايه غير رئيس ادارى مكتب القاهرة ؟

الشاهد - في وزارة المعارف

الرئيس - موظف في وزارة المعارف ؟

الشاهد - ايوه .

**الرئيس —** فى اى بلد ؟

**الشاهد —** فى مصر

**الرئيس —** ما عندناش وزارة بالاسم ده . . .

**الشاهد —** أقصد وزارة التربية والتعليم .

**الرئيس —** برضه واخدها على قاعدة ومن لم يحكم بما أنزل الله فأولئك هم الفاسقون . . مش بالنص والمعنى .

**الشاهد —** أقصد وزارة المعارف سابقا .

**الرئيس —** بس تعرفوا تعملوا الثلاث آيات بتوع سورة المائدة . . قول كمل كلامك

**الشاهد —** قال لنا ابراهيم الطيب ايه راىكم فى انسا عايزين تعارض الاتفاقية وطبعا راى المركز العام ظاهر وراى المرشد فاه راىكم فى مظاهرة .

**الرئيس —** قول من تانى . . عايزين تحكى من الاول بالترتيب، المدعى — انتم اتكلمتم فى الاجتماعات دى عن خطة قول لنا الكلام اللى دار واهى هى الخطة ؟

**الشاهد —** الاجتماع اللى اذكره حدث فى عمارة غمره .

**الرئيس —** والاجتماع اللى ماتذكروش حصل فيه ايه ؟

**الشاهد —** لا ده بمناسبة الكلام بتاع حضرة المدعى باروى الحادثة اللى باذكرها بالضبط وهى الخاصة باجتماع غمره وبقية الاجتماعات كانت للتنظيم والترتيب .

**الرئيس —** طيب قول لنا ذكرتم فيه ايه ؟

**الشاهد —** اقترح ابراهيم الطيب عمل مظاهرة .

**الرئيس —** مظاهرة كان وضعها ايه ؟

**الشاهد —** مظاهرة شعبية تقوم لمعارضة الاتفاقية .

**الرئيس —** ازاي تقوم ومين يقوم بيها ؟

**الشاهد —** الاخوان المسلمين .



الرئيس — فين ؟

الشاهد — في القاهرة .

الرئيس — طيب كمل .

الشاهد — لكن رد بعض الموجودين اننا حنعرض الاخوان للفناء لانهم حيواجهم البوليس ويمكن يطلق عليهم الرصاص او حاجة زى كده فقال ايه المانع تكون مظاهرة فيها بعض الاسلحة من الناس القادرين ليقاوموا البوليس اذا واجههم .

الرئيس — قررت انك بتتعاون مع المسلمين من اهل بلدك ؟

الشاهد — ايوه .

الرئيس — والبوليس من اهل بلدك أولا !

الشاهد — ايوه

الرئيس — ولما يمنع مظاهرة يبقى بيؤدى الواجب بتاعه ؟

الشاهد — ايوه

الرئيس — والدعوة علمتك ان واحد بيؤدى واجبه تعارضه .

الشاهد — لا

الرئيس — ما تعارضوش ؟

الشاهد — لا .

الرئيس — امال تخرجوا ليه بالاسلحة لتعارضوا البوليس

الى بيؤدى واجبه ؟

الشاهد — ده اقتراح من ابراهيم الطيب .

الرئيس — كان ردك عليه ايه ؟

الشاهد — باعتبارى اضعف الموجودين واحداثهم وفيه ناس

اقدم منى لم اتكلم .

الرئيس — السكوت دليل الموافقة مش فيه مثل يقول كده

... كمل بقية الخطه .

الشاهد — الى حصل بالضبط انه حصل نقاش في هذا الموضوع

فابراهيم قال طيب اتركوا الموضوع لان فيه ناس مهمتهم التفكير  
بتفكر فى الموضوع .

الرئيس — مين الناس دول .

الشاهد — يوسف طلعت وآخرين .

الرئيس — زى مين ؟

الشاهد — انا اعرف ان يوسف طلعت مسئول ولكن لما قال  
ابراهيم ان فيه ناس مهمتها التفكير تأكدت انه فيه آخرين  
بيعاونوه .

الرئيس — يعنى هل يوسف طلعت هو المسئول لوحده ؟

الشاهد — انا سبق ان ذكرت ان يوسف طلعت هو المسئول  
ولكن لما جه ابراهيم وقال فى الاجتماع ان هناك ناس قاعدين  
للتفكير فى مثل هذه الامور وفى المجالات دى بتصدر التعليمات من  
المجموعة وبتنفذ برأى واحد .

المدعى — مين المجموعة دى ؟

الشاهد — جازم مثلا بعض أعضاء مكتب الارشاد .

الرئيس — زى مين ؟

الشاهد — ما اقدرش احدد .

المدعى — يعنى كل مكتب الارشاد .

الشاهد — مش كله .

المدعى — مين فيهم ؟

الشاهد — حيبقى استنتاج .

الرئيس — مين المسئول عن النظام السرى ؟

الشاهد — يوسف طلعت وكام واحد .

الرئيس — يوسف عضو فى مكتب الارشاد ؟

الشاهد — لا .

الرئيس — مين رئيس الجماعة ؟

الشاهد - المرشد .

الرئيس - مين المسئول عن التنظيمات الموجودة في الجماعة ؟

الشاهد - المرشد المسئول الاول والاخير .

الرئيس - لما يكون فيه نظام سرى مين مفروض يعلم بيه ؟

الشاهد - المرشد العام .

المدعى - هل يجوز ان توضع خطة بدون موافقة المرشد

العام ؟

الشاهد - اعتقد انه لايمكن ان يصدر أمر بدون موافقته .

المدعى - قلت في كلامك انه كان فيه اجتماعات كام اجتماع

تم وفين ؟

الشاهد - حصل عدة اجتماعات في عمارة عاليه عند القصر

العينى عند سراية الامير السابق محمد على في عمارة كبيرة

اسمها ..

المدعى - عمارة الهامى حسين ؟

الشاهد - ايوه في آخر دور ..

الرئيس - يعنى كلهم غاويين العلالي .

الشاهد - واجتماع آخر في المنيل في منزل آخر يواجه محطة

البنزين وحدث كذلك عدة اجتماعات في بيت كمال السنانيرى

وكانت فيه اجتماعات كذلك في مكتب ابراهيم الطيب .

المدعى - في الاجتماعات دى ما تسلمتوش منشورات ؟

الشاهد - لا وده كان في اجتماعات العمارة بتاعة منيل البروضة

وكانت تدور حول راي المرشد ومكتب الارشاد وتتناول

الاتفاقية .

المدعى - ايه كانت المنشورات دى ؟

الشاهد - كانت بتقول ان الاتفاقية غير سليمة .

الرئيس - ما فكرتش غير سليمة ليه ؟

**الشاهد - فكرت لما نقلت في ٩/٨ وعلمت أن كل ما حدث كان  
تضليل .**

**الرئيس - كان تضليل ؟**

**الشاهد - أيوه .**

**الرئيس - من مين ؟**

**الشاهد - من البيان اللي أصدره مكتب الارشاد .**

**الرئيس - بخصوص .**

**الشاهد - البيان اللي صدر بخصوص الاتفاقية كان تضليل .**

**الرئيس - تضليل من مكتب الارشاد ؟**

**الشاهد - أيوه .**

**الرئيس - من أعضاء مكتب الارشاد ؟**

**الشاهد - منير الدله وعبد القادر عوده وخميس حميده  
ونفس المرشد وصلاح أبو رقيق وحسين كمال الدين ومش  
مين كمان .**

**الرئيس - تعرف مين وزير الشئون البلدية والقروية .**

**الشاهد - لا .**

**الرئيس - تعرف تقول مين وزير المالية ؟**

**الشاهد - بعد عبد الجليل العمرى ما اعرفش ... انا  
ذاكرتى ضعيفة جدا .**

**الرئيس - بقى ذاكرتك ضعيفة وفاكر عبد الجليل العمرى  
وما انتش فاكر بتاع النهارده .**

**الشاهد - لا والله .**

**المدعى - كنت تقوم بتوزيع منشورات ؟**

**الشاهد - أيوه كنت اجيب منشورات في الشعبة في مصر  
الجديدة وأديها لرؤساء المناطق ورؤساء المناطق يوزعوها على  
المناطق والشعب .**

الرئيس - عايز تفهمنى ان واحد من الصف الاول من الاخوان  
مشر عارف مين رئيسه يعنى لو انشالت الرئاسة وجه باروخ  
وحايم وقعدوا تعرف مين .

الشاهد - ده سر الثقة التى اخذنا بها .

الرئيس - آه ... بقى انتوا اخذتم بسر الثقة .

الشاهد - أيوه الثقة العمياء وكانت سبب الكارثة وكانت  
لاتجعلنا نبحت عن أسماء

الرئيس - كانت بتتولد فيكم ازاي الثقة دى ؟

الشاهد - من الاجتماعات التى كنا نعملها كنا ان اللى معانا  
ناس يتحدثون باخلاص وسلامة نية ماكناش نفهم انهم ناس  
ييعملوا لمصلحتهم الشخصية ولكن دلوقت تبين لنا ان مكتب  
الارشاد ضلنا لان اعضاؤه كانوا ييعملوا لمصلحتهم الشخصية .  
الرئيس - انت انضميت للاخوان سنة ٤٢ - ٤٤ هل كان  
المرشد اتعين ؟

الشاهد - أيوه حسن البنا كان موجود .

الرئيس - هو حسن البنا اللى اتعين والا هو صاحب الدعوة  
لا اقول اتعين يبقى كلامى منصب على مين ؟

الشاهد - على حسن الهضيبي .

الرئيس - هل كان الهضيبي اتعين ؟

الشاهد - لا .

الرئيس - حضرت تعيين حسن الهضيبي ؟

الشاهد - أيوه

الرئيس - اتعين ازاي ؟

الشاهد - بعد فترة الحل الاولى فى سنة ٤٨ انا كنت فى  
ادفو فى اسوان وبلغنى انه بعد الاخوان ما افرج عنهم اجتمع  
مكتب الارشاد القديم وعين حسن الهضيبي .

- الرئيس - وبعدين ؟  
الشاهد - دى كل معلوماتى فى الموضوع  
الرئيس - كان يشتغل ايه ؟  
الشاهد - مستشار فى المحكمة  
الرئيس - كان بيحكم بابه ؟  
الشاهد - بقوانين الدولة .  
الرئيس - وطلع من المستشارية بتاعته ليه ؟  
الشاهد - استقال ليقوم بعمل المرشد للجمعية  
الرئيس - هو عنده كام سنة ؟  
الشاهد - حوالى ٦٠ سنة .  
الرئيس - يعنى قعد لغاية سن الستين يحكم بالقانون  
الموجود ؟  
الشاهد - أيوه .  
الرئيس - ما استقلش ليه من زمان وقال لازم تحكموا  
بالقرآن ؟  
الشاهد - دى حاجة تخصه هوه .  
الرئيس - وتدعوك للثقة فيه ؟  
الشاهد - ماليش دعوه بيه أنا فى صفوف الاخوان .  
الرئيس - وهو ... مش رئيس الجمعية ؟  
الشاهد - أيوه  
الرئيس - واذا كنت على رأس الجمعية بتاعتك تعمل ايه ؟  
الشاهد - ابلغ احتجاجى بواسطة نائب الشعب  
الرئيس - واذا كان ماسألش فيك ؟  
الشاهد - اتصل برئيس المنطقة .  
الرئيس - وبعدين ؟  
الشاهد - اتصل بالمكتب الادارى

- الرئيس — واذا المكتب الادارى ماسألش ؟  
الشاهد — ما اقدرش اعمل حاجة .  
الرئيس — وتفضل قاعد .  
الشاهد — أيوه  
الرئيس — وبعدين تقول الثقة العمياء هى سبب الكارثة .  
الشاهد — ده اللى حصل  
الرئيس — طيب ارجع بنا للاجتماع اللى قعدت ساكت فيه  
كان يقولوا لكم ايه فى الاجتماعات .  
الشاهد — كان كلها تشمل قراءات فى الحديث للامام الشهيد  
حسن البنا وكتبه والقرآن وكانت كل المعانى التى تكتب بأسلوب  
الامام الشهيد حسن البنا كلها تدعو الى الثقة والطمأنينة فى  
صفوف الاخوان .  
الرئيس — هل هذه هى الدعوة الى الدين ؟  
الشاهد — هه ؟  
الرئيس — سؤالى هل هذا هو تعليم الدين الاسلامى .  
الشاهد — تعليم الدين من الكتب والقرآن .  
الرئيس — والقرآن . مانتش حافظه ؟  
الشاهد — للأسف ذاكرتى ضعيفة ولو أن ذاكرتى قوية كنت  
أحفظه .  
الرئيس — تعرف ايه من معانى القرآن عامة ؟  
الشاهد — انه دين السماحة والنصح ودين العزة والكرامة .  
الرئيس — وبس فيه حاجة ثانية غير كده ؟  
الشاهد — لا . . . بس  
الرئيس — يعنى ده الدين الاسلامى اللى عرفته فى القرآن  
بعد ١٢ سنة فى الاخوان المسلمين وبعد الاجتماعات للدراسة  
القرآن وكتب الامام الشهيد وبعدين يصل الحد بيك الى هنا

الكلام هل هذا ماتعلمه عن القرآن . . . ماتعرفش أبدا ان القرآن ده قانون يحدد علاقة الانسان بالانسان . الفرد بالفرد والفرد بالمجموع والفرد بالرب ويعلمك ويقويك علشان ماتكونش كذاب ومنافق .

الشاهد - أيوه ده اللي تعلمته في القرآن .

المدعى - التعليمات اللي قيل لك انها حتنزل في الوقت المناسب ما نزلتش ؟

الشاهد - ما نزلتش .

الشاهد - ما سألتش ايه السبب ؟

الشاهد - سألت قالوا لى خير .

المدعى - يعنى فيه تعليمات نزلت ؟

الشاهد - أيوه

المدعى - الثقة العمياء ما خلتكش تسأل

الشاهد - لغيابى عن المنطقة ما حبتش اتبحر معاه .

الرئيس - ماحبتش تببحر معاه ؟

الشاهد - أيوه

الرئيس - خصوصا وانت متعود انك تببحر في الموضوع . .  
الدفاع ؟

الدفاع - اذا كان الجهاز السرى كما قلت كان من اجل الدفاع عن البلاد ضدالمعتدى لما أدى الى البلبلة التى أشرت اليها فى صدر كلامك . . انت قلت انه حصلت بلبلة أدت الى حل الجهاز القديم ايه سببها ؟

الشاهد - كانت بخصوص حادث المرحوم السيد فايز أحد أعضاء الإخوان وكلنا نعلم أن الحادث بتاعه غير مشرف ولايقبه الاسلام قطعا .

الدفاع - ليه ؟



- الشاهد — مش من طريقة الاسلام .
- الرئيس — ايه الحادث ده ؟... قول لنا على الحادث وعلى طريقة الاسلام علشان نحققها على حد قولكم .
- الشاهد — حصل ان بعض اعضاء الاخوان وصل لبيت السيد فايز صندوق ولما جه يفتحه قتل هو وأخوه
- الرئيس — ومين وصل له الصندوق ؟
- الشاهد — واحد من الاخوان
- الرئيس — كيف حكمت ان الحادث غير مشرف ؟
- الشاهد — الطريقة دى
- الرئيس — عرفت الطريقة منين ؟
- الشاهد — سمعت
- الرئيس — يعنى بتحكم بالسمع على الموضوعات من غير ما تتحقق منها .
- الشاهد — انا تكلمت عما أعرفه وليس عما سمعته .
- الرئيس — انت مش قلت انك سمعت انت كاذب أو صادق ؟
- الشاهد — ايه وجه الكذب .
- الرئيس — كذاب أو صادق ؟
- الشاهد — .....
- الرئيس — ( للمتفرجين ) قال كده والا لا .
- أحد المتفرجين — أيوه قال كده
- الشاهد — يجوز فيه لبس
- الرئيس — طبعا ماهى دى الطريقة اللى انتم ماشيين بيها الكلام العايم وسورة آل عمران تحفظوهم الآيات الخاصة بالجهاد وان الجنة للمجاهدين فى سبيل الله ولكن من هم المجاهدين فى سبيل الله وما هو القرآن مش عارفين .
- الدفاع — هل تعتبر قتل السيد فايز جريمة ؟

- الشاهد — طبعاً .  
الدفاع — وقتل النقراشى حلال ؟  
الشاهد — جريمة  
الدفاع — طيب وليه قلت السيد فايز بس ؟  
الشاهد — أنا لسه ما كملتش  
الرئيس — مهلا يا سيدى المحامى . . . ما هو أصل قتل  
السيد فايز كان قبل قتل النقراشى ما هو أصل احنا راجعين  
الى الوراء الى ما قبل الاسلام الى الجاهلية .  
الدفاع — وقتل الخازندار حرام .  
الشاهد — أيوه  
الدفاع — اسلام او كفر .  
الشاهد — كفر  
الدفاع — وقاتله ؟  
الشاهد — يدخل النار  
الدفاع — حدث فى عهد مين قتل الخازندار ؟  
الشاهد — فى عهد حسن البنا  
الدفاع — والنقراشى ؟  
الشاهد — فى عهد حسن البنا .  
الدفاع — ومن يقر القتل كافر او مسلم ؟  
الشاهد — . . . .  
الدفاع — يبقى حسن البنا كافر او مسلم ؟  
الرئيس — للشاهد — ماتردش على هذا السؤال وارجو من  
الدفاع ألا يتعرض للمرحوم حسن البنا . . .  
الدفاع — هل يحتاج نشر الدعوة الى نظام سرى ؟  
الشاهد — النظام كان فيه سرى وعلنى فى آن واحد .  
الدفاع — هل أفهم من هذا أن الاخوان كلهم فى الجهاز السرى ؟

**الشاهد -** لا مشى كلهم .

**الدفاع -** هل الصف الاول أعضاؤه كلهم أعضاء فى الجهاز السرى ؟

**الشاهد -** هذا ما أعتقده .

**الدفاع -** قلت بأن السمع والطاعة فى دعوة الإخوان المسلمين أمر ..... ماذا تعنى بهذا ؟

**الشاهد -** أقصد أننا أتربينا على النظام وعلى أن نسمع ونطيع لرؤسائنا فى الجماعة .

**الدفاع -** ما هو جزاء الخارج عن القاعدة الذى ماينفذ بالسمع والطاعة ماهو جزاء من لا يستجيب للأمر الصادر إليه ؟  
**الشاهد -** ما أقدرش أحدد جازى يعتبر من غير الإخوان .

**الدفاع -** وبس

**الشاهد -** جازى كده

**الدفاع -** هل كنت تستطيع أن تخالف الأوامر التى تصدر اليك .

**الشاهد -** اذا كانت مخالفة للإسلام لا بد أن أخالفها .

**الدفاع -** وهل خالفت أنت أى أمر ؟

**الشاهد -** لم يحدث لانه لم يصدر الى أمر يخالف القاعدة السليمة للإسلام .

**الدفاع -** لماذا لم تكن تستحق أن تحل محل الخضرى فى رياسة الجهاز السرى .

**الشاهد -** الاستاذ الخضرى رجل ذو مكانة ومتعلم أكثر منى وذو ثقافة عالية ويجيد الخطابة وتعبيراته وتوجيهاته أقدر وأنا شخص كنت عضو عادى فى الشعبة وبعدين بقيت نائب شعبة حدائق القبة فى إبريل .

**الدفاع -** وهل مهمة الجهاز السرى التوجيه والخطابة

والبيان . التوجيه والخطابة طبيعتها أن تكون علنية .  
**الرئيس -** ظهر في الاجتماع أنه توجيه للقيام بمظاهرات  
مسلحة تضرب في البوليس اذا تعرضت قواته للمظاهرة .  
**الدفاع -** اذن لم يكن الجهاز السرى وعى وتوجيه وتفكير  
ولكن سلاح .

**الرئيس -** والقدرة على التوجيه ... هي لعمل مظاهرات  
مسلحة ضد البوليس لمنع الحكومة من أداء واجبها يبقى ايه  
الداعى أنه يكون أحسن منك يكونش لان صباعه على ( التتك )  
أحسن منك ..

**الشاهد -** ما أعرفش

**الرئيس -** أصلكم ماشيين على الطريقة الامريكاني باين من  
النظم بتاعتكم والبروجانده اللى بتعملوها حوالين نفسكم والرمل  
اللى تذروه في عيون الناس انت قلت تعتقد أن جميع رجال  
الصف الاول من الاخوان في الجهاز السرى ؟  
**الشاهد -** نعم

**الرئيس -** نفهم من ذلك ان جميع اعضاء مكتب الارشاد في  
الجهاز السرى ؟

**الشاهد -** جائر

**الرئيس -** بقى ده جائر والثانى أعتقد ؟

**الشاهد -** أنا أحكم على نفسى مقدرش أحكم على قاس  
لا أعرفهم .

**الرئيس -** انت حكمت على الصف الاول من الإخوان تقدر  
تنتقل الى الصف بتاعك وبعدين نشوف كيلهم في الجهاز السرى .  
زى ما تحكموا على الآيات وتفصلوها عن القرآن وتضحكوا بها  
على الجهلة السباكين والسمرية. والتجارين والخرديواتية .  
سكوت طبعاً ... صمت كامل ... مفيش كلام ... تعلق

- تقول ايه . . نحب نسمع تعليقك .
- الشاهد -** تبينت أن الجماعة ممشيانا في الطريق الخطأ
- الرئيس -** ايه هو
- الشاهد -** معارضة الاتفاقية .
- الرئيس -** بس كده ؟ بس معارضة الاتفاقية ؟
- الدفاع -** هل باقى الطريق كان صوابا ؟
- الشاهد -** اعتقادی الصحيح أيوه
- الرئيس -** والجهاز السرى كان صح ؟
- الشاهد -** هذا وضع لا دخل لى فيه
- الرئيس -** الجهاز السرى كان صح ؟ يا صح . يا غلط .
- الشاهد -** الاتجاه الاخير كان خطأ
- الرئيس -** والاتجاه الاول ؟
- الشاهد -** الاتجاه اللى بنى عليه كان سليم .
- الرئيس -** اتكلم فى النصف الاول للاتجاه .
- الشاهد -** اللى هو ايه
- الرئيس -** اللى تكلمت عليه فى النصف الثانى انه غلط . قلت غلط على ايه ؟
- الشاهد -** على أن مهاجمة الاتفاقية غلط .
- الرئيس -** يعنى الجهاز السرى كلن غلط . طيب بالنسبة للجزء الاول من الاتجاه ؟
- الشاهد -** المحافظة على الدعوة كان صح .
- الرئيس -** وقتل النقراشى ؟
- الشاهد -** لا غلط وأنا أتكلم عن الجهاز الاخير فقط ؟
- الرئيس -** حدد لنا ما هو الوضع الاخير وما هو الوضع الاول وما هو الوضع الاوسط ان وجد ؟
- الشاهد -** الوضع الاخير بعد مارس ٥٤ أو ٤٣ بعد اعادة

- الاخوان في الفترة الاخيرة .
- الرئيس — الظاهر ان كل حاجة عندهم تدل اننا راجعين للخلف . ٥٤ . يعنى ٤٣ .
- الشاهد — ده الجهاز الثانى . الاخير .
- الرئيس — والجهاز الاول ؟
- الشاهد — الفترة الاولى .
- الرئيس — اللى هى ؟
- الشاهد — بتاعة الامام الشهيد حسن البنا الاولى .
- الرئيس — الاولى اللى يلعبوها الاولاد ؟ الحجلة ؟
- الشاهد — بتاعت الامام حسن البنا
- الرئيس — وقتل النقراشى ؟ وقتل الخازندار ؟ اللى الثورة عفت عنكم وطلعتكم من السجون علشان كانت هابله . كانت ثورة هابله وقايمين بها شوية هبل وطلعتكم من السجون الاعمال دى بتاعت الجهاز السرى ايام حسن البنا كانت صح والا غلط ؟
- الشاهد — غلط .
- الرئيس — يبقى الجهاز السرى كان صح والا غلط .
- الشاهد — ايوه .
- الرئيس — ما تنطق . . يبقى مش بس مهاجمة الاتفاقية كان غلط فى جماعة الاخوان . . كان الجهاز السرى غلط . . مش كده والا ايه ؟
- الشاهد — ايوه .
- الرئيس — ليه تخفى بعض الحقائق ؟
- الشاهد — أنا قلت انه صح عن الفترة الاخيرة لاننا كنا جنتلاشى هذه الاخطاء .
- الرئيس — وانت رضيت بتلاشى الاخطاء ؟
- الشاهد — كانوا صادقين فى هذا .

**الرئيس -** ورضيت انك تقعد مع الصف الاول من جماعة  
الاخوان المسلمين في عمارة غمرة وترض وتسكت وتوافق على  
قيام مظاهرة شعبية مسلحة ضد الحكومة .

**الشاهد -** لم نوافق .

**الرئيس -** قررت فيما قبل انك سكت لانك اضعف واحد .

**الشاهد -** سكت وانتهى الاجتماع على اننا لم نوافق .

**الرئيس -** أنا باتكلم انك انت سكت . مش باتكلم عن الباقي .

**الشاهد -** أيوه .

**الرئيس -** وسكوتك كان موافقة ؟ من رأى منكم سنكرا

فليقومه . بآيه ؟ كمل .

**الشاهد -** بيده .

**الرئيس -** بيده واللى بسيفه . . وبعدين

**الشاهد -** بلسانه .

**الرئيس -** وبعدين .

**الشاهد -** بقلبه .

**الرئيس -** وده يبقى آيه ؟

**الشاهد -** أضعف الايمان .

**الرئيس -** وانت ايمانك أضعف الايمان لانك مرضتش تقاوم

بلسانك ( ضحك )

**الشاهد -** الاجتماع انتهى على اننا لم نوافق عليه .

**الرئيس -** افرض ان الاصوات كانت في صف الاخوان ووافقوا

عليه ؟

**الشاهد -** قالوا لنا ليس لكم شأن في هذا فيه ناس آخرين

مسؤولين .

**الرئيس -** يعنى لم يأخذوا اصواتكم ؟

**الشاهد -** لا .

الرئيس - آمال ازاي لم توافقوا ؟  
الشاهد - حدث نقاش في الموضوع .  
الرئيس - وانت قلت ايه ؟  
الشاهد - لا اذكر ما قلته على وجه التحديد .  
الرئيس - طيب تقدر تقول لنا ايه اللي قلته على غير التحديد ؟  
( ضحك )

الشاهد - ما كنتش موافق طبعا .  
الدفاع - هل كان من الممكن ان تدعو اى مواطن الى الانخراط  
في الجهاز السرى .  
الشاهد - لا .  
الدفاع - ليه ؟

الشاهد - لانه مش من القائمين بدعوة الاخوان المسلمين .  
الدفاع - مادام مهمة الجهاز السرى التقويم والارشاد والتعاون  
على الخير لماذا تحرم منه بقية الاخوان ؟  
الشاهد - لان وضعى محدود مكانش عندى فرصة

الرئيس - لو كان عنده الفرصة كان عمل جهاز سرى اكثر من  
كده كان عمل انقلاب على اكتشاف الجلاء تحت اسم الدين هم  
يعرفوا قل هو الله احد ؟ وباعتين محمود عبد اللطيف علشان  
يكون الطلقة الاولى في الخطة من جهاز طويل عريض .. احكى  
يا سيدى .. فتح الله عليك ...

الدفاع - قلت ان اساس الدعوة الثقة ؟  
الشاهد - ايوه ماقدّم  
الدفاع - هل كانت الثقة قاصرة على الاخوان المسلمين دون  
بقية المواطنين ؟  
الشاهد - كانت عامة  
الرئيس - هو انتم من طينة واحدة ؟



الشاهد — طبعاً

الرئيس — الحمد لله

الدفاع — قلت ان المنشور الى وضعه مكتب الارشاد عن

المعاهدة كان تضليل

الشاهد — أيوه

الدفاع — ايه هو معنى التضليل ؟

الشاهد — قالوا ان المعاهدة لا تتفق مع مصالح البلاد والواقع

ان المعاهدة أحسن . . .

الرئيس — مش عايزين رأيك في المعاهدة . ال ٢٢ مليون

مستغنيين عن رأيك أنت في المعاهدة ومستغنيين عن رأى جماعة

الاخوان المسلمين في المعاهدة . . ال ٢٢ مليون مش ال ٢٠٠ ألف

على اقصى تقدير كما قال معاون الضرائب أو مأمور الضرائب

عارفه مين ؟

الشاهد — سيد أبو سالم

الرئيس — انت عارف اسمه ؟ اشمعنى ذاكرتك قوية هنا ؟

الشاهد — لانى سمعت كده لما كنت معاه فترة في السجن

الرئيس — لمحت كلمة وفاكرها !! أما الكلام الى قلت انه دار

بالنسبة للاقتراح بتاع الثورة الشعبية المسلحة للجهاز السرى في

الدور الخامس في الهواء فوق . . ده مش فاكراه . قل لى على

وجه التحديد . ده صدق والا كذب . اذا كان يقبله العقل يبقى

صدق . يقبله العقل ؟

الشاهد — الى تحكم بيه

الرئيس — مش لك رأيك الخاص ؟ انا بأسألك يقبله العقل

والا لا ؟

الشاهد — مقدرش أعرف بالتحديد تقصد ايه ؟

الرئيس — ساعة ما تنزلق في الركن معرفش حاجه . تعرف

الى راح يكشف على نظره وقال له العلامة فين قال على الورقة .  
قال له الورقة فين قال له على الحيطه . قال له الحيطه فين ؟  
( ضحك )

**الدفاع —** هل يمكن أن تسمى التضليل فتنة ؟ تضليل الشعب ؟  
**الشاهد —** مقدرش أعرف

**الدفاع —** لما تضلل فريق من الناس . ده نتیجته الاختلاف  
أم لا ؟

**الشاهد —** نعم

**الدفاع —** وحين يختلف أفراد الوطن حول أمر جوهرى  
هل يسمى فتنة أم لا  
**الشاهد —** فتنة

**الدفاع —** وما جزاء الفتنة فى الاسلام ؟  
**الشاهد —** القتل .

**الرئيس —** ما الغرض الذى يستهدفه مكتب الارشاد من  
التضليل ؟ ما هو المأرب ما هو الهدف ؟ ما هى الغاية ؟

**الشاهد —** الحقيقة تبين ان نيتهم سيئة فى هذا التضليل .  
**الرئيس —** ليه

**الشاهد —** لان الاتفاقية سليمة وهم يقولوا مش سليمة .

**الرئيس —** يبقى كان غرضهم ايه ؟ الاتفاقية سليمة وقالوا انها  
مش سليمة يضللوا الناس ليه ؟

**الشاهد —** جايز للحصول على سمعة

**الرئيس —** ولما يحصلوا سمعة يحصل ايه ؟

**الشاهد —** أو على مركز

**الرئيس —** وبعد ما يحصلوا على مركز ؟

**الشاهد —** يبقى وصلوا لما ربهم

الرئيس - والمركز ده معمول علشان خاطر ايه ؟ يستفيدوا منه ؟

الشاهد - طبعا عايزين يستفيدوا

الرئيس - يعنى عايزين يوصلوا للمركز ده علشان يستفيدوا؟

الشاهد - أيوه

الرئيس - تقدر تقول لى ماهو المركز اللى حبوا يوصلوا اليه ؟

الشاهد - واضح من الاعمال الاخيرة انهم عايزين يوصلوا الى الحكم .

الرئيس - كويس

الدفاع - سؤال آخر . وهل تساوى المراكز تضليل شعب؟

الشاهد - من الظلم تضليل شعب علشان المراكز

الرئيس - والتضليل يتطبق فى اسلاميا ؟

الشاهد - فى المنافقين .

الرئيس - والمنافقين حكمهم ايه ؟

الشاهد - الكفار

الرئيس - والكفار وضعهم ايه ؟ اوصف الكفار

الشاهد - الذى يجحد بنعمة الله

الرئيس - يعنى اذا اكلت لقمة عيش وما قلتش الحمد لله

تبقى كافر ؟

الشاهد - الحكاية مش حكاية كلام

الرئيس - ما هو الكفر ؟

الشاهد - ....

الرئيس - من ائمة الاخوان ويعلم الدعوة فى الجماعة اللى

هو فيها من سنة ٤٢ - ٤٤ لغاية سنة ٥٤ . ومش عارف

كلمة الكفر يعنى ايه ؟

حضرتك بتشتغل ايه

الشاهد - معاون فنى

الرئيس - فين ؟

الشاهد - فى قسم مكافحة البلهارسيا

الرئيس - تحب ننتهى من شهادتك كما بداناها . سنك كام سنة ؟

الشاهد - ٣٣ سنة

الرئيس - علشان تبقى زى الموسيقى تبدأ كما تنتهى .  
محتة فنية !! مع السلامة

( يخرج الشاهد )

الرئيس - والله الدولة ما كان اغناها عن تضييع هذا الوقت

الادعاء - قعدنا نسأله من ٣ - ٩

الرئيس - هات الشاهد اللى بعده ( نودى على الشاهد )

الرئيس - اسمك ايه ؟

الشاهد - اسماعيل عارف رزق

الرئيس - بتشتغل ايه ؟

الشاهد - طالب بكلية الزراعة

الرئيس - سنة

الشاهد - رابعة

الرئيس - البكالوريوس ؟

الشاهد - ايوه

الرئيس - سنك كم سنة ؟

الشاهد - ٢٦ سنة

الرئيس - جامعة ايه ؟

الشاهد - القاهرة

الرئيس - تعال يا اسماعيل . ايه ده ؟

الشاهد - مصحف

**الرئيس** — قول والله العظيم أقول الحق والله على ما أقول  
وكيل ( وردد الشاهد القسم )

**المدعى** — انت من جماعة الاخو ان؟

**الشاهد** — أبوه

**المدعى** — من سنة كام ؟

**الشاهد** — حوالى سنة ١٩٧٠

**المدعى** — معلوماتك ايه عن النظام السرى ؟

**الشاهد** — كلمة الجهاز السرى لا أعرف عنها شيء أعرف ان  
فيه حاجة اسمها فصائل وأنا حديث العهد للتفكير عن الموضوع  
ده خالص .

**الرئيس** — على صوتك علشان الناس مش سامعين وبعدين  
يعملوا مظاهرة مسلحة ضدنا ويشتكونا ( ضحك ) .

**الشاهد** — اتصلت بالعمل ده من حوالى سبتمبر سنة ١٩٥٤  
اتصل بى يوسف طلعت وفهمنى ان فيه فى تنظيم الاخوان حاجة  
اسمها الفصائل والاسروانى سأكون حلقة صلة بينه وبين ابراهيم  
الطيب ووصلنى بابراهيم الطيب . وابراهيم عرفنى بأربعة وقال  
كل واحد مسئول عن فصيلة والفصيلة مكونة من ٣٠ وسائل  
تكون كده أو أقل .

**المدعى** — تكلم عن الفصيلة ومجموعها وعددها .

**الشاهد** — الفصيلة ٣٠ واحد مقسمة الى اربع مجموعات كل  
مجموعة سبع افراد وأحيانا تكون انقص من كده لما يقل العدد  
عن ٣٠ ويوجد اثنين مسئولين قائد الفصيلة وقائد ثانى لها .

**المدعى** — والتسليح ؟

**الشاهد** — لا أعرفه بالضبط ولكن كان يوصلنى أوراق أوصلها  
للسيد الرئيس علشان يودى اسلحة الى جهات معينة بالتعاون  
مع فؤاد مكاوى .

المدعى - يوصل أسلحة ؟

الشاهد - أيوه .

المدعى - ما هي ؟

الشاهد - لم ارها ولكن البيانات اللى كانت توجه فى الأوراق .  
ففيها أشياء معينة توصل لشبرا وحلوان ومصر القديمة .  
ووصل لشبرا ومصر القديمة ١٦ بندقية وعدد من القنابل  
معرفة فوش ويمكن يكون فيه جلعنايت واللى راح حلوان .

الرئيس - الجلعنايت ده ايه ؟

الشاهد - مواد مفرقة .

الرئيس - دى اللى بينطقوها قبل ما يقولوا بابا ( ضحك )

الشاهد - كنت احد الافراد فى النقل فقط ومعرفة فوش عنها

الرئيس - رايح تعمل ايه فى المعادى . تفرق مصنع الاسمدة  
والا عبد العزيز كامل وعبد الفتاح موسى .

الشاهد - ...

المدعى - الاسلحة علشان ايه ؟

الشاهد - المسئولين عنها اربع افراد . كل فرد مسئول عن  
ثلاث فصائل ولما فهمنا اخيرا ان الاسلحة دى تعد لاحداث  
شغب فى الوضع القائم فى البلاد كان لنا رأى مخالف للرأى ده .  
المدعى - ايه الخطة دى .

الشاهد - قالوا انهم يخشوا من اغتيال المرشد وبعض  
شخصيات الإخوان فكانوا يعدوا أشياء ايجابية لمواجهة أى شيء  
يحدث . وقالوا يحتمل يكون فيه مظاهرات او اغتيالات او  
نسف او خلافه ولكن لم يحددوا شيئا بالذات .

الرئيس - وده يعملوه امتى ؟

الشاهد - محدوش بالضبط بالنسبة لى . ولما سألت قالوا  
كل شيء رهن بوقته .

**الرئيس -** وانت كنت تعتقد ان وقتها امتى ؟ او من المقطوع  
ممكنش امتى ؟

**الشاهد -** لم يحدد بالضبط .

**الرئيس -** مش كنت توصل التعليمات ؟

**الشاهد -** ايوه .

**المدعى -** ما آخر تعليمات وصلتها ؟

**الشاهد -** مجرد أوامر ينفذوها .

**الرئيس -** تعتقد ان الوقت ده كان موقوت امتى ؟ اعمل  
( استبعاد ) انت لخبطت مخ الواحد . طلع جزء . استبعد اوقات  
لا يمكن يحصل فيها الكلام ده ؟ احصر العملية فى بعض الاوقات  
باعتبارك احد افراد الجهاز وتحمل الاوامر من جهة الى اخرى .

**الشاهد -** لم يكن لى صلة بهذا الوضع خالص . . صحيح  
تت من الاخوان وفرد منهم ولكن ليس لى صلة بالجهاز السرى .

**الرئيس -** امال كنت بتوصل اوامر الثورة الشعبية ؟

**الشاهد -** فهمونى ان دى حاجة عامة سيقوم بها الاخوان .

**الرئيس -** تبقى حاجة سرية ؟

**الشاهد -** ايوه .

**الرئيس -** تبقى تعرف الجهاز السرى ؟

**الشاهد -** فرق بين ده وده . .

**الرئيس -** اذا كان حاجة سرية تتناول موضوع اسلحة وثورة  
شعبية مسلحة تقوم باغتيالات لافراد الحكومة تبقى ايه ؟ تبقى  
سر هزار ؟

**الشاهد -** لا

**الرئيس -** حسب

**الشاهد -** لا كان فيه أشياء لايقلولوها لاي شخص . . .

**الرئيس -** بما انك متعلم . وبكالوريوس زراعة . . انت

أتولدت لقيت نفسك بكالوريوس ، والا اتعلمت .

**الشاهد - أيوه**

**الرئيس -** استبعد أوقات مش ممكن تبدأ فيها الاغتيالات والمظاهرات

**الشاهد -** قالوا ان الحالة متوترة والجرائد تتكلم كثيرا . وكان فيه احتمال خصوصا بعد اختفاء المرشد - والاخوان كلهم كانوا ثائرين على هذا الوضع وقالوا يحتمل يحصل له اى حاجة . ويصح تقوم مظاهرات احتجاج على كده .

**الرئيس -** احتجاجتم على ايه ؟ علشان ان جرى حاجة تروح المعادى وتجيب برنات واستنات ومظاهرات شعبية وقنابل مولوتوف علشان ايه ؟ علشان واحد يعتقل . . قبل مايجى البقر تتحضر المتأود .

**الشاهد -** قالوا ان دى حاجة موجهة للاخوان عموما . .

**الرئيس -** عموما مش المرشد

**الشاهد -** ويحتمل ناس تانيين .

**الرئيس -** وايه الدلائل اللى اكدت ان الحكومة ستتعتقل الاخوان وآخرين ؟

**الشاهد -** لان الجرائد كانت تتكلم عن المرشد كلام شديد .

**الرئيس -** زى ايه ؟

**الشاهد -** مش متذكر بالضبط

**الرئيس -** عرفت تذاكر دروسك من سنة ثالثة لسنة رابعة بكلية الزراعة جامعة القاهرة ؟

**الشاهد -** أيوه

**الرئيس -** كيف ؟

**الشاهد -** كنت جاي من البلد علشان اذاكر للبكالوريوس . عندنا علوم لازم تتذاكر فى الاجازة . وكنت اروح المشتل واللاتينى



كان يفيد في السنة الاخيرة . فقابلني يوسف طلعت في مسجد شريف وقال لى انت فاضى . قلت له انا باستعد للمذاكرة قال اعطينا من وقتك جزء بسيط قلت له ايه وضعى قال العمل ده بالذات . انك ستوصل اخبار لافراد وكان معاه ابراهيم الطيب .

**الرئيس - لماذا بعد أن تأخذ البكالوريوس تطالب الحكومة بالدرجة السادسة الفنية وانت في البكالوريوس ترضى أن تعمل ساعى بريد . . موصلاتى . .**

**الشاهد - ما أرضاش . .**

**الرئيس -** انت مش اشتغلت ساعى . . موصلاتى . . ده انت حتى ماوصلتش لساعى البريد . . لان ساعى البريد محترم ويعمل عملا عشان يكسب رزقه منه . . . لكن انت عارف انت عملت زى ايه . . . اقول لك . . حاجة اولها ( م ) . . . اتكلم . .

**الشاهد -** الاربعة اشخاص الذين اتصلت بهم ما اعرفهمش . واحنا لما شفنا الاخوان اتجهت اتجاه زى ده كنا مجمعين على اتخاذ خطة مضادة . . لانه قد يحدث من جانب الاخوان اشتباك مسلح . . فاحنا كنا جميعا نفكر فى الاتصال بالمسؤولين فى الجماعة لاننا اعتقدنا ان الناس دول يتصرفوا تصرفات من عندهم دون الاتصال بالمسؤولين . .

**الرئيس -** مين المسؤولين دول ؟

**الشاهد -** المسؤولين عن الاخوان . .

**الرئيس -** زى مين ؟

**الشاهد -** الاستاذ المرشد . .

**الرئيس -** والمرشد كان فين ؟

**الشاهد -** كان مختفى . .

**الرئيس -** وتأخذ رايه ازاي اذا كان مختفى . .

**الشاهد -** طلبنا من الاستاذ ابراهيم الطيب مقابلته . .

الرئيس — كان يعرف مكانه .. ؟

الشاهد — اتصلنا به ..

الرئيس — وقال لك ايه .. ؟

الشاهد — أخذ رأينا بأننا عاوزين تقابله .. ولم يرد علينا ..

وفي الآخر ..

الرئيس — قال لكم ايه ؟

الشاهد — لما أكمل كلامي في الجزء الاول ...

الرئيس — لا ... قولى وبعدين في الجزء الثانى ..

الشاهد — قال رأينا التفاهم مع الحكومة وانتهاج خطة سلمية

تؤدى بالاخوان الى التفاهم بين الاخوان والحكومة .. وفي نفس

الوقت لاتعرض سلامة الوطن الى الخطر .

الرئيس — والجزء الاول ..

الشاهد — هو رد علينا ....

الرئيس — اصلى انا مخى مشقلب .. احب اعرف حته من

هنا .. وحتة من هنا ..

الشاهد — طيب ..

الرئيس — قول الجزء الثانى وبعدين قول الجزء الاول ..

الشاهد — الجزء الاول .. لما شفنا حاجة زى دى ليس في

مصلحة الدعوة أو الوطن ... الاخوان في مجموعهم والشعبان

مجمعين على اساس ان هذه السياسة خطأ .. فعاوزين يتأكدوا

هل هذا هو رأى الاخوان ومكتب الارشاد أو فيه حاجة تانية

تملى هذه الارادة ...

الرئيس — بتقول اتنا كنا متأكدين ان هذه السياسة خطأ

ومع ذلك انخرطوا في سلك الجهاز السرى بما فيه من أسلحة ..

الشاهد — ارادوا أن يتأكدوا ...

الرئيس — من مين ؟

**الشاهد** - من المسئولين من الاخوان.. هل هذه هي السياسة العامة ونحن لم نسمع من المسئولين أى خطة ...

**الرئيس** - اذا كانت هذه هي السياسة العامة وتأكدتم انها غير سياسة الاخوان . . فليه بقيتم فيها ؟

**الشاهد** - لن تكون ...

**الرئيس** - وليه عملت موصلاتى لما أنت لم تسمع كلام المسئولين . . وشفت انهم يجيبوا أسلحة ويبتكلموا عن ثورات عسكرية مسلحة . . أنت مش بلغت التعليمات بعمل مظاهرات وثورة مسلحة . .

**الشاهد** - أنا لما علمت بخطورة الموقف . . .

**الرئيس** - ما شتمك الا اللى مبلغك . . وانت كنت بتبلغ وبتوصل كلام . .

**الشاهد** - عاوز أقول احنا انتهينا على ايه ...

**الرئيس** - انتهينا الى هنا ...

**الشاهد** - بس سيادتك خد كلامى وأنا أقول الحق . . .  
**وبعدين أنا واثق فى عدالة المحكمة ...**

**الرئيس** - لا يا شيخ . .

**الشاهد** - أيوه . .

**الرئيس** - أقسم ...

**الشاهد** - والله . . .

**الرئيس** - والله ايه ؟

**الشاهد** - والله أنا باقول الحق . .

**الرئيس** - اتكلم ...

**الشاهد** - ابراهيم الطيب فهمنا اخيرا لما وجد هذا الشعور موجود فهمنا . . وفهمنى أنا بالذات ان مقابلة المسئولين غير ممكنة . . وانهم عدلوا رأيهم وان رأيهم مفيش حاجة . . ولا

يحصل شيء .. وانهم في طريق تسليم الاسلحة للحكومة ..  
والتفاهم معها على كل ما فيه الخير من ناحية الدعوة والوطن ...  
ليس هناك نية مظاهرات أو اغتيالات ..

**الرئيس —** ماهى شروط القاء السلاح .. ؟

**الشاهد —** رأينا احنا الاخوان الشباب ان شروط الاخوان انهم  
يبعادوا عن السياسة .. لان هذا هو الذى اودى بالاخوان ..  
وتعبهم هو ناحية السياسة واندماجهم فيها اكثر من اللازم ..  
وكان الصلة بين القيادة والاخوان تكاد تكون معدومة .. وكل  
واحد يتصرف على كيفه .. وافهمت ابراهيم الطيب ان هذه  
السياسة قوبلت بالترحيب وكنا في طريقنا الى تصفية الجو  
تماما ...

**الرئيس —** وهل هذا هو شرط أن تترك الاخوان حقل  
السياسة ؟

**الشاهد —** مش تتركها .. انما مش بالطريقة التى كانوا  
سايرين عليها بالعناد .

**الرئيس —** يعنى برضه يتكلموا فى السياسة ..

**الشاهد —** يكتفوا بالسياسة الرشيدة ..

**الرئيس —** ما الفرق بين السياسة الرشيدة والسياسة التى  
تقراها فى الجرائد ..

**الشاهد —** أنا أفهم ...

**الرئيس —** ما الفرق بين كلمة السياسة والسياسة الرشيدة.  
أنت توصف لى وصف دقيق وجميل ...

**الشاهد —** السياسة الرشيدة هى التى تؤدى بالاخوان الى بر  
السلامة دون أى احتكاك أو مصادمة ...

**الرئيس —** ماهو بر السلامة بتاع الاخوان ؟

**الشاهد —** أن يصلوا الى هدفهم دون معارضة المسئولين ..

**الرئيس -** ماهو الاضطهاد الذى تعرض له الاخوان من الحكومة منذ ٢٣ يولية سنة ١٩٥٢ ؟  
**الشاهد -** لاشك ان الثورة فى الاول قابلت الاخوان اكرم  
مقابلة ..

**الرئيس -** وماذا كان رد الاخوان على هذه المقابلة الكريمة ؟  
**الشاهد - انحراف ..** ولهذا كنا عاوزين نرى رأى المسئولين لان الاخوان الموجودين اصرروا على ان تتغير سياسة الاخوان ..  
**الرئيس -** لماذا تطوعت لحمل بعض الرسائل وهذه كانت تحمل فى طياتها الاوامر السرية وتتعلق بالاسلحة وتتعلق بجمهرة ضد الحكومة الموجودة واستعمال العنف .. ولا تذهب وتبلغ المسئولين ... تعرف المسئولين مين ؟

**الشاهد -** الحكومة ... واقول ان مجموع الشباب رأى انه اذا تركنا هذا الامر فقد نبعد ويستلم العمل آخرون يأتون بأعمال تضر سياسة البلد ...

**الرئيس -** يعنى انت بكلامك ده تدلل وتثبت على نفسك انك انسان من الصف الاول فى جمعية الاخوان المسلمين ..  
**الشاهد -** حلم سيادتك ...

**الرئيس -** خايف تترك المركز احسن السياسة تنحرف ...  
**الشاهد -** أنا ماكنتش اعرف حاجة .. والى اعرفهم آحاد الله كانوا معايا فى القنال .. اما الباقي فلا اعرفهم .. ولكن لما كنت اقابلهم يفهمونى رأى الاخوان الذين معهم .. وأنا اوصله الى المسئولين .. والى آخر لحظة جاء لنا ابراهيم الطيب وقال انه كل شىء انتهى

**الرئيس -** انت هوائى .. ؟

**الشاهد -** لا ...

**الرئيس -** أمال ايه ؟

- الشاهد — الى تشوفه سيادتك ...
- الرئيس — الى اشوفه — أنا أسألك ...
- الشاهد — فيه ايه غير هوائى ...
- الرئيس — سلكى ولا سلكى .. وأرضى ..
- الشاهد — المحكمة تقدر هذه الظروف ..
- الرئيس — كل العملية اللي تعنيك .. رسائل .. شابل  
رسالة من هنا .. وتوصل من هنا ل هنا .. وتتكلم مع هذا ..  
وتقنع هذا .. وتتكلم مع هذا .. الموضوع كله رسالة في رسالة ..
- الشاهد — ما حصلش كده ...
- الرئيس — الموضوع كله رسالة في رسالة ...
- الشاهد — أنا مش مهمتى أقنع حد .. أنا جيت لقيت وضع  
قائم ..
- الرئيس — ليه لم تقنع من تتصل بهم ان رأيك غير موافق ...
- الشاهد — كان رأيهم أساسا كده ...
- الرئيس — لا تتكلم كلاما متناقضا ...
- الشاهد — أنا اقنعت بعض الاخوان ان الموقف العدائى لا يصح  
... وسيادتك قدر ظروفى ...
- الرئيس — ايه ظروفك .. واقف ٢٤ قيراط .. لابس  
بدلتك .. ما حدش بيكلمك .. بكالوريوس .. متعلم ٢٤  
قيراط .. مش سمكرى لا تفهم .. وبنسمع شهادتك أقدر  
ظروفك فى ايه ... ايه اللي يدعوك تقول هذا ؟
- الشاهد — مافش، حاجة ...
- الرئيس — أنا بأسألك سؤال رد عليه ... اتفضل اتكلم ..
- الشاهد — لو سمحت لى سيادتك ... ايه السؤال ...
- الرئيس — نسيتته .. اتكلم فى اى حاجة ... فى اى موضوع  
بعجيبك ... كلمنى فى الزراعة ...
- الشاهد — سيادتك مسئول عن الاصلاح الزراعى ... وان

شاء الله اكلمك فيه في وقت تانى ...

الرئيس — ان شاء الله ... في وقت تانى ...

الشاهد — أنا غرضي المحكمة تقدر شعور شباب الاخوان ..  
هل بين الشباب والحكومة أو أحد المسئولين أى ثأر .. أو أى  
شئ يدعوهم الى أن يحملوا أى حقد أو ضغينة ... ؟

الشاهد — أى واحد من شباب الاخوان .

الرئيس — من هم شباب الاخوان الذين تخصصهم ... هل هم  
ال ٢٢ مليون الذين يحملون ضغينة .. ؟ من هم ؟

الشاهد — العشرة اللي راحوا في فلسطين أو القنال من الشباب  
.. هل بينهم وبين المسئولين أى شئ خاص ...

الرئيس — اشمعنى تخصص العشرة دول ولا تخصص الجيش  
الى كله راح فلسطين .. من سلاح المشاة .. وسلاح الطيران ..  
والقوات البحرية .. اشمعنى تقدر هذا الشعور ولا تقدر هذا  
الشعور أو الحقة اللي بينك وبين سيدنا الشيخ .. مادخل هذا  
في الموضوع .. هل نحن نتكلم عن الشعور ... بنتعاب ...  
الشاهد — لا ... أنا أؤدى شهادة ...

الرئيس — احنا بنتعاب ... شعور ايه ومعانى ايه ...  
اتكلم عن الجهاز السرى والرسائل ... ده الموضوع اللي جاى  
شاهد عليه ... كل واحد من الموجودين قرأ كتب أو كده .  
( اشارة سيادته بيده ) .. انت جاى علشان تتكلم عن الجهاز  
السرى وما هو غرضه .. ومن المسئولين عنه .. وما هو السبب  
في ان الاخوان يعملوا جهاز سرى مسلح ... من المسئول عن  
تدبير هذه السياسة في الجماعة ... هل هو المرشد .. هل  
هو مكتب الارشاد .. أو واحد غير المرشد .. وهل يمكن لاحد  
غير المرشد ان يدير هذه السياسة ... هذا هو الكلام الذى  
تكلمنا فيه .. وانت راجل متعلم .. وعضو في جمعية الاخوان  
وتعلم ان فيها جهاز سرى .. وتعلم ان هناك أسلحة ورسائل ..  
تنقلها من هنا وهناك ... كلنا في هذا الموضوع ... عن المستوى

العالى بتاعك .. انت فى البكالوريوس .. هل تعرف الدولة بتدفع لكل تلميذ فى الجامعة اللى انت فيها كام .. الذين يدفعون مصروفات الدولة تدفع لهم ١٢٠ جنيه سنويا من فلوس المواطنين التى تأخذها الحكومة منهم ضرائب على السجائر وعلى كل شىء يستعملوها .. كل طالب فى الجامعة يكلف الحكومة ١٢٠ جنيه فوق المصروفات التى يدفعها اذا كان يدفع مصروفات ...  
**الشاهد -** أيوه ...

**الرئيس -** وانت وصلت الى سنة رابعة .. دفعت كام جنيه ..  
**الشاهد -** كنت آخذ مجانية وبادفع ٥٠ جنيه رسوم اضافية .. والسنة دى والسنة اللى فاتت .. والسنة اللى قبلها دفعت رسم كامل حوالى ١٧ جنيه ..

**الرئيس -** دول بس اللى انت دفعتهم ... ٥٠ ، ٥٠ ، ١٧٠ ... يعنى كل اللى دفعته ٢٦ جنيه ... علشان تبقى فى بكالوريوس الزراعة ... وتخرج وتتطالب الحكومة بالدرجة السادسة .. وتكون من حملة بكالوريوس الزراعة « B . S . C » وعشان تيجى امام المحكمة وتكلمنا الكلام الفارغ الغير مرتبط ... وترضى لنفسك ان تشتغل موصلاتى ... كلمنا عن هذا المستوى .. هذا الذى نريده ... ايه هو الجهاز السرى ... وما علاقته بالاخوان .. ومن المسئول عنه .. ومن الذى يدير سياسة .. الجهاز السرى ... ماتعرفش الجهاز الذى كان عنده أسلحة ويخبيها .. ده اسمه الجهاز السرى .. اتكلم ومفيش أسئلة بعد كده ...

**الشاهد -** يوسف طلعت لما قابلنى .. وصلنى بإبراهيم الطيب ... وإبراهيم الطيب وصلنى الى أربعة آخرين حتى أوصل الرسائل الى الأشخاص دول ... واذا كان عندهم أى حاجة ...  
**المدعى -** مين الأشخاص دول ؟

**الشاهد -** المسئولين عن الفصائل .. وهم محمد عثمان



عبد الله . . وعلى نويتو وعبد الرؤوف ايه مشى عارف . . ومحمد يوسف . . .

الرئيس - محمد يوسف مسئول عن الجماعة ؟

الشاهد - فصيلة السيدة زينب . . ومعاها فصيلتين تانيين . . ونويتو مسئول عن فصيلة امبابة ومعاها فصيلتين تانيين . . ومحمد عثمان عبد الله مسئول عن الوسط . .

الرئيس - الوسط يعنى ايه ؟

الشاهد - الحقة بتاعة وسط القاهرة . . ومشى عارفها بالضبط . .

الشاهد - عرب جهينة . . وشبرا . . وكنت اقابل يوسف طلعت وابراهيم الطيب كان يتصل بى مرة كل اسبوع او اكثر من مرة

الرئيس - كنت تقابل ابراهيم الطيب . . ؟

الشاهد - ايوه . . وكان يتصل بى الاربعة دول مرة كل اسبوع . . .

الرئيس - يتصلوا بك مرة كل اسبوع . . على الاقل ولا على الاكثر ؟

الشاهد - لا . . . على الاقل . . .

الرئيس - او تقريبا . . .

الشاهد - لما شفنا الوضع السائد . . وعلمنا هذه الظروف تكلمت مع ابراهيم الطيب زى ما قلت فيما سبق . . وهذه تكملة له وهى ان احنا ابدينا رغبتنا لابراهيم الطيب ان يوصلنا الى المسئولين . .

الرئيس - يا ابنى قل لنا ما هو الجهاز السرى والغرض من انشاء ايه ؟ ولا تقول لما شفنا كده وما شفناش كده . . . غرض انشاء الجهاز السرى ايه . . . ؟

الشاهد - يوسف طلعت قابلنى مرة واحدة وقال لى ان ابراهيم

- الطبيب هو الصلة بينى وبينه علشان اتصل بالناس دول ..  
الرئيس — متصل بآيه ؟  
الشاهد — يوسف طلعت وناس تانيين ..  
الرئيس — ومن تحت ..  
الشاهد — بى ..  
الرئيس — وانت تتصل بمين ؟  
الشاهد — بالاشخاص المسئولين عن الفصائل ...  
الرئيس — ورؤساء الفصائل مسئولين عن آيه ؟  
الشاهد — عن المناطق ..  
الرئيس — القاهرة مقسمة الى اقسام .. وكل قسم فيه فصيلة  
ورئيس كل منطقة هو رئيس الفصيلة .. وهو متصل بيسك  
وانت متصل بابراهيم الطيب .. وابراهيم الطيب متصل  
بيوسف طلعت .. تقدر تقول لى رئيس منطقة القاهرة مين ؟  
الشاهد — ابراهيم الطيب مسئول عنها ...  
الرئيس — وانت اركان حربه .. الرديف بتاعه ..  
الشاهد — ...  
الرئيس — خسارة الى ما رحتش كلية الهندسة ..  
المنعى — ما الغرض من التنظيم السرى .. ؟  
الرئيس — مين رئيس منطقة القاهرة ؟  
الشاهد — ابراهيم الطيب ..  
الرئيس — ومين اركان حربه ؟  
الشاهد — ما اعرفش اركان حربه ..  
الرئيس — طيب .. يبقى آيه مركزك .. حلقة الاتصال بين  
مين ومين ؟  
الشاهد — أحب ايين لسيادتك حته صغيرة ..  
الرئيس — ما تبينش حاجة .. رد على السؤال ... مين  
الى كان يوصل ابراهيم الطيب برؤساء المناطق .. ؟  
الشاهد — أحيانا .. كان ابراهيم الطيب يتصل بهم مباشرة

الرئيس - ومن كان يتصل بالمناطق ..

الشاهد - أنا ...

الرئيس - أركان حربه ابراهيم الطيب او دلدوله ..

الشاهد - ...

الرئيس - معلش .. وانت كنت ايه ... اما ان تكون

اركان حربه .. او المساعد بتاعه .. او الرديف بتاعه .. او

الدلول ..

الشاهد - ...

الرئيس - عبر عن مجموعة الكلمات دى بكلمة واحدة ..

انت كنت همزة الوصل بين ابراهيم الطيب ورئيس الجهاز

السرى فى القاهرة وبين رؤساء الفصائل فى المناطق .. حط

الكلام ده كله فى كلمة واحدة ..

الشاهد - ....

الرئيس - كل واحد عارف انك الرديف او المساعد بتاع

ابراهيم الطيب .. واستبعد ان تكون دلدول لانك كنت من

الصف الاول فى الاخوان ومتعلم الدعوة الاسلامية وفى بكالوريوس

الزراعة .. وخلينا فى صف المتهم علشان زى ما بيقلوا الشك

يبقى فى صالح المتهم وانت عندك شك فخلينا فى صفك ...

بعدين .. مين فوق ؟

الشاهد - عرفت ان ابراهيم الطيب يتصل بيوسف طلعت ..

ولا أعرف من يتصل بيوسف طلعت ..

الرئيس - هذا النظام كله يكون ايه .. ؟ يعنى الجهاز جزء

من ايه ؟

الشاهد - جزء من دعوة الاخوان المسلمين ..

الرئيس - الدعوة الى ايه ...

الشاهد - الى الخير ..

الرئيس - الجهاز السرى دعوة الى الخير الى فيه جلبنايت

الى اخذه سيد الرئيس الى المعادى و ١٧ بندقية على ما تظن ..

- الشاهد** - افكر ١٦ بندقية ..
- الرئيس** - متاسف .. غلط في واحدة .. هل هذه هي دعوة الى الخير .. ودعوة الاخوان دعوة الى الخير ؟
- الشاهد** - ايوه يافندم ..
- الرئيس** - والدعوة الى الاسلام .. ؟
- الشاهد** - دعوة الى الخير والاسلام ..
- الرئيس** - الاسلام يجي ثانيا ...
- الشاهد** - الاسلام دعوة الى الخير ..
- الرئيس** - يعنى الواحد يقول انا خير بدل انا مسلم ...
- مش عارف تتكلم وبكالوريوس زراعة ...
- المدعى** - يوسف طلعت مسئول امام مين ؟
- الشاهد** - ما عرفش ..
- المدعى** - فى التحقيق قلت انك فهمت انه مسئول امام هيئة مكونة من الاخوان برياسة المرشد ..
- الشاهد** - قلت امام مكتب الارشاد .. او من هيئة من الاخوان المسئولين برياسة المرشد ..
- الرئيس** - لماذا تنكر الان ذلك يامحترم .. ولا تقول ان يوسف طلعت مسئول امام مين ؟
- الشاهد** - انا لم انكر ... مسئول امام هيئة معينة ..
- الرئيس** - لازم يكون واحد معين ..
- الشاهد** - المرشد ..
- الرئيس** - اى جهاز فى الاخوان .. مين مسئول عنه . او مين يرسم سياسته .. ؟
- الشاهد** - مكتب الارشاد .. او المرشد ...
- الرئيس** - ومين رسم سياسة الجهاز السرى ...
- الشاهد** - مفروض انه مكتب الارشاد ...
- الرئيس** - من المسئول عن الجهاز السرى ؟
- الشاهد** - مكتب الارشاد ...

الرئيس - مكتب الارشاد أو المرشد . . ؟  
الشاهد - المرشد . .  
الرئيس - الجهاز السرى من المسئول عن سياسته . . . ؟  
الشاهد - مكتب الارشاد . .  
الرئيس - من المسئول عن الجهاز السرى . . .  
الشاهد - مكتب الارشاد طبعاً . . . ورأى الاستاذ المرشد  
مالوش قيمة . .

الرئيس - الخمسة سنتى أطول أو الاربعة ؟  
الشاهد - الخمسة سنتى أطول . . .  
الرئيس - والله براقو . . . عرفت منين . . .  
الشاهد - اتعلمت كده . . .  
الرئيس - قستهم على بعض . . . ؟  
الشاهد - أيوه . . .  
المدعى - كل أمر يبرم من مكتب الارشاد لابد من عرضه على  
المرشد ؟  
الشاهد - أيوه . . .

المدعى - قلت ان آخر تعليمات وصلتك من ابراهيم الطيب  
الى رؤساء المناطق الاربعة هو ان نكونوا مستعدين . . . ايه يعنى  
معنى الاستعداد .

الشاهد - يكونوا باستمرار موجودين وعلى صلة بهم ومحدث  
يكون غايب عن القاهرة . .

المدعى - هل هذا معنى الاستعداد ؟  
الشاهد - مستعدين لاي حاجة . . . مظاهرات أو أى  
حاجة . .

المدعى - مستعدين بالسلاح ؟  
الشاهد - فيه حئت معينة اخذت سلاح . . وفيه حئت  
ماخدتش . . ومحتمل قبل ما استلم العمل يكون فيه اى حاجة .

**المدعى** - فى كلامك الاول قلت ان آخر تعليمات قمت بتوصيلها هى استعداد الفصائل بالسلاح لاحتمال القيام باى عمل من الاعمال ولم يكن هناك اى تفصيل .. كما ذكرت ان ابراهيم الطيب ابلفك هذه التعليمات لابلاغها الى رؤساء المناطق .. فايه الخطه بالتفصيل كما شرحتها فى التحقيق ؟..

**الشاهد** - اذا سمحت تذكرنى بها ...

**الرئيس** - لا .. ما تذكر كش ...

**الشاهد** - ما اذكرش اى تفاصيل معينه .. وكل حاجة تيجى فى حينها .. وكان يحصل ان ابراهيم الطيب يتصل بالفصائل اتصالا مباشرا دون الرجوع لى ... وكان بيحصل كثيرا توصل حاجة معينه لكن هو ما حدديش ...

**الرئيس** - انت حافظ سورة آل عمران ...

**الشاهد** - لا ...

**الرئيس** - هل قراتها ..

**الشاهد** - ايوه ...

**الرئيس** - ايه الدرس اللى طلعت بيه .. من سورة آل عمران ..

**الشاهد** - مش متذكر ..

**الرئيس** - وانت من رجال الصف الاول للدعوة الخيرة وآخر ناس يعرفوا اى حاجة حتى على الدرس العام الذى تطلع بيه من سورة طويلة عريضة تكون جزء او جزئين فى القرآن لانها تطلع حوالى جزئين من القرآن .. والقرآن كله ٣٠ جزء ..

**المدعى** - هل كنت فى اجتماع غمرة ؟

**الشاهد** - لا يافندم

**الرئيس** - ايه اجيب لك .. شهادة مين .. مين يعجبنا

علشان يشهد عليك ..

**الشاهد** - فى اجتماع غمرة ؟

**الرئيس** - فى غمرة ..

المدعى - المحكمة سألت الشاهد عن ايه الغرض من النظام الخاص فلم يجب عليه ايه الغرض من النظام الخاص ؟  
الشاهد - اجتماع غمرة لا أعرف عنه شيئا ..  
المدعى - ايه الغرض من النظام الخاص ؟  
الشاهد - طبعى أعرف التكوينات الموجودة ... وكلمة نظام خاص مش موجودة بالنص ده .. انما اللي أعرفه ان الاخوان مكوئين فصائل ..

المدعى - والغرض من الفصائل دى ايه  
رئيس النيابة - قل لنا الغرض من الفصائل دى كان ايه  
الشاهد - حماية الدعوة ..  
رئيس النيابة - من ايه  
الشاهد - من أى اعتداء  
رئيس النيابة - اعتداء من مين ..  
الشاهد - ...  
رئيس النيابة - من مين يعنى .  
المدعى - مين اللي يعتدى عليها  
الشاهد - ...

الرئيس - من برد يعنى .. من زكام ؟  
الشاهد - بعض الاسلحة كانت معدة من قبل والاخوان راحوا فلسطين .. يعنى الاسلحة مش حاستغل هنا .. مثلا انا أعرف ان السلاح راح القنال ..  
الرئيس - السلاح راح القنال ، والا انتم كنتم بتخبوه ..  
الشاهد - ....

الرئيس - تعرف ضبطنا سلاح الاخوان فين  
الشاهد - فين يافندم  
الرئيس - تحت قبة شيخ .. وهم اللي طلعهوا بايديهم ..  
لانه ما كانش يجول فى مخنا ان حد يخبى السلاح تحت قبة شيخ .. ( ضحك ) .

قل لنا باه الغرض بتاع الجهاز السرى ..  
المدعى - ايه الغرض من الجهاز السرى ؟  
الشاهد - ...

المدعى - موجهها كلامه للسيد رئيس المحكمة - اقواله  
موجودة هنا فى محضر التحقيق تسمحوا لنا نذكره بها  
الرئيس - اتفضل ..

المدعى - سئل الشاهد .. ما هى الخطة ، فكان جوابه  
ان الخطة تشمل عمليات من اغتيال الى نسف الى استيلاء  
على المنشآت العامة الى تكليف افراد الفصائل بدراسة مناطقهم ،  
واحتمال القيام باى عمل من الاعمال ، وانهم كانوا سيتلقون  
اوامر من ابراهيم الطيب باغتيال أعضاء مجلس قيادة الثورة  
عدا اوامر أخرى جديدة كتكليف فصيلة أو أكثر للقيام  
بمظاهرات لتأييد الاخوان واستنكار موقف الحكومة .

الرئيس - طبعاً الكلام ده نسيته زى الدرس اللى اخذته  
فى سورة آل عمران .

الشاهد - لا متذكركه ..

الرئيس - متذكركه ..

الشاهد - ايوه .. وانا قلت هذا الكلام دلوقتى ..

الرئيس - موجهها كلامه للحاضرين - الكلام ده قاله دلوقتى  
الحاضرون - لا .. لا ..

الرئيس - يعنى دول كذابين وانت اللى صادق .

الشاهد - لا ..

الرئيس - يعنى تبقى انت كذاب والا صادق .

الشاهد - ...

الرئيس - ده تضليل .. تقول كلام ولا تعرفشى معناه .

الشاهد - يافندم كل الكلام اللى أنا قلتة ومكتوب فى

التحقيق أنا ماضى عليه .. بس أنا مش حافضه ..



الرئيس — بعد المدعى ما قرأ الكلام ، قلت انك ذكرت هذا الكلام ..

الشاهد — قلته بس مش هنا .

الرئيس — انت قلت انك قلته هنا .

( وقد أشهد سيادة الرئيس الحاضرين فقالوا ان الشاهد

لم يذكر هذا الكلام في الجلسة ) .

الرئيس — ايه رأيك بأه .

الشاهد — اصل أنا بانسى .

الرئيس — يعنى انت معترف بهذا الكلام امام المحكمة .

الشاهد — أيوه يافندم .

الرئيس — ٢٤ قيراط .

الشاهد — أيوه ..

الرئيس — مع السلامة .

الشاهد — ممكن أتكلم في اجتماع غمره لو سمحت يافندم .

الرئيس — لا .. مع السلامة ..

( وعلى اثر ذلك انصرف الشاهد )

الرئيس — افكر ناخذ راحة نص ساعة .. ترفع الجلسة ..

( رفعت الجلسة في الساعة الثانية عشرة والدقيقة العشرين

بعد الظهر )

### استراحة

( أعيدت الجلسة في الساعة الواحدة والدقيقة الخامسة

عشرة بعد الظهر ) .

الرئيس — المدعى ..

المدعى — دلوقتى المحكمة حاتسمع لون جديد من الشهود .

الشاهد حلمى عبد السلام ..

( نودى على الشاهد فحضر ) .

الرئيس — اسمك ايه .

- الشاهد — حلمى عبد السلام هلال .  
الرئيس — بتشتغل ايه .  
الشاهد — عندي محل حدادة .  
الرئيس — عندك كام سنة .  
الشاهد — ٢٨ سنة .  
( اخرج السيد رئيس المحكمة مصحفا صغيرا من جيبه  
ووضعه على المنصة وطلب من الشاهد أن يحلف اليمين عليه )  
الرئيس — عارف ده ايه .  
الشاهد — ايوه . . مصحف . .  
الرئيس — قل . والله العظيم اقول الحق ولا شئ غير الحق  
والله على ما اقول شهيد  
( حلف الشاهد اليمين )  
الرئيس — موجهها كلامه للشاهد — شوف . . المدعى حابسالك  
اسئلة ، فانت ترد على أنا . .  
الشاهد — حاضر يا فندم . .  
المدعى — انت من جماعة الاخوان المسلمين . .  
الشاهد — ايوه . .  
المدعى — من كام سنة . .  
الشاهد — من اربع سنوات . .  
المدعى — ايه موضوع الجهاز السرى .  
الشاهد — احنا كان عندنا شعبة . . اقول لسعادتك موضوع  
الشعبة . .  
الرئيس — قول على اقل من راحتك .  
الشاهد — وبعدين حلت بامر عسكري ، فطبعي قفلنا  
الشعبة وما بقاش فيه حاجة خالص . . من مدة شهر ونص .  
كان يوم جمعة ، بعد ما صلينا الجمعة رجعت على البيت . .  
وانا نايم في البيت جاني واحد اسمه صلاح الدين عباس خليل .

طالب .. قعد .. وبعد كده قال لى . ايه رايبك عاوزين نعمل  
مجموعة فقلت له ايه المجموعة دى ، فقال لى انت حا تتدرب  
وتحفظ قرآن ، وتتدرب على التسليح .. حاجة زى كده ..  
قلت علشان ايه .. قال علشان يقوم كفاح شعبى ، فقلت  
له انا راجل عندى اولاد .. ثلاثة اولاد ، وانا راجل عندى  
عمل ولا دخل لى بذلك .. فأتت المرة دى .. ١٥ يوم  
بعثوا لى فى بيت واحد اسمه عبد القادر سيد حنفى سليمان ،  
ولقيت هناك صلاح وعلى نويتو وثلاثة اربعة .. فقالو لى  
برضه لسه مش موافق ، فقلت انا مليش دخل بهذا .. انا  
دخلت الجماعة علشان احفظ القرآن وانا راجل صاحب اولاد  
وباعول عيلة وماليش دخل بهذا .. وكان معاهم المنشور  
بتاع الاتفاقية ومصحف .. فطبقوا المنشور .. وقعدنا قرأنا  
شوية فى المصحف وبعدين انا مشيت .. ثالث مرة بعثوا لى  
بالطريقة دى ، فقلت لهم انا راجل صاحب اولاد وماليش دعوة  
بالشغل ده .. ده كل ماتم فى هذا الموضوع ..

**المدعى - مجموعتك كانت مكونة من مين ..**

**الشاهد -** صلاح خليل .. محمد محمود الشقيرى ..  
صفوت مسلم .. عبد القادر حنفى .. محمد رهونى ..  
يوسف غنام ..

**المدعى -** ما سالتوش يعنى ايه الثورة الشعبية دى .

**الشاهد -** قالو حاتقوم ثورة شعبية وحاتساعدوها المجموعة  
دى ..

**المدعى -** الثورة الشعبية دى ضد مين ..

**الشاهد -** ضد الشعب والحكومات ..

**المدعى -** ضد مين

**الشاهد -** ضد الشعب والحكومات .. ده اللى فهمته منهم

**الرئيس -** علشان ايه الثورة دى

- الشاهد** — كان معاك المنشور بتاع الاتفاقية ..  
**المدعى** — بتقول فيه ايه المنشور ده  
**الشاهد** — مكتوب عليه الاتفاقية .. كان فيه كام بند .. انما  
انا ما شفتوش وما قرئتوش  
**المدعى** — شفت كام منشور  
**الشاهد** — شفت المنشور ده معاه .. ومرة ثانية على نويتو  
جاب منشورات وفرقوها فى ملعب الكورة ..  
**المدعى** — كانوا بيوزعوها ازاى  
**الشاهد** — صلاح اداها للطلبة  
**المدعى** — المجموعة بتاعتك كانت تابعة مين  
**الشاهد** — صلاح خليل  
**المدعى** — ومين رئيس صلاح خليل  
**الشاهد** — انا اعرف على نويتو الى كان بيعبى المجموعة ..  
**الرئيس** — ده كان رئيس صلاح  
**الشاهد** — ده هو الى كان يشرف على المجموعة  
**الرئيس** — تعرف انه كان فيه مجموعات ثانية  
**الشاهد** — ما اعرفشى .. والله ثلاثة لو كنت اعرف كنت  
اقول عن كل حاجة ..  
**الرئيس** — واحنا مصدقين .. يوم ما رحب عند على نويتو  
وصلاح خليل ، لما بيعتوا لك ورحت لهم فى البيت وكان معاهم  
المنشور بتاع الاتفاقية ومصحف .. وقالوا لك ماغيرتش رايتك ..  
فقلت لهم لا .. وبعدين هم طبعوا المنشور وفتحوا المصحف ..  
**الشاهد** — قرينا فى المصحف  
**الرئيس** — قرأتم من سورة آل عمران  
**الشاهد** — قرينا ربيع ..  
**الرئيس** — حافظ سورة آل عمران  
**الشاهد** — ايوه ..

الرئيس — طيب معناه ايه الريع ده

الشاهد — أوله .. ال م ..

الرئيس — ما تسمعلش .. انت عارف معنى الريع ده ..

الشاهد — ما اعرفشى ..

الرئيس — ليه .. محدش شرحهواك

الشاهد — لا ..

الرئيس — ما قالولكش الثورة الشعبية حتكون ضد مين

الشاهد — ما أنا قلت انى كنت باسدد فى وشهم كل مايجيولى

السيرة دى .. وثانيا انا دخلت الاخوان علشان كان جانى واحد

وقال لى ان الاخوان بتدى القرآن والاحاديث : فلما جه الحل

حمدنا ربنا ...

الرئيس — علموك ايه فى الاربع سنين

الشاهد — فى الاربع سنين دول .. قبل الحل اللى فات ، كنا

بنحفظ قرآن ، وفيه حاجة كده اسمها .. يعنى كانت بتيجى

رسائل مكتوب فيها السنة الاولى والثانية لنظام الحكم لاسر

الاخوان .. وهذه الرسائل كان يبقى فيها خمس او عشر آيات

قرآنية ..

الرئيس — طيب .. قل لنا شوية فى تبارك .. قل لنا شوية

فى « تبارك الذى بيده الملك .. »

الشاهد — تبارك الذى بيده الملك وهو على كل شىء قدير ،

الذى خلق الموت والحياة ليبلوكم ايكم احسن عملا وهو العزيز

الففور الذى خلق سبع سماوات طباقا ما ترى فى خلق الرحمن

من تفاوت ، فارجع البصر هل ترى فطور ، ثم ارجع البصر كرتين

ينقلب اليك البصر خاسئا وهو حسير ، ولقد زينا السماء الدنيا

بمصابيح ....

الرئيس — صدق الله العظيم .. كفاية ..

الشاهد — صدق الله العظيم ..

- الرئيس — قل لنا معناها بأه ..  
الشاهد — التفسير مش في ذهنى .. تبارك الله الذى بيده ،  
الملك يعنى ..  
الرئيس — لا انا عاوز معنى كل اللى قرите ..  
الشاهد — مش عارف .. اصل دى حاجات بقى لها مدة ..  
قبل الحل ..  
الرئيس — تعرف محمود عبد اللطيف  
الشاهد — محمود عبد اللطيف ، انا طبيعى شفت صورته فى  
الجرائد  
الرئيس — لا .. من غير الصورة اللى فى الجرائد .. يعنى  
شفته قبل الحادثة  
الشاهد — لا .. انا ما اعرفوش ..  
الرئيس — ساكن فين  
الشاهد — فى وراق العرب  
الرئيس — تعرف هنداوى  
الشاهد — شفت هنداوى مرة ..  
الرئيس — فين  
الشاهد — بعد الخروج من المحنة .. رحنا لحسن الباشا ،  
وده كان معتقل ، فرحنا علشان نزوره وكان هنداوى عنده ، فقال  
لنا سلموا على هنداوى فسلمنا عليه ..  
الرئيس المدعى .. فيه اسئلة ..  
المدعى — لا .. مفيش اسئلة ..  
الدفاع — ليه حمدت ربنا لما حلت جمعية الاخوان  
الشاهد — علشان احنا كنا عاوزين نستريح .. اصل انا راجل  
عندى محل بتاع حداده وراجل اعمال .. وده عاوز الانسان  
يتفرغ لاكل عيشه ..  
الدفاع — يعنى كنت بتعتبرهم ماشيين غلط ، وعلشان كده  
حمدت ربنا

**الشاهد** - زى ما قلت لسعادتك ، انا راجل عاوز اتفرغ لاكل عيشى .. وانا راجل عندى اولاد ، والمفروض ان اللى زى يروح يدور عن زبون لاكل عيشه ..

**الدفاع** - لماذا لم تتركهم لوحدك ما دمت تؤثر الحل  
**الشاهد** - الظروف دى ما حصلتش قبل كده .. الاحوال دى انا ما شفتهاش قبل كده .. لو سبق وحصل حاجه كنت تركتهم ...

**الدفاع** - اى ظروف خلتك تحمد ربنا .. الكونهم انحلوا ..  
**الشاهد** - دول ناس كل ساعة بيعملوا اعمال ، وطبيعى انها ما ترضيش الحكام ..

**الدفاع** - ايه هى الاعمال اللى ما ترضيش الحكام  
**الشاهد** - الحاجات اللى بيعتقلوا عليها ..  
**الدفاع** - زى ايه مثلا

**الشاهد** - المرة اللى فاتت اتصلوا بالانجليز  
**الدفاع** - يعنى كل اللى ضايقتك من الاخوان وحمدت ربنا عليه انهم اتصلوا بالانجليز .

**الشاهد** - دول ناس الاعمال بتاعتهم ... المفروض يعنى ان الانسان وطبيعى ربنا يقول ...  
**الرئيس** - يقول ايه

**الشاهد** - يقول .. اطيعوا الله واطيعوا الرسول واولى الامر منكم ..

**الدفاع** - اولى الامر دول مين اللى تطيعوهم .  
**الشاهد** - الحكام .

**الدفاع** - ومنذ حلت الجماعة ، لماذا لم تترك الاخوان ؟  
**الشاهد** - فى المرة دى ما حصلش حاجة .

**الدفاع** - انما رجعت تانى  
**الشاهد** - هم لما جوني فى البيت .. واخدوني عندهم فى

البيت ، وطبيعى انا قعدت معاهم حوالى نصف ساعة ..  
**الرئيس** — انت قلت انك قابلتهم ثلاث اربع مرات .. مرة  
جولك فى البيت ، ومرة جالك صلاح يسالك عن رايتك فى الانضمام  
لهم وانت مارضتشى والمرة اللى قراتم فيها سورة آل  
عمران والمرة اللى سالوك فيها وقالوا لك انت لسه مصمم  
فقلت اه .. وانت كنت واحد من الجماعة دول اللى هم  
كانوا مين ..

**الشاهد** — هم قالوا ان المجموعة دى ما سكها صلاح ،  
وفيه عبد القادر ، وفيها محمد الفتيرى ، ومحمود رهونى ؛  
وصفوت ، وسعد غنام .. لا .. يوسف غنام ، فقلت لهم .  
**الرئيس** — دول عددهم يبقى كام ..

**الشاهد** — صلاح ، وعبد القادر ، وصفوت والفتيرى ،  
ومحمد رهونى ، ويوسف غنام وانا .. يبقى عددهم ستة ...  
**الرئيس** — سبعة .. كان فيه شعبة للاخوان موجودة  
فى مركز الوراق .

**الشاهد** — كان فيه شعبة وحلت .

**الرئيس** — وبعد مارجعت .

**الشاهد** — مارجعتش .. الشعبة لما حلت .. خلاص  
انتهينا ..

**الرئيس** — لما انت انبسطت من الحل وقلت بركة يا جامع ،  
رجعت تخش فى الجماعة تانى ليه

**الشاهد** — ماحصلشى .. انا مادخلتش الا علشان ...

**الرئيس** — الشعبة قبل ماتتحل كانت بتعمل ايه

**الشاهد** — كنا بنقرا القرآن والسيرة وكان موجود نظام الاسر  
.. وكنا بنقرا القرآن ..

**الرئيس** — كنتم بتقرأوا القرآن قبل ماتعمل الشعبة ..  
والرسائل ..



الشاهد - وكل عشرة ايام او جمعة نعمل محاضرة ويقف  
واحد يتكلم ..

الرئيس - في ايه

الشاهد - عن الدين

الرئيس - زى الرسائل

الشاهد - ...

الرئيس - وبعد الحل قلت الحمد لله .. بركه يا جامع  
وانبسطت وفرحت .. ايه اللي يدخلك في جماعة بتعمل نفس  
العمل اللي بتعمله في الشعبة قبل الحل ، في حين انك فرحت .  
الشاهد - انا مارحتش .. ده واحد جاني في البيت اول مرة ..  
جه خدني لعبد القادر وقال لي القصة .. المرة الثالثة قال لي  
تعالى تقعد شوية .. ادى المسألة ..

الرئيس - يعنى ضحكوا عليك

الشاهد - انا باقول كل الحقائق من كل قلبي ولا اعلم حاجه  
من ذلك .

الرئيس - انت حاسس ان فيه حد ضحك عليك

الشاهد - طبعى عن حسن نية .. ثم انا ما عنديش حاجة  
وكلامى دوغرى ، وذلك نفس الكلام اللي باقوله هو اللي حصل ،  
وثانيا انا ما عرفشى حاجة ...

الرئيس - يعنى هو كروتك في الموضوع

الشاهد - اللي سيادتك تشوفه

الرئيس - انت حاسس بايه

الشاهد - كان يجب انى ماروحشى معاه المرة الثالثة : اتما  
هو قال لي تعالى تقعد شوية ، وطبعاً البلد عبارة عن عائلات ..

الرئيس - هو يقرب لك

الشاهد - لا .. انا من عيلة الهلالية وهو من عيلة سلمان ..

المدعى - مابلفكشى اذا كان الناس دول عاوزين يعملوا ثورة

الشاهد - هم كانوا بيكلموني كلام مش داخل مخي .. خمسة

مستة ايه صفتهم دول علشان يقوموا بثورة .. مش معقول ابدا ..  
مابقاش كلامهم يخش مخى .. كلام صغير وكنت باستهتر بهم ..  
الرئيس — وطلعوا هم اللي بيضحكوا عليك .. جيت تصيده  
يصيدك ..

الشاهد — ماكنتش واخد كلامهم بثقة ، لان كلامهم مش  
داخل مخى ..

الرئيس — مين المسئول عن جماعة الاخوان

الشاهد — اعرف ان المسئول عن هذه الجماعة هو الهضيبى

الرئيس — تعرف الجهاز السرى اللي كان موجود

الشاهد — ماعرفشى .. انا قلت لسعادتك اللي اعرفه .. وانا  
سبق انى قلت لو حاجة عن اى موضوع كنت اقولها على طول

الدفاع — الثلاث اجتماعات دول كانوا لمحاولة ادماجك فى  
المجموعة

الشاهد — ايوه .. ولكن انا مااندمجتش .. لا .. اصلهم  
ماخدوش منى كلمة ..

الرئيس — ماخدوش منك كلمة

الشاهد — يعنى واحد بيكلم واحد ...

الدفاع — مجموعة خطيرة زى ماقلت : تقوم باعمال خطيرة ...

الشاهد — انا ماشفتش اداى سلاح علشان اعرف ..

الدفاع — جماعة خطيرة بالشكل اللي انت عرفتة، وبعدين تقوم

تقول ثورة شعبية ضد الشعب والحكومات .. تقول لك على  
اعضاؤها السبعة قبل ان تندمج فيها .

الشاهد — ماحصلش حاجة ازيد من كده

الدفاع — ازاي تدخل فى دماغنا ان مجموعة خطيرة زى دى

تقول لك انها حتعمل ثورة ضد الحكومة والشعب قبل ماتنضم لها

الشاهد — انا ماشفتش حاجة ايجابية . اذا كنت شفت حاجة

كنت بلغت على طول ..

الدفاع - يعنى المفروض ان الواحد يتدرب على السلاح : ولما  
ماشفتش حاجة ايجابية  
الشاهد ...

الرئيس - الحكومة دى .. حكومة الثورة عملت لك ايه  
الشاهد - عملت موضوع الاصلاح الزراعى .. اخذت الاراضى  
من كبار الملاك .. ( ضحك ) الموضوع ده بتاع سعادتك .. ( ضحك )  
الرئيس - بتحاولنى به يعنى ... ( ضحك ) ... انت  
استفدت ايه .

الشاهد - بيعملوا لنا مصانع يصبوا الحديد بدل ما واحد  
زى حالاتى ما يجيب الحاجة غالية ، فتمنها حيرخص وانا  
شغلتي حداد قرمة .. وكمان فتح المصانع دى حايشغل العمال  
العاطلين فيها ..

الرئيس - وانت صابر ومستنى .  
الشاهد - انا شغال وفاتح المحل وباشتغل فى الابواب  
والشبابيك .. يعنى فتحوا مصانع علشان يشغلوا العمال ،  
وموضوع الاصلاح الزراعى ، وخرجوا الانجليز .. ( ضحك )  
الرئيس - الادعاء ..  
المدعى - ما فيش حاجة  
الرئيس - طيب يا سيد حلمى ..  
الشاهد - طبعى انا باقول لسعادتك الكلام ده من كل  
قلبي ..

الرئيس - ما تصدقش واحد يكلمك كده تاتى مرة ..  
الشاهد - انا باقول لسعادتك .. خد على اقرار اتنى  
ما اسمعشى .

الرئيس - الاقرار ده اقبضه منين . ( ضحك )  
بأه شوية ناس يضحكوا عليكم ويستغلوكم الاستغلال ده ..  
وانت عبيط تجرى وراهم ..

- الشاهد — اصل انا ما تعلمتش في مدارس ..
- الرئيس — تقوم تسلم دقنك لهم .. يروحو يلهوكم علشان يحطوكم في وش المدفع
- الشاهد — ربنا منتقم جبار ..
- الرئيس — يعنى احنا جاين علشان نرفعكم يقسموا هم يستفلوكم وينزلوكم ..
- الشاهد — ربنا يوفقكم ..
- الرئيس — مع السلامة يا حلمى ..
- ( وعلى اثر ذلك انتهت شهادة الشاهد وانصرف )
- المدعى — سمعتم حضراتكم على لسان الشهود اسم ابراهيم الطيب باعتباره قائد منطقة القاهرة للجهاز السرى ..
- وابراهيم الطيب موجود هنا ..
- الرئيس — يتفضل ..
- ( حضر الشاهد )
- مثل الادعاء البكباشى ابراهيم سامى جاد الحق والاسستاذ عبد الرحمن صالح عضوا مكتب الادعاء والتحقيق .
- الرئيس — اسمك ايه ؟
- الشاهد — ابراهيم الطيب ..
- الرئيس — بتشتغل ايه ؟
- الشاهد — محام ..
- الرئيس — عمرك كام سنة ؟
- الشاهد — ٣٢ سنة ..
- الرئيس — ده مصحف مش كده ؟
- الشاهد — ايوه ..
- الرئيس — قل والله العظيم اقول الحق ولا شىء غير الحق والله على ما اقول شهيد .
- ( اقسم الشاهد اليمين ) .

- الرئيس - المدعى  
وكيل النائب العام - انت عضو في جماعة الاخوان ؟  
الشاهد - ايوه ..  
وكيل النائب العام - من امتى ؟  
الشاهد - من سنة ١٩٤٥  
وكيل النائب العام - وظلت عضوا فيها لحد دلوقت ؟  
الشاهد - ايوه ..  
وكيل النائب العام - قولنا مركزك في جماعة الاخوان في السنوات الاخيرة .  
الشاهد - في السنوات الاخيرة كنت متصلا بالقسم القانوني بالمرکز العام وبعدين عهد الى بالاشراف على الجهاز الخاص في القاهرة من ناحية التنظيم والتكوين وبس  
وكيل النائب العام - متى عينت رئيسا للقسم الخاص في القاهرة ؟  
الشاهد - في حوالى فبراير ١٩٥٤ ..  
وكيل النائب العام - هل كانت الرئاسة المطلقة لك !  
الشاهد - لا .. كان هناك مجلس على قيادات اخرى ..  
وكيل النائب العام - اشرح للمحكمة وفصل  
الشاهد - المجلس كان يختص بمسائل عامة في التنظيم ويتكون من افراد منهم الشيخ فرغلى والدكتور خميس حميدة ويوسف طلعت والاستاذ صلاح شادى ..  
وكيل النائب العام - وبس ؟  
الشاهد - علمت ان الاستاذ عبد المنعم عبد الرؤوف كان من قسم الجيش  
وكيل النائب العام - والمجلس الاعلى كان له رئيس اولا واذا كان له رئيسه يبقى رئيسه مين ؟  
الشاهد - الرئيس الاعلى لاشك يكون المرشد

**وكيل النائب العام -** انت تخضع مباشرة للمجلس الاعلى او ان لك رئيسا تتلقى منه اوامر المجلس او اوامر المرشد

**الشاهد -** رئيسى المباشر يوسف طلعت عن القسم المدنى ..  
**وكيل النائب العام -** انت فى منطقة القاهرة ودى منطقة كبيرة طبعا قسمتها الى مناطق يتبعك فيها كام قسم ؟

**الشاهد -** ١٠ اقسام ..

**وكيل النائب العام -** هذه الاقسام هل نظمت فيها الجهاز الخاص فى المناطق العشرة ؟

**الشاهد -** كل هذه الاقسام منظم فيها هذا الجهاز ..  
**وكيل النائب العام -** اشرح للمحكمة كل مايتعلق بالجهاز من ناحية الاقسام والعدد وطريقة التموين والتجهيز والتسليح .  
**الشاهد -** ايوه ... رئيس المنطقة ويتبعه عدد من نواب الشعب وكل منطقة لها رئيس يبقوا ١٠ يجتمعوا مع بعض ولهم ضابط اتصال بينهم وبين القاهرة وكل قائد منطقة له قائد فصيلة معه هو المختص بالمسائل الفنية او العسكرية - اما قائد المنطقة فيختص بالشئون الادارية ..

**وكيل النائب العام -** مم تتكون الفصيلة ؟

**الشاهد -** الفصيلة تتكون من اربع مجموعات كل مجموعه سبعة وقائد الفصيلة وقائد ثانى او وكيل له وفيه ضباط اتصال خاصين بالشئون الفنية ويتبعوا يوسف طلعت وضباط الاتصال الاداريين منهم محمد عبد المعز والاستاذ حسين شعبان اما ضباط الاتصال الفنيين فمنهم اسماعيل عارف ومهدى عاكف ودول يتبعوا يوسف طلعت لانه مختص بالمسائل الفنية ..

**وكيل النائب العام -** والتسليح ؟

**الشاهد -** كان معهود به لاشخاص متخصصين فى الناحية الفنية زى سيد الرئيس وفؤاد مكاوى ..

**وكيل النائب العام -** تسليح الفصيلة ازاي ؟

**الشاهد -** ما عرفشى لان دى تفاصيل فنية متعلقة بالجهاز  
الفنى .

**الرئيس -** من اين يستورد ؟

**الشاهد -** ما عرفشى ده من اختصاص القسم الفنى وانا  
اختصاصى انسب الافراد ولانسب الجماعات .

**وكيل النائب العام -** ايه اللى بتراعه فى الاختيار ؟

**الشاهد -** يراعى كثير من الاعتبارات الروحية والثقافية  
والبدنية والى جانب ذلك التدريب

**وكيل النائب العام -** بتقول ان مسائل السلاح مختص بيها  
ناس تانيين وما تتدخلش فيها . .

**الشاهد -** كل تدخل لى فى هذه الناحية كان بتكليف من  
يوسف طلعت لاكلف سيد الرئيس بجرد المخازن . .

**وكيل النائب العام -** ما قدمش لك كشف بنتيجة الجرد ؟

**الشاهد -** لا . . ده من اختصاص يوسف طلعت . .

**وكيل النائب العام -** لماذا كلفك انت بأن تقول لسيد الرئيس  
ان يوسف طلعت يأمره بكذا ؟

**الشاهد -** علشان أوصل سيد الرئيس بالاخوان فى المناطق . .

**وكيل النائب العام -** المنطق يقول انك اللى كلفته فمن المعقول  
ان يخبرك بالنتيجة . . .

**الرئيس -** مش شرط . . الشاهد بيتقول انه مسئول عن  
الجهاز الادارى فالقسم الادارى مهمته ان يصل الراجل الفنى  
بالمسؤولين والنتيجة فنية مالوش دعوى بيها . .

**الشاهد -** ايوه . . .

**وكيل النائب العام -** كان هناك تدبير لاحداث حركة مسلحة . . ؟

**الرئيس -** قبل كده فيه حاجة . . . ما هو الغرض من انشاء  
الجهاز السرى ؟

**الشاهد -** الغرض هو بعض المسائل الداخلية والخارجية . .  
وحماية الدعوى الاسلامية فى الداخل والخارج فى الداخل باعتبار

ان التدريب فرض عين على كل مسلم اما الناحية الخارجية فلان بلاد المسلمين منكوبة بحكم المستعمر في الشرق والغرب والاخوان يستعدون لتقديم الجنود اذا ما حصل اى حاجة فيقدمون رجالا مجهزين مدربين لتونس او الجزائر او في مصر او اى بلد آخر ..  
**الرئيس** - اشرح لنا الوضع ازاى يكون في مصر .. كيف يؤدي النظام الغرض من تكوينه في مصر ؟

**الشاهد** - فيما يتعلق بمصر لاشك انه الى قبل الاتفاقية كان موجود فيه جنود احتلال قبل الحركة وبعد الحركة كانوا متحكمين في ارزاق المصريين وفي جزء من بلادهم ..

**الرئيس** - مفيش داعى نشرح الكلام ده لاننا فاهمينه باعتبارنا مواطنين . ماهو الداعى الى سرية الجهاز مادامت الحكومة القائمة على البلاد تقاوم الانجليز .

**الشاهد** - لم يكن بالسرية المفهومة بدليل ان جميع المناطق في القاهرة والاقاليم كان موجود فيها والجميع يعلمون عنه ولم تكن له صفة السرية ..

**الرئيس** - انت مش مسميه النظام ؟

**الشاهد** - ايوه ... النظام بس ولكن لم نقل النظام السرى ..

**الرئيس** - انت اقريت ان النظام مسلح ومنقسم الى جماعات وفصائل وله ضباط اتصال وله تسليح وتدريب وبه فنيين للكشف على الاسلحة وبه قسم مدنى على راسه يوسف طلعت فهل هناك ما يستدعى وجود اسلحة انت تعلم ان به اسلحة وقمت بتوصيل سيد الرئيس لجرد مخازن المناطق والكشف على الاسلحة وانت ماتعرفشى نتيجة الكشف .. جهاز منظم فيه اسلحة وانت محامى فهل قوانين البلاد تسمح بحمل السلاح ؟

**الشاهد** - لاتسمح ...

**الرئيس** - كيف توجد مخازن اسلحة وتنظيم مسلح داخل البلاد بدون علم الحكومة .



**الشاهد —** لا شك انه فيما يتعلق بالسلاح وضعه معارض للقانون ..

**الرئيس —** وهل ده يبقى سرى أو علنى .  
**الشاهد —** التشكيل علنى والسلاح سرى ..

**الرئيس —** لماذا كونت هذا النظام من قائد فصيلة وقائد ثانى للفصيلة برئاسة للمنطقة برئاسة للقاهرة بمجلس أعلى وما الداعى الى تكوين الجماعة من ٧ لابد ان لهذا ارتباط بالتكوين والتسليح .  
**الشاهد —** انا مهمتى كانت فيما يتعلق بالتكوين والتنظيم مالىش علاقة بالتسليح .

**الرئيس —** اذا طلبت منك انك تجيب لى واحد اغريه للقتل ماهى مسئوليتك

**الشاهد —** لاوافق ..

**الرئيس —** واذا وافقت .

**الشاهد —** غلط ..

**الرئيس —** ماهى مسئوليتك فى القانون .

**الشاهد —** يعتبر فاعل اصلى ..

**الرئيس —** كيف تسمح لنفسك اذن بتنظيم نظام وتسليح بواسطة غيرك وانت رجل تزاول مهنة المحاماة فى البلاد !

**الشاهد —** الذى فهمته ان النظام قد يستفاد به فى سائر الاقطار العربية والاسلامية الاخرى ولا شك ان البلاد محتاجة لرجال مسلحين مدربين

**الرئيس —** قلنا ان التنظيم ينافى قوانين البلاد ..

**الشاهد —** انا مهمتى التشكيل بس لا اكثر ...

**الرئيس —** انتهينا الى انك بهذا تعتبر فاعلا ..

**الشاهد —** ايوه ...

**الرئيس —** وقارنا بين هذا وبين حكاية الراجل اللى اكرهه منك وقلت انك تبقى فاعل لانك قمت بعمل تنظيمى مرتبط بعمل تسليح

غير مسموح به في القوانين الموجودة في الدولة وانت محام ومهنتك متصلة بالقوانين .

الشاهد - صح . . .

الرئيس - قول لنا بقى الغرض الحقيقي . .

الشاهد - لم أفهم انه لعمل غير شرعى . .

الرئيس - قلت ان الغرض هو حماية الدعوة في مصر وغير

مصر . . .

الشاهد - ايوه . . .

الرئيس - قول لنا حماية الدعوة في مصر يكون ازاى .

الشاهد - فيه جنود احتلال . .

الرئيس - جنود الاحتلال الحكومة تحاربهم علانية وفيه جيش

بتصرف الحكومة عليه ملايين وعنده طائرات ومدافع ومدافع ٦

بوصة ودبابات فهل التنظيم بتاعك قوته كقوة الجيش . . اذا

كنت مخلص حقيقة وعاوز تساهم ساهم بنفسك وباب التطوع

مفتوح في القوات المسلحة . .

الشاهد - ده صح وفيما يتعلق بهذا التشكيل لم يكن يقصد

به اى وضع غير شرعى .

الرئيس - بين لى النقطة اللى باسألك عليها « الدفاع عن

الدعوى بتقول يكون بمقاومة الانجليز ومقاومة الانجليز ليه ماتكونش

علنية فيه قوات مسلحة موجودة في البلاد مهمتها هذه المقاومة فما

الذى يدعوك لى تقيم قوات مسلحة بشكل صغير لتقاوم الانكليز

ولا تطرق باب التطوع في القوات المسلحة الكبيرة وهو مفتوح . .

الشاهد - فيما يتعلق بالتطوع ، الاخوان اشتركوا في التطوع

وتقدموا لسائر منظمات الحرس الوطنى . .

الرئيس - اذن ما الداعى الى اقامة النظام والابقاء عليه بعد

وجود الحرس الوطنى . .

الشاهد - علمنا ان الحكومة كانت تشجع التسليح للمقاومة

في القنال .

- الرئيس - علمت من مين ؟  
الشاهد - من يوسف طلعت ..
- الرئيس - ألم تعلم بما طلبته الحكومة من المرشد في مايو .  
الشاهد - ما عرفشى ..
- الرئيس - ايه اللى ماتعرفوش هو انا لسه قلت حاجه علشان  
نقول ما اعرفشى .
- الشاهد - ما اعرفشى الحكومة قالت للمرشد ايه ..
- الرئيس - اذا كان انا لسه ماذكرتش الواقعة منين بتقول انك  
ماتعرفهاش .
- الشاهد - انا اقول اننى لاعلم ان الحكومة طلبت في مايو من  
المرشد شيئاً
- الرئيس - ألم يقل لك يوسف طلعت ان الحكومة في مايو سنة  
١٩٥٣ طلبت من المرشد ٣ مسائل ؟
- الشاهد - لا ... ايه همه .
- الرئيس - طلبت الحكومة من المرشد ثلاث مسائل الاولى عدم  
التدخل في القوات المسلحة بضم افراد منها لجماعة الاخوان المسلمين  
في تشكيلات حتى لاتتكون في داخل القوات المسلحة قوتان يكون  
المصير النهائى بتاعها حرب اهلية بين افراد القوات المسلحة ..
- المسألة الثانية - نفس الطلب بالنسبة لقوات الامن
- ثالثاً - حل الجهاز السرى المدنى وتسليم جميع الاسلحة  
بتاعته لسبب ما هو السبب ، السبب هو ان السرية معناها ان  
هناك سياسة اخرى غير العلنية تبطنها الجماعة فاذا كان عندكم  
سياسة تانية غير العلنية قول لنا ايه هي لانه مفيش بيرية في الدين  
ولا الدعوة .
- الشاهد - لم ابلغ بهذا ..
- الرئيس - آمال بلغت بايه ؟
- الشاهد - يوسف طلعت قال لى ان الحكومة بتشجيع الفدائيين  
في القنال ..

الرئيس - ناقشته في كلامه .

الشاهد - لا . .

الرئيس - لم لم تناقشه .

الشاهد - قال لي معلومات اكيد . . .

الرئيس - ايه وجه التأكيد فيها . . اقسام

الشاهد - ذكر لي وقائع متأكد منها . . .

الرئيس - ماهي الوقائع دي .

الشاهد - هو قال ان الحكومة الحاضرة يسرت المفدائيين

الحصول على الاسلحة لمهاجمة الانجليز حتى يشعروا بحق انهم في وطن لا يستطيع اهله ان يصبروا على وجود متطفلين فيه او مستعمرين به . .

الرئيس - عظيم واذا كانت الحكومة بتجيب متطوعين سرا وتعد

لهم الخطط وتمدهم بالاسلحة فما هو الداعي لوجود الجهاز السري وماذا يعمل في القاهرة .

الشاهد - علمت ان فيه اجتماع حضره الصاغ كمال الدين

حسين واخرين من ضباط الجيش واجتمعوا بالاخوان وانهم تداولوا في كيفية الاستعداد لمقاومة الانكليز والتسليح والتدريب .

الرئيس - يوسف طلعت ذكر لك الكلام ده .

الشاهد - ايوه . . .

الرئيس - ماهو الدليل على صحة كلامه .

الشاهد - نفس كلامه والوقائع اللي سردها . .

الرئيس - لماذا لم تعبىء العشر فصائل للكفاح . .

الشاهد - حصل . . .

الرئيس - حصل ايه . . .

الشاهد - الصاغ كمال الدين حسين على وجه الدقة قال . .

الرئيس - بعلمك او بسمعك واذا كان سمعت تقول مين اللي

قال لك .

الشاهد - ذكر لي الدكتور حسين كمال الدين وكان رئيس

مكتب ادارى القاهرة ان بعض اعضاء مجلس قيادة الثورة وبعض ضباط الجيش طلبوا من الاخوان ان يجهزوا بعض الاخوان لاقلاق راحة الانجليز فى القنال وفعلوا اعدت بعض هذه القوات وكانت على وشك الرحيل وما اعرفشى السر فى عدم ذهابها ..

**الرئيس -** جميل ... اذا كانت الحكومة بتجيب السلاح علشان تقلقوا الانجليز فى القنال فما هو الداعى الى ان تجندوا الاخوان وتسليحهم فى السر

**الشاهد -** ماكانش فيه سر احنا كنا بنعمل على المكشوف ..

**الرئيس -** والسلاح ؟

**الشاهد -** لا عرف عنه شىء ..

**الرئيس -** طيب السكرتير المختزل يبقى يقراله اقواله فى الحنة دى الخاصة بالاسلحة - من هم رؤساء الفصائل ؟

**الشاهد -** الاستاذ عبد العزيز احمد وكمال السنائيرى والفيومى وهنداوى دوير ومحمد شديد ومحمد عبداللطيف وسيد ابوسالم

**الاستاذ ممدوح توفيق مندوب مصلحة الاستعلامات بمحكمة**

**الشعب -** لقد قال ماياتى عندما سئل عن الاسلحة وكونها مخالفة للقوانين - ان التشكيل كان علنى ولكن الاسلحة سرى ..

**الرئيس -** اتكلم ..

**الشاهد -** ذكرت انه فيما يتعلق بمسائل السلاح ، ذكر لى

يوسف طلعت ان الحكومة كانت تشجعه ومشروعية جمع السلاح او عدم المشروعية اتت من الطريقة التى حددتها لحضراتكم من أن بعض حضرات اعضاء الحكومة واذكر منهم الصاغ كمال الدين حسين طلب تجهيز بعض الاخوان وان الحكومة تشجع الفدائيين وطلبت تسليح بعضهم ..

**الرئيس -** ارجو من الشاهد اذا تكلم على لسان واحد يقول

انا سمعت وما يقرررش الامور بالشكل ده لان كمال الدين حسين مارحش وما قلش واللى حصل ان كمال الدين حسين جواه الاخوان فى اوائل ١٩٥٣ وطلبوا ان يعاونوا فى العمل بان ينضموا

الى المخابرات الحربية كقيادة منفصلة مش علشان السلاح ورفض  
طلبهم فاللى قالك الكلام يوسف طلعت يبقى ايه .. يوسف طلعت  
غلط وانت كنت مسحوب من دقنك

الشاهد - الى قالى الكلام يوسف طلعت وحسين كمال الدين  
رئيس مكتب ادارى القاهرة ..

الرئيس - ايوه قول مين علشانبقى نواجهك بيهم .. وبعدين

الشاهد - بناء على هذا اعيد هذا التنظيم السرى ..

وكيل النائب العام - متى اعيد تنظيم الجهاز .

الشاهد - اعيد تنظيمه على اساس ..

وكيل النائب العام - اناسألتك امتى وعاوز الاجابة على سؤالى

الشاهد - فى حوالى اواخر فبراير ...

الرئيس - وقبل كده ؟

الشاهد - كان منظم ولكن اعيد تنظيمه

الرئيس - مين كان رئيسه ؟

الشاهد - عبد الرحمن السندي وبعدين يوسف طلعت ..

الرئيس - كيف اعيد تنظيمه فى اواخر فبراير ١٩٥٤ مع انكم فى

المعتقلات ولم تخرجوا الا فى اواخر مارس ؟

الشاهد - انا متأسف لان ده غلط صحيح كنا وقتها فى

المعتقلات حصل اعادة تنظيم الجهاز على اساس قواد الفصائل ..

الرئيس - يبقى امتى ؟

الشاهد - بعد اواخر مارس ..

الرئيس - يطلع ايه يعنى ؟

الشاهد - اوائل ابريل ..

الرئيس - ايوه كده علشان يبقى الكلام متفق مع كلام الشهود

الآخرين ..

المدعى - حسب اقوالك امام المحكمة تقول ان صلتك بهذا

الجهاز بعد آخر مارس . فى ابريل . وانت تتكلم امام المحكمة عن

حوادث حصلت فى مايو سنة ١٩٥٣ فمن اين عملت بها ؟

**الشاهد** - قال لى يوسف طلعت عليها .

**المدعى** - بمناسبة ايه ؟

**الشاهد** - بمناسبة التشكيل والتسليح .

**المدعى** - وانت ناقشته فيها ؟

**الشاهد** - أيوه .

**الرئيس** - امتى ؟

**الشاهد** - يناير سنة ١٩٥٤ قبل الحل .

**المدعى** - ظهر من التحقيقات أمامنا . والتحقيقات الابتدائية

أن هناك علاقة أو اتصال بين اللواء محمد نجيب والاكخوان فمتى

بدأت هذه العلاقة ومع من ؟

**الشاهد** - أما فيما يتعلق بتحديد موعد هذا التفاهم أو هذا

الاتصال فلا أعلم على وجه الدقة وكل الذى أعلمه أن يوسف

طلعت باعتباره الرجل المسئول قرر لى أن هناك اتصال قائم بين

محمد نجيب والاكخوان .

**الرئيس** - من من الاخوان ؟

**الشاهد** - لم يحدد لى .

**الرئيس** - وتعتقد مين ؟

**الشاهد** - أعتقد اللجنة العليا للنظام .

**الرئيس** - المكونة من مين ؟

**الشاهد** - المرشد وفرغلى والاشخاص الآخرين اللى ذكرتهم .

واعتقد ان الاتصال كان يتم مباشرة أو بطريق غير مباشر عن

طريق أفراد يكلفوا بهذا .

**الرئيس** - زى مين ؟ يوسف طلعت مقالکش ؟

**الشاهد** - لا .

**الرئيس** - يظهر انه أمر سر .

**الشاهد** - هذا الرجل مؤتمن وأنا أسمع كلامه على هذا

الاساس .

**الرئيس** - هو اللى كان مؤتمنك ؟

**الشاهد —** لم أناقشه في الموضوع اللي ذكره لي .

**الرئيس —** وكان الاتصال على أساس إيه ؟

**الشاهد —** على أساس العودة بالبلاد الى الحياة الطبيعية وعلى أساس ضرورة ايجاد برلمان منتخب انتخابا شعبيا وبعيد عن المؤثرات الحزبية والشوائب الحزبية التي كانت تتصل بالبرلمانات السابقة ومن ناحية أخرى اطلاق الحريات بكافة أنواعها وخصوصا حرية الصحافة وابداء الرأي والناحية الثالثة كان الهدف الافراج عن المعتقلين وان البلاد يكون فيها حالة او نوع من أنواع الهدوء والتفاهم بين الرؤساء الموجودين والشعب الموجود .

**الرئيس —** كيف كان اتصال الاخوان بقيادة الثورة عند بدء الثورة باعتبارك شخص مهم ؟

**الشاهد —** لم تكن هذه المسألة من اختصاصي ولا احب ان اسأل في مسائل تعتبر سياسة عليا بالنسبة لي .

**الرئيس —** تعرف ان كان فيه اتصال ؟

**الشاهد —** يوسف طلعت قال لي ان هناك اتصال .

**الرئيس —** مع من ؟

**الشاهد —** مع محمد نجيب والاخوان .

**الرئيس —** مجلس قيادة الثورة في ٢٣ يوليو سنة ٥٢ . كان هناك اتصال بينه وبين الاخوان المسلمين ام لا ؟

**الشاهد —** الذي علمته من يوسف طلعت والدكتور حسين كمال الدين ان هناك اتصال وأداة الاتصال كان الدكتور حسين كمال الدين وصلاح شادي وآخرين لم يحدد لهم لي .

**الرئيس —** جميل . . وكانوا يتصلوا بقيادة الثورة علشان إيه ؟

**الشاهد —** للتعاون بين جماعة الاخوان وقواتها الشعبية وبين مجلس قيادة الثورة في ذلك الوقت باعتبار ان الاخوان منتشرين في كل جهة من جهات القطر وعلمت انهم كانوا يحرسوا الكنائس ومنتشرين في الشوارع ويقدموا مساعداتهم لمجلس قيادة



الثورة حتى يكون الشعب كله مؤيد لمجلس القيادة ويكون المجلس صف واحد ضد المستعمر .

الرئيس — باعتبارك في الصف الثاني من الاخوان المسلمين . .  
الشاهد — الثالث .

الرئيس — الا تعلم السياسة العامة للجماعة بالنسبة للثورة ؟  
الشاهد — اللى فهمته من الاخوان المسلمين ان هذه السياسة تتلخص في ضرورة التعاون التام والتآزر مع رجال الحكم .

الرئيس — ده كلام عام . قل لنا فى اى اتجاه يكون التعاون ؟  
الشاهد — فى ضرورة مساندة مجلس القيادة .  
الرئيس — فى ايه ؟

الشاهد — فى كل شىء بدون اى تفصيل او تقييد .  
الرئيس — بدون اى طلبات ؟

الشاهد — أيوه . . وكل ما فهمته ان الطلب الوحيد الذى طلب من مجلس قيادة الثورة هو ان ينحو بقدر الامكان النحو الاسلامى الذى يرضى عنه الشعب المسلم .  
الرئيس — مكانش برلمانات وحریات ؟

الشاهد — المفهوم ان مجلس قيادة الثورة بدأ العهد بما أعلنه ان الجيش يحمى الدستور لذلك الجميع كان يترقب وجود حياة برلمانية يسندها الشعب ويشرف عليها مجلس قيادة الثورة .  
الرئيس — ألم يقل لك يوسف طلعت أن لجنة الاتصال بقيادة الثورة ذهبت بعد الثورة مباشرة وقعدت حوالى يوليو وما يقرب من أواخر أغسطس وهى تذهب يوميا الى كوبرى القبة فى القيادة . وتلح فى طلب يتعلق بسياسة الاخوان ؟  
الشاهد — لا أعلم .

الرئيس — كيف تكون فى الصف الثالث ؟ يمكن سياسة الاخوان توجه فى القيادة العليا بدون أخذ الراى ؟  
الشاهد — مع الهيئة التأسيسية لانها مكونة من مكتب ارشاد .  
الرئيس — تمثل ايه الهيئة التأسيسية ؟

**الشاهد —** مجموع الاخوان .

**الرئيس —** وكل واحد غيرهم محظور عليه الكلام ؟

**الشاهد —** لما يكون فيه كلام سرى .

**الرئيس —** هل تعتبر ان الكلام اللي قاله لك سرى ؟ يا مواطنين .  
لجنة الاخوان قعدت من ٢٤ يوليو سنة ٥٢ الى مايقرب من اواخر  
اغسطس سنة ٥٢ تطالب بشيء واحد . هو ان يكون الحكم عسكرى  
مطلق بدون دستور وبدون برلمان لمدة لا تقل عن عشر سنوات .  
وكانت الحكاية اننا مختلفين معاهم لاننا معتقدين تمام الاعتقاد  
من يوم ٢٤ يوليو اننا نسلم البلاد لبرلمان . وكنا نظن ان فيسه  
بقية باقية في الوفد بعد ان يظهر نفسه ولذلك طلبنا من الاحزاب  
تطهير نفسها وطلبنا من على ماهر يصدر بيان فى هذا الشأن .  
واصدر بيانه فى سبتمبر وكانت الازمة الحادة اللي بيننا وبينه . واللى  
بناء عليه استقال فى ٧ سبتمبر . هذه الازمة حدثت لاننا اتفقنا  
معه ان يصدر بيان بان الانتخابات ستكون فى اوائل سنة ١٩٥٣ .  
وطلع البيان يومها بالليل واذيع الساعة ١١ فى الراديو . ولم  
يتعرض فيه للانتخابات التى ستم فى فبراير سنة ١٩٥٣ وعليه  
اجتمع مجلس قيادة الثورة واصدر بيان الساعة ٢ صباحا بضرورة  
اجراء الانتخابات فى فبراير سنة ٥٣ . كنت فى سيادتكم باعتبارك  
محامى ومن الصف الثالث من الاخوان المسلمين حتى لا تعرف .  
اطلاقا اى شيء من سياسة الاخوان العامة اللي قعدت تطلب وتلج  
حتى بعد اصدار البيان الساعة ٢ صباحا . وجم ثانى الساعة  
٥ صباحا وكنا كلنا نايمين فى القيادة وطلبوا الغاء هذا القرار  
واصدار قرار آخر على ان الحكم يكون عسكرى على الاقل عشر  
سنين ؟

**الشاهد —** هذا لم يصل الى علمى .

**الرئيس —** واحد فى الصف الثالث . هل هذا حكم برلمانى  
صليم فى جماعة الاخوان . لما يكون واحد من الصف الثالث فى

جماعة تأسيسية تمثل البرلمان . ترسم سياسة دون أن تأخذ رأيك ؟

الشاهد - هذه المسائل تدار في الهيئة التأسيسية وأنا مشـ  
عضو فيها .

الرئيس - ده حكمه ايه ؟ جمعية الاخوان المسلمين في كل  
اعمالها سرية فيما عدا ما يتعلق بامتها مع الدول الاجنبية ؟

الشاهد - جاز ان المسائل اللى فيها مسائل مجلس القيادة  
لا يصح ان تنشر . وأنا أعرفها .

الرئيس - كيف تعلل ذلك ؟

الشاهد - باعتبارى فرد فى القاهرة .

الرئيس - انت فرد فى القاهرة ؟

الشاهد - ايوه امال .

الرئيس - انت فى الصف الثالث مسئول عن الجهاز السرى  
وتنظيماته ؟

الشاهد - المسائل دى كانت تسلمنى العملية .

الرئيس - ألم يحكيها لك يوسف طلعت ؟

الشاهد - فى هذه الاثناء كنت مجرد عضو فى القسم القانونى  
بالمركز العام للاخوان المسلمين .

الرئيس - جمعية الاخوان المسلمين لا ترجع لمستشارها  
القانونى فى هذه المسائل ؟

الشاهد - لاشك . الاستاذ عودة كان اختصاصى فى المسائل  
القضائية واللوائح ولكن هذه مسائل عليا يختص بها غيرى .

الرئيس - لماذا لا تسمح لنفسك أن تعارض أو تناقش  
السياسة العليا للاخوان المسلمين . وتسمح أن تناقش سياسة

ال ٢٢ مليون ؟

الشاهد - هذه المسائل لم تعرض على .

الرئيس - كيف تسمح لنفسك ؟ هل الحكومة عرضت عليك ؟

الشاهد - لا .

**الرئيس -** اذن لماذا تساعد على حملة الدعاية التي قامت بها جمعية الاخوان ضد الاتفاقية وهي سياسة عليا في الدولة ولم تعرض عليك ؟

**الشاهد -** الذي أعلمه أن مكتب الارشاد تقدم ببيان قانوني الى الرئيس جمال عبد الناصر يذكر فيه انتقادات قانونية للاتفاقية .

**الرئيس -** كيف تحل لجمعية الاخوان مالا تحله لنفسك ؟  
**الشاهد -** هذه المسألة تتصل فعلا . . وكل مواطن له حرية التعبير .

**الرئيس -** هل عرضت الاتفاقية على الاخوان ؟

**الشاهد -** عرضت على الشعب في الجرائد .

**الرئيس -** هل عرضت على الجمعية كجمعية ؟

**الشاهد -** لم أعلم أن هذا حصل .

**الرئيس -** كم جمعية توجد في القطر المصري ؟

**الشاهد -** مفيش .

**الرئيس -** والشبان المسلمين ؟

**الشاهد -** غير سياسية .

**الرئيس -** والاخوان ؟

**الشاهد -** سياسية .

**الرئيس -** مع انها منحلة !! ليه الحكومه تحل الاحزاب وتبقى على جمعية الاخوان المسلمين مع انها سياسية وحزبية ؟  
**الشاهد -** هذا سر لا أعلمه .

**الرئيس -** المسائل دي كلها أسرار على الصف الثالث فما بالك بالصف الرابع والخامس لغاية محمود عبد اللطيف . ! !  
**الشاهد -** أنا أقرر ما أعلمه .

**الرئيس -** الصف الثالث لماذا لا يعلم هذه المسائل . اذن فهي محصورة على الصف الاول على الاقل أو الصف الاول والثاني على الاكثر . يعنى المسائل ماشيه بطريق غير . . .

**الشاهد** - الذي نفهمه ان هذه مسائل دقيقة يعرض الدقة ولا شك يجب ان يهيء لها الجو اللى يعتبر فى اضيق نطاق لكى يمكن بحثها بحث مستفيض وليس بشكل جمهورى .

**الرئيس** - وليس هناك قطعاً داعى لتهيئة الجو للحكومة لبحث موضوع يخص ٢٢ مليون بحثاً هادئاً . الاخوان يمثلون البرلمان !

**الشاهد** - هم جزء من الشعب .

**الرئيس** - يمثلوا قد ايه ؟

**الشاهد** - بالتفصيل معرفش .

**الرئيس** - قولها بالتقريب .

**الشاهد** - لا أعرف .

**الرئيس** - ١٥ مليون .

**الشاهد** - متجيش .

**الرئيس** - ١٤٥ حوالى كده .

**الشاهد** - ....

**المدعى** - كنا وقفنا عند الاتصال . قل لنا الخطة اللى كنتم عايزين تنفيذوها

**الشاهد** - الخطة كانت على أساس ان النظام مقصود به ...

**المدعى** - انا بأقول تنفيذ الخطة . القصد تكلمنا عنه كثير .

**الشاهد** - فيما يتعلق بالتنفيذ لم نتعدى مرحلة الأعداد .

**المدعى** - اشرح للمحكمة الخطوات .

**الشاهد** - الذى حدث أننا أخذنا فى دور الأعداد والتكوين من بعد مارس ٥٤ وظل هذا الأعداد من الناحية التنفيذية ومن ناحية تجميع الافراد واعدادهم الأعداد الثقافى والروحى ومن ناحية أخرى ...

**الرئيس** - الثقافى يدخل فيه المنشورات من الجهاز الإدارى !!

**الشاهد** - دى مسائل دعاية .

**الرئيس** - ثقافة .. وتعليم .. ووعى .. وادراك .. وناحية

ادارية تتبع الجهاز الادارى . قل لنسا ايه المشورات اللى كنت توزعها على الاقسام .

**الشاهد -** مخصص لها مركز دعاية فى المركز العام .

**الرئيس -** وتوزع عن طريق مين ؟

**الشاهد -** وتوزع عن طريق رؤساء المناطق .

**الرئيس -** مين يوزعها للمناطق ؟

**الشاهد -** وتوزع بواحد من امرين . اما عن طريق رئيس الجهاز الخاص او رئيس مكتب ادارى القاهرة .

**الرئيس -** والضباط الاداريين كانوا علشان ايه ؟

**الشاهد -** لتوصيل هذه المشورات من رئيس مكتب ادارى القاهرة لرؤساء المناطق مباشرة .

**الرئيس -** زى مين ؟

**الشاهد -** محمد عبد المعز . وحسين شعبان .

**الرئيس -** ظاهر من اقوالك ان محمد عبد المعز وحسين شعبان ضباط اتصال اداريين يعملوا بينك وبين المناطق .

**الشاهد -** وفى نفس الوقت كان يحدث ان رئيس مكتب ادارى القاهرة اذا اراد الاتصال برؤساء المناطق له الحرية فى ذلك فكان يعطى ما يريد الى رؤساء المناطق مباشرة .

**الرئيس -** ماذا تستنتج من عدم علنية سياسة الاخوان المسلمين فى اوائل الثورة وتصميمها عليه واخفائها وانكارها حتى عن الصف الثالث والله اعلم يمكن الصف الثانى لسه منعرفش ؟  
**الشاهد -** الذى اعلمه ان المرشد حسن الهضيبى كان قد تقدم ببيان الى السيد الرئيس والى حضرات اعضاء مجلس القيادة وذكر فيما اعتقد مطالب او مسائل للتناصح وذكر ...

**الرئيس -** فسر لنا تناصح تبقى ايه ؟

**الشاهد -** باعتبار الاخوان لا يدخرون وسعا فى ان يعاضدوا ويساندوا مجلس القيادة .

- الرئيس — اذكر بعض الاقتراحات ؟  
الشاهد — لا اذكرها بالتحديد .  
الرئيس — المعنى العام .  
الشاهد — انها ترى او تجمع على مصالح البلاد .  
الرئيس — والثورة مش عايزه مصالح البلاد ؟  
الشاهد — لا . علشان المجموعات الشعبية تؤازر ونساند مجلس القيادة .  
الرئيس — يعنى انتم موكلين عن الشعب ؟  
الشاهد — لا احب اقرر ان الاخوان باعتبارهم مجموعة من المجموعات الشعبية كانوا يتقدموا باعتبارهم ناس منتظمين بحمل هذا العبء .  
الرئيس — لهم قوة ؟  
الشاهد — المهم التنظيم لا اكثر .  
الرئيس — احسن من القوات المسلحة !!!  
الشاهد — تنظيمات شعبية .  
الرئيس — والقوات المسلحة مستوردة من باريس ؟  
( ضحك )  
الشاهد — لا . هي من الشعب ولكن التنظيم كان على اساس الاعداد . وهذا يقتضى كثير من المسائل .  
الرئيس — ما وجهة الخلاف لما تتقدموا بهذه النصيحة . لماذا اختلفوا ؟  
الشاهد — انا اتكلم عن المسائل اللى علمتها . وهى تقديم هذا البيان .  
الرئيس — انت قلت ان البيان عبارة عن تقديم ايه ؟  
الشاهد — بعض النصائح الى مجلس القيادة .  
الرئيس — ليه ؟  
الشاهد — مسائل تتصل بمصالح البلاد كمجموع

**الرئيس —** وكيفية ذلك ؟

**الشاهد —** الاتصال المستمر الدائم بين الاخوان وأعضاء مجلس القيادة لتنفيذ هذه الخطوات .

**الرئيس —** ما هي الخطوات .

**الشاهد —** دى مسائل كان يحددها أعضاء مجلس القيادة مع الاخوان .

**الرئيس —** اشراك ! جماعة الاخوان تريد اشراك وفرض وصايتها على شان خاطر كده . كانت تطلب فى يوليو ٥٢ وفى اغسطس ٥٢ بأن القيادة تفضل حاكمه فى البلد عشر سنين على الأقل وتطالب سرا فى الوقت نفسه ان القيادة تكون تحت وصايتها . تقوم يبقى الحكم فى ايدهم من تحت ستار — ولما القيادة عارضت ذلك حدث خلاف . وعشان يلغوا من هذا ويأخذوا الجولة يطبع ابراهيم الطيب المنشورات . وتحض على ايه ؟ كما قرر ابراهيم الطيب امام حضراتكم جميعا . دى محكمة الشعب . انتم الحكم فى محكمة الشعب مش احنا . كما قررت هنا . ينادى بايه . بالحريات . بالانتخابات . بانعقاد البرلمان فى حين ان الثورة لازالت على عهدا الى اختلفتم عليه انها تحدد فترة انتقال على شان تعمل انتخابات وبرلمانات فى يناير ستة وخمسين لماذا لم تنتظر الى يناير سنة ٥٦ بلل ما تعمل جهاز سرى . ولماذا تقاوم اتفاقية وانتم الهيئة الوحيدة التى قاومتها وكل بقية الهيئات بتوع الـ ٢٢ مليون متعلمين وغير متعلمين معروفوش يقروها ؟ ملهمش رأى ؟

**الشاهد —** الى اعرفه ان الاخوان قاموا بتقديم البيان الخاص بنقد الاتفاقية وكان موجه بالذات للرئيس جمال عبد الناصر بس .

**الرئيس —** متى كان الاتصال الذى وقع او تم بين رجال جمعية الاخوان على المستوى العالى قوى والرئيس السابق محمد نجيب



الشاهد - تحديد الوقت لم اعلمه بالتقريب .

الرئيس - زى فبراير بالضبط .!!

الشاهد - ولكن يوسف طلعت قرو هن هناك اتصال وتفاهم

بين الاخوان والرئيس محمد نجيب .

الرئيس - امتى ؟

الشاهد - بعد مارس .

الرئيس - فرصة ... مكسب بسيط .. نضحك على عقل

الناس زى ماضحكنا على عقل الغلبة المساكين بالحريات . . .

الهد .. ماذا كان المأرب والغرض من هذه المنشورات ؟ وماذا

تنتظر أن توجد بين صفوف الشعب كنت تنتظر ايه باعتبارك

محامى وراجل من الصف الثالث ؟ كان فيه هتلر .. وهيس ..

وجورنج .. اتكلم يا جورنج .

( ضحك )

الشاهد - كنت مجرد فرد فى الهيئة .

الرئيس - قل لنا ماذا كنت تتوقع أن يتم فى هذه البلاد بمثل

هذه الحملات اللى هى مخالفة للمطالبات السرية اللى كنتم

تطالبوا بيها ؟

الشاهد - الذى اعلمه ان الاخوان لم يكونوا سريين فى التعبير

عن آرائهم ولكنهم تقدموا بمذكرة مسهبة الى السيد الرئيس

وذكروا اعتراضاتهم على الاتفاقية .

الرئيس - ولما يكون فيه بينك وبين الرئيس موضوع تقوم

تقدمه فى منشورات ؟

الشاهد - أنا اتكلم عن المسائل العلنية اللى حصلت . مش

المنشورات .

الرئيس - أنا اتكلم عن الخطاب الذى ارسل الى رئيس

الحكومة . وفي نفس الوقت أرسل منه منشورات . وفي نفس الوقت وقبل أن يصل للرئيس وصل للسفارات الاجنبية وفي الوقت نفسه وصل الى جميع الجرائد المحلية والاجنبية وجميع مراسلي الصحف . لما أريد أرسل لواحد تناصح ولا تكلم معاه في مسائل تخص مصالح البلاد العليا . حريات البلاد . اقوم ابعت منها نسخ لكل الناس . يعنى قصدى منها ايه ؟

الشاهد — انا قلت ان الدعاية كان مخصص لها مكان في المركز العام .

الرئيس — وباعتبارك انك مسئول عن الاخوان المسلمين تعتبر نتيجتها ايه ؟

الشاهد — المسائل دي مش من اختصاصى . . مش عايز احكم عليها .

الرئيس — كمواطن تعتقد تكون ايه ؟

الشاهد — اعتقد اذا كان الكلام اللى فيها سليم ومطابق للواقع يبقى صح واذا كان غلط لا شك غلط .

الرئيس — يوجد ايه ؟

الشاهد — لخبطة .

الرئيس — والخبطة تنتج ايه ؟

الشاهد — لا شك غلط كبير .

الرئيس — ايه نتيجته ؟ لما البنى آدمين مخهم يتلخبط . يتحدوا والا ينقسموا ؟

الشاهد — ينقسموا .

الرئيس — فاذا انقسموا الى فريقين ماذا يتم ؟

الشاهد — يصح . . .

الرئيس — يصح ايه ؟

الشاهد — يقفوا امام بعض .

الرئيس — ولما يقفوا أمام بعض يعملوا إيه ؟ يسلموا على بعض ؟  
الشاهد — يحدث ارتطام .

الرئيس — ارتطام ازاي ؟

الشاهد — اذا كان فيه قوات ضد بعض تقف ضد بعض .  
حيكون حزازات .

الرئيس — ونتيجة الحزازات التي يمكن تحصل ؟

الشاهد — انقسامات وحزازات .

الرئيس — ودي توجد إيه ؟

الشاهد — ضغائن في النفوس .

الرئيس — ودي توجد إيه ؟ انت راجل صاحب دعوة . انت

بتعلم الناس الدعوة الاسلامية . لازم تكون راجل فلسفي . لايد  
تنزل لاعماق الاسلام توجد إيه دي ؟

الشاهد — تعمل انقسامات في الامة .

الرئيس — ولما تتولد يجرى إيه ؟

الشاهد — يحدث ارتطام . ترتطم اجزاء الامة ببعضها .

الرئيس — ولما يحدث ارتطام ؟

الشاهد — يحصل فرقه .

الرئيس — والفرقه توجد إيه ؟

الشاهد — ده كل اللي يحصل .

الرئيس — فريق منهم مسلح يحصل إيه ؟

الشاهد — يضربوا بعض .

الرئيس — وما بالك اذا كان هناك اجنبي راسخ على قلب هنا

البلد ، اللي يحصل إيه ؟

الشاهد — يتدخل الاجنبي .

**الرئيس -** كيف تسمح لنفسك ان تشترك في جماعة تكون هذه سياستها باعتبارك مواطن درست في الحقوق والبلد صرفت عليك ؟

**الشاهد -** الاخوان من اول لحظة كانوا يعدونا لهذا الموقف .

**الرئيس -** كيف يعدوكم لهذا الموقف ؟

**الشاهد -** كانوا يتوقعون ان القوات الانجليزية تتدخل في اى وقت اذا لم يحصل اتفاق بينهم ولذلك كانوا من اول الامر ...

**الرئيس -** ولذلك الهضبي تقابل مع ايفانز .

**الشاهد -** علمت ان هذه المقابلة ...

**الرئيس -** أنت لا تعلم شيئاً الا من يوسف طلعت . فعلمت من مين ؟

**الشاهد -** من الدكتور حسين كمال الدين .

**الرئيس -** انا غلطان .

**الشاهد -** قال لى ان هذه المقابلة لم تكن بناء على طلب الاخوان بل بناء على طلب المستر ايفانز وتفصيلها تدور حول هل من الممكن الوصول الى حل سليم يرضى البلد وترضى الحكومة والاضاع الشعبية اولا ؟

**الرئيس -** واحنا اتعلمنا وحضرتك متعلم حقوق ومعناك ليسانس حقوق وتعرف وتفهم قضايا وتمحصها وتحسب فيها ، تعلمنا من وسائل الانجليز المستعمرين ٧٢ سنة ، هذا غير الذى قرأناه عن الهند ما هى وسائل الانجليز .

**الشاهد -** أيوه ..

**الرئيس -** ايه هى ؟

**الشاهد -** الف والدوران .

**الرئيس -** وايجاد ...

**الشاهد -** الفرقة

**الرئيس** - يبقى لما طلب الهضيبي عشان يعملوا ايه ؟  
**الشاهد** - أيوه .

**الرئيس** - يتعمل ايه ؟  
**الشاهد** - معرفش .

**الرئيس** - علشان يصالحونا على بعض .  
**الشاهد** - لا . .

**الرئيس** - طلبونا عشان ايه وفيه وفد رسمى يتفاوض ؟  
**الشاهد** - قال الدكتور حسين كمال الدين ان المرشد استاذن  
**الرئيس** - ماذا يكون مارب الانجليز .  
**الشاهد** - انقسام بلا شك .

**الشاهد** - كيف يسمح المرشد حسن الهضيبي والاسلام  
يحض على الاتحاد ان يقابل الانجليز من غير راي الحكومة ؟  
**الشاهد** - الذى علمته انه اخبر . . .

**الرئيس** - علمت من مين ؟ من حسين كمال الدين او يوسف  
طلعت ؟

**الشاهد** - من حسين كمال الدين والمرشد نفسه .  
**الرئيس** - يكونش حسين كمال الدين ربنا بتاعك والا تعتقد  
بالمسيحية God the father God the son يكونش الاله  
الرب هو الابن والرب هو الاب يكونش الاله الاكبر والاله الاصغر ،  
كلام يوسف طلعت وكلام المحترم الثانى حسين كمال الدين  
لا ينقضا اطلاقا ولا يناقشا عقلا ولا دينا ولا اى شىء اطلاقا امام  
كلام الحكومة ويقاوم سرا وعلى طول تعمل جهاز سرى واسلحة  
ونعمل منشورات ونندس . . . ليه ؟

**الشاهد** - الذى ذكره لى المرشد نفسه فى هذا الاجتماع انه  
كان يعلم حقيقة نوايا الانجليز ولذلك كان الاستعداد قائم . . . .  
**الرئيس** - عاوز يحطهم تحت وصايته ؟

**الشاهد** - كان مقتنع كما فهمت بأن الانجليز مراوغون ولا يمكن بأى حال من الاحوال ان يؤمن جانبهم .

**الرئيس** - اعلن المرشد العام فى تقرير منه واعلن على صفحات الجرائد انه قد تكلم مع الانجليز واتفق معهم او قبل ان يتفق معهم على انهم يخرجوا من القنال ويعقد اتفاق سرى ما بينه وما بين الانجليز علشان يدى حق للانجليز لاحتلال جميع هذا القطر فى اى وقت مضلا بذلك الـ ٢٢ مليون ويعمل فى الخفاء كما يعمل الجهاز السرى الذى ياتمر بأمره ورشده .  
مش كده . رد يا محامى . رد يا قانونى .

**الشاهد** - هذه مسائل ... لم افهم هذا المعنى .

**الرئيس** - رد يالى بتششتغل فى مكتب عوده . رد يالى بتترافع امام المحاكم بالاسلام . رد يا راجل يالى قائم بدعوة الاسلام . رد يالى بتعلم محمود عبد اللطيف الاسلام ....

**الشاهد** - ( لا يجيب )

**الرئيس** - اتكلم .

**الشاهد** - ده اللى فهمته ياسعادة الرئيس من الكلام الذى قيل لى .

**الرئيس** - لماذا اختبأت عندما ضرب محمود عبد اللطيف جمال عبد الناصر وكل ما قيل على لسانك الا كلام ؟

**الشاهد** - انا اختبأت يوم تحديد اقامة عبد القادر عوده ..

**الرئيس** - ومالك وماله ؟

**الشاهد** - زميلى فى المكتب .

**الرئيس** - يمكن موضوعه لا يخصك .

**الشاهد** - بحسب علمى .

**الرئيس** - مش جازى فيه حاجة مش بحسب علمك .

**الشاهد —** يصح ، لكن مادام عبد القادر عوده محدد اقامته ومهدد باعتقاله في اى وقت ما قدرتش انتظر .

**الرئيس —** بتستخبي ... خايف من ايه ؟

**الشاهد —** من الاعتقال . مش عاوز اعتقل .

**الرئيس —** وهل يعتقلوك اذا كنت ما عملتش حاجة ؟

**الشاهد —** انا اعتقلت كثيرا . والاخوان بينختبئوا .

**الرئيس —** ولما بيعتقلوا . بيطلعوا تانى ليه ؟

**الشاهد —** . . . . .

**الرئيس —** رد على فى الكلام المظبوط ، اكلم .

**الشاهد —** كنت خايف من الاعتقال .

**الرئيس —** ليه تخاف . اللي على راسه بطحة يحس بيها ، وانت ايه البطحة اللي على راسك وخايف منها ؟

**الشاهد —** علشان الاستاذ عبد القادر عوده حددت اقامته .

**الرئيس —** ماهى الخطة او التنظيمات التى وضعت فى المكتب واصدرت الى الجهاز السرى ؟

**الشاهد —** الخطة ابلغها لى يوسف طلعت .

**الرئيس —** اذكر الخطة بالتفصيل .

**الشاهد —** كان على اساس الاتصال والتفاهم القائم بين الاخوان من ناحية وبين اللواء محمد نجيب من ناحية اخرى ، واللواء محمد نجيب معه كثير من وحدات الجيش مؤيدة لرايه .

**الرئيس —** كيف علمت ان كثيرا من وحدات الجيش مؤيدة لرايه ؟

**الشاهد —** هذا الذى ذكره لى يوسف طلعت .

**الرئيس —** هل لم تسأله عن توكيد هذه الواقعة ؟

**الشاهد —** مقيش دليل مادي عليها .

**الرئيس —** انت مش عاوز تناقش يوسف طلعت ؟

**الشاهد —** انا ناقشته .

**الرئيس —** وبعدين ؟

**الشاهد —** هو قال ان معاه قوات موالية كثيرة وله مطالب تقدم بها على اساس اطلاق الحريات وايجاد برلمان منتخب .

**الرئيس —** بالذمة والشرف محمد نجيب طالب باطلاق الحريات والجمعية التأسيسية طالب بيها يوم ايه ؟ طالب بيها يوم ٢٢ فبراير او ٢٣ فبراير سنة ١٩٥٤ او طالب بها يوم ان وقف بميدان الجمهورية في الشرفة وكان بجانبه عبد القادر عوده وكان في صبيحة يوم ٢٨ فبراير وقال للناس الواقفين دون الرجوع الى مجلس قيادة الثورة — انا اجيب لكم الجمعية التأسيسية هل ذكر هذا الكلام يوم ٢٣ فبراير سنة ١٩٥٤ او قبل ان يذكرها بعد هودته في صبيحة ٢٨ فبراير ؟

**الشاهد —** لا من ٢٨ فبراير سنة ١٩٥٤ .

**الرئيس —** انت قلت لا ( ثم وجه سيادته الكلام الى مندوبي مصلحة الاستعلامات المكلفين بتسجيل المحاكمات ) اكتب لا بالاختزال بالحرف الكبير وخط تحتها خطين .

انا ممثل الشعب واحس بالذى احس به قبل ٢٣ يوليو فما يهمني ان رقبتي تقطع ولا اخاف واهرب واخش جسوه الجحر بماذا تعلل هذا ؟

**الشاهد —** التعليل او الاسباب التفصيلية لست على علم بها .

**الرئيس —** بماذا تعلل هذا باعتبارك محام تحلل الاشياء حسب منطقها وتوجد المفارقات او الاتفاقات او الحلقات المتصلة او المنفصلة بين منطق الحاجات التي وكلت فيها من اصحاب القضايا؟  
**الشاهد —** انا كنت في هذه الاثناء معتقل



**الرئيس —** خرجت في فبراير وانت ساكن في الجيزة في مصر .  
**الشاهد —** بعد خروجي علمت ان اللواء محمد نجيب طالب  
بهذه المطالب وان هناك اتصال وتفاهم بينه وبين الاخوان لاقرار  
هذه المطالب بس .

**الرئيس —** المنطق بتاعك مبنى على الاتى : تصدق محمد نجيب  
عشان قال الحريات وتصدق الاخوان عشان قالوا الحريات .  
ولكن ماهو الشيء المادى او المعنوى الموجود بينك وبين مجلس قيادة  
الثورة او الدلائل التى تاخذها عليهم حتى لا تصدقهم وتصدق  
محمد نجيب ورياسة الاخوان ؟ ليه تصدق دول وليه تكذب دول  
هل هو حسب الهوى او حسب مايقع في نفسك والا ايه الدليل ؟

**الشاهد —** انا قلت لسيادة الرئيس من قبل ان هذه المسألة  
كانت متروكة لبحث فيها الاخوان الى هم في المجلس الاعلى  
للاخوان واحنا كانت تجهلنا المسائل مدروسه ومنتهية .

**الرئيس —** او تنفذوا المسائل التى انتهى فيها الى قرار دون  
لعلامكم هنا القرار وانما الخطة ساعة التنفيذ . يعنى دكتاتورية .  
**الشاهد —** كان يبحث معاها الهيئة التأسيسية .

**الرئيس —** يعنى دكتاتورية الهيئة التأسيسية كما كانت قبل  
٢٣ يوليو دكتاتورية البرلمانات الوفدية والسعدية والدستورية ،  
ودكتاتورية برلمانات السراى مش كان فيه دكتاتورية البرلمان ؟  
**الشاهد —** كان فيه دكتاتورية مفيش شك .

**الرئيس —** وهل تريد برلمانا كبرلمانات قبل ٢٣ يوليو ؟  
**الشاهد —** لا .

**الرئيس —** ليه ؟

**الشاهد —** لذلك الاخوان اشترطوا الا تشوب الانتخابات  
الشوائب السابقة .

**الرئيس -** من يضمن هذا ، وماهى طريقة تنفيذ هذا ؟

**الشاهد -** هذه مسائل ياسيدى الرئيس انا لم ابحثها .

**الرئيس -** عندما تطالب بأمور وتعلنها على الملأ لابد أن تعرف وتعلم كيفية تنفيذها ، ايه الخطوات التى حطيتها فى دماغك لوجود برلمان ؟

**الشاهد -** انا فعلا لم اتناول هذه المسائل بالتفصيل .

**الرئيس -** وليه تأخذها على عاتقك لتعلنها على الملأ لتشكيكها ؟

**الشاهد -** تبحث فى الجمعية التأسيسية .

**الرئيس -** المجلس الأعلى دكتاتورى ماشى على طريقة البرلمان الاول الى مش راضى عنها ، ولا واضع خطه امامك ، يجى برلمان كويس ازاي ؟ ده انت مش عارف تعدل نظامك .

**الشاهد -** كنت سأعدل نظامى

**الرئيس -** امتى ؟

**الشاهد -** فى الجمعية التأسيسية كانت تعدل عشان يكون لمجموعات الاخوان فى المناطق الرقابة التامة والاشراف على الهيئة التأسيسية

**الرئيس -** وفى الوقت نفسه ان يكون هناك نظام سرى . هل تناول تعديل هذا القانون تعديل الهيئة العليا لادارة النظام السرى ؟

**الشاهد -** نص فيه على كثير من الاقسام وانا قلت على كل الاوضاع .

**الرئيس -** وهل نصت هذه القوانين فى تعديلاتها على الهيئة العليا للنظام السرى المكونة من فرغلى وخميس وطلعت وشادى وعبد المنعم عبد الرؤوف برياسة الهضيبى هل نصت على ما هى سلطة تنظيم هذه الرياسة بالنسبة للجهاز السرى هل مكتوبة فى القانون ؟

الشاهد - ذكرت مكتب الارشاد .

الرئيس - هل هناك مواد تنص على تنظيم رياسة الجهاز السرى ؟

الشاهد - مش موجوده .

الرئيس - اذن لازالت هذه السرية موجودة بعد تعديل القانون بشأن تستعملوها للضحك على عقول الناس .

الشاهد - الذى اذكره ياسيدى الرئيس ...

الرئيس - قل لى ياسيدى الفاضل هل دى هى الحريات ؟

الشاهد - القانون . . . .

الرئيس - كم كنت اتمنى ان اقابلك وانا فى غير هذا المكان .  
كم كنت اتمنى ان القالك فى غير هذا المكان حتى لا يؤخذ على بالشبهة ان اكون متحاملا عليك او استغل سلطتى . واقسم بربى انى برىء من هذا .

الشاهد - المفهوم ان مكتب الارشاد له السلطة التامة والهيمنة التامة على كل شئون الدعوة .

الرئيس - مين ؟

الشاهد - مكتب الارشاد الذى ينتخب من الهيئة التأسيسية حسب التعديل ...

الرئيس - فيه اختصاصات لمكتب الارشاد او سلطات له تخول بعض الناس اقامة اجهزة سرية مسلحة تتبع الجماعة ؟

الشاهد - لا مفيش كلام زى ده .

الرئيس - مسئولية مين اقامة هذا الجهاز السرى ؟

الشاهد - مكتب الارشاد لانه اذا لم يوافق على هذا فهو عالم بوجوده .

الرئيس - لماذا اخذ بعض المسئولين امثال حسن الهضيبي

انه ينشئ باسم الجماعة سرا جهازا سرىا على النظام العسكرى  
مسلح بأسلحة طويلة المرمى ، قتالة ، فتاكة ، اتوماتيكية وكذا  
متفجرة سرا ؟

**الشاهد** — على العموم . . .

**الرئيس** — تحت مسئولية مين ؟

**الشاهد** — النظام كان قائم قبل وجود الهضيبى .

**الرئيس** — وهل الاستمرار فى الخطأ يعفى المستمر فى الخطأ ؟

**الشاهد** — لا ما يعفهوش .

**الرئيس** — تحت مسئولية من اخذ الهضيبى او قام بحمل  
مسئولية تنظيم والاستمرار فى تنظيم وتسليح الجهاز السرى  
باسم جماعة الاخوان المسلمين سرا ؟ أمام من يسأل واستمد  
سلطة من مين ؟ نهش الحته دى منين ؟

**الشاهد** — هو ادرى منى بالرد على الحته دى .

**الرئيس** — من تعتقد وانت من الصف الثالث المسئول عن  
وجود دولة داخل الدولة ؟

**الشاهد** — معرفش .

**الرئيس** — دولة جماعة الاخوان المسلمين ولها برلمان ولك أن  
تدلى بصوتك قل لنا نظام البرلمان المطبق فى الاخوان .

**الشاهد** — هو أقدر منى على أن يرد على السؤال .

**الرئيس** — ماتعرفش ؟

**الشاهد** — أيوه .

**الرئيس** — هل هذا هو مستوى الصف الثالث من جمعية  
الاخوان المسلمين التى تريد أن تفرض وصايتها على الحكومة وفى  
الوقت الذى لم تقبل الحكومة فرض هذه الوصاية عليها ولم تقبل  
التحكم بتاع انه لازم يكون فيه حكم عسكرى لمدة عشر سنوات

تنار وتبين للناس لونا آخر . هل تعرف أن صاحب الوجهين  
منافق وجمعية الاخوان منسافقة ونفاقها في هذا هي  
انها دارت وشها للشعب تطالب بالبرلمان والحريات . تستنتج  
من كده ايه ؟

الشاهد - انا ياسيدى الرئيس ما احبش اتكلم فى كلام زى ده .  
الرئيس - عاوزك ترد على السؤال . انت مجبر بحكم القانون  
ان ترد على اى سؤال فى اى ناحية من النواحي باعتبارك قانونى  
وتعرف امر تشكيل هذه المحكمة وهذا الامر يختلف عن اى امر  
شكلت به اى محكمة .

الشاهد - معلوماتى فى هذا قاصرة .

الرئيس - قل لى ايه فى تفنيك .

الشاهد - اعتقد ولا شك فيه كثير من الاعضاء يؤازرون  
الهضيبى فى هذا الموضوع ومن المسؤولين الذين يكتسبوا ثقة  
الاخوان فى الشعب والمناطق

الرئيس - ماذا كان موقفك . وانت لماذا لم تستقل من الاخوان  
وانت تعمل شىء ضد القانون وغير ما يطن الهضيبى . فمن  
ياخذ مسئولية او يستمد هذه السلطة فى أن يقيم نظام مسلح .  
هل هذا هو نظام البرلمان بتاع الجماعة ؟

الشاهد - اذكر لحضراتكم فى هذا انى علمت من الاخوان  
المتصلين به أن هذا الوضع مقصود به مصلحة البلاد .

الرئيس - أنهى وضع ؟

الشاهد - هذا التنظيم .

الرئيس - ازاي وكيف ؟

الشاهد - كما ذكرت لسيادتكم أن حضرات أعضاء مجلس  
القادة كانوا يشجعون تسيير الفدائيين فى هذا الوضع لذلك ...  
( ضجة أصوات فتول ايه انكلام ده ... لا ... لا )

**الرئيس —** سمعت الناس اللي في الجلسة قالوا لك ايه ؟  
**الشاهد —** أيوه .

**الرئيس —** سمعت الشعب قال لك ايه . راي من محكمة الشعب ؟

**الشاهد —** ( لا يجيب ) .

**الرئيس —** التزم الحق . واذا كنت كذوبا فكن ذكورا .  
**الشاهد —** انا أقرر اللي اعتقده .

**الرئيس —** سؤال آخر — قلت لك ان جمعية الاخوان نافقت لانها في وجه منها دكتاتورية وفي داخليتها لاتتبع نصوص القوانين الموجودة عندها ولا تنص في هذه القوانين عما هو موجود تحت يدها وبالوجه الآخر تلتفت الى الشعب وتنادى بحريات وانتخابات حرة وبرلمانات في الوقت اللي هي مش واضعة أسس لهذه البرلمانات بل الاسس اللي وضعها ضد ما تنادى به . ماهو المقصود من هذا وكيف تحل هذا ؟

**الشاهد —** لا احل اى وضع يمتن كرامة أو حرية الشعب باى حال من الاحوال وانما نحن باستمرار نجهز انفسنا لاي وضع سليم ونظيف واحنا لاشك ...

**الرئيس —** نرجع تانى لقصة نظيف وازاي البرلمان يجي ؟

**الشاهد —** معرفش وانا مكنتش مسئول .

**الرئيس —** تعرف انا احب اقول لك ايه . الجماعة ما عرفتش تأخذ حكومة الثورة تحت وصايتها . وتقوم تدهول الشعب بالحريات يمكن تفلس . وتيجي وزارة برياسة محمد نجيب وتكون حكومة صورية وتبقى تحت جناحها وتشغلها عشرة سنوات باصابعها كما تطلب وزى ما قرر شاهد اتنا مش عاوزين الحكم الان انسب قدام . طمعانين في الحكم ليه ؟ عاوزين من الحكم ايه ؟ زى ما كان فؤاد سراج الدين وزى الحكومات الاخرى اللي كانت تيجي وخلت الناس

مليانين سل ومليانين فقر وعيا وهم . . . مفيش داعى للكلام .  
قول يا سيدى .. كمل لنا الخطة واذا ما كنتش تفتكر نقراها  
لك . . .

الشاهد — كانت الخطة على أساس ان القوات الموالية للرئيس  
محمد نجيب مع القوات الشعبية ، الاثنين يقوموا معا بعد المطالبة  
بهذه المطالب فاذا قامت هذه الحركة وحصلت اعتداءات عليها فان  
هذه القوات ترد هذا الاعتداء بكافة السبل .

الرئيس — إزاي ؟

الشاهد — كالاغتيالات .

الرئيس — اغتيالات مين ؟

الشاهد — المعارضين .

الرئيس — مين ؟

الشاهد — من أعضاء مجلس القيادة .

الرئيس — اتكلم بالاسماء .

الشاهد — ذكر منهم الرئيس جمال عبد الناصر وذكر منهم  
اسماء اخرى واستثنوا من المجلس . . .

الرئيس — قول اسماء ، انت ما تعرفش التانيين ، هم احسن  
من جمال ؟

الشاهد — اللى علمته اغتيال المجلس كله اذا حصل اعتداء  
او ضرب .

الرئيس — الكل ؟

الشاهد — ماعدا افراد معينين للرد على الحركة .

الرئيس — حركة ايه ؟

الشاهد — حركة نجيب بالاتفاق مع الاخوان او بمؤازرتهم .

الرئيس — يعنى الاخوان عاوزين يعملوا حركة انقلاب مسلح ؟

الشاهد — كان الملقصود الحركة المسلحة تاتى من الجيش .

الرئيس - يعنى تقوم بانقلاب مسلح بما عندها من الاسلحة ؟  
الشاهد - بالاتفاق مع الجيش .

الرئيس - يقوموا يعضدوا الجيش اذا اعتدى عليه حد ، وقل  
ما يعضدوا الجيش بافراد الجهاز السرى يقوم الاخوان بتنبيح  
وتقتيل المعارضين وعلى راس المعارضين جمال عبد الناصر ويليهِ  
اعضاء مجلس قيادة الثورة ويليهِم ..... .

الشاهد - بس .

الرئيس - من باب العلم .

الشاهد - بس كده .

الرئيس - خسارة والله (موجها كلامه الى الحاضرين) تصوروا  
كلكم كنتم حتقعدوا محدش كان حيفتالكم .

المدعى - انت كنت مودى حزام ديناميت لهنداوى ؟

الشاهد - كان مقصود بيه حصول مثل هذا الاعتداء وفيهِ  
ناس معارضين ومؤيدين ، فاذا امكن الحزام يستعمل .

المدعى - ضد مين ؟

الشاهد - ضد أعضاء مجلس القيادة .

المدعى - يعمل ايه ؟

الشاهد - ده حزام متفجر .

المدعى - يلبسه الشخص ... .

الشاهد - للتفجير .

المدعى - انت قلت انكم كنتم محددين اشخاص معينين ، فى  
وسط الهيئه يتقدم الشخص الذى يلبس هذا الحزام - كما  
قلت فى اقوالك الى احد هذين الشخصين من أعضاء مجلس قيادة  
الثورة فينفجروا هم الاثنين .

الرئيس - ادبته لين الحزام ؟

الشاهد - لهنداوى .



**الرئيس —** قائد الفصيلة بتاع امبابه ؟

**الشاهد —** ايوه .

**الرئيس —** انت ذكرت انك ما تعرفش قواد الفصائل .

**الشاهد —** هو كان ماسك الفصائل

**الرئيس —** انت قلت ان ملكش دعوة بالاسلحة وما شفتش  
الحزام امال الحزام ده يطلع ايه ؟

**الشاهد —** ايوه . اعطاه لى يوسف طلعت .

**الرئيس —** انت كذبت كلامك لانك قلت ان ملكش دعوة بالاسلحة  
وفى هذه الخصوصية قلت انك رحى لهنداوى دوير وطلبت  
منه ايه ؟

**الشاهد —** ذكرت له ان هذا الحزام مقصود به استعماله أثناء  
حصول الاعتداء على القوات أو الحركة بعد حدوثها .

**الرئيس —** ماذا طلبت منه ؟

**الشاهد —** طلبت منه ان يحتفظ بهذا الحزام فى المخزن  
الخاص به .

**الرئيس —** ويعطيه لمن ؟

**الشاهد —** يتصرف ، لانه قائد فصيلة .

**الرئيس —** يتصرف فى انهى حدود ؟

**الشاهد —** فى حدود الخطة الموجودة .

**الرئيس —** هل ادبته الخطة ؟

**الشاهد —** الخطة اللى قلتها بالتفصيل ، وهى اذا قامت القوات  
الموالية للرئيس نجيب مع قوات الاخوان وحصل اعتداء عليها فبرد  
على هذا الاعتداء ...

**الرئيس —** بالقوات التابعة لمحمد نجيب فى هذه الحالة ، وقلت  
لهنداوى يعمل ايه بالحزام ؟

**الشاهد -** يدى الحزام للشخص الذى يشق فيه ليقوم بتفجير هذا الحزام .

**الرئيس -** فين ؟

**الشاهد -** ضد الاشخاص او الشخص من أعضاء مجلس القيادة الذين كانوا يتعرضوا لهذه الحركة ؟

**المتى -** لقد حددت له الاشخاص .

**الشاهد -** هو كان الكلام بصفة عامة . . . انما حصل تحديد على أساس انه الرئيس جمال . . .

**الرئيس -** امتى

**الشاهد -** نعم يافندم . . .

**الرئيس -** امتى حصل هذا التحديد ؟

**الشاهد -** فى اثناء شرح الخطة . . .

**الرئيس -** فى يوم ايه ؟

**الشاهد -** مش متذكر بالضبط . . .

**الرئيس -** طبعا دى مسألة زى قزقة اللب . . كل يوم بتأخذ أحزمة وبتدى أوامر يعنى المسألة زى قزقة اللب ، لدرجة انك اخذت الحزام وفيه مفجرات ، وقلت لواحد انه يكلف واحد علشان يلبسه ويعبط الرئيس جمال عبد الناصر ويفجره . . . **الحاجات دى ما تذكرشى وقتها . . .** وتما زى ما تكون بتقزق لب . . . لانك بتستعملها باستمرار . . .

**الشاهد -** لا . . . ابدا . . . دى اول مرة فى الحقيقة . . .

**الرئيس -** اذا كنت راجل زى ما بتقول فى الصف الثالث ، وتعرف الدعوة وبتدعو للدعوة الاسلامية وتعاليم الدعوة الاسلامية وتثق فى الدعوة الاسلامية وفى تعمق مفهوم الدعوة الاسلامية كان ضميرك ساعة ما تيجى تنام يؤنبك وكانت دماغك تلف وتدور وتشوف هيصة وزمبليطة وتجنن . . . **ده اذا كان عندك ضمير . . .** ( وهنا وجه السيد رئيس المحكمة كلامه لجمهور الحاضرين )

قائلا : اذا كان الكلام ده غلط يا اخوانى والله احب ان محكمة الشعب تعرف رأيكم ، وتقولوا ان الكلام ده غلط بمنتهى الحرية والصراحة ... )

احد الحاضرين — الشعب يطلب تفجير اللغم فيه ..  
وكيل النائب العام — انت اديته الحزام وحددت له الشخص ..  
الرئيس — فى اثناء الكلام ده انت حددت له الشخص انه الرئيس جمال عبد الناصر

وكيل النائب العام — وآخر ...

الرئيس — مين ؟

وكيل النائب العام — سيادة البكباشى زكريا محيى الدين ...  
( ضحك )

رئيس النيابة — وقال فى اقواله اذا فشل فى الوصول الى الرئيس جمال فيعمل عمله برضه مع السيد وزير الداخلية ...  
الرئيس — وبعدين ...

الشاهد — .....

الرئيس — وبعدين قامت الاخوان بثورة شعبية وبمظاهرات اخوانية وبعدين الشعب عارضها او قوات القيادة عارضتها ...  
راحت قايمة قوات محمد نجيب تضرب فيهم ... ده يغتال ده ،  
وده يغتال ده ، وانهزمت الحكومة وانتصرت الاخوان ...  
الشاهد — يافندم ...

الرئيس — ماهو الترتيب الذى سيعمل لادارة دفقة هذه البلاد ؟  
الشاهد — دى مسألة فعلا كانت من اختصاص المجلس العالى  
او مكتب الارشاد

الرئيس — الا تهكم فى شىء ... فى كثير او قليل مثل هذه  
المسألة ؟

الشاهد — لا شك تهمنى : وانما كل واحد يبيلزم مكانه  
المخصص له ...

الرئيس — الى ان تتم العملية ...

الشاهد — ايوه ...

الرئيس — وبعد ان تتم العملية

الشاهد — .....

الرئيس — يخرج يوسف طلعت بالجهاز بتاعه ويعمل انقلاب  
ضد حسن الهضيبي ويقلب حسن الهضيبي ، وييجي يوسف  
طلعت ، يطلع ابراهيم الطيب ويعمل جهاز سرى يقلب به يوسف  
طلعت وبعدين ييجي ابراهيم الطيب

الشاهد — ....

الرئيس — يعنى يبقى فيه جيشين فى بلد واحد ... جيش  
احرار وجيش اخوان ده الوضع اللي فى دماغكم ...

وكيل النائب العام — اشرح للمحكمة كيف طبع ووزع المنشور  
الذى صدر من الاخوان باسم ... ؟

الرئيس — ( موجهها كلامه للشاهد ) يا بختك بهدوئك وتقلك  
وبتتكلم على حزام متفجر . رايح تلقى أوامر لواحد علشان  
يقتال جمال عبد الناصر أو زكريا محيى الدين ... ومظاهرات  
شعبية وانقلابات منتظرين فيها حرب أهلية وحدث اغتيالات  
وواقف هادى ... ( ضحك ) .. قائد متين

الشاهد — احتراماً للمحكمة ...

الرئيس — احتراماً للمحكمة

الشاهد — ايوه ...

الرئيس — اهلا وسهلا ... يا سيدى تشكر ... على العين  
والراس احترامك ده للمحكمة ... ( ضحك ) ...

وكيل النائب العام — اشرح للمحكمة كيف طبع ووزع المنشور  
الى صدر من الاخوان المسلمين باسم اللواء محمد نجيب ...  
اشرحها من الاول .. احكيها من الاول ...

**الشاهد -** في يوم من الايام، رايت مع الاستاذ عبد القادر عودة ورقة مكتوبة بالرصاص ... مسودة وبدون توقيع وبخط يخالف خط الاستاذ عبد القادر . وقد طلب منى الاستاذ عبد القادر انه .. هل أعلم بوجود حد يستطيع انه هو يطبع هذا الكلام والا مفيش فأنا لاحظت ان هذا الكلام كان فيه نقد **وارد باسم الرئيس محمد نجيب للاتفاقية التي عقدت ...** وكان الاستاذ عبد القادر .. كان مشتركاً في اللجنة القانونية التي كانت في المركز العام والتي على أثرها صدر بيان من الاخوان وسلم الى الرئيس البكباشي جمال عبد الناصر ، فأنا ذكرت له انه فيه بعض اخوان يستطيعوا ان يقوموا بطبع هذا الكلام **وفعلنا اخذنا هذه الورقة ... وقمنا بطبعها ووزعت على رؤساء المناطق فقاموا بتوزيعها ...**

**وكيل النائب العام -** كيف طبعت ؟

**الشاهد -** طبعا في جهاز الطباعة ...

**وكيل النائب العام -** جهاز الطباعة ده ايه ؟

**الشاهد -** ماكينة رونيو كانت موجودة في حوزة الاستاذ

محمد عبد العزيز نصار ...

**وكيل النائب العام -** كيف وزع المنشور ؟

**الشاهد -** وزع عن طريق رؤساء المناطق على جميع الاخوان

في الشعب ...

**وكيل النائب العام -** يعني اتمم اللي طبعتها

**الشاهد -** ايوه

**الرئيس -** طبعتها فين

**الشاهد -** في ماكينة محمد عبد العزيز نصار

**الرئيس -** فين

**الشاهد** — احنا حددنا المكان وارشدنا عليه

**الرئيس** — فى اى حته ؟

**الشاهد** — حددناه فى مكان فى مصر الجديدة ...

**الرئيس** — شارع ايه ؟

**الشاهد** — الشارع مش متذكر اسمه ...

**الرئيس** — تعرف اسم صاحب البيت

**الشاهد** — الاستاذ محمد احمد عبد الرحمن ...

**الرئيس** — يشتغل ايه

**الشاهد** — ده قومسيونجى

**الرئيس** — والآلة دى موجودة فى بيته

**الشاهد** — ايوه ...

**الرئيس** — جنسها ايه

**الشاهد** — جستتنر

**الرئيس** — وبعدين

**الشاهد** — وبعدين طبعوها ووزعوها على رؤساء المناطق

بواسطة الاخوان ...

**وكيل النائب العام** — المنشورات كانت بتطلع من عندكم ازاي

**الشاهد** — فيه لجنة اسمها لجنة الدعاية فى المركز العام كانت

تؤلف المنشورات ثم تسلك احد امرين — اما ان تطبعها فى جهاز

الطباعة الخاص بالنظام الخاص او يكلف بها افراد آخرون لتطبع

فى مطابع عامة ...

**وكيل النائب العام** — مين اللى كان بيغبركها

**الشاهد** — كان فيه لجنة برياسة السيد قطب ...

**وكيل النائب العام** — وظيفته ايه

الشاهد - كان مدير تعليم ..

وكيل النائب العام - كان يفبرك المنشورات دى ؟

الشاهد - أيوه ...

وكيل النائب العام - وصلت ازاي المسودة اللى انت قلت لنا عليها .. اللى هي اصل المنشور بتاع محمد نجيب ... وصلت ازاي لعبد القادر عوده ؟

الشاهد - ماقاليش بالضبط انما انا علمت انه كان عن طريق شخص مجهول بالنسبة لى ... لا اعرفه ...

الرئيس - مجهول بالنسبة لك ؟

الشاهد - يعنى لا اعرفه .. الورقة كانت مكتوبة على اساس انها لمراسل من مراسلى الجرائد لما يجى يسأل واحد ..

وكيل النائب العام - وليه وصلت لعبد القادر عوده بالذات ؟

الشاهد - ما اعرفش ...

الرئيس - ماهى النقاط اللى فى المنشور ده ؟

الشاهد - نقد للاتفاقية ...

الرئيس - ما هي هذه النقاط التى تنقد هذه الاتفاقية ؟

الشاهد - ...

الرئيس - عددها واذكرها ... انت موافق عليها لانك بتعتقد او بتقول على الاقل انك تعتقد انها سياسة صح وان النقط التى اثرت ضد الاتفاقية صح ، وفى الوقت نفسه اخذت المنشور اللى بخط الرئيس السابق للجمهورية محمد نجيب ... اخذت الكلام ده ورحت على مطبعة فى مصر الجديدة وطبعته وفرقته على رؤساء المناطق ... والنقط اللى فيه ، افكر انك ماتقدرش تواجه الناس وتقول انا ما اعرفهاش ..

الشاهد - مش متذكرها بالضبط ...

**الرئيس -** مابقولشى صمها وحفضها لى زى القران .. قل فقط ماهى النقاط ، النقطة الفلانية ... والنقطة الفلانية ...

**الشاهد -** كانت تنصب بالذات حول التحالف مع تركيا ، واعتبار الاعتداء على تركيا يبيح للقوات الانجليزية انها تدخل الاراضى المصرية وتستغل الموانىء والمطارات وما شاكل ذلك ... هذا من ناحية ، ومن ناحية اخرى ، على ما تذكر كان موضع خطر الحرب ... كان ايضا مما اثارته هذه الورقة وتكلمت عنه باسهاب ... وقالت ان خطر الحرب يعتبر موجود من الان وعلى هذا الاساس تبقى القوات الانجليزية مش حاتطلع من مصر خالص لان خطر الحرب موجود ويبقى الانجليز مايطلعوش ...

**الرئيس -** متى وصلت هذه الورقة ليدك لطبعها ؟

**الشاهد -** بعد مارس سنة ١٩٥٤ ...

**الرئيس -** امتى بالضبط ؟

**الشاهد -** قبل توقيع الاتفاقية ...

**الرئيس -** النهائى او بالاحرف الاولى ؟

**الشاهد -** لا ... قبل توقيع الاتفاقية النهائى ..

**الرئيس -** كيف تهاجم اتفاقية لم يتم التعاقد عليها ؟

**الشاهد -** هى كان فيها نقد للاتفاقية ..

**الرئيس -** بالنسبة للنقاط الاولى ؟

**الشاهد -** ايوه ...

**الرئيس -** دى مافيهاش خطر الحرب ..

**الشاهد -** ايوه ...

**الرئيس -** ازاي تسمح لنفسك انك تروح تطبع منشور وتبعته للناس فيه كلام لم يات ذكره بالنسبة للنقاط الاولى للاتفاقية ومضاه الطرفان بالاحرف الاولى ؟



الشاهد — الى انا . . .

الرئيس — انت قررت الان ان هذا المنشور كان فيه مهاجمة  
هلشان خطر الحرب وان النقاط الاساسية في الاتفاقية المضاة  
بالاحرف الاولى ماكانش فيها خطر الحرب . .

الشاهد — سبب هذا ان عبد القادر عودة باعتباره رجل ثقة ،  
وسبق ان اشترك في اللجنة القانونية الخاصة بنقد الاتفاقية . .

الرئيس — نقد الاتفاقية . . .

الشاهد — مشروع الاتفاقية . . .

الرئيس — مع مين . . مع الحكومة ؟

الشاهد — لا . . . ده كان نقد المشروع اللي نشر في الجرائد . .

الرئيس — كان فيه لجنة اتصال ؟

الشاهد — كان فيه لجنة قانونية . . .

الرئيس — واللجنة دي كانت بتشتغل مع مين ؟

الشاهد — دي في المركز العام . . .

الرئيس — المركز العام كان لديه لجنة قانونية . . . بحثه مع  
مين ؟

الشاهد — اللجنة دي اجتمعت لبحث مشروع الاتفاقية . . .

الرئيس — مع مين ؟

الشاهد — بحثت النصوص . قدمت الاعتراضات على الاسس

الموجودة . . .

الرئيس — الاسس اللي مافيهاش خطر الحرب . . . ده ماله

باللجنة القانونية وماله بالكلام اللي احنا بنقوله وهو ان نقطةالخطر  
الحربي كانت موجودة في هذا المنشور ، في حين ان الاتفاقية واسس  
الاتفاقية المضاة بالحروف الاولى ، وهى سابقة لهذا المنشور لم

يات فيها ذكر خطر الحرب ... قلت الاستاذ عودة .. ماله الاستاذ عوده ؟

الشاهد - هو باعتباره رجل قانونى قال لى كده ، فانا اخذت بكلامه ...

الرئيس - كلامه قضية مسلمة ؟ .. هذه هي الدكتاتورية يا حضرات المحترمين هذه هي الدكتاتورية ايها المواطنون .. محامى يبدافع عن قضاياكم امام المحاكم .. وعودة يقول له حاجة غلط زى الشمس بتطلع من الغرب ، يقوم يصدق له لان عبد القادر عوده من جمعية الاخوان المسلمين ... ( ضحك ) ماتقدرش ترفضه له افر ... عبد القادر عودة .. حتى ولا مرة ؟  
الشاهد - اعتقد ان رايه كان سليما ..

الرئيس - حتى لو قال للناس الشمس بتطلع من الغرب ... تقول ايوه ...

الشاهد - اعتقد ان هذه النقطة كانت موجودة ..

الرئيس - هل قرأتها ؟

الشاهد - لا ما قدرشى اقول اتنى قرأتها ...

الرئيس - سمعت كلام عودة ... حضرتك محامى ولم تقرا الاتفاقية وتأخذ كلامه قضية مسلمة بدون الرجوع الى الاصل .. والله انا اعتقد .. انا سأترك رأى المحاماة فيها لاهل المحاماة ، وسأترك رأى المواطنين فيك للمواطنين ، وسأترك رأى المسلمين فيك - كمسلم - للمسلمين . وقل لى بقية شهادتك من فضلك ..  
يتفضل السيد المدعى

رئيس النيابة - انت تعرف عبد المنعم عبد الرؤوف ؟

الشاهد - ايوه يا فندم ...

رئيس النيابة - تعرفه من امتى ؟

**الشاهد —** قابلته في المركز العام . .  
**رئيس النيابة —** امتى ؟

**الشاهد —** في اثناء . . . ايام حركة الجيش . . يعنى في يولييه  
سنة ١٩٥٢

**رئيس النيابة —** في مبدا الثورة يعنى ؟

**الشاهد —** ايوه . . . وعلمت انه قبض عليه ؟ وانه كان معتقل  
وبعد ماهرب من السجن ، قابلته في المركز العام . .  
**رئيس النيابة —** بعد ماهرب ؟

**الشاهد —** بعد ماهرب . . . وطلب انهم يشوفوا له مكان علشان  
يقعد فيه . . .

**رئيس النيابة —** ازاي ؟

**الشاهد —** يختبئ فيه . . فانا فعلا وديته لكان في شبرا عند  
واحد اسمه احمد عيد . . .

**رئيس النيابة —** عارف الشارع كان شارع ايه ؟

**الشاهد —** مش متذكر الشارع . . وانما في شبرا بس . . استقر  
عنده مسافة طويلة وبعدين راح امبابه عند هنداوى دوير ، وكان  
راح عند مصطفى الزرقانى في امبابه ايضا وكان بيعيش معاهم . .  
**رئيس النيابة —** مش انت اللى نقلته ؟

**الشاهد —** ايوه . . . وبعدين كان موجود في معسكر كرداسة  
وهرب . .

**رئيس النيابة —** بيعمل ايه ؟

**الشاهد —** بيدرب الاخوان . .

**رئيس النيابة —** بيدربهم على ايه ؟

**الشاهد —** على التكتيك . . .

**رئيس النيابة —** كل الاخوان والا الجهاز الخاص ؟

**الشاهد — لا ... أعضاء الفصائل ...**

**الرئيس —** موجهها كلامه للمتهم — اهو ده رئيس هنداوى اللى اداله الطبنجة علشان يضرب بها جمال عبد الناصر ... اهو ده رئيس هنداوى ... بينكر انه قال لهنداوى انك تروح علشان تقتل جمال عبد الناصر .. سامع رئيسك ... سامع رئيس رئيسك ...

**المتهم —** انا طبيعى

**الرئيس —** سامع يامحمود يا عبد اللطيف ، لما تمشى وراء اهل' السوء يحصل لك ايه واحد يقول لك اقتل واحد ... تقول ايه ... اقعد ياغلبان .

**جلس المتهم**

**الرئيس —** ترفع الجلسة الان على ان تعود الى الانعقاد فى الساعة السادسة من مساء اليوم ١٥ نوفمبر سنة ١٩٥٤ ، ويستدعى هنواوى دوير لهذه الجلسة .

( رفعت الجلسة فى الساعة الثالثة والدقيقة الثلاثين بعد الظهر )

## خاتمة


بهذا تنتهى الجلسة السادسة من محاكمة المدعو محمود عبد اللطيف أمام محكمة الشعب ، وسيبدأ الجزء الثالث من هذا الكتاب بالجلسة السابعة وستستمر ادارة النشر والتوزيع فى اصدار هذه الاجزاء وستعرضها فى الأسواق بسعرها الزهيد ( ٣ قروش فقط ) حتى يطلع الرأى العام كله فى مصر وفى الخارج على ما كانت تنتويه هذه العصاةة المجرمة لمصر من هدم وتدمير . فاذا كنت لم تحصل على نسختك من الجزء الأول فاتصل بإدارة النشر والتوزيع ٦٨ شارع قصر العينى - القاهرة .











المحاكمات التي تمت في المدة من ١٥ إلى ١٦ نوفمبر ١٩٥٤



# محكمة الشعب

المضبطة الرسمية

محاضر جلسات محكمة الشعب

الجزء الثالث

١٩٥٤



## تقديم

أيها المواطن الكريم •

وقفنا بك في الجزء الثاني من هذه المحاكمات عند نهاية الجلسة السادسة ، وهانئذ أولاء نقدم اليك اليوم الجزء الثالث من هذه المحاكمات الخطيرة ، مبتدئين بالجلسة السابعة •

ولعلك تبين من قراءة اعترافات الشهود والتهمين على السواء ، كيف كانت تدور جموعية الاخوان المنحلة ، وكيف كان رؤساؤها يسيئون الى شباب هذه الامة باسم الدين تارة وباسم المعرفة طورا ، وانهم لم يكونوا في الواقع غير فئة ضالة ، تمتعت من السيطرة على عقول السذج والبسطاء باسمائهم الملتوية •

ان الوقائع المبينة في كتب محاكمات الشعب والمبررات والتعليقات المدهشة التي ذكرها المتهمون ، ليست من صنع اعضاء المحكمة أو أعضاء الادعاء ، ولكنها من الواقع نفسه ، الواقع الذي استمع اليه كل من اصفى الى التسجيلات التي نقلتها محطات الاذاعة الى جميع انحاء العالم •

فاذا كنت لم تشتتر بعد نسختك من الجزئين الاول والثاني فاتصل بادارة النشر والتوزيع ٦٨ شارع قصر العيني بالقاهرة •



## محضر

### الجلسة السابعة لمحكمة الشعب

المنعقدة علنا في الساعة السابعة مساء ، بمقر قيادة الثورة  
في الجزيرة يوم الاثنين ١٥ نوفمبر سنة ١٩٥٤ ، الموافق ١٩  
ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ  
اول نوفمبر سنة ١٩٥٤ ، الموافق ٥ ربيع الاول سنة ١٣٧٤ ،  
بتاء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو  
مجلس قيادة الثورة .

وعضوية القائمقام انور السادات ، والبكباشي ( ا . ح )  
حسين الشافعي ، عضوي مجلس قيادة الثورة .

وبحضور البكباشي ابراهيم سامي جاد الحق المدعي ،  
والاستاذ عبد الرحمن صالح وكيل النائب العام ، عضوي  
مكتب التحقيق والادعاء .

وتولى تسجيل المحاكمات بالاخترال الاساتذة : طلعت

الصبان ، وممدوح توفيق وابراهيم فكرى فوده ورمسيس  
حنا ، مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد .  
( حضر المتهم )

الرئيس - فتحت الجلسة . . المدعى . .  
وكيل النائب العام - انت ما اتصلت بشهنداوى دوير قبل  
وقوع حادث الرئيس جمال عبد الناصر  
الشاهد - اتصلت به كما سبق ان اتصلت بجميع رؤساء  
المناطق . .  
وكيل النائب العام - وآخر مقابلة كانت معاك له . . كانت  
امتى قبل الحادث ؟

الشاهد - لعها قبل الحادث بيومين  
وكيل النائب العام - ادितه الحزام امتى ؟  
الشاهد - قبل الحادث بيومين .  
وكيل النائب العام - كنت معاه يوم الحادث .  
الشاهد - لا يافندم . . .  
وكيل النائب العام - متأكد انك ما رحتلوش فى امبابة يوم  
الحادث .  
الشاهد - لا . . .



**وكيل النائب العام** — ما حصلشى بينك وبينه كلام بشأن  
إخطة اغتيال الرئيس جمال ؟

**الشاهد** — اللى حصل هو الكلام فى الإخطة التى عرضتها  
وتتلخص فى ان الاغتيالات لا يمكن ان يبدأ فيها الا اذا حصل  
اعتداء على الحركة الشعبية ..

**وكيل النائب العام** — سؤال محدد .. هل تحدثت مع هنداوى  
بشأن الاعتداء على الرئيس جمال ؟

**الشاهد** — لا ... لم اتحدث معه فى هذه الجلسة ..

**وكيل النائب العام** — فى اى جلسة تحدثت معه ؟

**الشاهد** — فى اثناء عرض الإخطة العامة ..

**وكيل النائب العام** — قلت له ايه

**الشاهد** — انا قلت ان هذا الاعتداء لا يجوز ان يتم الا اذا

حصل اعتداء على الحركة التى قد تقوم ..

**وكيل النائب العام** — يعنى تحدثت معاه ؟

**الشاهد** — ايوه يافندم .. فى اثناء عرض الإخطة ..

**وكيل النائب العام** — يعنى ألم تحدد وقتا او اشخاصا او

ميعادا ؟

**الشاهد** — لا ...

**وكيل النائب العام** — هل ادبت له سلاح او مسدس على وجه

التحديد ؟

الشاهد — لا ...

وكيل النائب العام — ما كلفتوش هو او غيره بانه يقوم بارتكاب  
هذا الحادث ؟

الشاهد — لا يافندم ...

وكيل النائب العام — اطلاقا ... ؟

الشاهد — لا ... اطلاقا ...

وكيل النائب العام — التمس من عدالة المحكمة ، ومالدا الواقعة  
شرحها هنداوى دوير ... اذا تكرمت المحكمة تستدعى هنداوى  
دوير ...

الرئيس — قررت ان هناك ... فيه خطة والخطة دى حاتقوم  
بمظاهرات شعبية مسلحة ...

الشاهد — ايوه ...

الرئيس — والمظاهرات الشعبية المسلحة دى ، تبدأ باغتيالات  
... بتاعة رئيس الحكومة ومجلس الثورة وبعض الناس من  
الضباط ... طبعا متصور أن مفيش ناس حاتسكت ... يعنى  
فيه ناس حاترفع صوتها ومعها سلاحها ... ماهو الموقف عندما  
يقوم فريقان فى البلد مسلحان يضربوا فى بعض ... ويغتال رئيس  
الحكومة ، ويغتال اعضاء مجلس قيادة الثورة ، ويغتال عدد من  
الضباط ، ويجتاح القطر رعب وفزع ، وليس هناك اى دفاع عن  
منطقة القاهرة ولا مداخلها ، وهناك قوات بريطانية مستعمرة

موجودة في منطقة القنال . . . ماهو الاستعداد الذي اتخذتموه  
لمجابهة الانجليز اذا مافكروا أن يدخلوا القاهرة ؟

**الشاهد -** اولا فيما يتعلق ببدء الحركة ، فقد كان المفهوم ان  
القوات التي ستشارك فيها قوات ذات اغلبية عديدة وقد سبق  
او هناك سابقة في حوادث ٢٥ مارس ، وما سبقها بأن سيادة  
الرئيس جمال لما وجد اتجاه معين كان يسلم به ، فكان برضه مفهوم  
لدى الناس الى ينفذوا او الذين يعدوا هذا الاعداد . . . جائز  
اننا نحصل على المطالب التي تقوم بها الحركة بدون اى اراقة دماء  
او معارضة من المعارضات . . .

**الرئيس -** اذا كان اغتيال جمال عبد الناصر واعضاء مجلس  
قيادة الثورة . . . مين الى يسكت الناس بتوع جمال ورجال جمال  
عبد الناصر واعضاء مجلس قيادة الثورة . . مين الى يسكت  
الناس ؟

**الشاهد -** ذكرت ان السيد جمال عبد الناصر ، كان علم انه له  
سابقة في هذا . . . لو حصل شيء يكون طبيعى سيادة رئيس  
الجمهورية موجود ، وجايز جدا ان يحصل تفاهم بين الرئيس  
نجيب والرئيس جمال . .

**الرئيس -** ازاى الرئيس نجيب يتفاهم مع الرئيس جمال  
المفتال ؟

**الشاهد** - أنا باتكلم قبل حصول أى اعتداء ، ومن المحتمل أن يتم تفاهم ..

**الرئيس** - وإذا لم يوافق ؟

**الشاهد** - باعتبار ان هناك اغلبية عددية ومجموعات كبيرة مع الرئيس نجيب ، كان المفهوم ان المسألة لاشك فيها ان الحكم يكون فيها للاغلبية ...

**الرئيس** - واحنا قلنا ان الناس دول حايثحولوا على بعض ويتضاربوا .. الحرب الاهلية بتكون الغلبة فيها للفريق الاقوى والاكثر عددا ...

**الشاهد** - ايوه ...

**الرئيس** - فى اثناء هذه المعركة ... ماهى الاستعدادات التى عملت لجابهة تدخل قوات الانجليز المسلحة الموجودة لديهم فى منطقة القنال ؟

**الشاهد** - ابلغنى يوسف طلعت ان هناك قوات موجودة فى اقليم الشرقية وشرق منطقة القنال ، وهى مستعدة للقيام بحرب عصابات ضد المستعمر فيما لو فكر ان يحتل جهات اخرى ..

**الرئيس** - ما هى هذه القوات التى فى القنال الشرقية ؟

**الشاهد** - قوات فصائل من الاخوان ..

**الرئيس** - يعنى فيه قوات فصائل للاخوان غير القاهرة فى

القتال والشرقية ، وعندهم من الاسلحة ما يكفى لمقاومة تدخل  
الجيش البريطانى .

**الشاهد -** لعرقلة ..

**الرئيس -** تدخل الجيش البريطانى .. او عندكم القوة دى  
ما تستعملوهاش ليه فى القنال ؟

**الشاهد -** الاخوان اشتركوا فى القنال قبل حرق القاهرة ..

**الرئيس -** اشتركوا بكام فصيلة ؟

**الشاهد -** علمت ..

**الرئيس -** انت كل حاجة علمتها ..

**الشاهد -** دهالى خاص بهذا الموضوع . . . علمت من

الناس المسئولين .

**الرئيس -** ماذا قررت فى اقوالك فى التحقيق .. ما هى

الخطة للدفاع لعرقلة الهجوم بتاع الانجليز ؟

**الشاهد -** القيام بحرب عصابات من شأنها ان تعرقل ..

**الرئيس -** ايضا ...

**الشاهد -** بنسف طرق المواصلات والمنشآت التى يحتلونها

**الرئيس -** وايه كمان ؟

**الشاهد -** وبتقطع خطوط امداداتهم وتموينهم ؟ ..

**الرئيس -** ( موجهها كلامه لجمهور الحاضرين ) - شايفين

يا حضرات .. بلدكم كانت حاتتنسف .. الطرق والكبارى والمنشآت .. هل يحطم المستعمر بأنه يوجد البلد فى حالة وهن وحالة ضعف ، وهل يحطم رجال اسرائيل بايجاد مصر فى حالة ضعف ووهن كالحالة التى كنتم ستوصلون اليها هلا فكرتم فى هذا ؟

الشاهد - لاشك ان الانجليز ..

الرئيس - اسمعنى .. انتم تكلمتم كثير فى المؤامرات بتاعتكم .. وهل علمت من التاريخ يا استاذى الفاضل خريج كلية الحقوق ان الانجليز اول ما دخلوا البلاد مستعمرين اول ما قضاوا قضاوا على رجال الجيش لتضعف البلاد وانتم قايمين على شان خاطر تضربوا الجيش فى بعضه والاهالى فى بعضها وهناك مستعمر فى داخل البلاد وهناك من يتمنى الاستعمار قاعد على حدود البلاد .. الخطة انكم تنسفوا المنشآت والكبارى والطرق .. الخطة انكم تنسفوا مصر .. ماهو برنامجكم فى الحكم هل هو الهدم او البناء .. واذا كان برنامجكم الحكم فهل هو ده الحكم الاسلامى

الشاهد - لا مش معقول ..

الرئيس - طيب قول لنا دى .. فسرها .. قول لنا الدرس

بتاع الانجليز وكيف تضمنوا عدم تحرك القوات الانجليزية وانتم  
نفسكم تخشوا تحركها ؟  
الشاهد - ايوه . .

الرئيس - والا ما كنتوش فاهمين ان فيه تحركات يبقى  
استعدادكم كان ازاي هل كان بالجلجنايت والاستن والبرن  
وهل نضمن ان ده يوقف التحركات ؟  
الشاهد - كان المقصود بها عرقلة القوات . .

الرئيس - اى قوات ؟  
الشاهد - القوات الانجليزية . . كان المقصود عرقلة القوات  
الانجليزية بنسف المنشآت . .

الرئيس - لكن القوات الانجليزية ما تتحركش فى حالة  
نشوب معركة داخلية . .  
الشاهد - يجوز ان تتقدم هذه القوات لاي اخطار وبمجرد  
ما قامت الثورة كان فيه تقدم لقوات الانجليز ولذلك تقدم الاخوان  
ليكونوا تحت تصرف الثورة . .

الرئيس - انتم . . شفتكم يامواطنين القوات المسلحة بتاعتكم  
فين . . مش هى القوات المسلحة الى القائد بتاعها عبد الحكيم  
عامر . . لا دى مدافعها ورق والبنادق فيها حلاوة تعرف اول  
حاجة عملتها الثورة ايه يوم ٢٣ يوليو . . . . . وتعرف ليه طردت

فاروق يوم ٢٦ يوليو وما طردتوش يوم ٢٣ قول لى يامسدير  
ما فكرتش فى السبب بعد الحوادث مابقت تاريخ ؟ .

**الشاهد -** لم يبلغ الى علمى شىء عن هذا . . .

**الرئيس -** الم تفكر وقد اصبح هذا جزءا من تاريخ البلد ؟ . .

**الشاهد -** من يوم ٢٣ يوليو الى يوم ٢٦ فعلا دى مسألة

بعيدة عن ذهنى . .

**الرئيس -** كانت الحكاية دى فى القرن نهون

**الشاهد -** القرن اللى نعيش فيه . .

**الرئيس -** العدد بتاع القرن ده ايه

**الشاهد -** العشرين . .

**الرئيس -** الحمد لله . . . الا تذكر هذه الحادثة الكبيرة ؟

تاريخ البلاد ؟ .

**الشاهد -** ما عرفشى . .

**الرئيس -** ماتذكرش . . طيب انا اقول لك . . السر فى

التأخير . . السر هو أن الثورة جعلت شغلها الشاغل وضع

الاستحكامات وجمع الاسلحة وجميع قواها لتكون خطا للدفاع

عن الوادى ضد القوات الانجليزية اذا ماتدخلت . . جميع الاسلحة

اللى كانت موجودة فى القواب المسلحة حتى ان مدافع الآليات

شغلناها مدافع ميدان كنت عايز اعرف حتوقفوها ازاي . .

حتوقفوها بالجنجايت والـ T.N.T ازاي انتم عرضتكم



على الثورة انكم توقفوا الجيوش الانجليزية وقتلوا للضباط  
اتفضلوا استريحوا واقعدوا في بيوتكم انتم عملتوا اللي عليكم  
يابتوع الثورة سلمونا بقى . . . سلمونا الغنيمة . . . سلمونا بقى  
ياسيد علشان تشغل المصاصة سلمونا بقى ياسيدى . . . واسرائيل  
مش عاملين لها اعتبار ولا فى الحساب والقوات الانجليزية ملهاش  
اعتبار . . حرب داخلية تحرقوا البلد وتنسفوا المنشآت وتنسفوا  
الطرق وتنسفوا الكبارى ما فكرتوش فى الاموال واصحاب رءوس  
الاموال حايهمموا ايه فى رءوس اموالهم وحملة  
الاسهم والسندات وبورصة العقار وبورصة الاوراق المالية  
حيحصل فيها ايه والوانى والحركة التجارية يحصل فيها ايه  
مافكرتوش فى تهوين القاهرة مافكرتوش فى البترول وحاييجى  
منين علشان تصبحوا تلاقوا رغييف عيش . . . ماهى الخطة التى  
وضعت او لم يكن هذا فى الحساب ؟

**الشاهد -** كانت فى الحساب . .

**الرئيس -** ماهى الترتيبات التى اتخذت لمواجهة القوات  
الانجليزية باعتبار انها قوات موجودة ويجوز ان تتدخل ؟ . .

**الشاهد -** الفكرة تعجيز قوات العدو بقدر امكانياتنا . .

**الرئيس -** واذا لم تتمكنوا بالاسلحة الفاسدة العاجزة والبنادق  
والبرن . . . صحيح اسلحة يمكن تقتل وتغتال ولكن ماتنفعش فى  
الميدان . . .

**الشاهد -** كنا فاهمين باستمرار ان القوة الشعبية ..

**الرئيس -** مين اللى كان مفهمكم .. اتدور ... لف كمان شوية ... الناس دول هم القوة الشعبية لو طلعت اعرف واحد او اثنين يبقى كويس للاسف المكان مابساعش اكثر من كده ... احنا كنا حقنا عملناها فى ميدان الجمهورية ...

**الشاهد -** الفكرة ان كل رجل يسلح علشان كل انسان يستطيع ان يتقدم للمعركة فى اى بلد من البلاد التى تريد التحرر من الاستعمار زى الجزائر وتونس ده بالضبط اللى كنا فاهمينه ..

**الرئيس -** هل درستم تاريخ او استعداد تلك الشعوب / الجزائر مثلا فيها حركة قومية فهل عندها مصانع بتطلع لهم اسلحة وذخائر ولا فيه امدادات وتموينات بتيجي لهم من جهة اخرى ؟

**الشاهد -** طبعا تموينات بسيطة ...

**الرئيس -** والغالبية ؟

**الشاهد -** من الاعداء ...

**الرئيس -** يعنى ( كلفتى ) يسرق منه .. ويحاربه

**الشاهد -** أيوه ...

**الرئيس -** زى ما سرقتم من الانجليز الاسلحة وجايين محاربوا الحكومة ..

**الشاهد -** أبدا ..

**الرئيس -** انت قررت في آخر كلامك ان الجهاز السرى لجماعة الاخوان كان للدفاع عن الدعوة في الجزائر او تونس او مصر فقلت لك اضرب لنا مثل عن كيفية الدفاع عن الدعوة في مصر وتدرجنا الى الكلام شوية واعترفت بأن الغرض هو القيام بحركة شعبية مسلحة ضد الحكومة تستهدف الاستيلاء على البلاد تقدر تقول لنا بقى ما هو التناقض بين الفكرتين بالنسبة للهدف الذى تكون منه هذا الجهاز المسلح هل الغرضين هما الهدف منه والا كان واحد يقال فى العن وواحد فى السر .؟

**الشاهد -** الغرض كان مواجهة القوات الاجنبية التى تعتدى على ارض الوطن مفيش شك ...

**الرئيس -** وصلنا الى ان فيه جيشين فى البلاد بقيادتين مختلفتين جيش على وجيش سرى بقيادة المحامى ابراهيم الطيب ورئيسه يوسف طلعت ..

**الشاهد -** ده كله مجرد اعداد بس لقوات شعبية ...

**الرئيس -** شىء جميل .. فى منتهى الجمال .. ذكرت فى اقوالك أنك لما كان الاستاذ عوده الاستاذ الى بتشتغل معاه .. الاستاذ عوده المحامى لما كان بيكلمك كنت بتاخذ كلامه ثقة فهل بادلته ثقة بثقة ؟

**الشاهد -** لا شك فى أن الثقة متبادلة ...

**الرئيس -** هل اطلعت عوده على الخطة بتاعة الجهاز السرى

الخطه بتاعة الحركة الشعبية والاغتيالات لجمال وأعضاء قيادة الثورة وبعض الضباط وتعضيد محمد نجيب لهذه الحركة الشعبية المسلحة المكونة من شعبية الاخوان المسلمين هل اطلعتة على ذلك ؟

**الشاهد -** طبعا باعتباره ليس عضوا في اللجنة العليا لم يكن يعرف بها وأنا لم أطلعه عليها . .

**الرئيس -** اذن الراجل كان يبادلك الثقة ويحكى لك الاسرار ويتشتغل معاه ولا تبادله الثقة وتخبي بعض الاسرار عنه في نفسك ولا تعطيهها له مع العلم بأنه من أعضاء مكتب الارشاد ومسئول عن أعمال الاخوان المسلمين جميعا والاجهزة التي بها فكيف لا تطلعه عليها ؟

**الشاهد -** لعل السبب في ذلك انه لم يكن تم انتخابات المكتب الجديد وان دى مسألة مقررة في اللجنة العليا . . .

**الرئيس -** والا علشان تستعمله شويه وتغتاله راخر . . . هل كان يعلم عوده بأنه فيه نظام مسلح ؟

**الشاهد -** ما افكرش . . .

**الرئيس -** كيف تفسر اذن قوله بأنه مستعد أن يخش واسطة خير بين الحكومة والاخوان على شرط أن تسلم الاسلحة بتاعة الجهاز السرى وان يحل هذا الجهاز كيف يقرر هذا وانت الى

بتشتغل معاه وموضع الثقة والسر بتاعه وما قلتش له على  
الجهاز ازاي يعرف وعرف منين ؟

**الشاهد** - لازم اتصل فعلا ببعض أعضاء اللجنة العليا وعرف

منهم ...

**الرئيس** - وانتم الاثنين المسلمين .. المؤمنين اللي بتعملوا  
الدعوة للاسلام هوه ينكر عليك وانت تنكر عليه في ايه في الحاجة  
اللي لا يقرها الدين انتم الاثنين تنافقوا بعض ..

**الشاهد** - دي مسألة اختصاص

**الرئيس** - وهل دي من اختصاص المحاماة .. انك تنظم  
جهاز سرى في القاهرة

**الشاهد** - لم يكن لى الامر ..

**الرئيس** - امال امر مين ؟

**الشاهد** - اللجنة العليا

**الرئيس** - واللجنة امرها مطاع عن الحكومة ؟

**الشاهد** - لا ...

**الرئيس** - والحكومة مش قالت مفيش تنظيم سرى او سلاح

**الشاهد** - انا ذكرت التبرير ..

**الرئيس** - آه .. بس كفاية لحسن دي بقت حكاية قديمة

وبقت ممله قوى لحسن اذا طلبت منك تعيدها حد يدعى علينا

... مين اللى ابتدا بالعدوان والضرب ... هل تعتقد بأن الحكومة حكومة الثورة وأعضاء مجلس قيادة الثورة بجهاز المخابرات كله اللى لديها يقعدوا سنتين ونصف مش عارفين امتى اتكون الجهاز وامتى أعيد تنظيم الجهاز وامتى اتسلح ؟

**الشاهد** — اعتقد انه يعرف ..

**الرئيس** — طيب ايه اللى سكتها عليكم ؟ ..

**الشاهد** — ما علمتش السبب ايه ..

**الرئيس** — اصلنا خايفين منكم .. يا امى .. ومع هذا تروحوا وتضعوا خطة الانقلاب وقيام الشعب الاخوانى المسلح بمظاهرة مسلحة وتتصل بأحد رؤساء الفصائل ... هنداوى دوير وتقول له كلف واجد علشان يبدأ تنفيذ خطة الاغتيال فى الوقت الذى يراه ويعتمد على نفسه ... كلفت مين ؟

**الشاهد** — ما كلفتوش لاننا لم ندخل فى اى دور تنفيذى ..

**الرئيس** — آه ... طيب هات لنا بقى هنداوى دوير ...

**نسف منشئات ومبانى وطرق وقتال داخلى كان ضد مين .**

**الشاهد** — كان ضد القوات الاجنبية ...

**الرئيس** — وخطة الاغتيالات لاعضاء مجلس قيادة الثورة ...

**مبتدئين بجمال عبد الناصر والنضباط الاحرار ؟**

**الشاهد** — يقينا لا ..

**الرئيس -** آمال خطة الاغتيالات ليه والثورة المسلحة ليه ؟

( حضر الشاهد هنداوى دوير )

**الرئيس -** يا هنداوى قررت فى اقوالك واعترافك بأن ابراهيم الطيب جالك وادالك امر بخطه . . . هذه الخطة تبدأ باغتيالات وادالك مسدس وكلفك بأنك تكلف محمود عبد اللطيف علشان يقتل جمال عبد الناصر وادالك حزام وقال لك اديله الحزام علشان يبقى ينسفه ويتنسف معاه وجاب لك واحد تانى اسمه نصيرى وقال لك كلفه بنفس المأمورية وقل لهم يعتمدوا على انفسهم فى تتبعه . . هذه الجزئية جت فى اقوالك واعترفت بها والا لا ؟

**الشاهد -** ايوه . . .

**الرئيس -** نحب نسمع منك تانى الحكاية دى بأقوالك والفاظك **الشاهد ( هنداوى دوير ) -** حاضر يافندم . . السيد ابراهيم الطيب جالى قبل الحادث بعشرة خمستاشر يوم وكان وقتها بيتصل بى تقريبا كل يوم وقال لى ان الخطة التى سيتبعها النظام السرى تبدأ اولاً بالاعتداء على الرئيس جمال عبد الناصر وبالاعتداء على بعض حضرات أعضاء مجلس قيادة الثورة وبعض الضباط الاحرار بكشف عندهم ونظرا لان منطقة امبابه مفيهاش جد قال لى مالکش دعوى بالحنة دى وبعد كده جبه ينفذ

العملية وحاب طنبجه واداهها لمحمود عبد اللطيف على أساس ان محمود يقوم بواجبه بمجهوده الشخصى وحتى ضرب لى مثل وقال لى انه يعتمد على مجهوده الشخصى وان الواحد اللى له عدو يتبعه لحد ما ينتهى منه وجاب المسدس فسلمته لمحمود ويوم الحادث بالذات كان عندى اثنين ونصف واتغدى وأنا كنت اتغدى فى البيت وهو كان جـه من غير غدا فجبت له فدا فى اودة المكتب وسلمنى حزام فيه لغم وشرح لى طريقة استعماله وقال لى لا يرجع يبقـى برضه يستعمله وجانى نصيرى وجاب لى طنبجه وقال لى اديها لنصيرى واعرض عليه الحزام والطنبجه وحتى أنا ابدمت اعتراضات على الحزام فكان رده انه قال انا دالوقت عندى اجتماع وبعدين حابقى آجى أخده ولما عرضت الحزام على نصيرى رفض وفضل الحزام عندى ...

الرئيس - اـ رانك يا ابراهيم

الشاهد ( ابراهيم الطبيب ) - الكلام لم يحدث علم هذا الـ حـه انا كلمته على اساس عرض حطة عامه وعاصل على لا ... باى عمل من الاعمال قبل نشره تـيـت اـتـيـس مـنـه المـنـوت الشعبية ...

الرئيس - حصل والا ما حصلش ؟



الشاهد ( ابراهيم الطيب ) — ما حصلش وأنا لم اسلم اليه

الا الحزام

الرئيس — ما سلمتوش الطبنجة ؟

الشاهد ( ابراهيم الطيب ) — لا ...

الرئيس — ما سلمتوش نصيرى ؟

الشاهد — أيوه ...

الرئيس — ما حددتلوش محمود عبد اللطيف ليقوم بالحادث ؟

الشاهد — لا ..

الرئيس — شايف ياهنداوى الرئيس بتاعك بيحاول نفى التهمة

منه ازاي . . قول لنا لما جالك محمود الحواتكى وكان معاه

عبد الفتاح القرشى وقال لك انه سمع أن هذه الخطة بتاعة

الاغتيالات وقيام الجهاز السرى بحركة مسلحة ثورية واحداث .

انقلاب فى البلاد قال لك انا سمعت ان المرشد مش موافق عليها

وبعدين لما جالك ابراهيم الطيب وحبيت تستفسر منه عن هذا

الكلام ...

الشاهد ( هنداوى دوير ) — بعدما جاتنى التعليمات من ابراهيم

الطيب واخذت منه الطبنجة قعدت فى ايدى ساعة والا ساعة

وربع وسلمتها لمحمود عبد اللطيف على طول وبعدين جاتنى

الاستاذ الحواتكى فى زيارة عارضة وقعد ثلث او ربع ساعة

وقال لى بلغنى ان النظام السرى عايز يعمل شوية اغتياالات  
وأنا بلغنى ان الاستاذ المرشد غير موافق على هذا الاتجاه وقال  
لى حتى عبارة لازلت أذكرها قال لى لابد أن هناك هوى مطاع  
وشىء متبع يعنى فيه ناس بيتمسكوا برأيهم وأنا حامر على  
رؤساء المناطق وأحاول وقف مثل هذا الاجراء فى هذه الحالة  
أنا تذكرت محمود عبد اللطيف فقلت له أوقف وبطل ...

**الرئيس -** لقد قرر محمود هذا ...

**الشاهد ( هندوى دوير ) -** وجانى ابراهيم تانى يوم مباشرة  
أو بعدها بيوم فقلت له يا فلان الحواتكى قال كذا فاحنا  
مش عايزين ندخل فى هذا التيار ..

فقال لى ان دول متصلين بالاستاذ البهى والجماعة المفصولين  
وعايزين يعطلوا شغلنا والاوامر دى صادره من المرشد ...

**الرئيس -** مين ؟

**الشاهد -** حسن الهضيبي ...

**الرئيس -** الرئيس الاعلى

**الشاهد -** للاخوان المسلمين والنظام السرى ...

**الشاهد ( ابراهيم الطيب ) -** حصل فعلا ولكن بعد الاعتراض  
على الخطة والاستعدادات لم تكن تمت ولم نعط أى أمر بالتنفيذ  
باعتبارها لم تتم والاجهزة غير مستعدة ولم يحصل أى تنفيذ

حتى يتم الاستعداد كما سبق أن ذكرت وهذا يتفق مع ما قاله  
الحواتكى الكلام الذى قيل عن الهضيبى والذى قاله لى يوسف  
طلعت . . . يوسف قال ان المرشد قال ان **الاخوان** لسه مش  
مستعدين وفيه **تنظيحات** يحسن اننا مانبدأش الا بعد الانتهاء  
من **الاعداد والتجهيز**

الرئيس — والله

الشاهد — أيوه . . .

الرئيس — لا يا شيخ

الشاهد — أيوه . . .

الرئيس — يعنى كل الكلام اللى قلته من الصبح لغاية ثلاثة  
ونصف نعيده لك من تانى . . .

الشاهد ( **هنداوى دوير** ) — يوم التلات كان عندى ولما قلت  
له ان محمود عبد اللطيف سافر الى الاسكندرية قال لى ايه  
الشاهد ( **ابراهيم الطيب** ) — احنا فوجئنا بهذا التكليف من  
الاستاذ **هنداوى دوير** ودهشنا له

الشاهد ( **هنداوى دوير** ) — سبحان الله ! . .

الرئيس — لذلك رحت هربان

الشاهد — ( **ابراهيم الطيب** ) انا ما هربتش الا بعد اعتقال  
الاستاذ عبد القادر عوده . .

الرئيس — وهربت ليه . . الظاهر ان له دخل كبير قوى فى الموضوع . . .

الشاهد — ( ابراهيم الطيب ) باعتبار انه معايا فى المكتب انا خشيت ان اعتقل . .

الرئيس — ايه رايك فى الاقوال دى يا هنداوى  
الشاهد — ( هنداوى دوير ) انا قلت الحق ويوسفنى ان ينكر جزء من اقوالى .

الرئيس — شفت الاسلام .  
الشاهد — ( هنداوى دوير ) ان الاسلام لا يجيز الكذب على اى حال . . .

الرئيس — شفت دعوة الاخوان المسلمين . .  
الشاهد — ( هنداوى دوير ) انا اتقدم برجاء . .  
الرئيس — قول لنا يا محمود ايه اللى حصل .  
المتهم — اللى حصل ان هنداوى دوير قبل الحادث بأربعة ايام او خمسة كان لسه ما ادانيش الطبنجة قال لى اوقف يا محمود وانا كنت باستطلع وقتها بس فوقفت وما طلعتش وبعدين بعدها قال لى مشى زى ما انت فى طريقك . .

الرئيس — طريقك اللى هوه ؟ . .  
المتهم — دراسة طريقة اغتيال الرئيس جمال عبد الناصر

وقبل الحادث يوم الاثنين بالليل الساعة اثناسر ونصف رحت له البيت واخبرته بالحكاية بتاعة جريدة القاهرة ولما قلت له كده تردد برهة بسيطة وقال لى طيب سافر الصبح مش عاوز فلوس فقلت له عايز فلوس طبعا ادينى خمسة جنيه . .

**المتهم — من هنداوى يا افندم**

**الرئيس — والرياسات اللى فوق هنداوى ؟**

**المتهم — اعرف ان ابراهيم الطيب . معرفش غيره .**

**الرئيس — والطبنجة دى اللى اعطاها لك .**

**المتهم — ايوه**

**الرئيس — شوفها كده ؟ والا استنى الا تكون مليانه**

**المتهم — حاضر**

**الرئيس — ( لهنداوى ) تحب تلمسها تانى ؟**

**هنداوى — ارجو ان شاء الله متحصلش حاجة زى كده .**

**الرئيس — ( للشاهد ) هى دى الطبنجه ؟**

**الشاهد — انا لم اسلمه هذه الطبنجة اطلاقا .**

**الرئيس — تشتريها بكام ؟**

**الشاهد — انا متأكد يا افندم من كلامى**

**الرئيس — ايه رايك يا هنداوى ؟**

**هنداوى — والله الانكار ده ملهوش داعى لان الامور لا تؤخذ**

بهذه الصورة ، واذا كان الانسان اخطأ يجب يتحمل خطاه .

وكيل النائب العام - محمود عبد اللطيف مشفتش الطيب

اثناء الاتفاق على محاولة الاغتيالات

المتهم - اثناء الاتفاق مشفتهوش

وكيل النائب العام - وقبلها شفته ؟

المتهم - ايوه يا افندم

وكيل النائب العام - قبلها قد ايه ؟

المتهم - عشرة - ١٥ يوم

وكيل النائب العام - حدث بينك وبينه حديث والا هو اتكلم

مع غيرك حديث وانت سمعته

المتهم - حصل بيني وبينه حديث في منزل هنداوى . قعدنا

شوى وبعدين هنداوى قال اخوك ابراهيم الطيب وعرفنى به

وقال جيفوت عليك في الدكان .

وكيل النائب العام - وهل هو فات عليك ؟

المتهم - حاقول . معانى لم اذكر هذا في التحقيق القديم

لانى مكنتش اردت . . الحكاية ان علشان خاطر هنداوى يسلمنى

انا وسعد حجاج لابراهيم الطيب . ابراهيم الطيب قعد معنا في

بيت هنداوى وقعدنا نتكلم شوية في حكاية الجهاد وما شاباه ذلك

وبعد كده ابراهيم الطيب قال حافوت عليك في الدكان انا عارفه .

وهو سبق انى شفته جاني فى الدكان مره . بعد كده اتصل بى  
بعد يومين ابراهيم الطيب فى الدكان وقال لى حضر سعد النهارده  
الساعة ٦ ، هو كان اتصل بى قبل الظهر او بعد صلاة الجمعة .  
وقال لى عايزك انت وسعد حجاج اليوم الساعة ٦ بدء من  
الساعة ٦ . قلت له طيب . سعد حجاج فى بشتيل وانا فى  
امبابه . بعد ماسليت الجمعة رحت لسعد حجاج الساعة اثنين  
فى البيت وأخبرته بالاجتماع قال لى طيب . وجاني الساعة ٦  
وقعد عندى من الساعة ستة وصلينا المغرب وقعدنا لغاية سبعة  
الا عشرة وجاء ابراهيم الطيب قال احنا عاوزين نقعد فى حته .  
فيه مكان ؟ قلت له فى البيت فيه مكان . قال نروح البيت .  
مشينا احنا الثلاثة . انا وسعد حجاج وابراهيم الطيب وقلت  
لهم عن اذنكم لما اوسع لكم السكة لان معنديش الا اوده واحدة  
وقلت انحى الجماعة بتوعى عن الطريق . طلعت فوق وفضيت  
السكة ونزلت لقيت الاثنين ثلاثة . استعجبت جه منين . الطيب  
قال لى ده معانا مفيش حاجة . قلت مادام مافيش حاجة خلاص  
وطلعت قعدنا احنا الاربعة وعملنا تعارف انا قلت اسمى محمود  
عبد اللطيف وسعد حجاج وابراهيم الطيب . ولغاية الرابع  
ابراهيم الطيب قال ده تعرفوه بتوفيق . وقال ده حيكون مندوب  
القيادة لكم واللى يقول لكم عليه تنفذوه قلنا حاضر مع السمع

والطاعة . وكان اى امر او اى حاجة نسمعها من الاخوان المسلمين نسمعها على انها حاجة خالصة وطاعة الاخوان طاعة من طاعة الله . دى اللى كنا باعتقادنا لها كنا ماشيين وراها نسلم بكل شىء .

وكيل النائب العام - حصل بينك وبين ابراهيم الطيب اكثر من مقابلة . وراح البيت عندك .  
المتهم - ايوه يا افندم

وكيل النائب العام - ابراهيم الطيب انكر انه راح لك الشاهد - انا قلت . . . انا كنت بازور الاخوان يابيه فى بيتهم الرئيس - الثورة الفت كلمة بيه من الاول خالص .  
وكيل النائب العام - مين قدم على نصيرى لهنداوى ؟  
الشاهد - رئيس المنطقة بتاعته .

وكيل النائب العام - يا هنداوى مين قدمه لك ؟  
هنداوى - ابراهيم الطيب هو اللى بعته .  
الرئيس - ( للشاهد ) انت اللى بعته . ؟  
الشاهد - انا لم اتصل به . كنت عادة لا اتصل برؤساء المناطق .

الرئيس - انت رحت لمحمود فى البيت ؟  
الشاهد - لتكليف يكون من طريق رئيس المنطقة .



الرئيس - انت قلت لرئيس المنطقة يكلف ؟

الشاهد - هو اتى يا أفندم ونصيرى طلب الانضمام

الرئيس - ليه ؟ بيحب هنداوى

الشاهد - كان مطلوب لاعتقاله فى الجامعة .

وكيل النائب العام - وايه دخل بين السرايات وامبابة .

الرئيس - علشان يكون العمل بعيد عن المنطقة . انت عايز

الشاهد

هنداوى - هو جاب لى الطبينة الثانية واللفم والمدفعين على

أنهم يشتركوا هو ومحمود . وأنا أقول لله ياسيدى الرئيس ان

سعد لم ينضم .

الرئيس - ايه حكاية المدفعين . جنسهم ايه . ؟

هنداوى - معرفش والله . ابراهيم الطيب سلمهم لى على

اساس أن محمود عبد اللطيف ونصيرى يعملوا كمين يراقبو

ركب الرئيس

وكيل النائب العام - ينكر ابراهيم انه كان اعطاك تعليمات

هنداوى - سبحان الله .

الشاهد - أنا قلت تعليمات بس .

الرئيس - هو اعطاك تعليمات الخطة لاغتيال الرئيس جمال

واعضاء رجال الثورة والضباط وسألته عن اللى فى منطقته .

هنداوى - هو يتأكد ان مفيش فى امبابة يا افنا

الرئيس - تعرف يحيى سعيد ؟

الشاهد - أيوه

الرئيس - بيشتغل ايه ؟

الشاهد - اظن فى مصلحة التنظيم .

الرئيس - الشغله الاساسية . ؟

الشاهد - فى مخبرات امبابة ؟

الرئيس - كان رئيس جماعة المخبرات ؟

الشاهد - أيوه . الهنداوى مرشح

الرئيس - والتقيت به ؟

الشاهد - أيوه

الرئيس - فىن ؟

الشاهد - شفته فى شارع العباسية .

الرئيس - فى الشارع فقط ؟

الشاهد - كان فيه لقاء .

الرئيس - فى الشارع على التلوار

الشاهد - لا . فى مسجد

الرئيس - كان فيه اجتماع ؟

الشاهد - أيوه

الرئيس — على أساس ايه ؟

الشاهد — كان يتصل ببعض الاخوان اللى بيشتغلوا فى قسم  
المخابرات

الرئيس — هو قال انه قابلك فى بيت كان فيه عبد المنعم  
مبد الرؤوف وكان بيشرح تكتيك بعيدان السجاير  
الشاهد — لا يا افندم ابدا .

الرئيس — الادعاء عايز هنداوى ؟

وكيل النائب العام — لا .

الرئيس — المرافعة عايزاه ؟

الدفاع — لا . يا افندم

الرئيس — متشكرين يا هنداوى اتفضل .

هنداوى — لى رجاء التمسسه من المحكمة .

الرئيس — مش وقت الالتماسات دلوقت .

( وخرج هنداوى دوير من قاعة المحكمة )

الرئيس — لما كنت تغتال الحكومة الموجودة والاخوان

المسلمين هم اللى يتغلبوا ما نوع الحكومة التى ستقام فى البلاد  
وما هى الخطة ؟

الشاهد — فهمت من الاخوان المسلمين ..

الرئيس — من مين ؟

**الشاهد -** فضيلة الشيخ فرغلى . ويوسف طلعت ان الاخوان ليس اغراضهم الحكم بأى حال .

**الرئيس -** وازاى الحكومة اللى كانت حتيجى ؟

**الشاهد -** دى كان بيتولاها طمها الرئيس محمد نجيب نفسه الرئيس - وما هى الخطة اللى تمليها على هذه الحكومة للسير عليه ؟

**الشاهد -** لا توجد خطة مطلقا .

**الرئيس -** ما الفرق بين الحكومة اللى يتولاها محمد نجيب والحكومة الحاضرة ما دام ليس هناك خطة ؟

**الشاهد -** اللى قيل أن اللواء محمد نجيب كان يريد ان يحقق المطالب اللى شرحتها من قبل .

**الرئيس -** دكتاتورية الاخوان المسلمين ؟

**الشاهد -** الخطاب اللى سيادتكم اشرت اليه فى الخطاب بتاعة

**الرئيس -** نفس الخطة موجودة فى الدكتاتورية المستترة للاخوان المسلمين فى الجهاز السرى .

**الشاهد -** لم افهم اطلاقا ان من هدفهم الوصول الى الحكم

**الرئيس -** أبدا والا يجب وجود حكومة اسلامية والا الحكم بالاسلام ؟

**الشاهد -** لازم يكون فيه تفاهم بين الحكومة والاخوان لتحقيق حكومة اسلامية .

**الرئيس —** ما هى الخطط والنقط التى تسير عليها الحكومة  
علشان تحقق حكم الاسلام .  
**الشاهد —** لم تكن محددة .

**الرئيس —** ويحصل عليها الاختلاف بعد قيام الحكومة  
**الشاهد —** لم اعلم بوجود اختلاف او احتمال وجود خلاف  
**الرئيس —** محمد نجيب يخضع لاي تصرف تقولوه له ؟ .  
**الشاهد —** لا اعلم ولم يصل الى علمى اى شىء يتعلق بهذا  
الاحتمال .

**الرئيس —** معناه انكم واثقين ان محمد نجيب على رأس  
الحكومة سوف يطيع كل ما يطلب من الحكومة لتحقيق حكومة  
انسلامية ؟

**الشاهد —** مقدرش اقطع بهذا .  
**الرئيس —** امال تقدر تقطع بايه ؟ تقدر تقطع بانك تعرف  
هنداوى ؟

اتفضل يا سيدى الدفاع .  
**الدفاع —** ذكرت بصدد تعرفك على محمود عبد اللطيف  
روايتين احدهما على لسانك والثانية على لسان محمود عبد  
اللطيف ايها صحيحة ؟ .

**الشاهد —** الروايتان صحيحتان وانا مقر هاتين الروايتين

وسبق انى زرت كثير من الاخوان فى منازلهم وتحدثت معهم فى شئون عامة كما ذكر محمود عبد اللطيف .

**الدفاع -** قلت ان الجهاز السرى خاضع لمجلس اعلى سميت أعضائه . هل هذا الجهاز الاعلى خاضع لتوجيه معين أم مستقل فى توجيهه ؟ .

**الشاهد -** لا اعتقد انه يخضع لاي توجيه آخر .

**الدفاع -** بعبارة اصرح ...

**الرئيس -** وكيف كان ذلك ؟

**الشاهد -** باعتباره انه المهيمن ليس هناك سلطة أخرى .

**الرئيس -** ولا مكتب الارشاد ؟

**الشاهد -** مكتب الارشاد لم يكن يتعرض لمثل هذه المسائل لانها كانت تفهم على أساس الميعول به من أيام الشيخ حسن البنا . فكان ليس له ان يتدخل فى المسائل اللى تعتبر مش من اختصاصه .

**الرئيس -** ولو أن هذا الجهاز السرى جزء من جماعة الاخوان ؟ .

**الشاهد -** أيوه صح .

**الرئيس -** وكان برياسة حسن البنا ؟ .

**الشاهد -** وظل برياسته وبهدين الاستاذ الهضيبي .

الرئيس — أمره هو النافذ ؟

الشاهد — مع أعضاء اللجنة .

الرئيس — اللجنة الخماسية واللى يمكن تكون سداسية ؟

الشاهد — جاز قوى

الرئيس — بانضمام عبد المنعم عبد الرؤوف تبقى سداسية ؟

الشاهد — أيوه .

الرئيس — دول مستقلين تمام الاستقلال عن مكتب الارشاد ؟

الشاهد — أيوه .

الرئيس — كيف يكون ذلك مع انه جزء من جماعة الاخوان ؟

الشاهد — مكتب الارشاد لم يكن يعلم بتفاصيل هذا الجهاز

من أيام حسن البنا .

الرئيس — هل هذا هو النظام الاسلامى الذى تريد تنفيذه فى

البلاد ؟

الشاهد — لذلك روى انه يجب ان يتم تعديل القانون لكى

يكون مكتب الارشاد هو المهيمن على كل شىء .

الرئيس — هل عدل هذا القانون ؟

الشاهد — عدل ولكن لم ينفذ .

الرئيس — موقوف . هل هذا التعديل فيه نص كما قلنا فى

الصباح . مادة تنص على أن مكتب الارشاد له الاشراف على  
الجهاز السرى .

**الشاهد** - بهذه الالفاظ لا .

**الشاهد** - أمال بأى الفاظ ؟

**الشاهد** - حسب الواقع مكتب الارشاد لا . . . .

**الرئيس** - الواقع ان المرشد متصل بالجهاز السرى ٢٤ قيراط  
ازاى احكم الواقع من غير النص ؟

**الشاهد** - لو حصل تعديل القانون .

**الرئيس** - ومكنتوش ناويين تعدلوا القانون ؟

**الشاهد** - اتعدل ولكن لم ينفذ .

**الرئيس** - هل نص فى القانون بعد التعديل أن يكون لمكتب  
الارشاد الاشراف على الجهاز السرى ؟

**الشاهد** - مذكور فى القانون أن هناك قسم الرياضة والتدريب  
العسكرى وده يطلق على النظام فيما يتعلق بالتعبير عنه فى  
الاوراق .

**الرئيس** - لما تحب تشنكل واحد وتدخله فى الجنة تقول له  
نعالى فى التدريب العسكرى والرياضة . لغاية ما يدخل الشبكة ،  
وان جه يطلع . . فايز ؟

**الشاهد** - أنا أعتقد انه اعتدى عليه من خارج جماعة الإخوان .



الرئيس — ما تكونش الحكومة ؟

الشاهد — مقدرش اتكلم عن الاحتمال ده .

الرئيس — يعنى بعيد عن مخك ؟

الشاهد — ايوه . ان بعض الظن اثم .

الدفاع — هل تعتبر الجهاز السرى جزء مهم من الاخوان ام

انه نظام عارض ؟

الشاهد — احب ان اقرر ان الجهاز السرى ليس سرى بالمعنى

الذى ذكرته حضرتك ولكنه موجود فى جميع المناطق الخاصة

بالاخوان .

الدفاع — هل هذا الجهاز تعتبره ايا كان سرى او غير سرى —

الجهاز اللى كنت عارفه وانا عارفه . هل هذا الجهاز جزء مهم

من رسالة الاخوان والا عمل عارض ؟

الشاهد — جزء من عمل الاخوان واساس ان يقوم الاخوان

بالاعداد والتجهيز والتنظيم والتدريب ؟

الدفاع — واعلى هيئة تشرف على الاخوان ايه ؟

الشاهد — سبق ذكرت هذا

الرئيس — قوله تانى وثالث ورابع وخامس

الشاهد — مجلس الارشاد

الدفاع — هل من المنطق ومن حقى ان اطالبك بالمنطق ان

يستبعد أضخم جهاز في الإخوان — كما قررت — عن رقابة أعلى  
هيئة في الإخوان

**الشاهد —** الواقع أن أعضاء اللجنة العليا ينتدبون من مكتب  
الارشاد ولكن في نطاق ضيق

**الرئيس —** من ينتدبهم ؟

**الشاهد —** المرشد

**الدفاع —** بموافقة مركز الارشاد

**الشاهد —** لا بموافقة الاعضاء المكتسبين ثقة اخوانهم

**الدفاع —** هل أعضاء مجلس الارشاد يعرفون نشاط أضخم  
واكبر جهاز أم انهم جهلة به ؟

**الرئيس —** هم عارفين انه تدريب عسكري ورياضة ونط  
جبل

**الدفاع —** هل حدث ان اختلف أعضاء مجلس الارشاد مرة  
حول ضرورة أو عدم ضرورة وجود هذا الجهاز ؟

**الشاهد —** لم يبلغ الى علمي شيء عن هذا

**الدفاع —** يعني تعرف ان أعضاء مجلس الارشاد لم يختلفوا  
قط حول ضرورة أو عدم ضرورة الجهاز . حقيقة متفق عليها .

**الشاهد —** لا اعلم بهذا

**الدفاع —** من باب المعرفة لو سمح الرئيس . كيف يتسألي

لهذا الجهاز أداء دوره في حماية الاسلام في مراكش وتونس  
والجزائر . وما الطريقة العملية لذلك ؟

الشاهد - الى حصل قبل هذا ان كان في حرب فلسطين  
تقدم كثير من المتطوعين من الاخوان ودخلوا البلاد بمساعدة  
الحكومة الى كانت قائمة حينئذ .

الرئيس - أى بلاد ؟

الشاهد - فلسطين

الشاهد - أنا أقصد الجزائر وتونس لان الحكومة نفسها  
حاربت في فلسطين ايه الوسائل العملية ؟

الرئيس - انت طول الوقت تتكلم عن الاخوان والحكومة .  
ضرتين رأسهم برأس بعض قد بعض . تتكلم عن ايه انجلترا  
وامريكا . المانيا الشرقية والمانيا الغربية حكومة داخل حكومة ؟

الشاهد - الحكومة الى تتقدم لمساعدة الجزائر قد تحدث

ازمات دبلوماسية مع بلاد أخرى

الرئيس - آه ده المكتب القانوني

الشاهد - دى مسائل مقررة

الرئيس - من قررها ؟

الشاهد - أنا فهمت ذلك

الرئيس - من مين ؟

**الشاهد -** من اللجنة العليا

**الرئيس -** الحكومة بتاعتك اللجنة العليا تأخذ منها قراراتك وتصرفاتك وتشريعاتك ما تترافعش في المحاكم مع موكلينك بالقانون اللي واضعاه اللجنة العليا كمان ؟

**الشاهد -** اللي أعلمه انه في كثير من الحالات يستحيل على الحكومة ان تقوم بعمل لمساعدة أى بلد من البلاد الاسلامية .

**الرئيس -** من اللي يرى ذلك . الدولة اللي ترى . لما انت ترى لوحدهك تنك ماشى تروح تتطوع . تأخذ فيزا وباسبورت وتسافر .

**الشاهد -** مضبوط كده صح .

**الدفاع -** الوسيلة العملية اللي يؤدى بها هذا الجهاز دوره لحماية مراكش والجزائر هي ايه ؟

**الشاهد -** تروح الافراد المستعدة لهذا .

**الدفاع -** هل يمكن ترحيلهم عن طريق غير الحكومة ؟

**الشاهد -** لازم موافقتها .

**الدفاع -** اذا رأت الحكومة . هل هي أقدر أم الاخوان ؟

**الشاهد -** ذكرت انها لاتستطيع لما قد يحدث من أزمات دبلوماسية .

**الرئيس -** واذا منعت الحكومة من ارسالها ؟ جيش الاخوان يقوم .

الشاهد - أبدا .

الرئيس - فإكر الجيش بتاع زمان اللى كانوا يقولوا عليه  
عساكر وحرامية . احب للتاريخ اقول اذا كنتم فاكرين ان الجيش  
فيه ضباط أحرار ١٦٠ فقط تبقوا غلطانين . كل ضابط يشتغل  
فى الجيش سواء كان لسواء أو ملازم أو صول أو عسكري كلهم  
أحرار . والضباط الأحرار والناس الأحرار لهم قيادة واحدة  
مش قيادتين . وقيادة زى ما واحد من المواطنين يقول قيادة  
علنية وهى مجلس قيادة الثورة . وميشتغلوش فى الخفاء أبدا  
وميحلفوش يمين كذب وميختفوش تحت ستار أرقى رسالة  
هى الدين الإسلامى . يقوم يتستر من تحته ويعمل جهاز دهليزى  
مسلح هو ده الفرق علشان محفظتوش الدين الإسلامى مضبوط  
ومعرفتوش تطبقوا الدين الإسلامى مضبوط ومعرفتوش تدخلوا  
فيه وتعرفوا الدرجات والخطوات اللى يجب ان تتبعوها مش فى  
الشكل ولكن فى الباطن والمعنى . الثورة لم تغش أحد زى محمود  
عبد اللطيف . مغشتش واحد زى نصيرى . ماتخبيش على  
الناس وتقول لهم نودىكم قسم التدريب العسكرية والألعاب  
وبعدين تدخلهم فى الجهاز السرى واللى يطلع منه . . زى فايز .  
الثورة لما قامت عملت حساب العيش بتاع الناس وعملت  
حساب المواصلات بتاعتهم وعملت حساب انها تحافظ على أموالهم

ومنشأتهم وطرقهم وكباريهم مش تنسفها أحب أعرف ازاي  
ومش عايز أعرف منك . ومش عايز أسمع منك حاجة . كل  
واحد يحكم ايها منهم اسلامي أكثر . مش عايز أعرف منك حاجة  
ده بس يمكن تفتح لك نقط يمكن تروح متعرفش تنام زي احنا  
ما بنعرفش ننام علشان شوية هالافيت زيكم .

**الدفاع —** هل من مصلحة مصر — كمواطن — أن تحارب في كل  
ميادين الارض . في الجزائر وتونس ومراكش واندونيسيا ؟  
**الشاهد —** لا شك أنه من واجبها .

**الرئيس —** بس مش بفوضى زي اللي عايزين تعملوها مع  
الحكومة يجب أولا أن يكون فيه فوضى طبعاً . يستعد هذا النظام  
ثم ثالثا تستعمله في الداخل . المنطق يقول كده معلمش منطق .  
ما امتحنوكش في المنطق ، امال أخذت شهادتك على ايه ؟ أخذت  
ليسانس الحقوق على ايه ؟

**الدفاع —** وقت قيام الجهاز وهذه مهمته أن يحارب في كل  
بقاع الارض فهل كانت حررت أرض الوطن من المستعمر ؟  
**الشاهد —** الاخوان بذلوا كثيرا

**الدفاع —** انا لا اسأل عن البذل . وانما هل الانجليز خرجوا  
من مصر ؟

**الشاهد —** لا

**الدفاع —** هل ترى من الممكن أو من ناحية المنطق ان تحرر مصر بقاع الارض من مستعمرها قبل أن تحرر نفسها ؟  
**الشاهد —** لا طبعاً

**الدفاع —** اذن فيما يكون قيمة الجهاز ؟  
**الرئيس —** يمكن ماسمعتس بيان المرشد ولا ابراهيم الطيب ولا حسين كمال الدين

**الشاهد —** مع وجود القوات الانجليزية اشترك الاخوان في فلسطين وهى غير مصرية

**الدفاع —** وعلى هذا النحو تحاربوا في تونس والجزائر وترجعوا بنفس النتيجة ؟

**الشاهد —** ماهى نفس النتيجة

**الدفاع —** أنا أسألك عنها

**الشاهد —** الذى أعلمه ان الاخوان يجب ان يقوموا بالواجب الذى عليهم لا أكثر

**الرئيس —** الواجب الى عليهم احدث ثورة شعبية اخوانية ضد الحكومة الموجودة باغتيال رئيس الحكومة واغتيال أعضاء مجلس قيادة الثورة واغتيال بعض الضباط وايقاع حرب أهلية بين فريقين مسلمين •

شفت المنطق ماشى ازاي • ماشى صح ١٠٠ ٪ عشرة على عشرة روح ناجح •

**الدفاع - هل من الدين أو من الوطنية أن يتطوع صاحب القوة للدفاع عن الغير بينما هو في حاجة الى الدفاع عن نفسه ؟**

**الشاهد -** يحدث هذا في كثير من الحالات

**الدفاع -** يحدث هذا في كثير من الحالات أى ان يتقدم الفرد بطعامه للغير بينما هو جائع ألم تسمع الحديث الذى يقول ابدا بنفسك ثم بمن تعول ؟

**الشاهد -** الاخوان اتركوا في فلسطين

**الدفاع -** كان هذا دفاع عن مصر لان لاسرائيل تطمع فيها فيبقى هذا دفاع عن مصر

**الشاهد -** الدفاع عن أى بلد من البلاد الاسلامية . . . .

**الرئيس -** بلاش فلسفة في المسائل العسكرية

**الشاهد -** أنا مستعد اسكت

**الرئيس -** مستعد ايه . . . انت بتتجنى على . . . احنا اولاد بلد ، والمحكمة اسمها محكمة الشعب وأظن اسمها دل عليها وثبت للناس انها شعبية .

**الشاهد -** هذا المعنى لايتطرق الى ذهنى

**الرئيس -** كلنا متربين في الحسينية وباب الشعرية ودرب الحجر والناس كلها عارفة كده . واحنا لم نتربى في قصور علشان مانفهمش الحركات . رد على السؤال الذى يقوله لك الدفاع والتزم حدوده



الشاهد - أيوه

الرئيس - انت شاهد تؤدى شهادة وتقول الجواب على اد  
السؤال منتش محامى .

الشاهد - صح اتفضل يا افندم

الرئيس - اقعد ساكت وانا اللي اقول له اتفضل  
( موجهها كلامه الى الدفاع ) اتفضل .

الدفاع - هل سمعت ... ؟

الرئيس - ده النظام

الدفاع - هل سمعت ان الاستاذ الهضيبى لما دعى للقتال قال  
انه يبقى قوته لاستعمالها فى الخارج هل سمعت أم لا ؟

الشاهد - سمعت انه قال اننا كما نحارب فى القنال سنحارب

فى تونس والخارج .

الدفاع - هل تعتقد كمحامى أن الهيئة التى تصل الى الحكم  
عن طريق الارهاب تتخلى عن الارهاب بعد وصولها الى الحكم ؟

الشاهد - لا أعلم فى أى مرحلة من المراحل ان الاخوان كان من

اهدافهم الوصول الى الحكم .

الرئيس - انما تريدون وضع الحكومة تحت الوصاية .

الدفاع - انا أسالك عن قاعدة منطقية . رد عليها . هل تعتقد

ان الهيئة التى تصل الى الحكم عن طريق الارهاب ، هل تتخلى  
عن الارهاب عندما تصل الى الحكم ؟

الشاهد — ما اعتقدش .

الدفاع — اى أن الهيئة التى شعارها الارهاب يبقى شعارها  
الارهاب .

الشاهد — لا شك فى هذا.

الدفاع — هل تحب لمصر أن ترقع تحت أقدام الارهاب ايا  
كان مصدره ؟

الشاهد — لا شك . لا

الدفاع — هل تعتقد أن الارهاب يفقد المواطنين شجاعتهم  
وعزيمتهم ؟

الشاهد — مستحيل .

الدفاع — هل تعتقد ان الارهاب من شأنه اذا دام يفقد  
المواطنين شجاعتهم وعزتهم ؟

الشاهد — مستحيل .

الدفاع — هل تعرف ان الشجاعة ممارسة أم لا ؟

الشاهد — لا شك انها ممارسة .

الدفاع — وهل تعرف ان مما يزيد فى الانسان الشجاعة أن  
يمارسها أم لا ؟

الشاهد - لا شك ان الممارسة توجد بهذه الصفة .

الرئيس - اذن لماذا تستعملون الارهاب مع أعضاء الجهاز  
السرى بعد دخولهم فيه فى الاخوان المسلمين ؟

الشاهد - معرفش .

الرئيس - انت مسئول عن قسم القاهرة

الشاهد - أيوه .

الرئيس - ومسئول عن الجهاز الادارى له ومخابراته ؟

الشاهد - المخابرات قسم قائم بذاته .

الرئيس - تبع من ؟

الشاهد - تبع الاستاذ صلاح عبد المعطى وهو كان ما سكها

لاخر لحظة

الرئيس - ودى تبقى تبع أى قيادة ؟

الشاهد - تبع الاستاذ يوسف طلعت

الرئيس - تبع النظام الماشى فى الجهاز السرى مش غصب

عناك ، ويقول لك سواء تعرفها اولا تعرفها ان فيه حاجة اسمها

سياسة عليا

الشاهد - يصح

الرئيس - زار كل من ( واسمحوالى ما أقراش الاسم لمصلحة

التحقيق ) فلان وفلان وفلان منزل فلان يوم كذا الموافق كذا

الساعة كذا ويوم كذا الموافق كذا ( التاريخ ) وشهد كل من فلان من المنطقة الفلانية وفلان من المنطقة الفلانية مجتمعين مع فلان في منزل فلان حتى الساعة كذا

ثانياً — وبدأ النشاط يدب وتعدد عدة اجتماعات بين أعضاء النظام بالمنطقة كذا ولما علمنا ( ده اللي كاتبه جهاز المخابرات ) ان هذا النشاط يعلم المسئولين في الاخوان قسم الجهاز السرى رفعت الرقابة

هذا تقرير قدمه أحد أعضاء مخابرات الجهاز السرى ومعناه ان هناك رقابة على الجهاز السرى **علشان خاطر الارهاب** ، فلما يجتمعوا او يعملوا فتنة داخل هذا الجهاز المسلح . . . **فايز** تحب اقرا لك كمان حته من تقرير الارهاب وتحت يدى صورة زنكوغرافية له . كاتب التقرير يتكلم عن عضو ثانى فى داخل الجهاز السرى أى سرى السرى أى الرقابة فى المخابرات التى تراقب الجهاز السرى . لانه لوحظ على واحد حاجات .

( تلى سيادته ) « اذا لزم الامر فانى على استعداد كامل لتقديم تقرير واف عن الاخ فلان لان حالته النفسية غير عادية »  
يعنى بيشوف حالته النفسية غير عادية فيكتب تقرير ويوديه للرئاسة فيه ارهاب أكثر من هذا علشان تذل اعناق الرجال .  
**الدفاع** — اذا كانت ممارسة الصفة سبيل الى ايجاد . . .

**الرئيس —** ( لاحظ أن الشاهد يجفف عرقه ) ما تمسحش  
مركك . . . لسه بدرى أوى .

**الدفاع —** اذا كانت ممارسة الصفة سبيل الى ايجادها أو  
تقويتها الا تعتبر من الخيانة ممارسة الارهاب ضد المواطنين على  
هذا النحو خيانة .

**الشاهد —** ممارسة الارهاب ضد المواطنين خيانة ، لا شك  
في هذا .

**الدفاع —** هل تعتقد أن مقتل الخازندار الشهيد بحق من  
شأنه أن يعرض — كمحام — رسالة القضاء وهى رسالة مقدسة  
للمؤثرات أم لا ؟

**الشاهد —** لا شك في هذا ، وأنا مقتنع بهذا .

**الرئيس —** ما هى طبيعة الاجهزة السرية المسلحة ، هل طبيعتها  
ارهابية او تدليك هدوء وطمأنينة .

**الشاهد —** مفروض أن يكون فيه الهدوء والطمأنينة

( ضحك )

**الرئيس —** سمعتم منطق الصف الثالث من جمعية الاخوان  
المسلمين الذين يدعون دعوة الدين ؟ وسمعتم المنطق الذى كانوا  
يحكمون به البلاد . شفتم الديمقراطية البرلمانية والانتخابات  
والحرية . شفتم الاسماء الرنانة اللى بيضحكوا بها على ١٩ مليون

واحد ساكنين فى الطوب النى ويشربوا ميه عكره . الاجهزة السرية  
تدينا هدوء وطمأنينة اذن لماذا لم تتبع الدول تنظيم جيوشها  
وتسليحها فى السر طالما أن السر يجيب طمأنينة أكثر ؟

**الشاهد —** لا أقصد ان السر يأتى بطمأنينة ، انما أقصد ان  
الاخوان فى تشكيلاتهم يقصدون الى هذا المعنى  
**الرئيس —** ده شىء جميل . حدوده جديدة

**الشاهد —** هذا الذى وقع فى ذهنى

**الرئيس —** شىء جميل جدا . شىء فى منتهى الجمال

**الدفاع —** انت قلت ان القتل من شأنه يؤثر على رسالة القضاء  
فما قيمة دولة يختل فيها ميزان القضاء واذا فرض واختل . .  
**الرئيس —** لا داعى لهذا السؤال

**الدفاع —** وانا متنازل عنه وانا كنت اناقشه كمحامى . وهل  
تعتبر ان . . .

**الرئيس —** الفكرة اننا مش عاوزين نخش فى قضايا قديمة .  
واللى توفى الله يرحمه

**الدفاع —** هل تعتبر تنظيم آلات الشترساوى الشر ، . . . دى  
موميات

**الشاهد —** لا شك

**الدفاع —** هل كان دورك قائم على تنظيم وتشكيل الجهاز  
السرى او الخاص ؟

**الشاهد -** ايوه يا افندم

**الدفاع -** كيف كان يتأتى ايجاد حياة دستورية بعيدة عن  
المؤثرات الحزبية لانك قلت اننا عاوزين حياة دستورية بعيدة عن  
المؤثرات الحزبية ، وما هى الطريقة لتكوين حياة دستورية بعيدة  
عن المؤثرات الحزبية ؟

**الشاهد -** المسألة دى لم ادرسها ، انما دى تبحث عن طريق  
الحكومة التى تقوم بعد ذلك  
**الدفاع -** تعمل ايه ؟

**الشاهد -** قلت ان هذه المسألة متروكة للحكومة . . .

**الرئيس -** توت حاوى . تضربزر يطلع برلمان حر مائة فى المائة  
مفيش فيه حاجة ابدا .

**الدفاع -** ما هى الوسائل ؟

**الشاهد -** لم نفكر فى الوسيلة اطلاقا

**الرئيس -** سوف لا يفكرون فى الوسيلة لانه سوف لا يعلنها  
والحكومة الى رايحه تيجى حتكون تحت الوصاية وهى التى  
تعلنها وهو يعمل فى الخفاء . . ويبقى الجيش الاساسى جيش  
الجهاز السرى

**الدفاع -** انا مكنتش فاهم المسألة على النحو ده . .

**الرئيس -** ( موجهها كلامه للدفاع )

ارجو ان تذكرنا بهذه المسألة مرة اخرى بعد ان تنتهى

**الدفاع** - هل كان في نية الاخوان ان يرشحوا رجالهم لهذه الانتخابات البعيدة عن المؤثرات الحزبية ؟

**الشاهد** - المسألة انا لم اعلم بها ولا يوجد قرار حاسم فيها  
استطيع ان اقرره .

**الدفاع** - تقديرك الشخصي ايه ؟

**الشاهد** - راى ان الاخوان يناؤا بانفسهم عن كل مناصب  
الحكومة

**الدفاع** - وهل العضوية في المجالس النيابية من المناصب  
الحكومية ؟

**الشاهد** - لا تعتبر من المناصب الحكومية وانما هو اشتراك  
في الحكم عن طريق السلطة التشريعية .

**الدفاع** - ومين ينتخب أعضاء في المجلس وبذلك يكون بعيدا عن  
المؤثرات الحزبية الماضية

**الشاهد** - الشعب هو الذى ينتخب

**الرئيس** - زى ما الاخوان ينتخبوا الجمعية التأسيسية  
والجمعية التأسيسية تنتخب مكتب الارشاد ومكتب الارشاد  
واخذ الجهاز السرى والمرشد واخذ اقوى ناحية في الاخوان  
المسلمين دكتاتورية تحت أمره . هذه هى الديموقراطية في جمعية  
الاخوان وفى داخلية قوانينها وعشان كده عاوزه تعمل فى البلاد



احسن ديموقراطية ما خلصتوناش ليه من القلب ده اللي احنا فيه ؟ ما سمعتوش كلام سيد الرئيس ليه عشان تخلصونا وكنا متنا واستريحنا وكان اللي لهم عمر يشوفوا ويتفرجوا . ليه ما سمعتوش كلام سيد الرئيس ؟ سيد الرئيس قال لك في جوابه مش وقته نخش معركة وبعث له مع حسين شعبان انك موافق على الخطة . وهو قال لك انه مش موافق على الخطة الكبيرة لان فيه شك اننا نخسر المعركة زى ما خسرتها . هذه هي الحقيقة الواقعة انكم خسرتها . وابتدأتم اول طلقة في المعركة وفشلت المعركة ونفذت الخطة وفشلت . هو كان احكم منكم شفت لو كنتم شطار كنتم عملتم سيد الرئيس قائد النظام السرى كان بالعبكة والضحك على دقون ١٩ مليون من عارفين رأسهم من رجليهم . والدعوة الاسلامية ما بتعلمش حد لانكم انتم لا تعرفوها . وبالجهاز السرى كنت تقدر تعمل انقلاب مفاجيء انما ربك بالمرصاد عشان استغلّيتم الدين في أحقر الأغراض وبأحقر الوسائل واتجبرتم فيه اتجار رخيص وربنا قال ان آياتى لا يتجر بها اتجار رخيص ولا تستعملوا آية منفصلة عن هذا الكتاب وكل آية فيه ككل انما انتم علمتموهم الآيات الاولى من سورة آل عمران وهى آيات الجهاد وفهمتموهم ان الجهاد يكون بقتل جمال عبد الناصر ويقتل بعض اعضاء مجلس قيادة الثورة ليه ؟ عشان انتم لا تحكمون

بالاسلام وعشان سايين الخمارات واحنا مالنا ومال الخمارات .  
هل نحن جبنك يا ابراهيم وقلنا لك اشرب خمرة غصب عنك ،  
هل الاسلام يقول لك لما تلاقى واحد يشرب خمرة تقطع رقبتة .  
هل الاسلام قال لك كده ، واذا كان قال لك كده اقرأ لنا السورة  
اللى فيها كده ( موجهها كلامه للدفاع ) اتفضل .

الدفاع - هل الاخوان حزب أم لا ؟

الشاهد - ليسوا حزبا

الدفاع - أمال ايه ؟

الشاهد - هيئة اسلامية عامة تعمل للاسلام عامة

الدفاع - لا صلة لها بالسياسة الوطنية .

الشاهد - السياسة الاسلامية

الرئيس - ماهى السياسة الاسلامية ؟

الشاهد - اللى هى تحرير جميع البلدان الاسلامية من

المستعمر

الرئيس - وما هى السياسة الوطنية ؟

الشاهد - نفس السياسة .

الرئيس - اذن ليه بتنفى ان للاخوان صلة بالسياسة الوطنية

الشاهد - السياسة الوطنية جزء من السياسة الاسلامية

الرئيس - اذن السياسة تختلف فى كل دولة حسب طابعها

الداخلى .

الشاهد - نعم

الرئيس - علمنا مبادئ جديدة ياسقراط ! ياريتة كان عايش  
بلشان يلطم على المنطق الذي وصل اليه .

الدفاع - قلت أن سياسة الاخوان كانت تستهدف التعاون  
المطلق مع حكومة الثورة ومن ضمن الحاجات المتفق عليها عودة  
الحياة النيابية أولا

الشاهد - مش متأكد من ناحية التحديد

الرئيس - الحرية يعرفوها بالكلام والتشهير وبالزعم انما  
بالعمل لا

الدفاع - هل الاتفاقية وثيقة سياسية أم قانونية ؟

الشاهد - فيها الناحيتين

الرئيس - مش عاوزين نتعرض للسياسة بتاعة الدولة .

الدفاع - ماهو المدى العددي الذي حددتموه للاعداد لكي  
يبدأ دور التنفيذ ، لانكم قلتم لازم لكي يبدأ في دور التنفيذ ان  
يكون العدد خالص .

الشاهد - ٣/٤ الاخوان منضمين في هذه التشكيلات وقائمين

بتدريباتهم

الدفاع - ماعدد الاخوان في تقديرك ؟

الشاهد - يصل .....

**الرئيس —** الصبح قال يصل الى ١٥ مليون تقريبا .

**الدفاع —** هل انت مؤمن على هذا الرأي ؟

**الشاهد —** لا يا افندم لاسمح الله ما أقدرش اقول هذا

**الرئيس —** اذن قلت لى تقريبا ليه ؟

**الدفاع —** على وجه التقريب .

**الشاهد —** على وجه التقريب نصف مليون اخ في القطر المصري

**الرئيس —** نصف مليون امام ٢٢ مليون دى نسبتها كام ؟

٢ ٪ وشوية تفرض رأيها على الدولة بجهاز وارهاب .

٢ ٪ يفرضوا رأيهم بمسندسات على ٩٨ ٪ هل هذا مبدأ

الديموقراطية والحرية ؟

**الشاهد —** طبعا لا

**الرئيس —** هل هذا هو مبدأ البرلمانية ، ده مبدأ الانتخابات ؟

انما لاعجب فى ذلك اذا كان هذا هو المبدأ اللى ماشية عليه جمعية

الاخوان المسلمين .

**الشاهد —** ( يسعل ) .

**الرئيس —** لا بأس عليك عندك برد اقفل صدرك أحسن تأخيه

هوا فى زورك . اقفل الباقة اذا حببت تسبها مفتوحة وأنا مالى

أنا بانصحك .

**الدفاع —** يعنى انت عاوز ٣/٤ ال نصف مليون يبقى كام .

**الشاهد —** عدد لا يقل عن عشرة آلاف شخص

**الدفاع —** انت قلت ٣/٤ ال نصف مليون وانما تكتفى بعشرة

الآف واحد .

**الشاهد —** نعم .

**الدفاع —** كم منهم تم اعداده فعلا ؟

**الشاهد —** مكنش وصل ال العشرة آلاف واحد .

**الدفاع —** يعنى ٣٠٠٠ ارهابى .

**الرئيس —** وعلشان كده سيد الرئيس قال لك لو دخلنا المعركة

يمكن نخسرها . وبلغك عن طريق الاخ حسين شعبان هذا

السؤال الى بعته مع حسين شعبان لانه ضابط اتصال .

والسؤال الذى بلغه ابراهيم الطيب وارسل مع حسين شعبان

يسأل فيه سيد الرئيس هل أنت مستعد لتنفيذ غير ما ارسل

( وما ارسله كان من أجل تأجيل تنفيذ الخطة ) اى ان غير ما

ارسله هو التنفيذ السريع . الطرق التحتانية ، الدهليزية ، الف

والدوران مش يقول له على التنفيذ انما باعت له يقول له انه

موافق على غير ما ارسل ولما ترجع الى ما ارسل تجده التأجيل

فيكون غرضه التنفيذ .

**الدفاع —** فهمنا الحاجة العادية وهى اعداد عشرة آلاف

شخص فما هى الحالة العامة التى تقدم بها للخروج من دور

الاعداد الى دور التنفيذ .

**الشاهد** — مش فاهم — تسمح تحديد لى السؤال .

**الدفاع** — ما هو السبب لاعداد ١٠ آلاف شخص السبب

المباشر الى تطلع بمناسبتة ايه ؟

**الشاهد** — هذه المسألة كان لسه لم بيت فيها ..

**الدفاع** — كان لم بيت فيها .. يعنى كان العدد ١٠٠٠ ر. ١ ؟

**الشاهد** — كان لم بيت فيها بعد ..

**الدفاع** — وهو كذلك ..

**الرئيس** — والله ياسيدى الدفاع .. يصح نختصر فى المسائل

دى ونقتصر على الوقائع الخاصة بقضية محمود عبد اللطيف .

**الدفاع** — وهو كذلك .. بس عاوز أعرف الهيئات الى لها حق

التناصح على الثورة ايه غير الاخوان ؟

**الرئيس** — موجهها كلامه للدفاع — انت من الاخوان ؟

( ضحك ) ..

**الدفاع** — لا .. مش قصدى .. ( ضحك ) ..

**الرئيس** — احنا كلنا اخوان ، واذا ما كناش بنحس اننا اخوان

ماكانش الواحد يتضايق .. ياطيب . احنا جينا وانت نايم فى البيت

علشان نحررك من الظلم ومن الفساد الى كان متفشى فى البلاد ..

من النهب الى كانت بتتنهبه البلاد والاستبداد الى كانوا يستبدون

بالناس .. طردنا لكم ملك ، كنتم مسمينه ملك كريم .. انتم

والمرشد بتاعكم . . ملك كريم . . زيارة كريمة لملك كريم . .  
ملك كان يقتلكم في ضوء النهار . . كان يفتالكم في ضوء النهار  
وجينا أنقذناكم من حكومات كانت تتجر فيكم باسم الدستور  
والبرلمان والانتخابات والحريات وباسم القنال طبعى خافين  
ليطلعوا الانجليز بسرعة واذا طلعوا الانجليز تبقى البلد حرة  
تقول لها حرية ايه . . ما تعرفش تضحك عليها . . الحق يا واد  
. . سارع ضد الزمن قبل الانجليز ما يطلعوا والبلد مستعمرة  
واضحك عليهم وقول لهم حريات . . شفتهم المبادئ اللى بتغرى  
حريات ايه !! حوريات من الجنة ( ضحك )

**الدفاع -** بمناسبة مناط الدفاع عن محمود عبد اللطيف أريد  
ان اقول لمحكمة الشعب ان حدود دفاعى بل دفاعى الوحيد هو  
انه اداة صغيرة فى جهاز بشع وكلما ازداد الجهاز بشاعة وكلما  
ازداد بيان المدى الذى يعمل فيه هذا الجهاز وكلما ازداد تضليله  
وبرزت اساليبه ، كلما بدت هذه الاداة هينة ولا تستحق النظر  
اليها كلما بدت هذه الاداة تافهة لا تستأهل الوقوف عندها . .  
لعلنى سمعت هنا يا حضرات قضاة الشعب - لعلنى سمعت  
هنا ان لدينا الكثيرين مع الاسف الشديد المحزن الممض -  
من أمثال محمود عبد اللطيف الذين لم ينالوا قسطا من تعليم  
والذين لم ينالوا قسطا من ارشاد والذين لم ينالوا قسطا من

سعادة .. استغل فيهم هذا البؤس ، استغل فيهم هذا الجهل  
من الذى استغل هذا وما قدرته وما مده وما مؤهلاته .. هذا  
هو دفاعى اليكم .. اننى اعتبر ان كل تقصير فى ابراز هذا انما  
هو تقصير فى الامانة التى وكلتموها الى وقبلت اداءها ...  
محمود عبد اللطيف من هو فى هذا الجهاز ؟ ومن هو محمود عبد  
اللطيف امام حسن الهضيبى المستشار السابق ؟ من هو محمود  
عبد اللطيف بين يدى ابراهيم الطيب المحامى ؟ من هو محمود  
عبد اللطيف بين يدى هنداوى القادر الواسع الحيلة ؟ من هو  
محمود عبد اللطيف بين يدى هؤلاء الابالسة ، وبأى سلاح يفتالون  
محمود عبد اللطيف ؟ محمود عبد اللطيف ضحية هذا الجهاز  
شان عشرات الالوف الذين كانوا على استعداد لو ساط عليهم  
هذا الجهاز ان يفقدوا دينهم ووطنيتهم طواعية لهذا الجهاز ..  
واذا لم يجتث هذا الجهاز ، فسيبقى امثال محمود عبد اللطيف  
مستعدين كل الاستعداد .. فانهم سيجدون كلمة القرآن ..  
كلمة القرآن تمسح أقدم الكلمات التى عرفت البشرية منذ آدم  
حتى اليوم هذه الكلمات المقدسة الكريمة تمسح لكى تنطلق بها  
النار الى صدور المحردين لكى ترقع مصر بعد ذلك ولا يدرى  
الى أى مدى الى قرن أم قرنين أم خمسة قرون أم دهر من  
الزمان لكى تقوم من ركعتها الا الله بعد ان تسلط عليها الفساد



أرجو أن يكون مفهوما هذا لأنه هو مناط دفاعي . . لا تندهبوا  
اذن يا حضرات القضاة . اذا ما اضطررت أن أسأل حول مدى  
الجهاز . . مدى بشاعته وأساليبه في هذا التأثير . . لان هذا  
هو دفاعي . .

الرئيس — ليس لدينا مانع من السؤال . .

الدفاع — هل سياسة الاخوان المسلمين اعداد اعضائهم  
اعدادا جهاديا ؟

الشاهد — نعم . .

الدفاع — أريد مثلا في التاريخ أرى أعد عشرة آلاف من  
المسلمين بالديناميت والمسدسات للدفاع عن ذاته ضد رأى  
آخر لنفس المواطنين . . فهمت ؟!

أريد مثلا في التاريخ لجماعة من أبناء البلد الواحد يستعينوا  
بعشرة آلاف واحد علشان يفرضوا أنفسهم على باقى الآراء  
الآخرى . .

الشاهد — لا أعلم شيئا عن هذا . .

الدفاع — فى أى بلد من بلاد العالم ؟

الشاهد — لم اسمع به . .

الدفاع — بما فيه الدولة الاسلامية ؟

الشاهد — ايوه . .

**الدفاع** — ساعدنى اعمل معروف .. ما هى جريمة محمود  
عبد اللطيف فى نظرك كرميل محمود عبد اللطيف فى الجهاز  
السرى او فى الجهاز الخاص .. انا احب اجاملك فى هذا  
الموقف ...

**الشاهد** — . . . .

**الدفاع** — ما هى جريمة محمود عبد اللطيف فى نظرك ؟

**الشاهد** — والله دى مسألة يعنى ..

**الدفاع** — انت محامى .. ما تقدرشى تقول ايه جريمته فى  
نظرك ؟

**الشاهد** — اعتقادى لا شك ان فيه تأثير عليه فقام بما قام .

**الدفاع** — فقام بما قام ..

**الشاهد** — وكان تأثير بشكل قوى ..

**الدفاع** — بشكل قوى

**الشاهد** — ايوه .

**الدفاع** — ما هو عقاب محمود عبد اللطيف بوصفك رجلاً  
قانونياً ؟

**الشاهد** — هو فاعل اصيل ..

**الدفاع** — ولكن تقديرك للظرف اللى جرفه .. هل تدخل هذا  
الظرف فى حسابك ؟

**الشاهد - لا شك ..**

**الدفاع -** هل من شأن الاجهزة السرية ان يحتفظ صغارها  
بارادته كما يحددها القانون ؟

**الشاهد -** الذى اعلمه فى هذا ان كل فرد لا يقوم بعمل الا اذا  
كان طبعا متحمس له وعارف تفاصيله ومقدر نتائجه ..

**الدفاع -** هل استغل فى ذلك جهله ؟

**الشاهد -** لا يافندم استغل فى ذلك تشبعه بالعمل الذى  
سيقوم به .

**الدفاع -** هل كان محمود عبد اللطيف اكثر تشبعا منك  
بمبادئ الاخوان ؟

**الشاهد -** انا شخصا لم اتبين الا انه شخص طبيعى .

**الدفاع -** هل كنت تقدم على ما أقدم عليه ؟

**الشاهد - لا .**

**الدفاع -** اذن استغل فيه ظرف خاص ؟

**الشاهد -** اعتقد هذا ..

**الدفاع -** تعتقد ذلك .. هل استغلال البساطة والجهل صغار

ممن يبذله والا لا ؟

**الشاهد -** لا شك فى هذا ..

**الدفاع -** وممن ينتفع به ؟

**الشاهد — لا شك في هذا . .**

**الرئيس —** طبعى لما يكون متحمس للعمل اللى متحمس له يكون صادر بأوامر من رياسة عليا فى الجهاز ؟

**الشاهد —** فى بعض الاحيان قد يكون الشخص متحمسا من تلقاء نفسه من غير صدور أوامر له . . وفعلا كنا تلقى بعض الاخوان متحمسين ولا يرضوش انهم يتقبلوا اوضاع الجماعة .  
**الرئيس —** ولذلك عملتم الجهاز الارهابى على الجهاز السرى علشان محدش يدخل فيه ويعرف يخرج منه .

**الشاهد —** طلّعوا كثير . . .

**الرئيس —** طلّعوا أيام ما جبتم تطلّعوا السندي وبذلك طرد السندي وبعدين راح جايب سياسة جديدة . علشان كده المرشد قال . . لا سرية فى الدين وغير الجهاز وجاب ابراهيم الطيب ويوسف طلعت . وخرج عبد الرحمن السندي بالجهاز بتاعه ، وجه ابراهيم الطيب ورئيسه يوسف طلعت بجهازه . . .

**الدفاع —** ماهو تقديرك لخطر الجهاز السرى بعد ان بان على

**النحو الذى لم تكن تعرفه قبل أن يبين ؟**

**الشاهد —** لا شك ان اندفاع الافراد بدون ما يكونوا ملتزمين الخطط الموجودة المتفق عليها من الرياسات . . دى مسائل خطيرة تحدث ولا شك بلبلة وتحدث اضطرابا وتحدث يعنى مسائل لا مصالحة لاحد فيها .

**الدفاع** — يعنى لو نجح الحادث تحدث بلبلة .

**الشاهد** — أنا باتكلم كلام عام ...

**الدفاع** — ازاى ؟

**الرئيس** — أنت قررت خطة ووصلت هذه الخطة لرؤساء المناطق ومن هؤلاء الرؤساء هنداوى دوير وصلت الخطة وضعت فى المكتب الاعلى الى هى اللجنة العليا بموافقة رئيسها حسن الهضيبي رحت بلغت هذه التعليمات . ما ارتآه محمود عبداللطيف هو الجزء الاول من هذه الخطة ..

**الدفاع** — ده تسميه بلبلة ...

**الرئيس** — كيف تفسر ان توارد الخواطر بتاع محمود عبد اللطيف .. فكر فى فكرة وطلع ينفذها تقوم تطلع مطابقه لتفكير المكتب الاعلى المكون من فرغلى .. خميس .. طلعت .. شادى .. برياسة حسن الهضيبي هذه الامخاخ قعدت تمحص وتضع خطة .. الجزء الاول خطر مصادفة فى نفس الوقت بنفس الطريقة ، وبنفس التفكير لمحمود عبد اللطيف .

**الشاهد** — قلت فى هذا ان الخطة ...

**الرئيس** — يبقى المعقول ان الخطة راحت الرياسة ورئيسها بلغها بتكليف ومحمود عبد اللطيف قام بتنفيذها .. فشلت الاولانية .. كر الخيط زى البلوفر .  
**الشاهد** — ماكانش من مقتضى الخطة ..

الرئيس — دى كتبت اربع مرات والناس حايسمعوها ويقرّوها  
.. نقولها تانى ونكتبها لخامس مرة كمان .. الناس يدعوا علينا  
بعدين .. ( ضحك )

الدفاع — الجهاز السرى .. هل بان لك أنه يحمل خطرا  
على الوطن ؟

الشاهد — على هذا النحو يعتبر انه فيه خطر على الجماعة  
وعلى الوطن .

الدفاع — هل كان يتأتى لحكومة دستورية تطبق القوانين  
العادية لا الاستثنائية ان تقمع هذا الشر وتحمى الوطن منه ؟  
الشاهد — . . .

الدفاع — بان لك خطره .. هل كان يتأتى لحكومة دستورية  
القوانين العادية تجكمها ان تقمع هذا الخطر بديناميته .. بحاله ..  
الشاهد — لا اعتقد أن هناك أى مانع ..

الدفاع — هل من أجل تفادى هذه الحالة طالبتم باعادة  
الحياة الدستورية لان الانقلاب فى ظل الدستور أسهل منه فى  
الحالة التى لا يكون فيها دستور ؟

الشاهد — أى حانقلو سيحدث ؟

الدفاع — هه ..

الشاهد — أى حالة لو سمحت ؟

**الدفاع —** هل من أجل هذا الانقلاب الذى بدأ كان فى نيتكم أن تطالبوا بدستور هل الانقلاب فى حالة وجود دستور أهون وأسهل من الحالة التى لا يوجد فيها دستور ؟

**الرئيس —** ماكانش يطالب بدستور ، كما قال وقرر أن الرئيس محمد نجيب عند ما كان يفضد هذا الانقلاب الإخوانى بجزء من القوات التى افهمهم انها تحت سيطرته وكان ذلك فى ابريل أو آخر مارس وكان طبعا معروف لدى الجميع ماهى حوادث مصر وما هى الادوار التى مرت بها البلاد من فبراير لمارس لابريل .. كان معروف .. قال لك نجيب محمد نجيب ، ونقول للناس علشان يهديهم حانجيب لكم حريات .. حانجيب لكم برلمان وانما ماقلشى حانعمل .. خطوات التنفيذ لم توضع بل وضعت الاعلانات .. وضعت المانشيتات اللى حاتنشر فى الجرائد وضعت الالفاظ اللى حايطلى بها الكلام ... كل ده على ورق انما تنفيذ الخطة .. بتعمل ايه فى البلد ... تمشى ازاي .. تتحكم ازاي .. تأكل ازاي .. تشرب ازاي .. تدافع عن نفسها ازاي — طبعا مش ضرورى لان الكلام ده تبليغه تانى يوم ، والجهاز الارهابى موجود .. جهاز ارهابى بعشرة الاف والجيش يبقى مائة .. يبقى الجيش الحقيقى هو الجهاز الارهابى .. من اللى يفتح بقه فى البلد .. مين الست اللى كانت حتقدر تخرج فى الشارع ومين

الست اللى كانت حتقدر تروح الجامعة وتتعلم علشان تطلع  
تشتغل وتساعد اهلها ومش عيب ابدا انها تساعد اهلها لاننا  
كلنا بنساعد اهلينا . . ( ضحك ) . .

**الدفاع -** سؤال اخر . . هل كان من قبيل المصادفة وحدها  
ان تكتشف وزارة الداخلية مؤامرة صهيونية هدفها الفوضى  
والحيولة بين مصر وبين كمال الاتفاقية في نفس الوقت الذى  
يبين فيه ان هناك جهازا سريا للاخوان هدفه الانقلاب عن طريق  
الفوضى أو الفوضى عن طريق الانقلاب ؟

**الشاهد -** أنا طبعا لم يصل لعمى شىء بالنسبة للمؤامرة  
الصهيونية .

**الدفاع -** ده نشرته كل الجرائد .

**الرئيس -** باعتباره محامى فى مكتب عبد القادر عودة ما  
يصحش انه يقرأ حاجة عن الصهيونية . . لو قرأها فى الجرنال  
يقول استغفر الله العظيم . ( ضحك )

**الشاهد -** أنا مدى معلوماتى ان الاخوان كانوا بيقفوا مواقف  
باستمرار . . .

**الدفاع -** أنا لا أسألك عن الاخوان . . دى مصادفة والا لها  
أصل ؟

**الشاهد -** لا اعتقد ان الاخوان اداة للصهيونية . .



الدفاع — لا تعتقد ان الاخوان اداة للصهيونية ..

الشاهد — لا

الدفاع — ولو من غير اتفاق ؟

الشاهد — لا

الدفاع — انا لا اقول ان هناك اتفاق ..

الرئيس — ولما ييجوا الضباط ويوجدوا حرب أهلية ويخربوا الطرق والمواصلات ويخربوا المنشآت والناس متلاقيش تاكل ونعمل زى البلاد اللى حصل فيها كده اللى كانت تأخذ تموينها من روسيا أقدر أعرف انك ما كنتش بتشتغل لحساب اسرائيل .. أقدر افهم انك كنت بتشتغل لحساب روسيا ؟ .. لان كل البلاد اللى عملت كده ، كانت بتشتغل لحساب روسيا ، وكانت بتجيلها امداداتها من روسيا ..

كانت تجيلها اللخائر والعتاد والملابس من روسيا .. والادوية والاكل وجميع المعدات الخاصة بطرق المواصلات والسكان يا كانت تجيلهم من امريكا ... فأى الطرفين كنت تعمل لهما .. روسيا والا امريكا طالما استبعدنا اسرائيل ؟

الشاهد — لا هذا ولا ذاك .

الرئيس — يبقى ماذا يكون حكمك على انسان يفعل فعلة وهو

لا يعلم مداها ؟

**الدفاع — ونتائجها . . .**

**الشاهد —** السؤال تانى لو سمحت سيادتك لانى مش سامع .

**الرئيس —** من الساعة عشرة الصبح لغاية داوقتى . . المرة

الوحيدة اللى ما سمعتنيش فيها . .

**الشاهد —** الاستاذ اصله . . ( الشاهد يقصد الدفاع )

**الرئيس —** وغوش عليك يعنى ؟

**الشاهد —** أيوه . . .

**الرئيس —** موجهها كلامه للدفاع — آه . . . من فضلك سيبه .

**الدفاع —** وهو كذلك . . .

**الرئيس —** انا باقول لك . . ماحكمك على انسان يأتى يمثل

هذه الفعلة ولا يجعل فى حسبانته ما سوف يتعرض له من نتائج ؟

**الشاهد —** يبقى تفكيره ناقص . .

**الرئيس —** تفكيره ناقص ؟ . . يعنى تفكير القيادة اللى وضعت

الخطه دى كان تفكيرها ناقص ؟

**الشاهد —** لا شك أنه ناقص . .

**الرئيس —** لا شك أنه ناقص ؟

**الشاهد —** أيوه . .

**الرئيس —** كفايه . .

**الدفاع —** بماذا تعلق استنكار العالم الانسانى كله لاعمال

الاخوان فيما عدا راديو اسرائيل فقد أقرها ودافع عنها ؟

الرئيس — خط خط من فضلك تحت ناقص ..

الشاهد — ما سمعتوش وما سمعتش صدى الجرايد بره .

الدفاع — ما سمعتوش صدى الجرايد بره ..

الشاهد — أيوه ..

الرئيس — كوبرى ؟

الدفاع — واذا كنت أنا بانقل لك هذا الخبر .. هل تصدقنى ؟

الرئيس — ليه انت من الاخوان ؟ .. ( ضحك ) .. هو لا  
يصدق الا اثنين ..

يوسف طلعت وحسين كمال الدين .. استغفر الله العظيم ..  
أنا قلت اثنين وهم ثلاثة . هم ثلاثة .. وعوده ... والرد على  
ذلك انه كان حايعمل لهم كوبرى ينطوا عليه .

الشاهد — لم يبلغنى شيء .

الدفاع — أنا باديك هذا الخبر .. كل الجرايد استنكرت هذه  
الحوادث وقالت عنها انها حوادث جهنمية ...

الشاهد — لا شك ان احنا نستنكر هذا الحادث .

الدفاع — باقولك ... بماذا تعلل ان اسرائيل وحدها هى التى،

دافعت عن هذه الاعمال وأقرتها ؟

الرئيس — والله لو سمحت .. مين اللى يستنكر الحادث ..  
انت تستنكره ؟

**الشاهد —** أيوه . . . لا شك في ذلك .

**الرئيس —** في حين أنه موجود في الخطة بتاعتكم اغتيال جمال  
عبد الناصر وأن ماكانش جمال عبد الناصر يبقى زكريا محيى  
الدين واحداث حرب اهلية . . . الكلام ده انت قلت وقررت  
هنا . . . وبعدين تستنكر الخطة بتاعة القيادة بتاعتك ؟

**الشاهد —** أنا أستنكر الحادث كما وقع . .

**الرئيس —** آه . . صعب عليك جمال عبدالناصر . . والامكسوف  
من نفسك وانت راجل من الصف الثالث لان طلح تفكيركم باين  
بالشكل الوقح ده والانهيال الى انهارتوه يا مؤمنين . . يا أصحاب  
الدعوة يا أصحاب تقوية النفوس . . يا أصحاب تقوية الاخلاق  
دعائم الآدمية . . مش انت اللي قلت على الخطة دى . . اغتيال  
جمال عبد الناصر . . قلتها وبلغتها بصفتك قائد منطقة القاهرة  
لهنداوى دوير ؟

**الشاهد —** أيوه في حالة وجود اعتداءات . .

**الرئيس —** الادعاء . . . فيه أسئلة ؟

**وكيل النائب العام —** كفاية . .

**الرئيس —** اكراما للتاريخ علشان خاطر اللي ماسمعشى اسمك

في الاول يسمعه في الآخر . . اسمك ايه ؟

**الشاهد —** ابراهيم الطيب . .

الرئيس - بتشتغل ايه ؟

الشاهد - محامى . .

الرئيس - سنك كام ؟

الشاهد - ٣٢ سنة . .

الرئيس - طيب اتفضل . . مع السلامة . .

( وعلى أثر ذلك انتهت شهادة الشاهد )

الرئيس - اتفرجوا يا اخوان . . اتفرجوا يا مواطنين . .

اتفرجوا عليه وهو خارج . .

( انصرف الشاهد )

الرئيس - ترفع الجلسة الآن على أن تعود الى الانعقاد فى الساعة

العاشرة من صباح غد الثلاثاء الموافق ١٦ نوفمبر سنة ١٩٥٤

( رفعت الجلسة فى الساعة التاسعة والدقيقة العاشرة مساء ) . .

## مختصر

### الجلسة الثامنة لحكمة الشعب

المنعقدة علنا في الساعة الحادية عشرة والدقيقة الأربعين صباحا بمقر قيادة الثورة في الجزيرة ، يوم الثلاثاء ١٦ نوفمبر سنة ١٩٥٤ ، الموافق ٢٠ ربيع الأول سنة ١٣٧٤

المؤلفة وفقا للأمر الصادر من مجلس قيادة الثورة بتاريخ أول نوفمبر سنة ٥٤ الموافق ٥ ربيع الأول سنة ١٣٧٤ بناء على المادة السابعة من الدستور المؤقت .

والمشكلة برئاسة قائد الجناح جمال سالم عضو مجلس قيادة الثورة .

وعضوية القائمقام أنور السادات والبكباشي (( ا . ح . )) حسين الشافعي عضوى مجلس قيادة الثورة .

وبحضور البكباشي سيد سيد جاد المدعى ، والاستاذ على نور الدين وكيل نيابة أمن الدولة ، عضوى مكتب التحقيق والادعاء .

وتولى تسجيل المحاكمات بالاختزال الاساتذة طلعت الصبان وممدوح توفيق و ابراهيم فكرى ورمسيس عبد الشهيد مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد  
( حضر المتهم )

الرئيس — فتحت الجلسة . . . الشاهد موجود

المدعى — ايوه موجود يا افندم محمد خميس حميده .

الرئيس — اسمك ايه

الشاهد — محمد خميس حميده

الرئيس — من فضلك زعق شويه صناعتك ايه ؟

الشاهد — صيدلى .

الرئيس — السن ؟

الشاهد — ٣ سنة .

الرئيس — قول أقسم بالله العظيم ان أقول الحق والله على

ما أقول شهيد .

« أقسم الشاهد اليمين »

المدعى — انت من جماعة الاخوان المسلمين ؟

الشاهد — ايوه .

المدعى — ايه مركزك فى الجماعة .

الشاهد — وكيل الاخوان المسلمين .

المدعى — ايه معلوماتك عن النظام الخاص ١٠

الشاهد - أيوه يا أفندم دخلنا الاخوان المسلمين حوالى سنة ١٩٣٩ - ١٩٤٠ وبعد فترة لغاية سنة ١٩٤٦ فهمت من الاستاذ حسن البنا أن هناك شبابا من الاخوان المسلمين يتدربون على السلاح لان طبيعة دعوة الاخوان المسلمين هي تربية الشباب على أهداف عليا لينضج منهم أناس مستكملين كل عناصر التربية ويتدربوا على السلاح وحيث أن التدريب لا يبيحه القانون فكانوا يأخذوا بعض في أماكن بعيدة زى الصعيد أو في المقطم ويتدربوا وهناك يجيئهم بعض ناس يفهموا هذه الامور ويدربوهم سرا وسمعت من الامام أن فهمهم أنهم يستعدروا لـ" يتطالبه الاسلام في فلسطين في القنال وغير ذلك من الامور العامة التى يكون متفقا عليها . ده الوضع لغاية ٤٦ - ٤٧ - ١٩٤٨ وجت حكاية فلسطين وتطوع الاخوان للذهاب الى فلسطين ولما جـم حصل حل الاخوان المسلمين وكنا في سنة ١٩٤٨ - ١٩٤٩ في المعتقلات وحصلت قضايا بعد سنة ١٩٤٩ واستشهد الامام في فبراير سنة ١٩٤٩ وخرجنا من المعتقلات ورحنا بيوتنا والشباب اللى وقعت عليه القضايا بدعوا يحسون بأنهم في كيان خاص وذاتية خاصة في تنظيمهم وسيرهم .

وظلت الجماعة مالهش وضع قانونى مدة طويلة لغاية ما جـه الاستاذ الهضيبي سنة ١٩٥٠ أو ١٩٥١ . . سنة ١٩٥١ فى الغالب



في الفترة دي ما كانش للجماعة وضع قانونى أو لها قيادة أصلا  
وكان صالح ع شماوى بس يتولى القضايا ويجمع الاموال لمثل  
هذا الغرض ولما جاء الاستاذ الهضيبى جه معاه الاستاذ عبد  
القادر عوده وكيل الجماعة وكنا أمام وضعين **الدعوة ككل وفيها  
جهاز بذاته يعتبر قائما** وهذا الوضع كان بيتعب الجماعة وكان  
فيه ثنائية فى الجماعة والاخوان أعضاء الهيئة الأساسية كانوا  
يروا أن هذا الوضع ما يكونش موجود أصلا ولا بد ان الدعوة  
تبقى توجيه واحد وسياسة واحدة منهاج وتفكير واحد وحاول  
الاستاذ عبد القادر عوده فى الفترة الاولى أن يعالج هذه المشكلة  
ويظهر انها أخذت فترة طويلة وما عولجتش وأنا من المنصورة  
مش من القاهرة فالاستاذ الهضيبى بعث لى جواب يقول أن  
المشكلة ان الدعوة كبيرة وفيها ثنائية والجماعة فيها اضطراب  
وهذا الاضطراب يرجع الى ما قبل حضور الهضيبى وذلك أن  
**جماعة ترى منع التربية العسكرية** وانه من المستحسن التربية  
فقط مطلق التربية أما ان **يعد الشباب اعداد عسكري** فلا داعى  
له وجماعة ترى أن هذا صح وأن منع التربية العسكرية يبقى  
**خروج من فكرة الجهاد الاسلامى** دول كانوا فكرتين موجودتين فى  
الجماعة وكنا بنعانى المشكلة بشكل عجيب هذا عدا المشاكل  
التى استجدت من بقايا السجون والمعتقلات وقد عهد الى أنا وعبد

العزیز کامل وحسین کمال الدین بمعالجة هذا الوضع ومباشرة  
وشفنا الوضع أن الحل هو تفهیم الاخوان معنی الاسلام الحقيقي  
ومتی يكون الجهاد ومتی لا يكون وتطوره الحديث وطريقه  
واقترح تكوين قسم الاسر وذلك لتوحيد منبع الفكر للاخوان  
المسلمين ما يبقاش كل قسم له توجيه لوحده . . . الكشف  
لوحدها والتربية لوحدها والطلبة لوحدها وهكذا بل يصدر من  
مكتب الارشاد توجيه كامل حتى لايشذ عن الحركة الاسلامية  
الى كثير ما اودت بالجماعة واخترنا لقسم التربية الاستاذ عبد  
العزیز کامل وكان الاستاذ الباقوري رئيس قسم نشر الدعوة  
فاخذناه منه علشان يتولاه الاستاذ عبد العزیز کامل علشان يبقی  
توحيد للمسألة وازالة فكرة السرية علشان يبقی التفكير واسع  
عام يلتقى مع الامور العامة بدل ما يبقی التفكير ضيق محدد لانه  
بياخذها تربية عسكرية على فهمه ويسىء فهم الامور وارادنا أن  
نتشیل الشباب ونعالجه وذلك بالابقاء على فكرة الجهاد بين  
الاخوان ولكن تطلع الى النور وتبقى علنية ويبقى التفكير موحد  
وكذلك انشأنا قسم الاسر وقام اخ من الاخوان عليه وقام اخ  
آخر غيره من نفس النظام علشان ما يقالش أنه حصل حاجة  
وتولى هذا العمل وكانت مهمته أن يخرج بالاخوان الى النور  
ومصطفى مشهور كان في قسم الاسر اشتغل في القسم العام

وأنا خلصت المشاكل وسافرت على المنصورة وكان هذا قبل قيام الثورة بمدة طويلة وحتى فبراير سنة ١٩٥٣ أنا انتسبت للقاهرة ... تحب أقول لسيادتك تطور الفكرة .

**الرئيس -** انت تجاوب على السؤال بتاع المدعى

**المدعى -** عايزين تطور الجهاز من أول ما نشأ لغاية ما انتهى .

**الشاهد -** حاضر ... أنا جيت في فبراير والنقيت الوضع

كما هو برضه صحيح اتحسن شوية وبدأ الاخوان يحسوا أن كلمة النظام دى بقت مافيش حاجة وبقت كلمة عادية ما بقاش فيه اللي تحت الأرض ... وسارت الأمور بهذا الشكل ولكن لم يتم بعض اللي كان مطلوب والامور ما رجعتش بالاخوان الى الوضع اللي عايزينه ... وبرضه ثنائية وفيه أفراد قائمين بأفكار أخرى فقابلت عبدالرحمن السندي وقلت له وضع الجماعة بهذا الشكل مقلقل ووحدة التفكير ووحدة الامور ووحدة الدعوة ايه اللي ماخلاش تسير في هذا الاتجاه ... وفي هذا أحب أسجل انه كان بينه وبين المرشد مفيش ود فقلت له احنا بنلتقى جميعا على الدعوة العامة وما بنلتقيش على أفراد ولم تجمعنا سوى الدعوة العامة لا الافراد لازم تصبر وتشتغل تانى وتحل هذا الوضع لان الاخوان مرتبطين بك ارتباطا كبيرا فقال أنا مستعد وعبد الرحمن السندي اشتغل في قسم الرياضة في الاشغال العامة

والتقى مع المرشد وقال له انا حريص على الدعوة وانت حريص عليها ... وسارت الامور لغاية اغسطس سنة ١٩٥٣ وطبعاً لا يخفى على حضراتكم أن الجماعة نفوس تختلف بمقدار ما فيها من الخير وتقدير للامور والاحساس بالامور العامة والخاصة والصفيرة والفترة دي كانت دقيقة على الدعوة فعلاً وفي يوم التقيت مع عبد الرحمن السندي فوجدته تعبان ومتضايق سألته ليه يا فلان فقال أنا حسيت ان المرشد بيكون نظام جديد غير النظام المعروف وانه يحس أن المرشد عايز يخلص منه لان تكوين نظام جديد وضع ... يعنى مش تمام فقلت له أنا لا أفهم هذا ولا أعرفه ولا أحس به فقال انت تشوف الكلام كله . . . والكلام بيكون من نواحي كثيرة والتقى السندي مع المرشد وواجهه وخرج من المقابلة بأنه لافائدة وانه من المستحيل التعاون مع المرشد في هذا الامر . . وجانى اثنين من الاخوان وقالوا لايمكن أن نصبر على هذا ونحن سنترك أعمالنا في الدعوة ما دامت الامور تسير على هذا الوضع وفي جلسة من جلسات المكتب المرشد قال انه حصل فيه كلام بينه وبين عبد الرحمن السندي يؤدي الى استحالة التعاون بينهما . . . وبعد ذلك الاخوان اللي كانوا متعاونين أصلاً مع عبد الرحمن قالوا احنا منسحبين من هذا العمل وهاتوا اللي يقدر يسير بهذا الوضع

وقالوا هاتوا غيرنا ما دام فيه جهاز آخر . . . فسألت المرشد هل احنا بنعمل جهاز آخر فقال دى اوهام وفيه شبان بيكرهوا عبد الرحمن السندى غرضهم اننا نكون منهم جهاز ولكن مفيش فقلت طيب اذن نجيب أخ آخر علشان يسير بالنظام فى الجماعة فى الطريق الذى نهدف اليه وهو اعادة الشباب الى الامور العامة ونخلص من هذه المشكلة وتبقى الدعوة فى الداخل زى الخارج . . واختير يوسف طلعت مسئولاً عن النظام فى الفترة الاخيرة وده كان فى شهر نوفمبر سنة ١٩٥٢ وبعد ذلك . . أحب أقول هنا حته علشان تبقى معروفة . . . وهى أن النظام فى طبيعته أنه يتبع المرشد رأساً .

**الرئيس —** ايه النظام اللى يتبع المرشد ؟

**الشاهد —** النظام الخاص او الجهاز .

**الرئيس —** أيوه .

**الشاهد —** بعد كده مشينا نوفمبر وديسمبر وقام يوسف طلعت بالمهمة الموضوعة فى ذهننا وهى ان ينتهى النظام وأن تكون الدعوة متطابقة وجه الحل فى يناير سنة ١٩٥٤ وبخرجت فى ٢٥ مارس سنة ١٩٥٤ وبعد ذلك مشينا وفى فترة من الفترات جه المرشد . . . فى الفترة دى حصل وده طبعاً لا يتعلق بالنظام ولكن بالامور العامة بعدين جه المرشد سافر البلاد العربية فى

يوم العيد ... احب اقول ان الصورة دى فى الوضع العام  
فهل أقولها ...

**المدعى -** مين اخر رئيس للجهاز السرى ؟

**الشاهد -** كان يوسف طلعت .

**المدعى -** ايه الظروف اللى اتعين فيها رئيسا للجهاز السرى ؟

**الشاهد -** ما انا قلت لسيادتك .

**المدعى -** الظروف ... يوسف ازاي جه وايه الظروف اللى

نشأ فيها علشان يكون رئيس للنظام ؟

**الرئيس -** طيب قول الكلام ده ثانى .. عيده يمكن المدعى

عايزه بتفصيل أكثر من اللى قلته .

**الشاهد -** لما عبد الرحمن طلع بعد الظروف المحيطة واللى

حصل فيها مما ادى الى استحالة التعاون بين المرشد وبينه

وعبد الرحمن علم ان فيه نظام جديد بيعمل فى حين انه ماشى

فى الطريق المرسوم اللى هو انهاء هذا الوضع وأن يعمل الاخوان

كلهم فى قسم عام ... يبقى ايه الداعى يكون فيه نظام جديد ما

يكونش موجود فيه فعز عليه دى حته الحته الثانية أن فيه كثير

من اللى حول عبد الرحمن ما يرتاحوش اليه وغيرهم كثيرين

يرتاحون اليه وكان فيه ضجة فى الجماعة أمام هذا انسحب عبد

الرحمن وقال ما اشتغلش بعد ذلك قالوا نعمل ايه ضرورى نجيب

واحد من النظام علشان يحل محله ويسير به كما كانت الفكرة مرسومة وهى تطابق الدعوة .

**وكيل النائب العام —** المفهوم من كلامك انك ترى وتعمل على أن يعود افراد النظام للوضع الطبيعى فى الدعوة وان النظام الخاص او السرى لم تعد اليه حاجة خاصة وبعد أن انتهت أسباب قيامه بقيام حركة الجيش وأنت عملت على ذلك مدة طويلة . . فلماذا يعاد تشكيل النظام بعد ذلك ويعين رئيسا له يوسف طلعت ؟ .

**الشاهد —** أنا قلت فى كلامى ان ذهاب عبد الرحمن من العمل لم يمنع ان لسه الناس موجوده نفس الافراد اللى كانوا فى الجهاز موجودين . . المسألة مش ان واحد طلع انما المسألة أن فيه ناس موجودين شبان كثيرين موجودين على فكرة وتنظيم . . . يطلع عبد الرحمن لكنهم موجودين والمشكلة هى كيف تصفى هذه الفكرة ونصل بهم الى التوجيه السليم فكان لا بد من وجود أخ آخر يتولى رياستهم لينتقل بهم الى الطريق المرسوم .

**وكيل النائب العام —** المفهوم ان عبد الرحمن السندى كان قد بدأ فى الانتهاء بهذا النظام . . ايه اللى عمله يوسف طلعت فى هذا السبيل ؟

**الشاهد —** هو كان جاى علشان يتم ما بدأه عبد الرحمن وهو منع الثنائية فى الدعوة والوصول بها الى تطابق كامل . وفعلًا

كانت كل الاوامر تنزل من مكتب الارشاد . . . يوسف طلعت  
كان في الفترة التي اريد ان اشرحها قعد فترة يأخذ بهذا وذلك  
من يناير الى ٢٥ مارس سنة ١٩٥٤ .

**وكيل النائب العام -** ايه التنظيمات اللي عملها يوسف طلعت ؟

**الشاهد -** نفس التنظيمات لا أعرفها لاننى اتصل بالامور من  
وضعها العام أما التفاصيل فهو يتصل بالمرشد العام . كان فيه  
اسر خاصة بالجهاز واسر من غير الجهاز وكان المطلوب ان يتطابق  
الجميع وبديل ما يبقى فيه ٥ أسر خاصة بالجهاز و ٥ أسر من  
غير الجهاز يبقى فيه ١٠ أسر متطابقة في التفكير والتوجيه .

**وكيل النائب العام -** اذا صح انكم عملتم لهذا الغرض فايه  
الى عمل ؟

**الشاهد -** تفاصيل الاشراف مع المرشد وأنا لا أعرف الا  
الاضاع العامة ولعللى بعد ٢٥ مارس اقدر اوضح ما يلقي ضوعا  
على الامور .

**وكيل النائب العام -** طيب وضع ، هو ده اللي احنا عايزينه  
وضح لنا ايه اللي عمله يوسف طلعت لما تولى رئاسة النظام . . .

**الشاهد -** بعد ٢٥ مارس .

**الرئيس -** سنة كام ؟

**الشاهد -** سنة ١٩٥٤ .



الرئيس — اتفضل .

الشاهد — بعد ٢٥ مارس سنة ١٩٥٤ وأسجل الزيارة الكريمة  
التي قام بها الرئيس جمال مع سيادة وزير الارشاد القومى فى  
منزل المرشد أحب أن اسجلها حيث اننا نروى للتاريخ .

الرئيس — اذا كنت حبتدى فى القصص دى نبدأ من الاول  
.. من اول القصة .

الشاهد — طيب .

الرئيس — مش بس تقواوا « ويل للمصابين » .

الشاهد — حاضر .

الرئيس — وانت راجل كنت حمامة السلام .

الشاهد — ايوه

الرئيس — والا كنت حمامة الايك .

الشاهد — حاضر ..

الشاهد — ابتدى القصة من الالف .. ابتدى قول لنا قصة  
النظام الموجود داخل الجماعة الاسر اللى نجب ندخلها فى بعض ،  
بدل ما هى خمسة خمسة نجعلها عشر اسر . دول خمسة من  
تحت دهايز ماشيين ودول عايمين على الوش ولكن فى الشكل  
العام أسرة واحدة . عشرة . ده الكلام اللى نجب نفسره وسيادتك  
راجل صيدلى وعمرك ٤٣ سنة ومنتدب من الخارج وكيل

المرشد وكنت في وقت من الاوقات نائب المرشد . تحب تتكلم  
من المستوى العالي قوى اتكلم عن الجمعية وبعدين ندخل في  
حماسة السلام .

الشاهد - اللى تراه سيادتك .

الرئيس - الكلام المضبوط يمشى مسلسل . تقدر تقرأ  
الفتحة بالعكس ؟

الشاهد - لا .

الرئيس - تنفع ؟

الشاهد - لا .

الرئيس - طيب اقرأ لنا من أول بسم الله الرحمن الرحيم .

الشاهد - المرشد سافر البلاد العربية وقعد مدة هناك .

الرئيس - أنا عايز الحقة بتاعة التنظيم بتاع الجهاز الخاص .  
الحقة اللى اتعملت لها لجنة ونقلت عبد الرحمن السندي من  
الرياسة الخاصة بالنظام الخاص لرياسة التدريب لانه هو اللى  
قادر على اقناع الناس اللى معاه . يندمجوا . وازاي ندمجهم .  
وبعدين ازاي ننشئ جهاز سرى . وجاء يوسف طلعت .  
الشاهد - أيوه يا افندم .

الرئيس - وطبعاً الكلام حصل وعبد الرحمن السندي في  
التدريب بدليل انه لما عرف وهو مدير التدريب أن فيه جهازاً

ماشى له أتباع قالوا له فيه سياسة ثانية .

**الشاهد -** بدى أقول ان يوسف طلعت مجابش الى كنى

عايزينه .

**الرئيس -** أيوه ؟

**الشاهد -** لم يستطع أن يصل الى ما تريده بل بالعكس

أوصلنا الى مالا يكن فى الحسابان .

**الرئيس -** انت . خميس . جبت السندى ورحت قابلتته

بالمرشد العام حسب اعترافك وصالحتهم مع بعض وفهمت

السندى انه لازم يفهم ان النظام يدخل فى صلب الجمعية ولا يبقى .

هناك نظام خاص أبدا . ولازم تمسك قسم التدريب وانت

الوحيد الى تقدر تقنع افراد النظام يتنازلوا عن النظام ويدخلوا

فى التدريب .

**الشاهد -** حصل .

**الرئيس -** قول لى باعتبارك مسئول كيف فشل عبد الرحمن

السندى فى حل هذا النظام هل لانه فشل فى اقناعهم او لان فيه

غيره يلعب بطريقة أخرى من وراه ؟

**الشاهد -** فيه ناس ميجبوش عبد الرحمن السندى .

**الرئيس -** نفك الساعة ونطلع الرقاص . ونحاول نركبها ثانى

اذا ركبت تبقى ساعاتى متزعلش . أصلى مش كيمائى كنت

أقول لك في الصيدلة .

الشاهد — من غير شك فيه ناس مكانوش بيحبوا السندي .  
وناس كانوا يوافقوه .

الرئيس — مين دول ومين دول ؟

الشاهد — كلهم اخوان .

الرئيس — يعنى من النظام العام والخاص . من الدرجة العالية والوطنية ؟

الشاهد — مجموعة الاخوان كلها .

الرئيس — طبقة مخصوصة . يعنى من النظام الخاص ومن الطبقات العالية والطبقات الوطنية ؟

الشاهد — ايوه يا أفندم . فيه ناس عايزين السندي وناس مش عايزينه . لما لم يستطع أن يتعاون مع المرشد انسحب لان فيه نظام جديد يعمل ، ولما سئل المرشد قال له لم يعمل نظام جديد . قال هو القديم مفيش جديد . عايزين نتبع دستور .

اللى هو أن لا يتدخل الاخوان مع بعض .

الرئيس — النظام السرى ...

الشاهد — ايوه يا استاذ .

الرئيس — أنا مش استاذ خليك مؤدبة .

الشاهد — أنا متأسف . أنا آسف جدا .

**الرئيس** — أنا مسامحك . كنت تقول ان عبد الرحمن السندى  
كانت معاه لجنة مكونة من . . . ؟

**الشاهد** — خمسة أو أربعة .

**الرئيس** — أحمد حسنين . مشهور الصباغ . أحمد زكى .  
عبد الرحمن السندى كانوا يرأسهم الجهاز السرى . الجهاز ده  
سرى بمعنى السرية ، والا سرى علنى ، والا علنى ؟  
**الشاهد** — عادى .

**الرئيس** — سرى أو سرى علنى أو علنى ؟

**الشاهد** — اشرحه سيادتك .

**الرئيس** — لا . اسمه ايه . لان فيه حاجة البنى آدمين موافقين  
عليها . فيه حاجة سرى . وفيه سرية علنية . وفيه علنيه .  
يدخل تحت أى بند ؟

**الشاهد** — ما أعرفش أفرادہ . أعرف خمسة ستة من  
رؤسائه .

**الرئيس** — المفروض انهم يمشوا ازاي ؟

**الشاهد** — علنى .

**الرئيس** — والحاجة العلنى تشيل سلاح ؟

**الشاهد** — غلط .

**الرئيس** — ازاي يشيل سلاح وهو علنى ؟

**الشاهد — غلط يا أفندم .**

**الرئيس —** هل كان من التنظيم أن يكون في الجهاز أسلحة ام لا ؟

**الشاهد —** التنظيم انه لا يكون هناك أسلحة الا عند المطلوبات

**العامة .**

**الرئيس —** ايه المطلوبات العامة . ومن يحددها ؟

**الشاهد —** الحكومة

**الرئيس —** هل السلاح كنتم تجيبوه من الحكومة أو باذنها أو

بمعرفتها أو عن طريقها أو بمعلومية الحكومة والا كنتم نهريوه

**من الحكومة ؟**

**الشاهد —** غلط يا أفندم .

**الرئيس —** أنا مش عايزك تقول غلط أو صح . احنا قاعدين

هنا نقول غلط أو صح قل لنا . مهرب من الحكومة ؟

**الشاهد —** مهرب من القانون طبعا .

**الرئيس —** الجهاز اللي تكونه وتسلمه بأسلحة مهربة من

حكومة يبقى جهاز ايه ؟ سرى والا على ؟ والا سرى على ؟

**الشاهد —** سرى

**الرئيس —** ما يقاش سرى على ؟

**الشاهد —** لا

**الرئيس —** أبدا الحمد لله ان الثالثة ما طلعتش . كنا دخلنا

في مصيبيه ، ايه العلنى السرى . سرى قطعناها . يعنى الكلام  
الى كنت بتقوله حاجه عاديه مش مضبوط . النظام السرى  
الى كان موجود وكان يرأسه السندى ومعه اربعة آخرين .  
لما صدر امر بحله من المرشد وعبد الرحمن راح مسك التدريب  
ايه الى خلى النظام السرى ده ييجى قائم بذاته وييجى عليه  
يوسف طلعت . وجماعة عبد الرحمن السندى يخرجوا وبتوع  
يوسف طلعت يدخلوا وينفذوا ويكبروا ويتشكلوا ويعمل لهم  
اسلحة ولجنة ثانية شايف دول . « وأشار الرئيس الى أصابع  
يده » عبد الرحمن السندى ومعاونيه طلعا . ملينا الفراغ ناس  
جداد وعملنا رياسة جديدة . ده الى حصل . ده كلامك .  
فسره . اى واحد من الى قاعدين يقر هذا الكلام فسرّه علشان  
يدخل مخى .

**الشاهد -** يوسف جه . الى طلع مع عبد الرحمن السندى  
اربعة . يوسف جه وضع عبد الرحمن .

**الرئيس -** وضع !!

**الشاهد -** بدله يعنى . يوسف جه موضع عبد الرحمن  
**الرئيس -** لما حليت الجهاز وتريد أن تدخله الجماعة تقوم  
تجيب له يوسف طلعت هى الفكرة التخلص من السندى ؟  
**الشاهد -** الناس هم هم موجودين .

**الرئيس —** هل كنتم مقتنعين ان الناس كانوا مخطئين . لما تصدروا لهم امر خاص بالنظام السرى ولا يتبعوا امركم . نظام سرى مسلح يحمل سلاح كنتم مقتنعين تمام الاقتناع ان وجود هذا النظام فيه ضرر للجمعية والدعوة والبلد . حبيتم تحلوه . القائد اقتنع . واللجنة اقتنعت والافراد لم يقتنعوا تعملوا ايه ؟ النتيجة تكون ايه ؟

**الشاهد —** نشيلهم .

**الرئيس —** وليه ماتشالوش ؟

**الشاهد —** يتشالوا . يجب .

**الرئيس —** متشالوش ليه ؟

**الشاهد —** بعد يوسف طلعت ماجه . اخدنا فترة دقيقة . .

**الرئيس —** أرجوكم . والله والله والله انا مش باتفرك او اعكنك او احنق عليك فى حاجة . أحب اتناقش فى الموضوع وافهمه . أحب افرق فيه متعومنيش . أحب اوصل الى قاعه . انا أصدرت امر حل الجهاز ووديت عبدالرحمن السندي للتدريب . المفروض ان أعضاء الجهاز ينحلوا وتنحل الاسر بتاعتهم والمفروض اسلم الاسلحة حسب الكشف اللي عندي حسب الجرد . ليه محصلش كده ؟ حد مختلف معنى السؤال ؟

**الشاهد —** قلت ان عبد الرحمن السندي يسير بهم الى حل



هذا الموضوع .

الرئيس — ليه ؟

الشاهد — دول شوية ناس مش جرة قلم طوالى . يا عبد الرحمن يسير بهم الى هذا ويطلبوا الى الامور العامة زى الرياضة الرئيس — أنتم كجماعة الاخوان المسلمين وكرياسة الاخوانجية اوجدتم فى هذه الجمعية افراد مواطنين من أبناء هذا البلد على فكرة جهاديه خلت مخهم يفكر فى حيز ضيق مستتر تحتانى — على حد تعبيرك . واعطاهم سلاح فى أيديهم وحبيت تخرجهم منه جبت واحد علشان يقنعهم علشان يتركوا هذا بدون ماتلم . السلاح من أيديهم . بدون أن نعلم عن السلاح ومخابئه وأفراده .

صح والا غلط ؟

الشاهد — صح .

الرئيس — استنى على النقطة دى لما نجىء لها فى الكلام السنه الجايه . اتكلم . كمل السؤال بتاع الادعاء .

الاستاذ على نور الدين — المدعى — بعد يوسف طلعت جهايه؟

الشاهد — ماعملش حاجه .

الرئيس — ازاي معملش حاجه . ازاي سكت . ونتيجة السكوت تبلور عنه ايه وازاي كان عندكم أخبار بتطورات الموضوع ولما توصل لكم التطورات تقررُوا ايه ؟ ايه القرارات اللى تتخذوها

لجابهة الموقف ؟ هو أنا بالكلم عسكرى من جيش الاخوانجيه ؟ ده  
أنا بالكلم واحد فوق . فوق خالص .

الشاهد — لما لم يعمل يجب أن يكره ....

الرئيس — ايه الاوامر بالتفصيل اللى اعطيتها ليوסף طلعت  
علشان يعملها ؟

الشاهد — كان على العموم يا يوسف النظام ينتهى بكل ظروفه  
ولكن التفاصيل ما أقدرش أقولها لسيادتك .  
الرئيس — ليه ؟

الشاهد — أنا واحد من ١٥ . أنا مش مسئول .  
الرئيس — انت واحد من ثلاثة .

الشاهد — كلام مين ده ؟

الرئيس — كلامك اللى مضيت عليه . اسمعوا يا حضرات  
رئيس النظام السرى فى ذلك الوقت عبد الرحمن السندى ومعه  
خمسة مسئولين . أحمد حسنين ....

وفعلا اتشكلت لجنة منى أنا خميس ومن الاستاذ عبد  
العزيز كامل وحسين كمال الدين واتصلنا بالخمسة السابقين  
للنظر فى أمر النظام .

الشاهد — انتهت هذه بمجرد الانتهاء من عملها وأنا سافرت  
المنصورة .

**الرئيس -** كانت اللجنة لانتخاب يوسف طلعت . حاجه من اثنين . أما حل النظام واما ...

**الشاهد -** هى قبل قيام الثورة بعد وجود المرشد مباشرة.

**الرئيس -** ده اللى باتكلم عنه . من أول وجود اختلاف بين المرشد والسندى . أنت مالك ومال الثورة حتتلق فيها يه ؟ لما اللجنة اتكونت اتكونت ليه ؟

**الشاهد -** لحل المشكلة القائمة .

**الرئيس -** وصلتم لايه ؟

**الشاهد -** تكوين قسم . واندماج الاخوان . وانا انتهت مأموريتى وسافرت .

**الرئيس -** انتهت المشكلة . والحل العام ؟

**الشاهد -** أنا واحد من الاخوان فى المنصورة .

**الرئيس -** يعنى جايبك العسكرى محمد على حسنين من الاورطة الثانية مشاة . وجايبك فى المجلس الاعلى تقرر الموقف وتحل المشكلة . طالمسا أنكم تقوموا بدعوة اسلامية تدعو الى ايه؟

**الشاهد -** الاسلام والفضيلة .

**الرئيس -** وده موجود فىين ؟

**الشاهد -** فى الكتب .

**الرئيس -** أى كتب ؟

الشاهد — كثيرة . لاتغيب عن سيادتك .

الرئيس — تغيب عن القرآن ؟

الشاهد — القرآن هو الاصل .

الرئيس — قول لى ، القرآن قال لك تصلى وسابك عايم فى

الصلاة ؟

الشاهد — لا حدد الصلوات .

الرئيس — حدد الركعات ؟

الشاهد — أيوه .

الرئيس — وطريقة الوضوء ؟

الشاهد — أيوه .

الرئيس — لما الدعوة الى تنشرها بين الناس حددت فى

القرآن بالتفصيل . ليه سبت حل عقدة الدين من غير تفصيل

ما هو الغرض ؟

الشاهد — الغرض الى قلته لسيادتك ان حل هذا الوضع

بالصورة الى رايناها مدتها . وهو عمل قسم التربية . والاخوان

يشتغلوا بالقسم العام ، لم نضع تفصيلا كما كان يجب ان يكون .

الرئيس — وهل هذا خطأ ؟

الشاهد — خطأ .

الرئيس — كرر بصوت عالى .

الشاهد — خطأ يا فندم •

الرئيس — من مين ؟

الشاهد — منى ومن اللجنة •

الرئيس — وما تأثير هذا الخطأ وما انعكاسه على جماعة الاخوان المسلمين باعتبارك رجل مسئول في الجماعة ؟

الشاهد — الخطأ اللي احنا فيه اساء الى الجماعة •

الرئيس — وما هو الخطأ الموجودة فيه الان ؟

الشاهد — ان تصور بهذه الصورة •

الرئيس — احب تقول الخطأ بالتفصيل والتدقيق •

الشاهد — ان يقوم الاخوان بعمل من الاعمال اللي حصلت •

الاعتداء على الرئيس وان تقوم بمثل هذه الامور

الرئيس — ايه الامور دي ؟

الشاهد — الحالة اللي احنا فيها •

الرئيس — احنا في حالة جميلة خالص ( ضحك ) •

الشاهد — الحمد لله • ربنا يبارك • انا قصدي حالتنا احنا •

حالة الاخوان •

الرئيس — عايز التفاصيل • قول لنا •

الشاهد — . . . .

الرئيس — عايز اجابه على سؤالى •

**الشاهد — ان يقوم فرد من جماعة الاخوان باغتيال الرئيس**

**جمال في وقت ... مش قادر أتصور .**

**الرئيس — ولأنا قادر ( ضحك )**

**الشاهد — أقول ايه ... يكفى هذا ... نقول ايه . ان يصبح**

**الاخوان المسلمين اجراميين .**

**الرئيس — اذا كان الاخوان المسلمين سمحوا للجنة عليا ان**

**تنظر في سياسة جزء مهم في جماعة الاخوان المسلمين وهى الجهاز**

**السرى . وحل اشكاله . وسمحت لنفسها رياسة الاخوان . ان**

**تقبل هذا التقرير المرفوع من تلك اللجنة . التقرير العايم غير مفسر**

**لحل اشكال قائم ماذى موجود في جماعة الاخوان . قبلت أم لا ؟**

**الشاهد — قبلت .**

**الرئيس — وده صح ؟**

**الشاهد — غلط .**

**الرئيس — غلط ؟**

**الشاهد — نعم .**

**الرئيس — يفهم من كده ان جماعة الاخوان المسلمين غلط ؟**

**الشاهد — الى أبعد حدود الغلط .**

**الرئيس — تقدر تقولى الجماعة التأسيسية للاخوان المسلمين**

**كيف تكون . اللى هى برلمان الاخوان المسلمين الى قبل التعديل**

الآخر الموقوف ؟

الشاهد — يختارهم حسن البنا بالاقتدار وكل سنة في حدود عشرة يطلعوا وعشرة يدخلوا .

الرئيس — يعنى بالتعيين . عددهم كام ؟

الشاهد — ١٤٨

الرئيس — المرشد يعين ١٤٨ واحد كل سنة يخرج عشرة . .

الشاهد — يدخل عشرة جدد .

الرئيس — يعنى السنه الجايه يبقوا ١٤٨ — اللى بعدها ١٥٨ .

الشاهد — نعم .

الرئيس — ودلوقت اد ايه ؟

الشاهد — ١٤٧ ومازادوش .

الرئيس — معينين ؟

الشاهد — نعم .

الرئيس — ومكتب الارشاد يتكون ازاي ؟

الشاهد — كل سنتين تنتخبه الهيئة التأسيسية تختار ١٢

ولهم حق ضم ٣ .

الرئيس — ١٢ منتخبين من الجمعية التأسيسية المعينة و ٣

معينين ؟

هذه ديموقراطية الاخوان المسلمين اللى كانت حتطبق عليكم

في الحكومة الاتية الى كانت حتكون تحت وصاية الاخوان المسلمين  
شفتم البرلمانات والدستور والانتخابات المثالية اللي كان ستطبق  
عليكم ؟ لو كان يصحبهم نظام غير كده كانوا طبقوه على نفسهم .  
ده مع اننا نترك الى جانب شويه الجهاز السرى والاسلحة . هل  
مكتب الارشاد قراراته توقف وتلغى قرارات المرشد ام هي  
استشارية ؟ ملزمة ام استشارية ؟

**الشاهد -** في الواقع استشارية .

**الرئيس -** مكتب الارشاد المعينين فيه ثلاثة والباقي منتخبين  
من بين ١٤٧ الى هم الهيئة التأسيسية البرلمانية المعينين . رايهم  
استشاري . مكتب الارشاد رايه استشاري غير ملزم المرشد  
العام للاخوان المسلمين هل هناك دكتاتورية اكثر من كده ؟  
دكتاتورية مقنعة كم واحد فيكم كان يعرف الكلام ده ؟ يرفع صباعه  
لم يرفع أحد

ولا واحد يعرف كده . شفت التصيليل باسم الدين . كلمنى  
ياسيد خميس وبعدين .

**الشاهد -** ده نظام الهيئة التأسيسية وانتخابها .

**الرئيس -** وهل الجمعية التأسيسية رايها استشاري ايضا ؟  
هي تجبر مكتب الارشاد . ومكتب الارشاد يتقدم بقراره وقراره  
استشاري .



**الشاهد —** هي ملزمة .

**الرئيس —** مكسورة من هناك ونلحم والماسورة مكسورة  
وخربانة من عند الجيران .

( ضحك )

**الرئيس —** بالذمة يرضى ليه يقعد في جمعية بتاع مكتب الارشاد  
وده رأيه استشارى طرطور . هل تعرف أنه فيه مجلس اسمه  
مجلس ادارة السكة الحديد وكان رأيه استشارى وطبعا الحكومات  
الى فانت حطت مجلس الادارة وعملت رأيه استشارى للوزير  
فله أن يتصرف كيفما يشاء ، طبعا كانت دكتاتورية للوزارات  
الى كانت تيجى ، تعرف اول حاجة عملتها الثورة ايه » .

**الشاهد —** خلته اجبارى ملزم، ورأيه استشارى ملزم للوزير .

**الرئيس —** أهى دى دكتاتورية الثورة ! ؟

**الشاهد —** عارفينها كويس .

**الرئيس —** لا يا شيخ !!

**الشاهد —** أنا عارفها كويس .

**الرئيس —** مقلتش ليه مكتب الارشاد يرضى يقعد طرطور ؟

**الشاهد —** لا . . لا مش رايحين تقعد طراطير .

**الرئيس —** لا مش حنقعد !!

( ضحك )

**الرئيس -** ايه السبب انكم ما قدرتوش ترفضوا او تتصرفوا مع المرشد ، هل لانه كان فيه جهاز سرى ، طيب وبعد حله لما كان برياسة السندي ما عرفتش تتخلصوا منهم فاضطريتم انكم تجيبوا يوسف طلعت . لماذا لم تلجأوا الى جهة أكبر منكم لحل الموضوع ؟

**الشاهد -** أكبر ....

**الرئيس -** أيوه زى مين ؟

**الشاهد -** مفيش غير الحكومة .

**الرئيس -** ليه لم تلجأوا الى الحكومة ؟

**الشاهد -** ما اتصرفناش هذا التصرف ، وأحب أقول لسيادة

**الرئيس** انها سلسلة اخطاء .

**الرئيس -** زعق شويه ، انت كان صوتك مجلجل فى الاول ؟

لازم تكون راجل شجاع صوتنا فى انتصاراتنا يتساوى مع صوتنا فى انهزامنا .

**الشاهد -** أيوه طبعاً .

**الرئيس -** لازم يكون « موتنا واحد وتكون « اسبور » .

**الشاهد -** سلسلة اخطاء كانت متتابعة .

**الرئيس -** سلسلة اخطاء كانت متتابعة . كيف تقيم من نفسك

او تسمح ان تشترك مع اخرين يقيموا من انفسهم رأساً لجماعة

تدعو لتدعيم اصول الاسلام في نفوس المسلمين، وأنت تعلم أنك  
ماشي في سلسلة اخطاء متتالية ؟

الشاهد - والله ... اسمح لي ... كنا نحاول العلاج ، لأنها  
عبارة عن نفوس وكان الواحد يحاول علاج مايسنطيع ان يعالجه .  
الرئيس - أنت بتقول أنك بتعمل اخطاء في الجماعة متتابعة  
وفي الوقت نفسه تعالجها ازاي ؟

الشاهد - كانت اخطاء مني ومن غيري .

الرئيس - لماذا لم تشاركوا الحكومة كوصية عليكم ؟

الشاهد - أخطأنا لاننا لم نفعل ذلك .

الرئيس - ماذا كانت نتيجة الاخطاء المتتابعة وتأثيرها على  
الشباب البريء اللي غررتم به . شفت انه محتاج الى علاج وانتم  
محتاجين الى علاج ازاي ؟

الشاهد - خطأ كبير .

الرئيس - يعني كان الوضع السليم مادام اني مش راضى عن  
الجهاز السرى اني أحله ، وأروح للحكومة وأقول لها هذه هي  
قائمة الاولاد اللي مش راضيين يسمعوا كلامي ، وهذه قائمة  
بالاسلحة الموجودة في أيديهم وفي المخازن لحد علمي ، واذا كان  
فيه غيرها فأنا ما أعرفش وأقول للحكومة هذا غلط وراثته وأنا  
عايز أصلحه . ده الكلام الصح .

الشاهد — كان يجب ان يكون هذا .

الرئيس — مابالك اذا قد طلب منكم هذا . يبقى ايه ؟

الشاهد — يبقى احنا مخطئين ومقصرين

الرئيس — لا ، انت مخطيء وجانبك الصواب، حل هذه المشكلة في الاول ، معرفتش بتفكيرك ووحى داخلى تروح للحكومة لاستشارتها فيما عمله لحل صحيح ، لماذا لم تستشر الذى هو اكبر منك وهو الحكومة ؟ لادى الحكومة جت لكم وطلبت منكم بعد أن أفهمتكم الموقف على حقيقته والتأثيرات المنعكسة على أفراد هذه الامة فيما بعد اذا ما ظل الحال قائم على هذا وتبلور الموضوع في نقط ثابتة محددة بالضبط ، زى ما القرآن ينص على الصلاة الحكومة ادبت لك النتيجة ، وانت عملت ايه ؟

الشاهد — قيل لى هذا فى شهر اكتوبر الماضى ؟

الرئيس — اكتوبر ايه ؟

الشاهد — اكتوبر سنة ١٩٥٤ .

الرئيس — بس ؟

الشاهد — قيل لى صراحة .

الرئيس — قيل لك صراحة بس ، وهل لم تسمعه من قبل ؟

الشاهد — سمعته .

الرئيس — امتى ؟

**الشاهد —** من سنة سابقة كمان .

**الرئيس —** من أى تاريخ ؟ امتى ؟

**الشاهد —** يمكن من فبراير سنة ١٩٥٣ .

**الرئيس —** من فبراير سنة ١٩٥٣ ؟

**الشاهد —** كان تناول فيه الرئيس . . كنا فى رمضان .

**الرئيس —** كان رمضان فى شهر مايو .

**الشاهد —** فى شهر رمضان يبقى فى مايو .

**الرئيس —** انت مش فاكّر هذه الحادثة اللى قابلك فيها رئيس

الحكومة ، اشمعنى مش متذكر مثل هذه الحوادث القريبة وفاكّر

غزوة أحد أو بدر ؟ عشان الحاجات دى تنفع للضحك على عقول

الناس مش كده ؟

**جهاد . . . سورة آل عمران . . اشحن منشورات . . قول لى**

**ياسيد خميس .**

**الشاهد —** فى شهر رمضان . . . لا . . فى رمضان الرئيس

جمال قال لى أن تشكيلات الجيش وتشكيلات البوليس غير

مرغوب فيها ، وده خاصة بالحديث الذى دار وغيره فى يوم

مقابلتى للرئيس جمال ، قال انا صراحة فى اكتوبر . . فى ١٥ .

اكتوبر انى مش عاوز الجهاز السرى ده يكون له اثر .

**الرئيس —** قال لك ايه ؟

**الشاهد -** قال لى ان الجهاز السرى هو الذى يؤخر الديمقراطية  
او يؤخر الوصول الى ديمقراطية صحيحة تطمئن اليها البلاد  
وأخ من الاخوان قال له ....

**الرئيس -** مين من الاخوان كان موجود ؟

**الشاهد -** عمر النلمسانى واحمد الشريف والخضرى وجودة  
والخضرى قال له سيادتك تعرف ان هذا يأخذ وقت .

**الرئيس -** هل هذه اول مقابلة ؟

**الشاهد -** لا . المقابلة التى قابلته فيها فى رمضان هى التى  
قال لى فيها على تشكيلات الجيش والبوليس .

**الرئيس -** لا . احكى لنا من اول مقابلة .

**الشاهد -** أول مقابلة للرئيس فى رمضان قال لى ....

**الرئيس -** هل كنت لوحده ؟

**الشاهد -** لا كان معايا الاستاذ الباقورى والشيخ سيد سابق  
واذا حببت حد من الثورة أقول ؟

**الرئيس -** هل هذا سر ؟

**الشاهد -** كان موجود السيد الرئيس والسيد أنور السادات  
والصاغ صلاح سالم والصاغ كمال الدين حسين على ما اذكر  
دى أول مقابلة .

**الرئيس -** كان بتاريخ كام ؟

الشاهد — في شهر رمضان .

الرئيس — مفيش مقابلة كانت قبل هذه المقابلة ؟

الشاهد — معايا انا بالذات لا . هذه اول مرة تشرفت فيها

بمقابلة الرئيس .

الرئيس — كانت المقابلة قين ؟

الشاهد — هنا في مبنى مجلس قيادة الثورة .

الرئيس — انت متأكد ؟

الشاهد — ايوه يا افندم .

الرئيس — والا اتقابلتم في بيت منير الدله ؟

الشاهد — ده بعدين .

الرئيس — بتاعة منير الدله بعدين ؟

الشاهد — انا قابلته مرتين .

الرئيس — اول مرة .....

الشاهد — اول مرة في بيته بالدقي أيام حكاية الانجليز .

الرئيس — حكاية الانجليز كانت امتى ؟

الشاهد — في فبراير حاجة زي كده .

الرئيس — يبقى اول اجتماع كان في فبراير .

الشاهد — لم نتكلم فيه في النظام الخاص .

الرئيس — انت اول مرة اتقابلتم .....

الشاهد - كانت في بيت منير الدلة .

الرئيس - كان مين في بيت منير الدلة موجود ؟

الشاهد - الصاغ صلاح سالم والصابغ عبد الحكيم عامر

والصابغ كمال الدين حسين

الرئيس - ومين ؟

الشاهد - والمرشد

الرئيس - قل لي اسماء .

الشاهد - حسن الهضيبي .

الرئيس - المرشد العام دي عندك انت اما عندنا لا .

الشاهد - حسن الهضيبي ومنير الدلة وصلاح أبورقيق وحسن

العشماوي جاء متأخرا .

الرئيس - وبس ؟

الشاهد - ده مدى ذاكرتي - وأنا كنت موجود .

الرئيس - وفريد عبد الخالق مكتش هناك وصلاح شادي

متذكروش ؟

الشاهد - صلاح شادي كان موجود لكن فريد عبد الخالق

ما أذكروش

الرئيس - تم ايه في ذلك الاجتماع بتاع فبراير سنة ١٩٥٣

تم ايه ؟



**الشاهد -** كان الاجتماع خاص بالمقابلة التى تمت بين المرشد وايفانز . والمرشد بلغ هذه المقابلة الى الرئيس جمال والسادة اعضاء مجلس القيادة ، ده كان فى هذا الاجتماع

**الرئيس -** تحلف يمين ثانى فوق الحلفان الى حلفتها ، تحلف بشرفك ان الذى ستذكره فى هذه الخصوصية بتاع هذا الموضوع فى هذا الاجتماع صح احلف بشرفك ؟

**الشاهد -** بشرفى ان الذى ساقوله صح ، وان هذا الاجتماع تم علشان خاطر المرشد يقول ... يبلغ ... والا يقول له الى حصل ....

**الرئيس -** يقول له والا يبلغ جمال عبد الناصر واخوانه باللى حصل ؟

**الشاهد -** يقول له الذى حصل للسيد جمال وكلمه فيها .  
**الرئيس -** هل الموضوع كان فيه نقاش او اجتماع من اجل ان المرشد يبلغ . انا جيت اقابلك وبعدين اتكلم فى موضوع انا افتحه يصح انك تطالبنى او تطلب منى يعنى هل طلب ان تقابلونا هشان تبلغونا الموضوع . هذا الاجتماع كان بناء على طلب من المرشد واخوانه للجماعة بتوع القيادة عشان يبلغوهم حاجة والا كان اجتماع عادى عارض وبعدين اثير فيه بعض الكلام ؟  
من اى جانب كان ؟

الشاهد - والله ، وأنا اجدد قسمي اننى دعيت الى الاجتماع  
فحضرته وبعدين حسن الهضيبي كلم السيد الرئيس جمال في  
الذي حصل بينه وبين ايفانز . وأنا ما أعرفش أقول هل كان  
الهضيبي مطلوب لهذا فقط أو كان حديث عابر . وأنا اتكلمت مع  
الرئيس جمال في هذا .

الرئيس - السيد خميس أحد الاعضاء وأحد اخوان حسن  
الهضيبي .

الشاهد - وأحد أعضاء مكتب الارشاد

الرئيس - يعنى من الاخوان

الشاهد - أبوه .

الرئيس - يعنى الاخوان اللى مش أعضاء في مكتب الارشاد  
مايقوش اخوان ؟

الشاهد - لا يبقوا اخوان .

الرئيس - ومن أعوان حسن الهضيبي وراح معاه في الاجتماع  
وكان من ضمن الذين قابلوا جمال عبد الناصر وعبد الحكيم عامر  
وكمال الدين حسين وصلاح سالم يبقى مستوى خميس ايه في  
الجماعة ؟

خميس مش عارف المقابلة دي تمت ازاي ولا ابتدأت ازاي ولا  
حاجة ، كانت معالمها ملموسة خالص في مخيلته .

**الشاهد -** أنا اقول لسيادة الرئيس انهم قالوا لى السيسى  
الرئيس جمال عبد الناصر جاى عند منير الدله مع رجال الثورة،  
وانت لازم تكون موجود وان ..... .

**الرئيس -** ما سألنش ليه ؟  
**الشاهد -** ما سألنش فيها أبدا ، وحياة المصحف وشرقى  
ماسألت .

**الرئيس -** هل انك ما تسألش ، يبقى صح والا غلط ؟

**الشاهد -** غلط

**الرئيس -** يعنى يا اخوانا يا مواطنين اسمعوا الحكاية ؛ كل  
حاجة غلط فى غلط فى غلط فى غلط أنا غلطان فى ده خطأ فى سلسلة  
اخطاء متتابعة . . ألف مبروك عليكم حكم الإخوان . . . اتفضل  
اذكر ماذا تم فى هذه المقابلة اتكلموا فى ايه بعدما شربوا الشاى  
والقهوة ؟

**الشاهد -** الاستاذ حسن الهضيبى قال للرئيس جمال عبد  
الناصر الذى حصل بينه وبين ايفانز .

**الرئيس -** الذى حصل ايه ؟ الى حصل فى مقابلته ايفانز ده،  
ده تاريخ أحكى . ؟

**الشاهد -** أنا مكنتش مقيد ده .

**الرئيس -** يعنى أنا الى مقيده ، واذا كنت تسمع من كل  
الناس انهم مسمينى « ريكوردر » وأنا لاشيل نوته وكل حاجة

أسجلها في دماغى وان كنت فاكرا أنا بأكتب حاجة فى الورقة دى  
( وأطلع الشاهد على الورقة ) أحب أقول لك ان الورقة دى لسه  
جايه لى دلوقتى من وزارة الزراعة ولو تشوف تاريخها تعرف  
انها جايه دلوقتى. تحب تأخذ خمس دقائق عشان تقيد وتيجى،  
ومع ذلك تحب تستريح شويه وتفكر فى الكلام اللى أنت ناسيه  
وتقيده فى ورقة ؟

**الشاهد —** مفيش مانع .

**الرئيس —** ترفع الجلسة عشر دقائق عشان الشاهد يقيد اللى  
عاوز يقوله .

( رفعت الجلسة حيث كانت الساعة الواحدة بعد الظهر )

( أعيدت الجلسة عند الساعة الواحدة والنصف )

( حضر الشاهد )

**الرئيس —** أعيدت الجلسة ، أيوه يا سيدى عرفت النقط التى  
دار فيها الحديث ؟

**الشاهد —** عرفت النقط أيوه النقط دارت فى ان كان إيفاتز  
قال للهضيبى عن الحياد وموقفنا كمصريين فى الحياد وحول الخبراء  
الفنيين وحول ... وحصل كلام فى الامكانيات والمعاهدة السرية  
**الرئيس —** ايه النقط اللى حصل فيها الكلام فى الامكانيات وفى  
الخبراء و ...

**الشاهد —** والمعاهدة السرية ، ده النقط اللى اتا تذكرتها .

**الرئيس -** وبعدين ؟

**الشاهد -** السيد الرئيس نفسه ...

**الرئيس -** ايه النقط اللى اتكلم فيها ايفانز مع المرشد ، انت قلت اربع نقط فبين لنا الحياد ، وكل واحد يعرف ما هو الحياد فى اللغة العربية انما دخله ايه فى الموضوع نحب نعرف . والخبراء والامكانيات نحب نعرف والمعاهدة السرية ايه نحب نعرف ، ايه دخلهم فى الموضوع نحب نعرف .

**الشاهد -** طيب يا افندم ايفانز لما قابل الاستاذ الهضيبى قال له يعنى احنا موقف مصر ... لا مش كده ... اصلى انا بأروى حديث .

**الرئيس -** افندم ؟

**الشاهد -** الاستاذ حسن الهضيبى قال للرئيس جمال عبد الناصر ... قال له لما ايفانز قابلنى وتكلم معى فى المعاهدة ، وكان فى مدتها فكرة علانية المعاهدة بين مصر والانجليز ، فقال له انا اتكلمت معاه فى بعض الامور وهو كلمنى فيها وهو بيتكلم عن المعاهدة وانا قلت له ان احنا دخلنا ايه فى الحرب ، مالنا ومال الحرب وموقفنا كمصر هو ان تقف على الحياد بين الدول المتصارعة وتعمل كتلة عربية او اسلامية تقف على الحياد . ده حجة الحياد .

**الرئيس -** والحجة الثانية ؟

**الشاهد -** الحجة الثانية . . . ده مش ممكنه ؟ ما أقدرش  
أتكلم فيها فقال له ايفانز لما تقفوا على الحياد ، وافرض انكم  
هوجمت من بلد أخرى ثانية نعمل ايه ؟ فقال له **المرشد نعمل**  
**بينكم وبيننا معاهدة سرية بشأن تبقوا تيجوا في الوقت الذي**  
**نحدده عند الهجوم من الخارج .** والحجة الثالثة الخاصة بالخبراء  
وكانوا اتكلموا عن الخبراء الفنيين وعدم الفنيين في حدود . . .  
أنا سمعت كده ، أما الامكانيات فكان يتكلم فيها السيد وزير  
الارشاد القومى وقال . . . كان بيشرح امكانيات البلد واننا  
مستعدين .

**الرئيس -** اللى قاله وزير الارشاد فاكده بالتفصيل لكن كلام  
المرشد مش فاكده .

**الشاهد -** أنا فاكه كلام وزير الارشاد لانه كان معايا أنا بالذات .  
**الرئيس -** تعرف الحكاية بتاعت الكلب الذى تبول على حائط  
بين بينين أنا

**الشاهد -** أيوه .

**الرئيس -** مرة كلب تبول على حيطه فلما ذهب الى الشيخ  
ليقول له نعمل فيها ايه لانها اتنجست فقال له لازم تهدها وتبنيها  
سبع مرات ، فلما قال له دى الحيطه اللى بينى وبينك فقال له  
الشيخ قليها من الماء يطهرها . فانت كلام المرشد مش متذكر

تفاصيله ، الاخوان جميعا يحبوا يسمعوا لاننا لانعمل في السر .

**الشاهد -** في آخر مقابلة للرئيس قال له . . . وأنا آمنت عليها ونشرتها صحيفة الجمهورية وانا قلت له حصل هذا .

**الرئيس -** قل لنا ايه اللي حصل .

**الشاهد -** هو قالها بكل التفصيلات . قال السيد الوزير للمرشد ان الحياد . يحصل ولا يمكن الحياد في هذا الخضم العالمي ، ومفيش بلد يقدر يقف على الحياد ولا يصح ان تكون هناك معاهدة سرية ، ونحن جميعا مكافحين ومفيش معاهدة سرية ، والخبراء احنا مش قابلين العدد ده ولازم يلبسوا مدنى وينزلوا على امرنا وكلام طويل دار في هذا المعنى .

**الرئيس -** فيه ناس كثير هنا . . . نختار واحد . . السيد احمد الصاوى .

**السيد احمد الصاوى -** أفندم .

**الرئيس -** هل تقبل هذا شرحا للموضوع ؟

**السيد احمد الصاوى محمد -** ده كلام ضعيف وغير معقول

**الرئيس -** نسأل واحد من اللي ما تعرفوش . . . ( ووجه

سيادته الكلام الى أحد الحاضرين ) الاخ اللي ورا . . . أبو

نضارة ، هل تقبل هذا الكلام شرحا للموضوع ؟

**أحد الموجودين -** لا اقبله ولا افهمه .

الرئيس - واحده من السيدات ، هل تقبلى هذا الكلام ؟  
احدى الصحفيات - عمال يلف يلف يلف كده هوه ( وأشارت  
بيدها الى حركة دائرية )

الرئيس - بلاش انتى عشان انتى صحفية ، واحدة ثانية .  
احدى السيدات - هذا كلام عايم .  
الشاهد - أنا أقول لسيادتكم الذى دار ، وان السيد  
الرئيس ...

الرئيس - هل هذه المقابلة تمت بعد امضاء اتفاقية السودان  
أم قبل امضاء اتفاقية السودان ؟  
الشاهد - بعد توقيع اتفاقية السودان يا سيدي الرئيس  
على ما أذكر .

الرئيس - يعنى بعد فبراير سنة ١٩٥٣ ؟  
الشاهد - أيوه ...

الرئيس - هل مقابلة حسن الهضيبي لايفانز كانت قبل  
اتفاقية السودان أو بعد اتفاقية السودان ؟  
الشاهد - تبقى قبل اتفاقية السودان .  
الرئيس - كان يوم ايه ؟

الشاهد - سيادتكم بتجيب على ويتحدد اليوم مع ان أنا  
كنت فى المنصورة وما كنتش لسه بقيت نائب مرشد .. يخيل



الى ان انا باتحمل كل شىء

الرئيس — قابله يوم ٩ فبراير سنة ١٩٥٣ ؟

الشاهد — قلت هذا حصل .

الرئيس — قابله فين ؟

الشاهد — الى اعرفه انا بس انه قابله في بيت الهضبي . . .

اذا كان غير هذا فما اعرفش . . . وشرف سيادة الرئيس ده الى  
انا اعرفه .

الرئيس — انت مالك ومال شرفى .

الشاهد — انا آسف . . . آسف يافندم .

الرئيس — سيب شرفى لتقديرى انا الخاص . . . وشرفك انت

تقدره لنفسك ماتقدروش لنفسك . . . مالناش دعوة . . .

الشاهد — حاضر يافندم . . . الى اعرفه ان المقابلة دى كانت

في بيت المرشد . . .

الرئيس — كان ايام المقابلة الى جه فيها جمال عبد الناصر

وصلاح سالم وكمال حسين وعبد الحكيم عامر . . . جم لمسا

قابلوا حسن الهضبي والبطانة . . . كانت هذه المقابلة كانت

مقابلة تخص وتختص بها جمعية الاخوان المسلمين والا كنت

تعلم بأن اللجنة الى هى مجلس القيادة كانت بتقابل وتعمل

اجتماعات متتالية لجميع الناس الى نعرفهم ونقدر تأخيراتهم . . .

إذا كانوا الساسة القدامى أو النقابات أو الهيئات ؟

الشاهد — كانت بتقابل كل من ترى فيهم المصلحة .. من  
ترى في مقابلتهم مصلحة للبلد يعنى مش خاصة بالاخوان ،  
الرئيس — كان الكلام علشان خاطر ايه ؟  
الشاهد — المعاهدة ...

الرئيس — علشان خاطر تبادل وجهات النظر فى الاسس اللي  
بنتكلم فيها مع الانجليز وانه مايصحش اتنا نتكلم ...  
الشاهد — واحنا ... واحنا متفرقين وبآراء مختلفة ..  
والسيد عبد الحكيم عامر قال اتنا الآن نحس ان الامة كلها امة  
واحدة ..

الرئيس — أيامها ماكانش لواء .. كان الصاغ عبدالحكيم عامر  
الشاهد — أيوه

الرئيس — احنا بنتكلم فى فبراير سنة ١٩٥٣  
الشاهد — أيوه

الرئيس — انت مش حافظ القرآن ؟

الشاهد — مش حافظه كله

الرئيس — حافظ معناه

الشاهد — ياريت

الرئيس — ياريت ؟

**الشاهد -** ياريت يعنى حافض معناه .

**الرئيس -** أيوه يافندم . . . وبعدين لما تبادلوا وجهات النظر . . . ايه كانت وجهة النظر بتاعة الاخوان برئاسة حسن الهضيبي في تحديد الاسس اللى ممكن أن تقبل من البلاد المصرية لحل الازمة والمشكل العضال بتاع الانجليز . . . فيه نقط في هذا الاجتماع تحددت ؟

**الشاهد -** أيوه .

**الرئيس -** وهى ؟

**الشاهد -** . . .

**الرئيس -** علشان خاطر اذكرك . . . ان في هذا الاجتماع لم يذكر حسن الهضيبي أن هو قابل ايفانز لان مقابلة ايفانز كانت مقابلة سرية اللى هى تمت في يوم ٩ فبراير وماكانش عندنا خبر بها وانما بلغ مسامعنا بعض الكلام في أن مقابلة تمت .

**الشاهد -** أيوه .

**الرئيس -** الاجتماعات دى كانت علشان خاطر تبيان وجهات النظر . . . تقدر تقول لى وجهة نظر حسن الهضيبي واخوانه اللى كانوا معاه ايه كأساس يقبل لحل الازمة مع الانجليز ؟ . . . اظن دى مسألة هامة وخاصة بأسس السياسة بتاعة البلد فماتقولشى انك ماتفتكرهاش . . .

**الشاهد -** حصل ان انتهى اللقاء وخرجوا ولم يحددوا شيء

.. قالوا احنا سايبين للقيادة حرية التصرف فى هذا ..

**الرئيس —** انما انتم ايه الاساس اللى قبلتوه على انه يكون حد أدنى للتفاهم مع الانجليز ؟

**الشاهد —** احنا كهيئة شعبية لا نستطيع أن نحدد حد أدنى

**الرئيس —** ماكانش فيه هيئة من الهيئات لها أن تفرض حد أدنى أو حد أعلى انما كل هيئة لما تتكلم معها بتقول الحلا الادنى اللى فى نظرها واللى يصح ان تحل به الاشكال ..

**الشاهد —** رجال الثورة القادة موضع ثقة الامة .. ايه اللى احنا نعمله أو نحدده ..

**الرئيس —** ياسيد يافاضل نحن لا نتكلم عن ثقة أو عدم ثقة .. احنا بنتكلم عن رأى جماعة من الجماعات الكثيرة المختلفة اللى قام بمقابلتها رجال الثورة لتفهم الاسس اللى يقبلوها كناس مواطنين لحل الازمة ما بين مصر وانجلترا .. انتم كهيئة من هذه الهيئات ..

**الشاهد —** أيوه ..

**الرئيس —** ايه الاساس اللى قبلتوه وبينتوه ؟

**الشاهد —** الاساس اللى عندنا وعاشين عليه كأخوان ان المفاوضات كمبدأ ملناش دعوة بها — كهيئة شعبية — وانما احنا مع الحكومة القائمة .. حكومة الثورة اللى هى موضع ثقة الامة وثقتنا ..

**الرئيس —** يعنى يومها لما تكلمتم مع بعض .. الهضيبى وانت ومنير الدله وحسن عسماوى وصالح شادى .. ما قلتوش أسس تقبلوها لحل الازمة مع الانجليز لحل الاشكال مع الانجليز؟  
**الشاهد —** جميل .. اللى اذكره لسيادتك اننا ليس من حقنا ان نذكر أسسا بل نترك للحكومة ذلك . لم نحدد أسس .. حاقول لسيادتك حددنا .. لا .. تركنا رجال الثورة يتصرفوا .. لنا فى ده ايه ؟

**الرئيس —** أمثال الأسس اللى انت قلتها دلوقتى اللى هى بتاعة المعاهدة السرية والفنيين ..

**الشاهد —** أيوه

**الرئيس —** والحياد والامكانيات .. دى تطلع ايه ؟

**الشاهد —** حاقول لسيادتك .. ده النقاش الذى دار بين الهضيبى وبين ايفانز وبيقوله للسادة قادة الثورة .

**الرئيس —** يعنى كان عندك علم بمقابلة الهضيبى وايفانز ؟

**الشاهد —** لم أعلم بها الا فى الجلسة .. انا دعيت للاجتماع ..

**الرئيس —** اذكرك ؟

**الشاهد —** اتفضل

**الرئيس —** انت مش عاوز تتكلم .. وبتجرى وبتهرب وبتلف وقدور وبتطرد عنك كل مسئولية وانت نائب المرشد ؟

**الشاهد — لا .. لا ..** نائب مرشد لا يعمل الا في غيبة المرشد .

**الرئيس —** باترينة من البترينات على رأى هنداوى .. يعنى كنت باترينة ؟

**الشاهد —** والله يمكن ..

**الرئيس —** تعرض من وراها المعروضات .

**الشاهد —** حاقول لسيادتك .. دى كانت بتعرض من ورايا حاجات كتير

**الرئيس —** يعنى ماكنتش باترينة بل أكثر من باترينة .. ( ضحك ) ..

**الشاهد —** أيوه ...

**الرئيس —** باغنا ان الهضيبى اتصل بالانجليز وهو كان من ضمن الهيئات ومن ضمن الناس اللى كنا بنقابلهم ونشرح لهم وجهة نظرنا وهم يشرحوا لنا وجهة نظرهم .. قابلنا الساسة القدامى وبعض رجال الأحزاب القديمة ورجال الأعمال والنقابات وغير النقابات اللى نعرفهم واللى مانعرفهمش ومدرسين وأساتذة وصحفيين وكل هيئات البلد .. كلام حسن الهضيبى والجماعة اللى كانوا معاه كان الآتى بعد : انهم مستعدين يقبلوا أى شرط في نظير الجلاء فأى عدد من الفنيين لاسين عسكريين زى بعضه دى

ثمرة واحد .. ثمرة اثنين .. فى حالة خطر الحرب — واللى  
يقرر خطر الحرب الامم المتحدة . حالة خطر الحرب يسمح  
للجنود البريطانيين ان يحتلوا القطر المصرى .. اى حاجة احسن  
من كده طبيعى هم ما عندهم مش مانع .. ده « البيس » ..  
ده البلاطه .. اذن الانجليز وافقوا على كده فهم موافقون ..  
يومها قام اخواننا بتوع مجلس القيسادة وفهموهم وقالوا لهم  
يا جماعة بلاش الحديث فى خطر الحرب لان دى مسألة مفتوحة  
.. خطر الحرب ده اوعوا تتكلموا فيه أبدا لاتنا لا نقبل عدد  
من الفنيين عساكر .. ده لا نقبله أبدا .. وخرجنا من هذا  
الاجتماع .. حصل هذا الكلام ام لم يحصل ؟

**الشاهد —** ايوه يافندم .. حصل كلام فى الخبراء .

**الرئيس —** الكلام اللى باتكلمه .. حصل او لم يحصل ؟

**الشاهد —** فى الاجتماع حصل ..

**الرئيس —** حصل كمان فى الاجتماع الآتى .. حصل الآتى

بعد .. أشار جمال عبد الناصر بإشارة الى ما سمعناه عن مقابلة

المرشد بالانجليز واتصاله بهم قال لهم اسمعوا .. أنا سمعت

انكم قابلتم الانجليز قالوا لا .. قال لهم على العموم لا .. آه ..

أحب أنبهكم لخطورة اتصال أى فرد أو هيئة فى هذه الامة

بالانجليز . لان الانجليز سيحاولون أن يتصلوا بالناس علشان

ياخذوا منكم موافقات وياخذوا من التانى موافقات ويبجوا لى  
— أنا يا مفاوض — ويجابهنى بهذه الموافقات ويخرجونى •  
فما أقدرش آخذ (( البيسى )) • • البلاطة • • يبقى كاتى بهذه  
الطريقة أدى للانجليز باب وأديله شيك على بياض علشان يطالبنى  
بمطالب وأنا قاعد أدامه مفوض عن هذه الامة • دى الطريقة اللى  
كانوا بيعملوها زمان مع الوفدين وغيرهم من الاحزاب وتفضل  
المفاوضات تكرر وتكرر • • تكرر وتكرر • • وتلف  
العجلة • • حكومة تيجى ورا حكومة • • والمفاوضات بقى لها  
٧٢ سنة • • وبعدين المرشد قال له مش ممكن نعمل حاجة زى  
كده • • حصل أم لا ؟

الشاهد — حصل

الرئيس — كان فيه نقطة ثالثة فى الاجتماع • • تذكر النقطة  
الثالثة ؟

الشاهد — قولها سيادتك •

الرئيس — ليه مش فاكرها ؟

الشاهد — بتاعة الامكانيات • •

الرئيس — بتاعة الامكانيات • • برافو عليك • • ( ضحك ) • •

حصل كلام زى ما كان بيحصل فى كل اجتماع من الاجتماعات  
الثانية تكلمنا عن قدرة البلاد ضد القوات المحتلة فى القنال • •  
وقال لهم احب اقول لسكم ان عندنا خطة كاملة ينشتغل على



أساسها علشان نكمل النقص اللى فى هذه البلاد علشان خاطر  
حالة كفاح مسلح اذا ما دعانا الامر للدخول فى كفاح مسلح ..  
قالوا نخش فى كفاح مسلح .. قلنا لهم طيب بأى امكانيات ..  
استعرضوا الامكانيات وقالوا آه .. موافقين معاكم ... قلت  
لهم وفى خلال الوقت والمدة اللى احنا بنستعد فيها علشان نوصل  
امكانياتنا لدرجة اننا نكون قادرين نخش فى كفاح مسلح مش  
فوضى فلابد اننا نستكمل بقية النقص اللى موجود فى البلد ..  
ابسط مافبها التموينات ... مانجوعشى الناس .. الناس  
ماتموتشى من الجوع ... تانى حاجة تموين القوات اللى حاتروح  
علشان خاطر تحارب .. وبذلك ابتدينا نعمل مصانع للذخيرة  
ومصانع للاسلحة الصغيرة ، دى كانت الخطه وماكنتشى خطبة  
عرش ابدا ... حصل هذا الكلام ؟

**الشاهد - حصل .**

**الرئيس -** ازاي وانت نائب المرشد ووكيل جماعة الاخوان  
ماتعرفشى السياسة العليا بتاعة الاخوان .. تقدر تقول لى ؟  
**الشاهد - ...**

**الرئيس -** منتظرين منك رد ..

**الشاهد -** الكلام بتاع الامكانيات الكلام ده حصل بالنص ..

**الرئيس -** طيب ازاي ما انتش فاكّر هذا الكلام .. على  
الشعب اللى بيسمعك ليه ما انتش عاوز تتكلم ؟

الشاهد — هذا الكلام الذى سيادتك قلته حصل فعلا فى الاجتماع .

الرئيس — ليه ما قلتوش ؟

الشاهد — دلوقتى يعنى ؟ أنا قلت لسيادتك .

الرئيس — لا امبارح ... ( ضحك ) ...

الشاهد — أنا قلت لسيادتك ..

الرئيس — ليه ما قلتوش ؟

الشاهد — كان يجب أقوله ..

الرئيس — يجب تقوله ؟

الشاهد — أيوه ...

الرئيس — هل تعرفه ؟

الشاهد — أعرفه ؟

الرئيس — يجب تقوله .. وما قلتوش ليه ؟

الشاهد — قلت لسيادتك ان الناكرة ضعيفة ولكن لما سيادة

الرئيس قاله تذكرته وقلت ان هذا حصل فعلا ...

الرئيس — طيب ... ده الاساس الذى انتم قبلتوه .. وده

الاساس الذى انتم قابليته .. حالة خطر الحرب وتيجى الانجليز

تحتل البلد .. فى حالة خطر الحرب .. حالة خطر الحرب دى

.. يحددها مين ؟ .. هناك فى « ليك سكسس » والا مش

عارف فين .. تعرف محلها .. مجلس الامن .. ليك سكسس

الشاهد — أيوه ..

الرئيس — مخاطباً الاسناد أحمد الصاوى محمد رئيس تحرير  
الاهرام — والا مش صح يا سيد صاوى .. اصل أنا ضعيف فى  
الجغرافيا شوية .. ( ضحك )

الاستاذ أحمد الصاوى محمد — صح يافندم ..

الرئيس — موجهها كلامه للشاهد — وقبلتم اى عدد من الفنين  
لابسين عسكريين وقبلتم انكم تعملوا معاهدة سرية لا يطلع عليها  
الشعب .. طبعا خايفين لا الشعب ما يوافقشى .. ليه اندرتم  
للشعب بوجه آخر بعد امضاء الاسس الاولى للاتفاقية بالاحرف  
الاولى واصدرتم بيان للشعب معارضين فيه الاسس الى  
امضيت بالحروف الاولى وقتلتم ان احنا لا نقبل هذا ولا نريد  
بالجهاد بديلا .. ؟ ليه ؟

الشاهد — اقول لسيادتك ؟

الرئيس — أيوه ... اسمعوا يا حضرات ... ( ضحك )

الشاهد — أنا فى الحقة دى معارض .. لما المعاهدة امضيت  
بالحروف الاولى قلنا كهيئة شعبية اتنا نضع تحت تصرف رجال  
القيادة وجهة نظرنا فى المعاهدة .. واقسم لك بشرفى اتنا كنا  
نبغى بها تقوية ظهر المفاوض المصرى ولذلك بسرعة بادرت  
بقارسلت للرئيس نسخة كما ارسلت نسخة الى اعضاء الجمعية  
التأسيسية فى الاقاليم والى اعضاء مكتب الارشاد .. اما ان

تتطور الامور بعد ذلك فهذا ما لا اوافق عليه ..

الرئيس - مخاطبا أحد الحاضرين - الكلام ده ياسسيديتا

الفاضل .. انت راضى عن الكلام اللى قاله .. ؟

المواطن - يظهر انه مضطرب ومتأرجح

الرئيس - اسم سيادتك ايه ؟

المواطن - مصطفى الوزان .

الرئيس - احنا جايين نعمل مراجيح هنا ؟

الشاهد - هو اللى بيقول مش أنا .. ( ضحك )

الرئيس - أنا عاوز اجابة على السؤال اللى باسألها لك ..

الشاهد - ...

الرئيس - الأسس اللى انتم وافقتم عليها اللى هى معاهدة

سرية واحتلال البلاد فى حالة خطر الحرب ودى تحددها مش

مصر بل الأمم المتحدة .. وعدد مفتوح من الفنيين لابسين

عسكريين ده الاساس بتاعكم . ؟

الشاهد - أيوه

الرئيس - هل هذا الأساس احسن والا الأساس بتاع

الاتفاقية فى النقط الأساسية التى أمضت بالأحرف الأولى

أحسن ؟

الشاهد - لا النقط الأساسية أحسن .

الرئيس - اذن تكونوا مبسوطين والا زعلانين ؟

**الشاهد — كنا مبسوطين •**

**الرئيس —** طيب ليه أنذرتم الشعب وقتوله احنا ما بنرضاش  
عن أى حاجة انفقت عليها النورة وان احنا لا نبغى أى شىء اطلاقاً  
ولا نرضى إلا الجهاد .. كان ايه مأربكم ؟  
**الشاهد —** أقول لسيادتك الحنة دى ..

**الرئيس —** أيوه قول لى الحنة دى ( ضحك ) ..  
**الشاهد —** كنا نبغى تقوية المفارضى المعرى لعله ياخذ أكثر لانه  
كان لسه ما مضاش الانفاقية النهائية •

**الرئيس —** انا مش حاطول معاك أكثر من كده لانه اتضح من  
كلام الشاهد أن رؤساء جماعة الاخوان المسلمين القائمة بتشديد  
أسس ودعامة الاسلام وبان هنا امام المحكمة انهم مايعرفوش حاجة  
اسمها منطق أو حاجة اسمها أساس أو تحديد انا مش حاطول  
معاك وانما حاقول الآتى بعد ..

**الشاهد —** انفضل يافندم ..

**الرئيس —** مخاطباً أحد الحاضرين — والله الأستاذ اللى فى  
الصف الثالث اللى قاعد جنب حضرة الصول

**أحد الحاضرين —** أيوه يافندم ( وهم أن يترك مكانه ليقترّب  
من المنصة ) ...

**الرئيس —** لا .. خليك مطرحك .. هل الالتفات الى الشعب

ومعارضة الاتفاقية واسس الاتفاقية اللى هى احسن من الطلبات  
اللى كانوا راضيين عنها يعتبر تقوية لظهر المفاوض المصرى ؟  
**المواطن -** يعتبر خيانة ...

**الرئيس -** الأستاذ اللى بعد منه .. رأيه ايه ؟

**المواطن -** أى معارضة لآى خطوة يتخذها انسان قطعاً تبقى  
ضد الخطوة اللى بيتخذها ..

**الرئيس -** مخاطباً شخصاً ثالثاً - وسيادتك - رأيك ايه ؟

**المواطن -** نفاق .

**الرئيس -** مخاطباً شخصاً رابعاً - وسيادتك .. رأيك ايه ؟

**المواطن -** أى حاجة تتعمل ضد رجال الثورة عن شىء قاموا  
به لمصلحة البلد وهم يشكروا عليه جداً جداً يعتبر العمل ده ان  
فيه اساءة للبلد ...

**الرئيس -** مخاطباً شخصاً خامساً - وسيادتك ؟

**المواطن -** هذه تعتبر جريمة فى حق البلاد ...

**الرئيس -** مخاطباً احدى السيدات - والست اللى ورا

الاستاذ . اللى لابس نضارة سودة رأيها ايه ؟

**المواطنة -** خداع .

**الرئيس -** والله انا ما أعرفش ولا واحد فيهم من اللى قاعدين

دول ولا هم قرايبي ولكن يمكن يكونوا احسن من اخوانى ..

مفیش واحد من دول قال لك ان ده يقوى ظهر المفاوض المصرى .

**الشاهد -** احنا كان عندنا حسن نية . . اذا كنا اخطانا . .

**الرئيس -** هل هناك حد للخيار وحد للى يقبل فيه الخطأ . .

يعنى فيه حد يقول فيه الخطأ المحتمل ومستوى لا يقبل فيه الخطأ ؟

**الشاهد -** فيسه . .

**الرئيس -** وهل انتم تجاوزتم الحد بتاع الخطأ المحتمل ام لم

تتجاوزوه ؟

**الشاهد -** أيوه . . تجاوزنا حد الخطأ المحتمل . .

**الرئيس -** يعنى دخلتم فى درجة الخطأ البين ؟

**الشاهد -** أيوه . .

**الرئيس -** كيف تسمحوا لانفسكم وانتم رياسة دعوة

الاسلام انكم ترتكبوا خطأ . . هذا الخطأ داخل فى المستوى الذى

لا يحتمل الشك فى تبيانه انه خطأ ؟

**الشاهد -** . . . . .

**الرئيس -** ازاي تعلموا الناس رسالة الاسلام بهذا التفسير

وهذا المنطق وهذا الافق وهذه البصيرة ؟

**الشاهد -** . . . . .

**الرئيس -** تبقوا انتم ناس مؤمنين على الدعوة للاسلام ؟

الشاهد — ..... .

الرئيس — رد على

الشاهد — مخطئين ... .

الرئيس — هل أنتم ناس صالحين للقيام بالدعوة للإسلام ؟

الشاهد — محاولين .. .

الرئيس — مخاطباً جمهور الحاضرين — سمعتم يا اخواني

يامسلمين .. . يا شعب يامصريين .. . سمعتم يامواطنين .. .

( أصوات استنكار من الحاضرين )

الرئيس — وبعد الاجتماع ده حصل ايه ؟

الشاهد — اجتماع ايه ؟

الرئيس — ثانى اجتماع .. . نخش فى ثانى اجتماع ... . كان

امتى ؟

الشاهد — مع الرئيس جمال ... .

الرئيس — لا .. . مع خياله ... . ( ضحك ) .. .

الشاهد — قابلته هنا فى مجلس قيادة الثورة ... .

الرئيس — زعق من فضلك .. . قول ثانى ... .

الشاهد — قابلت سيادة الرئيس فى مجلس قيادة الثورة .. .

الرئيس — بناء على طلبك والا هو اللى استدعاك ؟

الشاهد — هو استدعانى .. .



الرئيس - له . . كان امتى ؟

الشاهد - فى شهر رمضان .

الرئيس - يعنى فى مايو سنة ١٩٥٣

الشاهد - ايوه . . وقال لى . . يا فلان . . فيه تشكيلات

الجيش وتشكيلات فى البوليس وهذا الامر لا يصح ان يكون . .

الرئيس - زعق من فضلك . .

الشاهد - وهذا الامر لا يصح ان يكون لافى الجيش ولا فى

البوليس وانا باقول انه ليس من المصلحة ان يكون هذا . .

الرئيس - له مش من المصلحة ان يكون هذا ؟

الشاهد - لان وجود اخوان فى الجيش قد يدعو الى وجود

تفرقة فى حين ان الجيش يجب ان يظل وحدة واحدة مالوش اى

تدخل فى متل هذه الامور العامة . . والبوليس كذلك . .

الرئيس - ماهى الخطورة التى تنشأ من وجود مثل هذه

التشكيلات فى قوات مسلحة نظامية . . ؟

الشاهد - خطورة ضخمة . .

الرئيس - العمل فى الخفاء . .

الشاهد - . . . . .

الرئيس - ايه الخطورة دى . . نحب نسمعها منك . .

الشاهد - يقتتلوا مع بعض بالاسلحة . .

الرئيس - دى تسميها حالة ايه ؟

الشاهد - حالة فوزى ..

الرئيس - حالة فوزى أو ...

الشاهد - أو فتنة .

الرئيس - أو

الشاهد - أو حرب أهلية .

الرئيس - كويس ... وبعدين ...

الشاهد - و ....

الرئيس - وطلب منك ايه ؟

الشاهد - طلب منى انى أبلغ هذا للمرشد باعتبارى نائب

المرشد .

الرئيس - باعتبارك ايه ؟

الشاهد - باعتبارى نائب المرشد .. وأقول له ان هذا لايجب

أن يكون فى أى صورة من الصور ...

الرئيس - وايه اللى يجب ؟

الشاهد - يجب ألا يكون للاخوان أى تشكيلات فى الجيش

أو فى البوليس

الرئيس - أيوه ...

الشاهد - وده اللى يجب ان يكون .. وأنا سبق أن قلت هذا

لعشماوى وصلاح شادى .

**الشاهد -** أنا سبق قلت لحسن العشماوى وقلت له فهم  
الاخوان ان ميكنش فيه تشكلات موجودة فى الجيش فقال لى  
طيب يا افندم وبلغت طبعاً المرشد فى هذا الوقت وقلت له على  
الحديث الذى دار بينى وبين سيادة الرئيس فقال احنا معندناش  
فى الجيش اى تشكلات خاصة الا اننا بندى فكرة اسلامية  
للجنود فقلت له طيب دى مش محتاجة لتشكلات اننا بخصوص  
التشكلات الموجودة فى البوليس فكنا نعرف ان سلاح شادى  
يقوم بها وسلاح تعهد بمنعها وان يحاول بان ماسقاش فيه اى  
تشكلات فى اى ناحية من النواحي ... ده الحديث الذى دار  
وبلغته للاخوان فى ذاك الوقت .

**الرئيس -** ونسحة السليغ كانت ايه ؟

**الشاهد -** بلغته ولكن ظلت برضه التشكلات يعنى بعد مدة  
ظهر ان فيه تشكلات فى الجيش وتشكلات فى البوليس .  
**الرئيس -** وبعدين ؟

**الشاهد -** وبعدين طبعاً لما جه قدم ضباط الجيش للمحاكمة  
وطلع الاربع او خمس ضباط الى مفروض انهم بتوع الاخوان  
وبتوع البوليس طلّعوا لكن يعنى مشده الحل الى يرضى الانسان  
**الرئيس -** يعنى رئيس الحكومة او جمال عبد الناصر لانه  
كان لسه مش رئيس حكومة فى ابريل سنة ٥٣هـ وانما كان فى  
مجلس قيادة الثورة هنا حسب ما قررت فى اول كلامك انكم

جانبكم الصواب في مسألة التشكيل السرى ومشفتوش الخط  
الصحيح الى يجب أن تتبعوه وهو أن تلجأوا لواحد أكبر منكم  
ليحل لكم المشكل ربنا هادكم وجاب لكم نعمة من عنده واحد  
ناصح أمين لفت نظركم الى ضرورة انهاء التشكيلات السرية في  
القوات المسلحة وقوات البوليس وفي الجهاز المدنى وانتم قلتم  
طيب وبعدين مقدرتوش وقلتم اننا شفنا انه خطر ومقتنعين  
بذلك لما مقدرتوش تعملوا حاجة ليه مرجعتوش له .

**الشاهد - أنا قلت لسيادتكم أننا أخطأنا في هذا الموضوع**

**الرئيس - المرة الاولى كان الخطأ كان بحسن نية والثانية بعمد**

**الشاهد - حسن النية قائم وده خطأ مش عمد**

**الرئيس - مش بيقال لا يلدغ المؤمن من جحر مرتين**

**الشاهد - لا مش بعمد**

**الرئيس - أمال يكون ايه ؟**

**الشاهد - يكون أى شىء الا عن عمد لان حسن النية قائم**

**الرئيس - كيف يكون حسن النية قائم وانت تعلم ان هذا**

**الوضع يؤدى الى الفتنة والى الحرب الاهلية**

**الشاهد - الواقع اننا كل ما نسأل الاخوان القائمين بالامر**

**يقولوا مفيش وسيادتكم تعلم أنها كانت سرية وأنا معرفش**

**وموقفنا واضح واحنا مخطئين فعلا في هذا وان يجب أن نرجع**

**لرئيس جمال .**

وكيل النائب العام - طلب الرئيس جمال عبد الناصر في مايو سنة ٥٣ حل هذه المشكلات وانت باعترافك اليوم مع المرشد عهدتم الى يوسف طلعت بالاشراف على الجهاز السرى وتدريبه في نوفمبر سنة ٥٣ يعنى بعد الطلب في مايو بحل الجهاز أعيد النظام وعهد ليوسف طالع برأسته تفسر دى ازاي

الشاهد - انا ادريح ان فيه جهاز سرى قائم

وكيل النائب العام - مين على رأسه ؟

الشاهد - يوسف طلعت

وكيل النائب العام - وعلى رأسه

الشاهد - المرشد

وكيل النائب العام - هل يوسف طلعت يقدر يتصرف من غير

موافقة المرشد ؟

الشاهد - لا

الرئيس - يعنى لا بد ان المرشد يوافق علشان يعطى الامر وينفذ .

الشاهد - ايوه .

الرئيس - عيد الكلام ده من فضلك

الشاهد - رئيس الجهاز السرى هو يوسف طلعت ولا يمكن

لرئيس الجهاز السرى ان يتصرف الا اذا اخذ امر من المرشد

الرئيس - هل في الاوامر التى يصدرها حسن الهضيبى

يستشير فيها مكتب الارشاد ؟

الشاهد — طبعاً لا حيتشار في ايه

الرئيس — وهل تستشار الهيئة التأسيسية ؟

الشاهد — ولا تستشار فيها الهيئة التأسيسية كذلك

الرئيس — هل عرض البيان الذى صدر منكم بالاعراض على  
اسس الاتفاقية على الجمعية التأسيسية ؟

الشاهد — لا لم يعرض عليها

الرئيس — آمال صدر باسم مين ؟

الشاهد — باسم مكتب الارشاد

الرئيس — يعنى مأخذتوش فيه رأى الجمعية التأسيسية

الى هيه برلمان الاخوان

الشاهد — لا

الرئيس — شفتم الديموقراطية بتاعة الحكم البرلمانى شفتم

بياخذوا الرأى ازاى بيقلوا الرأى شورى ولكن هل هى فعلا

شورى وهل هى شورى ملزمة لما نسالهم يقولك اذا عزمتم

فتوكل على الله يعنى انا باستشيرك وعزمت على حاجة ثانية

فأتوكل على الله ورأيك مش مهم .. يبقى اسمه ايه فى حدود

الكلمة الى تعرفها فى اللغة العربية الواردة فى المصباح المنير

ومختار الصحاح ؟

الشاهد — اسمها ديكاتورية واستبداد

الرئيس — وبالنسبة للناس اللى بتوردهم صورة وانتم فى  
صورة ثانية

الشاهد — يبقى جهل

الرئيس — جهل ؟ ... القائمين على نشر دعوة الاسلام فى  
جماعة الاخوان باعتراف نائب المرشد ووكيل جماعة الاخوان  
جهله .. جهله بساط والا جهله مركبين على رأى توفيق الحكيم  
المدعى — الشاهد ذكر انه كان فى الجيش تشكيلات للنظام  
السرى وانه كان اخذ امر واخطأ فى تنفيذه .. تعرف عبيد  
المنعم الرعوف ؟

الشاهد — أيوه

المدعى — هل قدم للمحاكمة العسكرية ؟

الشاهد — أيوه

المدعى — وهل هرب ؟

الشاهد — أيوه

المدعى — مين اللى اخفاه ؟

الشاهد — الاخوان

المدعى — هل تعتقد ان فيه حسن نية فى تنفيذ الامر ؟

الشاهد — لا غلط

الرئيس — طيب قول لنا الاجتماع الثانى كان امتى ؟

الشاهد - عقب سفر الاستاذ الهضبي الى البلاد العربية  
الرئيس - تفتكر دى تعتبر حاجة أساسية فى التاريخ لازم  
يعرفها كل مسلم سفر الهضبي الى البلاد العربية زى هجرة  
النبي ؟

الشاهد - لا أنا باسرد التاريخ  
الرئيس - ولا زى الاسراء والمعراج ؟  
الشاهد - لا استغفر الله ... هو على العموم سافر يوم  
العيد .

الرئيس - كان موافق ايه ؟  
الشاهد - هو العيد الصغير كان امتى  
الرئيس - السنة دى ؟  
الشاهد - أيوه

أحد النظارة - يوافق يونية سنة ١٩٥٤  
الرئيس - حصل ايه ؟  
الشاهد - قابلت سيادة الرئيس مع الاستاذ عبد الرحمن البنا  
الرئيس - بمناسبة ايه ؟

الشاهد - أيوه .... كان فيه بعض أمور معلقة  
الرئيس - ما هى هذه الامور المعلقة ؟ ... المعلقات  
السبع ... ؟



**الشاهد -** التعبير هو اللى بيحكم . . . وأنا حريص على اللفظ  
اللى يؤدى معناه

**الرئيس -** وهو بيان لى مايعبرش وانت راجل تقوم بدعوة  
اسلامية لماذا لم تطلب وضع اخ لك معك ليساعدك فى بيانك ؟  
**الشاهد -** المكتب معاى وزى الاخوات .

**الرئيس -** المكتب وعرفنا ان الماسورة مفتوحة من عند الجيران  
والراى شورى ويتضح انه اذا عزمت فتوكل **يعنى راى المرشد**  
**دكتاتورى**

**الشاهد -** احنا كنا بنتكلم فى قرار الحل ومشكلة ضبط  
الجيش والافراج عنهم وضباط البوليس عودتهم الى الخدمة .  
**الرئيس -** فيه ضباط بوليس اترفدوا وفيه ضباط جيش  
فصلوا وجماعة الاخوان المسلمين انحلت ما هى الاسباب التى  
دعت الى هذا . ؟

دعت الى هذا ان التشكيلات فى الجيش كانت قائمة . .  
فاستدعاك جمال عبد الناصر فى مكتبه وقال لك بلغ المرشد  
ان التشكيلات السرية بتاع القوات المسلحة والبوليس والتشكيلات  
بين الاهالى والمواطنين تؤدى بالبلاد الى خطر كبير ورحت بلغته  
وبعدين ، ماعملتوش حاجة بل بالعكس عينتوا رئاسة جديدة  
واعددتم الجهاز السرى انت قلت ان ده بحسن نية . . أعرف

حسن نيتك منين . . ايه الدلائل ؟ مش ده سبب حل الجماعة في يناير ١٩٥٤ ومش ده السبب في فصل الضباط اللي قدرتم تأثروا على ادمغتهم فصلناهم لاننا مش مكتب ارشاد تقدر تؤثر فيهم وفصلنا ضباط البوليس الموجودين في الجهاز لان حالة الامن في البلاد ما تحتملش انهم يخشوا في بعض . . جيتم في هذا الاجتماع وطلبتم ايه . . علشان الجمهور يكون في الصورة ؟  
**الشاهد -** حل الامور المعلقة . . .

**الرئيس -** انا عايزك تقول لي ايه اللي تم في مقابلة يونيو . . .  
بصفة عامة ايه اللي حصل ؟

**الشاهد -** طلبنا الغاء قرار الحل ومسألة ضباط الجيش كان مقبوض عليهم يفرج عنهم ثم ضباط البوليس يعادوا  
**الرئيس -** يعني غرضكم اعادة الجماعة . ؟  
**الشاهد -** أيوه

**الرئيس -** واعادة الضباط المفصولين من قوات الامن لانهم في النظام السري والضباط المعتقلين في الجيش على ذمة التحقيق لانهم اخوان يفرج عنهم وينسابوا في قلب الوحدات ما هو المارب من هذا ؟

**الشاهد -** المارب ايجاد جو من الثقة بيثنا وبين الحكومة .  
**الرئيس -** جو الثقة يعني ايه . . . يعني ترجع ريمة لعادتها القديمة ؟

الشاهد - يبعدوا عن الاخوان

الرئيس - انتم عرفتم تقنعوا الجماعة اللى كانوا مع عبد  
الرحمن السندى ؟  
الشاهد - لا .

الرئيس - ازاي تطلبوا مننا واحنا مش مكتب ارشاد اننا  
تقنعهم اذا كنتم انتم ماعرفتوش نبقى احنا يا ضبط ياغلاية  
يا عساكر ياللى ما نعرفش فى الدين ... ياللى مش مسلمين .  
الشاهد - ازاي الكلام ده .

الرئيس - ياللى امير المؤمنين بتاعكم اهدر دمنا ... تقدر  
نعمل ايه .

الشاهد - ازاي الكلام ده ... اهدار دم ايه ؟

الرئيس - احكى ... احكى لنا شوية من فضلك .. قول  
لنا طلباتكم دى هدفها ايه ؟

الشاهد - فى ظنى الشخصى انها لحسن الثقة .

الرئيس - جمال عبد الناصر قال لكم ايه ؟

الشاهد - فيه مقابلة ثانية اتممها .

الرئيس - لما نخلص من دى الاول .

الشاهد - اصل احنا فى يوم الاحد ماكناش عارفين حنتقابل  
ونتفق على ايه يوم الخميس فى المقابلة الاولى الرئيس جمال

شرح لنا موقف الحكومة من الاخوان وان الحكومة ماكانت لتتجنى عليهم وان موقفها ماكان الا موقف الاب الحانى على الجماعة وخرجنا فى وقت متأخر من الليل وتنساول كل المواضيع وبين ما عملته الحكومة وقل ماترك أمرا الا وفسره ووضحه بما يؤكد حسن النية وموقف الثورة الطيب من الجماعة واديرت هذه المعانى فى هذه الجلسة وخرجنا وفى الاسبوع اللى بعده .

الرئيس - طيب أفكرك .

الشاهد - اتفضل .. قد يشد منى حاجة ولكن لابد ان اقولها .

الرئيس - قد تشد ؟

الشاهد - قد تبعد عنى ...

الرئيس - تبعد عنك ... انت بعد عنك كل الشر كل الكلام كل الحوادث تتناساها ولا تذكرها ذاكرتك ضعيفة وليست لديك معلومات واقريت بأنكم جهلة .

الشاهد - حصل .

الرئيس - يعنى دى نتائج يطلع بها كل الناس ... مش حصل ان الرئيس جمال عبد الناصر قال لكم انه لايمكن اقامة حكومة ديمقراطية مع وجود أجهزةسرية ترهب المواطنين وترهب الحكومة وترهب الرياسات القائمة عليها .... لذلك اذا كنتم

عايزين تثبتوا حسن نيتكم . . . اثبات حسن النية ييجى على ٣ خطوات مش خطوة واحدة الخطوة الاولى . . .

**الشاهد -** تهادن وتفاهم وتعاون

**الرئيس -** ايوه . . . انت ذاكرتك بقت حديد . . .

اذكرها بقى مع التفسيرات .

**الشاهد -** ده فى المقابلة الثالثة .

**الرئيس -** لا . . . . . احكى اللى حصل فى المقابلة الثالثة .

**الشاهد -** المقابلة الثانية خرجنا منها بعد شرح الموضوع والمقابلة الثالثة قال حابعت جواب الغاء الحل والضباط حنتصرف فيهم وخرجنا مرتاحين من المقابلة الثانية ولكن المقابلة التى يقول عنها سيادة الرئيس هى التى ذهبت فيها انا والتلمسانى والخضرى ودى كانت فى اكتوبر

**الرئيس -** فى اكتوبر اعاد الكلام اللى قاله لك فى يونيو .

**الشاهد -** سيادتك اصدق .

**الرئيس -** اجيب لك الرئيس جمال عبد الناصر

**الرئيس -** يبقى قطعاً صح .

**الرئيس -** واجيب لك عيسد الحكيم عامر اللى حضر المقابلة . . . مش قال لسكم فى اكتوبر احنا قضينا على الاجهزة السرية اللى فى الجيش والبوليس ولم يبق الا الاجهزة السرية

**الوجود في وسط المواطنين ودي احنا ما نعرفهاش . الشعب**  
**والفصائل والمجموعات ومخازن الاسلحة . ومنطقة القاهرة**  
**والاقاليم والمكتب الاعلى . . . اللجنة العليا وفوق كل دول**  
**الكريم شانتية . . . حسن الهضيبي . . والاحرام نقول كريم**  
**شانتية يمكن تحكموا علينا بأننا مش مؤمنين وتهدروا دمنا .**

**الشاهد - ليه بقى !**

**الرئيس - احكى لنا . . . حصل الكلام ده . . . التهادن**  
**فالتفاهم فالتعاون . . . وما هو تفصيلاته .**

**الشاهد - فعلا خرجنا من عند الرئيس باستعداد كامل بأن**  
**نسير بهذا الوضع تهادن وتفاهم ثم تعاون ان شاء الله والواقع**  
**انه أبدى استعدادا بما لم يترك لانسبان حاجة يتكلم فيها**  
**وبدأنا نخطو خطوات في هذا السبيل وكانت فرصة أن المرشد**  
**في سوريا وغائب وبدأت الجماعة تستبشر وتحس بتجاوب كبير**  
**بين الاخوان والحركة وان مفيش حاجة يشكى منها أبدا**

**الرئيس - نحب أنك تفسر لنا التهادن فالتفاهم والتعاون**  
**والكلام اللى يجى تحتها لان كل كلمة من دول عنقود عنب به**  
**حبات كثيرة تتبلور الى كلام كثير فيطلع التهادن ويطلع التفاهم**  
**ويطلع التعاون . . فاشرح لنا ايه اللى عملتوه .**

**الشاهد - بدأنا بأن كل عمل يؤدي الى عدم التفاهم نلغيه .**

**الرئيس -** احنا قلنا فى الاول خالص التهادن ولا يمكن أن يأتى التفاهم قبل التهادن ولا يمكن أن يأتى التعاون قبلهم .  
**الشاهد -** التهادن . . . كان الاخوان بيطلعوا مجلة اسمها الاخوان فى المعركة .

**الرئيس -** اسمها ايه ؟  
**الشاهد -** مجلة سرية اسمها الاخوان فى المعركة .  
**الرئيس -** مجلة سرية ؟ مش منشور .

**الشاهد -** ايوه مجلة سرية يصدرها الجهاز . السرى  
**الرئيس -** مين المسئول عنها . . . يوسف طلعت ؟ الهضيبي ؟  
**الشاهد -** يوسف طلعت . وحسن الهضيبي مسئولين عنها .  
**الرئيس -** فيها ايه المجلة دى . . . الاخوان فى المعركة ؟ الاخوان اللى قبلوها معاهدة سرية مع الانجليز وقبلوا عودة الانجليز فى حالة خطر الحرب وان تحدده الامم وأى عدد من الفنيين لابسين عساكر زى بعضه بتقول ايه الاخوان فى المعركة بيطلع فيها ايه ؟

**الشاهد -** ماجاء فيها كله . . .  
**الرئيس -** كانت ترمى الى ايه ؟

**الشاهد -** توزع بين الاخوان . . . وقلت انه غلط لا أقره . . .  
**الرئيس -** جاء فيها ايه ؟

**الشاهد -** جه فيها حاجة خاصة بالمعاهدة . . . ده العدد اللى

شفتة . . قلنا العدد ده العاشر مايطلعش . .

الرئيس — صادرتوه ؟ عاملين رقابة على المجلة السرية . .

الرئيس — قلنا مايطلعش في مجلة سرية . . . علشان فيه كلام

حرج شوية . .

الرئيس — وطلعت ؟

الشاهد — النقطة انهم بعد ٢٠ يوم طلعو العدد ١١ بعد

ما اتصلت بهم وقلت عيب يصدر العدد ده . .

الرئيس — انت قرأته ؟

الشاهد — طلع ١٠ واللى ييجى بعده ١١ وانا قلت مفيش عدد

يطلع . .

الرئيس — دى زى يوليو واكتوبر . . ؟

الشاهد — لا . . . مسلسل . . وبعد ٢٠ يوم فوجئت بنزوله . .

الرئيس — وهل انت مسئول ؟

الشاهد — للاسف كنت مسئول . .

الرئيس — قلنا ان المجلة السرية تصدر بواسطة الجهاز السرى

اللى يرأسه يوسف طلعت . . وحسن الهضيبي . . والجهاز السرى

يطبعها ويصدرها . . وقلنا ان مكتب الارشاد غير مسئول ولادخل

له . . ازاى وانت فى مكتب الارشاد تكون مسئول عن المجلة السرية ؟

همزة وصل ؟



**الشاهد -** حصل بدون علم مكتب الارشاد . . ولما قلت للمكتب

على . . .

**الرئيس -** يا حبيبى . . قول مسئوليتك . . ومدى علفك

بالمجلة السرية حسب اقوالك من الجهاز السرى واتصالك به ؟

**الشاهد -** توزع على الاخوان . .

**الرئيس -** انت قلت ما بتصدروهاش بأى سلطة . .

**الشاهد -** فى غيبة المرشد قلنا نحمل المسئولية . . . المكتب

قال ماتطلعوش حاجة بعد كدة لانه يجب الا يخرج . . .

**الرئيس -** مشى شوية . . احسن . . وصلنا . .

**الشاهد -** الجهاز السرى طلع العدد . . بعث ليوסף . . وقلت

له ازاي العدد ده يطلع . .

**الرئيس -** العدد كان فيه ايه ؟

**الشاهد -** كان فيه مهاجمة للمعاهدة . . وفيه على ما اذكر . .

**الرئيس -** كان فيه حاجة مهمة قوى . . . قوى . . . قوى . .

**الشاهد -** حكاية المعاهدة لان الانجليز قالوا للشورة او رجال

الثورة مفيش حاجة مع الاخوان . . ومع النحاس . . كلام زى ده .

**الرئيس -** بس ؟

**الشاهد -** والحته . . . لو قلت لسبادتك ماقراته تقول انت

غلطان . . . لانه طلع نكبة علينا . .

— ٦٣٢ —

الرئيس — طلع نكبة عليكم ! ليه ؟

الشاهد — غلط ..

الرئيس — فيه ايه علشان نعرف انه نكبة ؟ .. افرض انه ورقة  
ورا ورقة من صور القران .. تبقى ايه النكبة .. افرض العدد  
صور من القران كله .. لافيه كلمة زيادة .. ولا حاجه .. ولا  
تاريخ تبقى نكبة منين ؟

الشاهد — الاسلوب السرى وحش ..

الرئيس — يعنى قرأته ..

الشاهد — ايوه ..

الرئيس — قول كده قرئت ايه فيه .. ؟

الشاهد — انا اتذكر نقد الاتفاقية ... وحكاية الانجليز ..

الرئيس — وحكاية اتفاق جمال عبد الناصر مع اسرائيل ..

بيت عبد الناصر مفروش من السراى .. مائتكلم ..

الشاهد — انا موقفى دقيق ...

الرئيس — وموقف البلاد ؟

الشاهد — أدق ..

الرئيس — الدقيق أهم ولا الأدق ؟

الشاهد — الأدق ...

الرئيس — مع موقفك الدقيق قدر الموقف الادق . . واتكلم . .  
كان فيه ايه العدد ؟

الشاهد — منزل جمال عبد الناصر مفروش . .

الرئيس — مفروش بايه ؟

الشاهد — مفروش . . . بـ . . . كلام . .

الرئيس — مفروش بكلام ؟ ؟

الشاهد — لا . . . ياناس . . . يا جماعة . . . ده خطأ لا يقره

اسلام ودين اقول أكثر من كدة . . ده كلام غلط . .

الرئيس — قول كان مكنوب ان بيت جمال عبد الناصر ماله ؟

الشاهد — أنا شفت بيت السيد جمال . .

الرئيس — ماله ؟ . . مكتوب ايه . . ؟

الشاهد — مفروش بأحسن فرش . .

الرئيس — منين ؟

الشاهد — يكفى . . .

الرئيس — يجب ان تجيب على كل سؤال تسأله المحكمة .

الشاهد — ايوه . .

الرئيس — منين الفرش ؟

الشاهد — . . . ما قدرش أنطق . . .

الرئيس — لازم تنطق بيها . . . منين ؟

الشاهد — حاضر . . . مستعد أقولها . . .

الرئيس — ده جاء في الجريدة السرية . . اتكلم . . . اتخفى

الشهادة وانت مؤمن ؟

الشاهد — أنا مش قادر أنطقها . . .

الرئيس — انت قادر كبير . . .

الشاهد — مقدرش أنطقها أبدا . .

الرئيس — أحكى . . . قول . . . قال إيه ؟ المفروشات الفخمة

جاية منين ؟ . . . توكل على الله وانطقها . .

الشاهد — من القصور . . من لجنة الجرد . .

الرئيس — دخلت بيت جمال عبد الناصر ؟

الشاهد — أيوه . .

الرئيس — مفروش من القصور ؟

الشاهد — لا . . .

الرئيس — مفروش ازاي ؟

الشاهد — عفش البيت الاول . . . أيام زواجه .

الرئيس — ازاي تنزلوا يامسلمين جريدة سريه فيها الكلام ده

. . غرضكم إيه ؟

الشاهد — سيادتك تقول ماتشاء . .

**الرئيس —** الشعب اللى يقول مايشاء . . . الاستاذ اللى لابس قميص أحمر

**الشاهد —** تشنيع . . .

**الرئيس —** لشخص آخر . . غرضه ايه من الكلام ده ؟

**الشاهد —** بلبلة الافكار

**الرئيس —** واللى وراه لابس نضارة . .

**الشاهد —** عايزين يعملوا ثورة فى البلد . .

**الرئيس —** وانت يا شيخ ياعجوز ياللى ورا . .

**الشاهد —** بده يقول ان عبد الناصر سرق حاجات من القصور

**الملكية . .** أنا راجل بتاع لبن . .

**الرئيس —** الشعب أهه . . طبيعة . . ولما صدرت الجريدة

**السرية . . .** حليتكم الجهاز السرى ؟

**الشاهد —** يا يوسف ازاي يصدر هذا . . قال لى أنا باشتغل

مع الرئيس المرشد مش معاك . . قلت له أنا قايم بعمل المرشد

مع مكتب الارشاد . . قال المرشد مش غايب . . . هو فى البلاد

**العربية . . .**

**الرئيس —** واتفاق جمال مع اسرائيل . . جيته منين ؟

**الشاهد —** مين اللى جابه ؟

**الرئيس —** اذن مسئولية الجهاز السرى ايه ؟

الشاهد - المرشد هو المسئول عن هذا . . .

الرئيس - عن ايه ؟

الشاهد - عن هذا الغرض . . .

الرئيس - ايه الغرض . ؟

الشاهد - سييء جدا . . . الاضرار اللى احنا فيها .

الرئيس - ايه هي الاضرار اللى احنا فيها . . . أو اللى انتم

تتوقعوها ؟

الشاهد - ربنا سلم . . .

الرئيس - ايه هي . . . ؟

الشاهد - الفوضى اللى تحصل . . . والفتنة . . .

الرئيس - والفتنة تعمل ايه . ؟ تولد ايه ؟ نرجع للكلام من

الاول . . .

الشاهد - حرب أهلية . . .

الرئيس - وترك حاجات كبيرة على حسب كلامك . . .

الشاهد - أيوه . . .

الرئيس - وبعدين . . . ايه الاجراء اللى اتخذه جمال

عبد الناصر ؟

الشاهد - ولا حاجة . . .

**الرئيس -** جالكيم امتى ؟

**الشاهد -** فى اكتوبر . . . عمر البكتاش من مكتب الارشاد . .

احمد شديد من مكتب الارشاد . . والخضرى من الهيئة  
التأسيسية . . وجوده من الهيئة التأسيسية . . وحلمى  
نور الدين من الهيئة التأسيسية . . وعثمان نجاتى من الهيئة  
التأسيسية . .

**الرئيس -** ومين ؟

**الشاهد -** مش فاكر . .

**الرئيس -** وانت . . . موجود معاهم . . قال لكم ايه ؟

**الشاهد -** ايوه . .

**الشاهد -** تناول حاجتين . . بعد أن روى لأعضاء الهيئة

الحالية . . قال لنا موقف الحركة من الإخوان . . . وان المعاهدة

انتم اتهمتونى فيها بأننا ناس خنا . . وكلامكم مش صحيح . .

وروى الكلام الى حصل فى بيت منير الدلة . . وانا قلت ايه حصل

فى هذه الجلسة لانى كنت حاضرها . . وقال حكاية الحياة

البرلمانية وانه مش متأخر عنها . . ولكن لا يمكن أن تقوم حياة

برلمانية وطيدة فى البلاد ويكون فيها هيئة لهذا جهاز سرى . .

فهذا أساس التفاهم وأساس الحياة السليمة الى يمكن نمشى

عليها . . وبلغوا الهيئة التأسيسية ذلك . .

**الرئيس — قول الحكاية دى تانى . .**

**الشاهد — حاجتين . . . المعاهدة . . .**

**الرئيس —** أظن مش طاهقناين تسمعوها تانى لانها أشياء تتعلق بمستقبلكم ان كان يراد به مستقبلكم . . كان يراد ان يكون مستقبلكم كده . . بالطريقة اللى انشרכת اليوم . .

**أصوات من الجمهور —** لا قدر الله

**الرئيس —** الحمد لله . . . تانى الحقة دى . .

**الشاهد —** حكاية المعاهدة . . انتم ناس قلتم علينا . . . افهم ان النقد يكون محلى فيما بيننا . . ولكن أن يكون يتعدى الحدود بأننا مش أمناء . . ده معرفش يبقى ازاي . . صمموه كما تروا . .

**الرئيس —** خصوصا اذا كان النقد يتناول بعض الاسس التى هى . . .

**الشاهد —** وأكثر منها يافندم . .

**الرئيس —** دى نمرة واحد . . ننتقل على نمرة ٢ . . .

**الشاهد —** الجهاز السرى . . لايمكن ان تكون هناك حياة

**ديمقراطية سليمة آمنة الا اذا كان مفيش أجهزة . . والهيئة لها**

**أجهزة موجودة . . ماتبقاش ديمقراطية**

**الرئيس —** تبقى ايه ؟



الشاهد — مش حياة برلمانية سليمة .. ده تلخيص كلام  
الرئيس ..

الرئيس — يعنى وجود سرى فى البلاد معناه ايه ؟

الشاهد — معناه مفيش قيام حياة برلمانية سليمة ..  
الرئيس — ايه ؟

الشاهد — ماتبقاش ديموقراطية .. حزب له اسلحة ..  
وحزب مالهش .. لما ينزلوا مع بعض ...

الرئيس — يعملوا ايه ؟

الشاهد — يضربوا بعض ..

الرئيس — واحد عنده اسلحة ... وواحد لا .. ؟

الشاهد — الاثنين عندهم ..

الرئيس — يعملوا ايه ؟

الشاهد — يضربوا بعض

الرئيس — نرجع لايه ؟

الشاهد — الفتنة والفوضى ..

الرئيس — والنتيجة ايه ؟

الشاهد — الحرب الاهلية ..

الرئيس — انت ليه تراوغ فى شهادتك ...

الشاهد — لا ... ابدا ..

الرئيس — هي دي مهمة القائمين بالدعوة في الاسلام ؟ هو ده  
اللى اتعلمتوه من أسس الاسلام ؟

الشاهد — أنا منجوع ..

الرئيس — اجيب لك تاكل .. ماشبعتش ؟

الشاهد — مخطيء يافندم ..

الرئيس — ومخطيء في حق مين ؟

الشاهد — في حق بلادى ..

الرئيس — مخطيء في حق بلادك ... مين الناس الحقيقيين

اللى كانوا يديروا سياسة الاخوان المسلمين . . مع حسن  
الهضيبى ؟

الشاهد — المختبئين معه ..

الرئيس — مين بالاسم .. ؟ قلهم بالاسم .

الشاهد — صلاح شادى .. حسن العشماوى .. كمال

عبد الرازق ... محمود عبده والباقي ناس ...

الرئيس — فيه بطانة معينة ؟

الشاهد — كانوا باينين ..

الرئيس — انت اللى بتقول اختبأوا .. أنا ماقلتش . .

الشاهد — صالح أبو رقيق .. ومنير الدله ..

الرئيس — ومين تانى ؟

الشاهد - مفيش ..

الرئيس - والله لسه فيه اتنين .. انت منتظر حد يكلمك !!  
دى شهادة . . مين تانى ؟

الشاهد - عبد الفادر عوده اظن ..

الرئيس - ماتدخلش فى التخمين .. ان بعد الظن اثم ..

الشاهد - كفاية كده ... لا اذكر ..

الرئيس - منير الدله .. صالح ابو رقيق .. والمرشد حسن  
الهضيبي عمل معاه ايه .. عينهم فين ؟

الرئيس - فى مكتب الارشاد ..

الرئيس - اعضاء ولا فراشين ؟

الشاهد - اعضاء فى المكتب ..

الرئيس - وهم مين ؟

الشاهد - الهيئة التأسيسية ..

الرئيس - فى الجهاز المنتخب ولا المعين ؟

الشاهد - فى المعين ..

الرئيس - هل نجحوا فى انتخابات الجمعية التأسيسية ام  
سقطوا ؟

الرئيس - وبعد ان سقطوا المرشد عينهم فى الجزء المعين ! ..

الشاهد - سقطوا ..

جزء من مكتب الارشاد من الجمعية التأسيسية التي هي الجمعية  
التأسيسية في حد ذاتها ايه ؟

الشاهد — معينة يافندم ..

الرئيس — شيء جميل .. وبعدين تصل الى أن مكتب الارشاد  
، رأى ايه ؟

الشاهد — استشارى ..

الرئيس — غير ايه ؟

الشاهد — غير ملزم ..

الرئيس — والرأى النهائى لمن ؟

الشاهد — للمرشد ..

الرئيس — مين المرشد ؟

الشاهد — مين ؟ .. حسن الهضيبى ..

الاستاذ على نور الدين — لما طلبت من يوسف طلعت ان  
يوقف اصدار نشرة الاخوان في المعركة طبقا لما قررت الآن ثم  
صدرت النشرة وقلت له لماذا صدرت فأجابك بأنه يأخذ الاوامر  
من المرشد .. والمرشد كان في هذا الوقت غايب في سوريا .. ايه  
الاجراء التي اتخذته — بصفتك نائب المرشد وكنت بمكتب الارشاد  
— مع يوسف طلعت في هذا الموضوع ؟

الشاهد — احنا لانستطيع — كمكتب الارشاد — ان نوقع عليه

أى عقوبة لانه يقول أنا مش باشتغل معاكم . . أنا باشتغل مع  
المرشد رأسا . . لا باخذ أمرى منك ولا منه .  
الرئيس - حماية . . . فاكرين عهد الحماية . . حمايه من  
حسن الهضيبي . .

الشاهد - احنا اخذنا اجراء . .

الرئيس - لايمكن لشخص يأخذ حماية من واحد الا اذا كان  
قوى . . بأيه . . بجيش . . جهاز سرى مسلح . . . الله . . .  
الله . . . الله على دعوة الاسلام . . الله . . والله مش حاعرف  
ما تقفوا أمام ربنا ان شاء الله في حضور محمد في يوم الحساب  
تعملوا ايه ؟

الاستاذ على نور الدين - ايه كان رأى الاخوان في نظام الحكم  
وقت قيام الثورة سنة ١٩٥٢ ؟

الشاهد - السؤال تانى ١٠٠

الاستاذ على نور الدين - ايه كان رأى الاخوان في نظام الحكم  
وقت قيام الثورة سنة ٥٢ ؟

الشاهد - بعد ان قامت الثورة قدمنا مذكرة رسمية لرجال  
الثورة وجه فيها الحجة الخاصة بالحكم . . أننا نرجو ان الدستور  
الجديد يبقى مقام على الأسس الاسلامية . . ده خاص بالحكم . .

لم نتدخل في الحكم بغير هذا .. هو بيان أصدرته الهيئة التأسيسية ..

**الرئيس -** قام على ايه ؟

**الشاهد -** أسس اسلامية ..

**الرئيس -** ماهى الأسس الاسلامية التى تطلون أو ترغبون .  
أو تودون أن يقوم عليها الدستور الجديد كأساس ؟ أذكرها لنا ..

**الشاهد -** الشورى ..

**الرئيس -** كما هى مستعملة فى جماعة الاخوان المسلمين ؟  
( اضحك )

**الرئيس -** بتضحكم ليه يا جماعة ؟

**الجمهور -** مفيش شورى ...

**الرئيس -** هو فيه واحد يعمل فى بيته حاجة أكثر من اللى يقتنع بها .. الشورى فى الاسلام هى كده .. جماعة الاخوان قالت كده .. الجمعية التأسيسية معينة وتنتخب مكنب الارشاد ورايها استشارى أما الحكم فهو غير ملازم ... دى الشورى !!  
.. بدليل ان خميس عارضى فى موضوع الجريدة السرية وماحدث سمع له كلام مع أنه نائب المرشد ووكيل الجماعة وعضو فى مكتب الارشاد .. رد على السؤال .. ايه أسس الدستور

**الشاهد -** ...

**الرئيس -** لما انت نايم ومستريح ٢٤ قيراط ؟ ؟ متعرفش  
قلة النوم يعنى ايه ؟ قول الأسس صحتكم كلكم كويسة والله  
الحمد .. تعرفوا الفط والنط .. ومتدربين تربية بدنية كويس  
... ومتقدروش تفكروا والا علشان اللى ميقدرش يكون  
مستريح لانه عايش ليومه ؟ احكى الاسس اللى طلبتوها لكى يقوم  
عليها الدستور الجديد ..

**الشاهد -** اللى بيقوم عليها الاسلام ..

**الرئيس -** اللى هى ايه ؟

**الشاهد -** اللى هى موجودة فى كل الدساتير ..

**الرئيس -** ايه هى ؟

**الشاهد -** القائمة ...

**الرئيس -** وايه هى ؟

**الشاهد -** حرية الفرد ... والشورى ... والتكافل بين

الامة ..

**الرئيس -** سمعتم أسس الاسلام يامواطنين . سمعتم الاسس

بتاعة الاسلام ..

**الشاهد -** الامة تكون دينية ... ودى مفروضة وقائمة ..

**الرئيس -** ايه فى جمعية الاخوان المسلمين فى داخليتها كجمعية

قائمة بذاتها مسئول عنها ناس قايمين بالدعوة معتقدين فيما

تقولوه كأسس الاسلام .. نفذوا فيها ايه فى داخلبتكم ؟ حرية  
الفرد نفذت ازاي .. الشورى نفذت ازاي .. النكافؤ .. والا  
التكافل بين الامة ..

**الشاهد —** تكافل يعنى تعاون ..

**الرئيس —** معلش .. يمكن نكشف عليها فى المختار او فى  
المصحف .. لان كل كلمة فى المصحف تفسر فى آية اخرى ..  
تتبع الآيات الموجودة فى المصحف تجد الكلمة مفسرة فى آية  
اخرى .. دى نصيحة منى انا شخصيا للمسلمين .. المصحف  
لما نزل لم يعتمد على مختار صحاح او اى حاجة ..

**الشاهد —** القانون القديم كنا بنعد له ..

**الرئيس —** كنتم ماشيين على اى قانون؟ وكنتم تحققوه على  
اى اساس من الاسس اللى تدينوا بها كأسس الاسلام داخل  
الجماعة .. من حرية الافراد الى الشورى الى التكافل بين الامة  
على حسب رايتك ..

**الشاهد —** حكاية الشورى فى الجمعية كانت محددة ، غير  
معينة .

**الرئيس —** كانت محدودة مش معينة هل كان المرشد يخضع  
للراى الاستشارى بتاع مكتب الارشاد ؟

**الشاهد —** كان يتصرف كما يرى



الرئيس — يعنى الاستشارة بتاع مكتب الارشاد كانت غير . .  
الشاهد — ملزمة

الرئيس — هل هذه هى الشورى فى الاسلام ؟  
الشاهد — لا

الرئيس — هل هذه هى الشورى التى كنتم تطلبونها كأساس  
للدستور الجديد لحكم البلاد ؟  
الشاهد — لا

الرئيس — هل افهمتم هذا للمواطنين  
الشاهد — محصلش

الرئيس — ماذا كان مأربكم من ان تقولوا للمسلمين والمواطنين  
اوامر واسس لاتنفذوها فى داخل جمعيتكم وانتم تعلمون انها  
مخالفة للاسس بتاعة الاسلام او تفسيرات اسس الاسلام . .  
وتسيبوهم فى العمى والظلام وفى بحر خضم بين امواج متلاطمة ،  
والجو مكفهر وهناك اعاصير وقوات مرابطة فى داخل البلاد وقوات  
اخرى معادية على حدود البلاد وفقر يرعى بين المواطنين وجهل  
ومرض ياكل فى اجسادهم وعقولهم ليه ؟ ماغرضكم ؟ عاوزين  
توصلوا الى ايه ؟ الخطة السياسية دى موضوعة علشان ايه ؟

الشاهد — ( لايرد )

الرئيس — الجواب ايه ؟

**الشاهد - غلط**

**الرئيس - غلط . . . ايه هو اللي غلط**

**الشاهد - القانون القائم عندنا غير شورى ، ومطلوب الشورى**

**واللى احنا فهمناه ان الخطة السياسية تؤدى الى غير الشورى .**

**الرئيس - الى غير ماتنادون به او تفهموه الى المواطنين يبقى**

**ايه ؟**

**الشاهد - غلط**

**الرئيس - وماذا يكون المأرب من هذه الخطة الخطأ ؟ تفتكر**

**يكون ايه ؟**

**الشاهد - غلط وغير اسلامى**

**الرئيس - وتعتقد انه يوصل لفين ؟ السكة دى توصل لفين ؟**

**الشاهد - توصل الى اضطراب وفتنة**

**الرئيس - والى . . .**

**الشاهد - فوضى**

**الرئيس - والى . .**

**الشاهد - حرب أهلية**

**الرئيس - يعنى والحمد لله كل سكة تمسكها من اتجاه الاخوان**

**وتنظيمات الاخوان توصلنا فى الاخر الى . .**

**الشاهد - اخطاء**

**الرئيس - نتيجتها ايه**

الشاهد — حرب اهلية

الرئيس — ماذا كنتم تبتغون من هذه الحرب الاهلية وقد ثبت  
لدينا الان باقوالك واعترافاتك ان جميع خطط الاخوان ومسالك  
الاخوان وتكوين الاخوان توصل كلها الى الحرب الاهلية . يبقى  
الغرض بتاعكم واضح وهو الحرب الاهلية .

لماذا تسعون الى حرب اهلية ؟

الشاهد — لا يرد ( . . . . )

الرئيس — ليه . قل لى

الشاهد — لا يرد ( . . . . )

الرئيس — الجواب ؟

الشاهد — اقول ايه ياسيدى الرئيس

الرئيس — الجواب

الشاهد — غلط

الرئيس — وايه الى كنتم تجنوه من الحرب الاهلية ؟

الشاهد — لا ينتج الا الشر

الرئيس — الحرب الاهلية توصل البلاد الى ايه ؟

الشاهد — دمار

الرئيس — والاسلام امر بالدمار ؟

الشاهد — لا يا فندم

الرئيس — يعنى كنتم ماشيين فى سكك مختلفة وتنظيمات

مختلفة وسياسات عدة كلها توصل الى دمار مخالفين بذلك الدين  
الاسلامى ؟

والدعوة الاسلامية . ايه رأيك ؟

**الشاهد — هذا يخالف الدين الاسلامى ويخالف السياسة  
الاسلامية**

**الرئيس —** ويخالف المبادئ الاسلامية .

**الشاهد —** طبعاً يخالف المبادئ الاسلامية

**وكيل النائب العام —** لماذا اختفى المرشد ؟

**الشاهد —** بعد ما جه من سوريا اعد حوالى اسبوع فى المركز

العام وبعدين حصل انه واحد من الاخوان خطب فى جامع فى الروضة  
واسمه حسن دوح . . .

**الرئيس —** قال ايه فى الخطبة ؟

**الشاهد —** عارض الاتفاقية على المنبر وتناول فى الخطبة كلام

لتجريح المعاهدة وتجريح للحريات .

**الرئيس —** بحق ؟

**الشاهد —** لا . ما كان محق

**الرئيس —** وبعدين

**الشاهد —** وبعدين راح رجال البوليس يسألوا عن المرشد فى

البيت فظن انه مطلوب للاعتقال او القبض عليه فهو قال انامش

بحاسلم نفسى للبوليس .

الرئيس — وهل كان مطلوب القبض عليه صحيح ، او هو ظن ذلك .

الشاهد — لا . ظن بس

الرئيس — وان بعض الظن اثم ، يبقى حسن الهضيبي ارتكب ايه بظنه هذا ؟

الشاهد — اثما

الرئيس — وبعدين

الشاهد — هذا هو سبب الاختفاء .

وكيل النائب العام — هل اختفى معاه حد تانى ؟

الشاهد — ايوه ، حسن العشماوى ومحمود عبيده ، وكمال عبد الرازق

وكيل النائب العام — ليه دول اختفوا

الشاهد — اختفوا وياه .

وكيل النائب العام — عمل ايه اختفاء المجموعة دى ؟

الشاهد — هم كانوا متصلين بيه وهم فى هذا الوقت كانوا

الذين يديرون السياسة

الرئيس — فى هذا الوقت بس ، والا هم كانوا من زمان

الشاهد — ايوه انما وضع الان فى الاختفاء انهم كانوا يديروا

السياسة

الرئيس — يعنى دول ساسة البلد وهو الرأس المنفذ وهؤلاء

مستشاروه دى هيئة الاستشارة ، او الهيئة الفنية للاستشارة ،  
... استشارة قانونية والا استشارة فنية والا استشارة ادارية  
والا استشارة سياسية والا دول كلهم مع بعض ؟

**الشاهد -** مستشاروه فى سياسة الجماعة وفى كل حاجة .

**الرئيس -** يعنى كل الحاجات دى مع بعض ، وهى مجموع  
الاستشارات التى ذكرتها وما يستجد غيرها .

**الشاهد -** ايوه وقد يستجد غيرها .

**الرئيس -** او جائز انه موجود وانا ما اعرفش

**الشاهد -** جائز ...

**وكيل النائب العام -** بعد ان اعلنت الحكومة انها لا تريد اعتقال  
المرشد لماذا لم يظهر هو وبطانته ؟

**الشاهد -** لا اعلم .

**وكيل النائب العام -** الم تتصل به ، الم تكن نائبه ؟

**الشاهد -** لا اعرف

**وكيل النائب العام -** وسيبقى مختفى لامتى ؟

**الشاهد -** فهمت انه سيظهر لما يحصل حاجة

**وكيل النائب العام -** اى حاجة ؟

**الرئيس -** حاجة ايه ، ؟ تطلع عفارىت فى البلد

**الشاهد -** حادثة ... حاجة ... اى حادثة

الرئيس - المشاع في الاخوان ان لما المرشد يختفى حاجة  
حتتطلع في البلد ، يطلع ايه ... شجرة .  
الشاهد - يحصل اى حادثة

الرئيس - ايه الى يحصل اوتومبيل يطس واحد  
الشاهد - المشاع انه مختفى ولا يطلع الا بحادثة  
الرئيس - ايه ؟

الشاهد - هذا هو الذى دار وسمعته  
الرئيس - احكى لنا ما سمعته

الشاهد - كان يظن انه مطلوب للاعتقال وبعدين الحكومة  
قالت انا مش عايزه اعتقله والسيد الرئيس قال انا مش حاعتقله  
فما يطلعش ليه ، فاللى كان بيقال انه لا يطلع الا بحادثة ...  
اقول ايه

الرئيس - ايه الى كنت بتسمعه ؟  
الشاهد - حادثة

الرئيس - بيت يقع ... ايه الحادثة دى  
الشاهد - ( لا يرد )

الرئيس - فسر لى معنى الحادثة ؟  
الشاهد - لا يرد ( ..... )

الرئيس - بركان يحصل وينفجر فى وسط البلد او زلزال  
يهد اوصال البلاد ويكسرها ويخربها . ايه الحادثة دى ؟

**الشاهد -** والله يا سيدى الرئيس .....

**الرئيس -** أنا مش سيدك . !

**الشاهد -** وانت يا سيد الرئيس .

**الرئيس -** مش سيدى محبش الكلمة دى . :

**الشاهد -** السيد الرئيس ..

**الرئيس -** ايه الحادثة ؟

**الشاهد -** لا يرد

**الرئيس -** ما هى الحادثة

**الشاهد -** الذى سمعته انه لا يطلع الا بحادثة .. أى حادثة

.. المرشد مش طالع ليه ؟ مش طالع الا لما يحصل حادثة ..

اعرفها ايه مش طالع الا بحادثة .... أقول ايه اكثر من هذا

**الرئيس -** وماذا كان يقصد من أن ظهور المرشد ، كما كان

يشاع هذا ما بين افراد جمعية الاخوان المسلمين ما يفهم منه

أن خروج المرشد لازم يكون بحادثة .

**الشاهد -** لأن عملية اختفائه واختفاء ناس معاه عملية غير

سليمة وانحراف بالدعوة مختفين ليه ؟

**الرئيس -** ميكنش الاختفاء لاعلان الجهاد ؟

**الشاهد -** جهاد ايه ؟!

**الرئيس -** الجهاد اللى كانت تشحن به أفراد الجهاز السرى

**الشاهد -** ضد مين ؟



الرئيس - كنتم تعلموهم الآيات الاولى من سورة آل عمران •

الشاهد - جهاد ضد مين ؟

الرئيس - جهاد انا عارف . . هذا الذى كان يشاع ويقال بين

أفراد جمعية الاخوان المسلمين .

وكيل النائب العام - الحادثة ضد مين ؟

الرئيس - مش ده يخش تحت الحادثة اولا ؟

الشاهد - يخش !

الرئيس - انت قررت اى حادثة ، ايا كانت صفتها او صبغتها

من زلزال الى بيت يقع الى حادثة ترمواى ، اى شىء ما بين هذه الحوادث

تحصل عشان المرشد يخرج . يعنى من اول ثورة مسلحة تقوم

بها جمعية الاخوان المسلمين بواسطة الجهاز السرى بتاعها الى

اى شىء أدنى من هذا ، مضبوط ؟ تخش تحت كل حادثة •

الشاهد - تخش

الرئيس - مضبوط

الشاهد - مضبوط •

وكيل النائب العام - مين اعوان يوسف طلعت فى قيادة النظام

السرى ؟

الشاهد - أعرف فى البوليس صلاح شادى •

الرئيس - فى البوليس صلاح شادى ومين تانى ؟

الشاهد - هذا الذى أعرفه فى البوليس وفى الجيش لا أعرف

أحد . .

**الرئيس -** وفي المدنيين ؟

**الشاهد -** يوسف طلعت .

**الرئيس -** واللى يساعده .؟

**الشاهد -** ابراهيم الطيب .

**الرئيس -** قرر ابراهيم الطيب أن هنالك رئاسة عليا لنظام الجهاز السرى . زى مجلس ادارة الشركات وفيه عضو مجلس ادارة منتدب وهو بيكون عضو من أحد هذه الجماعة ، ويرأس هذه الجماعة ...

**الشاهد -** حسن الهضيبي .

**الرئيس -** مين الجماعة الذين يكونون مجلس ادارة الشركة ؟

**الشاهد -** اللى أعرفهم يوسف طلعت وهو يتصل مباشرة مع المرشد ، فاذا كان المرشد عمل مجلس يبقى ده خاص بالمرشد ، واللى أعلمه ان صلاح شادى ويوسف طلعت بيتصلوا مع المرشد مباشرة .

**الرئيس -** وصلاح شادى ويوسف طلعت مسئولين عن ايه ؟

**الشاهد -** يوسف طلعت مسئول عن الجهاز السرى المدنى ،

وصلاح شادى مسئول عن الجهاز السرى فى البوليس .

**الرئيس -** كلها ؟

**الشاهد -** والمسئول عن صلاح شادى انه يتبع رأسا حسن

الهضيبي .

**الرئيس —** قرر ابراهيم الطيب في اعترافاته أن اللجنة العليا التي تتأسس الجهاز السرى مكونة من الاثنين بعد : الشيخ فرغل .  
**الشاهد —** فرغلى !

**الرئيس —** أنا مسميه فرغل كما أنا أستبيح له أن يلخبط اسمى كما يشاء . ويوسف طلعت . مين تانى تقدر تكمل ؟  
**الشاهد —** سيادتك تقول .

**الرئيس —** وصلاح شادى ، ومين تانى تقدر تقول ؟  
**الشاهد —** اتفضل سيادتك .

**الرئيس —** وسيادتك ماتعرفش ؟  
**الشاهد —** لا ما اعرفش .

**الرئيس —** وسيادتك . خميس حميده . .  
**الشاهد —** اقرر لسيادتك . . .

**الرئيس —** ويمكن يكون مين كمان ؟  
**الشاهد —** الى سيادتك تقول عليه .

**الرئيس —** ده الى سيادته قال عليه وعبد المنعم عبد الرعوف بعد هروبه من قضية مسئول فيها امام الحكومة .

**الشاهد —** الى اقوله عن نفسى لانى اعلمه بنفسى هو انى اقرر انى لست مسئولاً لا عضو أعلى ولا عضو أصغر فى هذه التشكيلة التى يرأسها يوسف طلعت وتتبع المرشد فى أى صورة من الصور، والإشراف

الأعلى لهذا الجهاز ليوسف طلعت الذى يتبع المرشد وصلاح شادى ويتبع المرشد مباشرة وعبد المنعم عبد الرؤوف لا أعرف ان كان معهم أولا . . أما أنا عن نفسى فأشهد واعترف أنه ليس لى اتصال بهذه اللجنة العليا أو اللجنة غير العليا ولو كنت مشرف مكنش يوسف طلعت يقول لى أنا بأشتغل مع المرشد رأسا .

**الرئيس -** لانه هو عضو فى مجلس الادارة المنتدب وجرت الاحوال فى بلدنا ان أعضاء مجلس الادارة المنتدبين يلهطوا الاعضاء **الشاهد -** لكن أنا ما اتلهطش .

**الرئيس -** انت قلت فى كلامك انك أكثر من بترينة ، تقدر تقول له ازاي مع أنك قلت داوقتى مابتلهطش .  
**الشاهد -** أنا لست فى هذا الوضع لا مشرف ، ولا مسئول فى هذا الوضع .

**الرئيس -** قررت انك لا تلهط ، فانت باعتبارك نائب المرشد ووكيل جمعية الاخوان المسلمين تقدر تقرر لى ازاي انك لا تلهط وازاي انك مش بترينة .

**الشاهد -** لو كنت مشرف فى هذا الجهاز ماكانش يصح . . .  
أنا انفى أنى مشرف فيه .

**الرئيس -** قرر محمد فرغل بجانب اعتراف ابراهيم العليمه انك أنت خميس حميده وهو الشيخ محمد فرغلى معينين مستشارين للجهاز السرى .

**الشاهد -** أنا لم أعين من حسن الهضيبي مستشار وقديكون  
الشيخ محمد فرغلي عين ولكن أنا لم أعين مستشار ولا مسئول  
في هذا النظام .

**الرئيس -** والاسلام قال ايه ؟

**الشاهد -** من وجهة ايه . ؟

**الرئيس -** من وجهة شاهداه قاتلاه . .

**الشاهد -** بس يثبت على ان لى أدنى صلة بالجهاز . .

**الرئيس -** آمال احنا قاعدين نعمل ايه ، يكونش أننا قاعدين  
نخرج تمثيلية كما تقولوا .

**الشاهد -** ( لا يرد )

**الرئيس -** ألم يقول بعض الاخوان المسلمين بأرشاد من  
الهاربين ان المسألة كلها حكومة الثورة عاملها تمثيلية .  
**الشاهد -** لا . .

**الرئيس -** لماذا لم تذهب الى الاذاعة وتقول لها أنا عندي  
بيان مهم اقرره وعشان كده أنا عملت نداء كذبت فيه هذا .  
**الشاهد -** أنا كنت واضع نفسي تحت تصرف الحكومة .

**المدعى -** عندما عين الهضيبي يوسف طلعت رئيسا للجهاز  
هل استشارك في تعيينه ؟

**الشاهد -** هو قال لى كما قال لالف واحد .

**الرئيس —** شفتم الغلب اللى احنا صديناه عنكم ، تفتكر اننا  
نفتح الحنفية على آخرها ونسيبكم ونمشى ... . اتكلم .  
**الشاهد —** ( لا يرد )

**المدعى —** وايه كان رأيك أنت الخاص بالنسبة لتعيين يوسف  
طلعت رئيسا للجهاز ؟

**الشاهد —** انا كنت واحد من ضمن الاخوان .

**المدعى —** رأيك أنت هل يصلح أو لا يصلح ؟

**الشاهد —** هو زى غيره .

**الرئيس —** ما هو قرر زى باقى الرئاسة ان كلها جاهلة ومخالفة  
للاسلام وتنفذ بما لاتنادى به وتضمر مالا تظهره .

**المدعى —** عندما اختفى حسن الهضيبى وبطانته من الذى كان  
يدير الجماعة ؟

**الشاهد —** هم

**الرئيس —** مين هم ؟

**الشاهد —** حسن الهضيبى ومن معه ..

**الرئيس —** بالاتصال مع مين . مين هم الجماعة الظاهرين ؟

**الشاهد —** لما قابلت الاستاذ الهضيبى بعد اختفائه، قابلته ...

**الرئيس —** وهو مختفى

**الشاهد —** كان لسه ما يقاشر، اختفاء قوى ، بعد اسبوع ..

**الرئيس -** نص الاختفاء ، يعنى أنا كنت محقق وأنا بأقول سرية أو سرية علنية أو علنية .

**الشاهد -** لك الحق فى كل ما ذهبت اليه .

**الرئيس -** رجعنا الى السرية العلنية . النص اختفاء ده كان سرى يعنى مكانه مجهول والا النص اختفاء معناه انه كان نص معروف ونص مش معروف ، وانهى نص ماكانش معروف .

**الشاهد -** قلت له حيث أنك حتختفى ومش عاوز تطلع فلازم شئون الجماعة يديرها مكتب الارشاد .

**الرئيس -** هل قال لك انه حيتختفى ؟

**الشاهد -** قال لى أنا مش حاسلم نفسى ،

**الرئيس -** كان رده ايه ؟

**الشاهد -** قال انه مش حيسلم نفسه

**الرئيس -** بالرغم أنك قلت له مفيش نية عند الحكومة للقبض عليه .

**الشاهد -** هذا ما قلته ..

**الرئيس -** والا انت لا تجرؤ أن تقول له كده لان رايك استشارى شفتكم يا حضرات من سيكون رئيس المستشارين فى البلاد ، كان حيتبقى خميس حميده ...

**المعنى -** وعندما زرته فى مخبئه وجدت مين كان موجود ؟

الشاهد - صلاح شادى وعبد القادر حلمى والذى اخذنا من  
المدار ...

الرئيس - مين ؟

الشاهد - واحد اسمه عبد القادر حلمى وحسن العشماوى  
المدعى - مين تانى كمان ؟ انت لك أقوال فى هذا ؟  
الشاهد - عبد القادر عوده ..

الرئيس - ترفع الجلسة الآن على أن تعود للانعقاد فى الساعة  
السابعة مساء .

( رفعت الجلسة حيث كانت الساعة الثالثة وخمس وأربعين  
دقيقة مساء )



## محضر

### الجلسة التاسعة لحكمة الشعب

المنعقدة علنا في الساعة السابعة والدقيقة الخامسة عشرة

مساء بمقر قيادة الثورة في الجزيرة يوم الثلاثاء ١٦ نوفمبر سنة ١٩٥٤

الموافق ٢٠ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ

أول نوفمبر سنة ١٩٥٤ الموافق ٥ ربيع الاول سنة ١٣٧٤ بناء

على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو

مجلس قيادة الثورة .

وعضوية القائممقام أنور السادات والبكباشي ( ا . ح )

حسين الشافعي عضوي مجلس قيادة الثورة .

وبحضور البكباشي سيد سيد جاد المدعي والاستاذ على نور

الدين وكيل النائب العام عضوي مكتب التحقيق والادعاء .

وتولى تسجيل المحاكمات بالاختزال الاساتذة طلعت الصبان

وممدوح توفيق و ابراهيم فكرى فودة ورمسيس حنا مندوبو

مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد

( حضر المتهم كما حضر محاميه الاستاذ حمادة الناحل )

( حضر الشاهد الدكتور خميس حميده )

الرئيس - فتحت الجلسة . . الادعاء له أسئلة . .

وكيل النائب العام - ايوه يا فندم

الرئيس - اتفضل . .

وكيل النائب العام - بعد أن اختفى الهضيبي وقابلته في مخبئه  
كما ذكرت ، هل اتفقت معه بصفتك وكيل الجمعية على  
كيفية ادارة شؤون الجماعة في غيابه .

الشاهد - قلت له تختفى ما تختفيش ، دى حاجة تتعلق  
بك ، انما عاوز كل ما يتعلق بالجماعة ، مكتب الارشاد يقوم به . .  
فقال لى ، أنا حر . . ادى اللى عاوز اديله . . انت وكيل فى غيابه  
فقط ، وأنا موجود . .

الرئيس - كان ردك عليه ايه ؟

الشاهد - ردى عليه . . قلت لا . . أنا عاوز كل حاجة ترسل  
للمكتب والمكتب وحده هو المسئول . . مازودتش عن هذا ،  
وخرجت من عنده ورحت الدار تانى . .  
الرئيس - وبعدين ايه اللى تم .

**الشاهد -** وبعد ذلك كانت كل الامور .. كانت تدار من  
خلف ظهر مكتب الارشاد .

**الرئيس -** بواسطة .

**الشاهد -** بواسطة نفس هذا الجهاز ومع المرشد .. وبدأت  
المنشورات تنزل .. فهذه الحالة من غير شك ادت بجماعة  
الاخوان .. يعنى تضايقوا من هذا الوضع ، والمكتب لا يستطيع  
ان يفعل شئ ، فخلت فريق من الاخوان حاولوا وضع حد  
لهذا ..

**الرئيس -** ولماذا مكتب الارشاد لم يكون لنفسه جهازا مريا .  
خاصا لمحاربة الجهاز السرى الخاص بتاع حسن الهضيبي وهم  
اغلبية .

**الشاهد -** احنا عاوزين نقضى على الاجهزة الخاصة .. والا .

**الرئيس -** لماذا لم تعملوا جهاز علنى وتلجأوا للحكومة .

**الشاهد -** تلجأ للحكومة ؟

**الرئيس -** لماذا لم يلجأ مكتب الارشاد لمحاربة الجهاز الاول  
خايف منه .. اللى هو بيدار بواسطة حسن الهضيبي .

**الشاهد -** قلنا كان يجب يكون هذا .. ولكن طلبنا أشياء  
حلا للموقف وهى اعطاء الهضيبي اجازة وایقاف الانتخابات وبعض  
امور داخلية وجدناها علاجا للموقف وتكوين مكتب جديد ...

**الرئيس -** كيف يكون العلاج باعطاء حسن الهضيبى اجازة ،  
فى حين انك فى اعترافك قلت ان حسن الهضيبى - وهو فى أكثر  
من اجازة - كان يدير الجمعية بواسطة اعوانه .

**الشاهد -** دى كنا حانعلنها ثم نتولى هذا العمل فى الاقاليم  
وتفهم الاخوان حقيقة ما وصلت اليه الجماعة .. كنا بداننا فعلا .  
**الرئيس -** ما هى طريقة البدء وما هى الدلائل .

**الشاهد -** اختير المكتب الجديد ..

**الرئيس -** مكتب ايه .

**الشاهد -** مكتب الارشاد الجديد .

**الرئيس -** مين اختاره .

**الشاهد -** احنا ضمينا خمسة له ..

**الرئيس -** الى اختارهم .

**الشاهد -** المكتب القديم ..

**الرئيس -** والمكتب القديم ده اصله جاى منين ..

**الشاهد -** اصله من الهيئة التأسيسية ..

**الرئيس -** والهيئة التأسيسية جاية ازاي ..

**الشاهد -** بالتعيين ..

**الرئيس -** يبقى ، هل الخمسة الى ضموا دول يمثلوا شعبة

الاخوان المسلمين أو يمثلوا الشخص الذى عين الجمعية التأسيسية

**الشاهد -** الجمعية التأسيسية اللى عينها حسن البنا . .

**الرئيس -** مين ورثه فى كل اختصاصاته . .

**الشاهد -** حسن الهضيبي . .

**الرئيس -** هل عدلتوا أى شىء فى اختصاصاته . .

**الشاهد -** لا . . .

**الرئيس -** يعنى الهضيبي ورث حسن البنا فى كل اختصاصاته

بما فيهم الجمعية التأسيسية المعينة . . بما فيهم مكتب الارشاد

أولا هو فيه جزء معين وجزء منتخب . . هو ضم من الجمعية

التأسيسية خمسة الى مكتب الارشاد . . تقدر تفهمنا ما هو

التغير اللى طرا على مكتب الارشاد .

**الشاهد -** طرا فيه تغير . . وجود أغلبية حريضة على هذا

الاصلاح ، وان تخطو خطوات عملية فى السير بالجماعة الى سير

يرضى . .

**الرئيس -** من هم الذين ضموا لمكتب الارشاد وما هى كيفية

ضمهم ؟

**الشاهد -** المكتب فى الاجتماع ضمهم . .

**الرئيس -** بالتعيين ؟

**الشاهد -** لا . . فيه سبعين اخ من أعضاء الهيئة التأسيسية

الذين يكونوا أغلبية فى الجماعة . .

**الرئيس -** يكونوا أغلبية في الجماعة .. يعنى ١٤٧ لسبعين  
تبقى أغلبية ؟

**الشاهد -** فيه منهم غايين أو مستقلين ..

**الرئيس -** آه .. يعنى أغلبية الحاضرين ..

**الشاهد -** أيوه .. السبعين يكونوا أغلبية ..

**الرئيس -** طبعى كانوا دول .. السبعين دول كانوا أى فريق

**الشاهد -** دول بتوع السياسة اللى ضد سياسة الهضيبي ..

**الرئيس -** الفريق ده كان برياسة مين .. مين كان متزعمه ..

**الشاهد -** أنا ..

**الرئيس -** وكان مين فيه ؟

**الشاهد -** خميس ، عمر التلمساني ، عبد المعز عبد الستار ،

أحمد شبيك ، جوده ، فتحى الانور ، عبد السلام فهمى ، حلمى

نور الدين ، محمد الخضرى ..

**الرئيس -** وكونتم جماعة وانت على رأسها ، وكان العدد

سبعين .. وكان عندكم أغلبية ..

**الشاهد -** أيوه ..

**الرئيس -** واتفقتم على إيه ؟

**الشاهد -** جينا خمسة من المكتب القديم وضمينا خمسة ..

**الرئيس -** بالانتخاب والا بالتعيين ؟

الشاهد - بالتعيين .. أو بمعنى أصح ...

الرئيس - فسر لنا ( أو بمعنى أصح ) بالمقارنات ..

الشاهد - .....

الرئيس - يعنى بدل ما حسن الهضيبى ما كان هو اللي بيعين ؟  
أصبح هناك فريق آخر ينازعه هذه السلطة ، وهو اللي يعين ..  
وبعدين ياخذ الاغلبية عليه ويطرده ويحل محله ، زى ما حسن  
الهضيبى ما حل محل حسن البنا ، ويرسم النظام اللي رسمه  
البنا .. برياسة مين المرة دى

الشاهد - هم اللي كانوا حطينى على رأسه ..

الرئيس - يعنى أجبروك ؟

الشاهد - لا .. أنا قبلت .. انما دى سياسة كانت تسير بنا

الى مصير غير كريم ..

الرئيس - والسياسة الجديدة دى كانت تسير الى مصير أكرم

الشاهد - كنا نتمنى ذلك .. واحنا بدأنا فعلا بتنظيم كل

أعمالنا ..

الرئيس - ماهو النظام الذى اتخذتوه ضد حسن الهضيبى

والجهاز الذى يرأسه .. اللي هو الجهاز السرى ؟

الشاهد - العمل الاول ان مكتب الارشاد هو الذى يحمل

أهباء الدعوة ..

الرئيس — ده واحد ..

الشاهد — ٢ .. البدء فى انهاء مشكلة الجهاز السرى انهاء

اصيلا ..

الرئيس — وكان ذلك فى تاريخ

الشاهد — فى الاسبوع الاخير ..

الرئيس — من ؟

الشاهد — من يوم الحادثة المشئومة .

الرئيس — فى الاسبوع الاخير من يوم الحادثة المشئومة ..

يعنى امتى ؟

الشاهد — يعنى الخميس اللى قبل يوم الثلاثاء .. الخميس

.. ثمانية ايام .. حوالى تلتاشر او خمستاشر يوم قبل الحادث

.. وبدأ درس الثلاثاء ..

الرئيس — يكفينى هذا ..

وكيل النائب العام — اطلعت على المنشورات التى كانت تصدر

عن الجهاز السرى .. شفت منها منشور بعنوان ( محمد بجيب

ينقد الاتفاقية )

الشاهد — ايوه شفته ..

وكيل النائب العام — ما عرفتش مصدر المنشور ايه

الشاهد — شفته متوزع على الاخوان .. يعنى الاخوان هم



الى موزعينه في شعبهم وفي مناطقهم ..

**وكيل النائب العام -** ما سألتش جه منين ؟

**الشاهد -** قالوا انه نزل عن طريق المختصين في الجهـازا  
السري ، وانه نزل في يد الاخوان ووزع عليهم في الشعب والمناطق  
.. وواحد جابه لي وقال لي ازاي ده ينزل من ورا ظهر مكتب  
الأرشد ..

**وكيل النائب العام -** جه منين او ايه الصلة بين اللواء محمد  
نجيب وبين الجمعية علشان ينزل هذا المنشور ؟

**الشاهد -** الاستنتاج ان فيه صلة وانه نزل باسم محمد نجيب  
ووزع على أجهزة الاخوان .. يبقى فيه صلة ..

**وكيل النائب العام -** بصفتك نائب المرشد ، ما كانش عندك  
معلومات عن هذه الصلة ؟

**الشاهد -** ما أقدرش أحدد أوي الا في المرة اللي الاستاذ  
عبد القادر عوده كان زاره فيها يوم ٢٥ مارس .. والاخوان  
لماطلعوا من الاعتقال زارهم ، وانه اتصل مع الهضيبي في التليفون ..  
دي الامور اللي مدى علمي ..

**الرئيس -** دي الشواهد العامة ..

**الشاهد -** أيوه .. وفي الفترة الاخيرة ، كثير من الأشياء كانت  
تخفى على ..

**الرئيس -** باعتبارك متزعم الفريق الآخر ، هلاستعنتم ببعض  
الاخوان اللى يدلوكم على ما يجرى فى الخفاء من الفريق المضاد  
لكم ويعطوكم بعض المعلومات عن تحركاته وأساليبه وأغراضه ..  
شأنكم شأن حزبين فى دولة .. كل حزب يجرى وراء الآخر  
ليعلم عنه كل شىء

**الشاهد -** الواقع انه كان الغرض من هذا الوضع الاخير ،  
وضع حد للسياسة .. سياسة الاختفاء ، والسير بسياسة  
واضحة للجماعة .. يعنى كان المرسوم ان دى تكون سياسة  
الجماعة ..

**الرئيس -** هل كنتم تعرفوا تقيسوا حد القوة بتاع الفريق  
المضاد ومداه ، وهل أنتم قادرين انكم تخشوا معاه معركة والا لا  
**الشاهد -** يمكن قادرين على اساس اننا نبغى الخير وان  
الجماعة مهيأة للمشى للخير .. واذا كان بعض الشباب مش موجه  
توجيه صحيح ففيه قدرة على أن يستقيم وأن يوجه هذا  
السبب الى الخير .. دى عاوزه سفر وشوية حاجات ..  
ما كانتش مشكلة لو اننا انتقلنا فى الاقاليم وعملنا زيارات هناك ،  
يتوضح للاخوان مايجب أن يكون .. يعنى لو انطلقنا فى الاقاليم  
كان يمكن نشر الوعى ..

**الرئيس -** تنطلقوا فى الاقاليم وتنشروا الوعى ، وفى حظيرتكم

جهاز سرى مسلح لا يخضع لكم

**الشاهد** — احنا كنا حانوضح للاخ وجه الحقيقة والا يكون مكانه فى غير الجماعة .. واحنا التزمنا قرارات يوم الخميس بضم خمسة أعضاء فجاء واحد من الاخوان يوم السبت اللى يتلو الخميس وقال ان هذه القرارات اخذناها بعاطفة فأنا قلت من لم يلتزم منا سياسة يوم الخميس يطلع بره ، فطلع واحد بره .. وكان الاخوان ناويين أن يلتزموا هذا العنف !.

**الرئيس** — العنف

**الشاهد** — يعنى ما تسيبش حل لحل آخر .. يعنى حسم الامور ..

**وكيل النائب العام** — فيه منشور تانى بعنوان وزير سابق ينقد الاتفاقية .. برضه اطلعت عليه

**الشاهد** — برضه قال لى واحد عليه وقال انه كان بيتوزع مع منشور محمد نجيب ..

**الرئيس** — ما معلوماتك عنه

**الشاهد** — معلوماتى انه .. انا أرجح انه يكون لواحد وزير سابق ..

**الرئيس** — مين

**الشاهد** — سليمان حافظ .. ترجيحا

الرئيس - ليه ترجع انه يكون سليمان حافظ

الشاهد - لصلة محمد نجيب بسليمان حافظ ..

الرئيس - لصلة محمد نجيب بسليمان حافظ ؟

الشاهد - أبوه ..

الرئيس - وكان ايه المنشور ده ..

الشاهد - برضه يعنى مهاجمة ..

الرئيس - لايه .. فى اى نقطة

الشاهد - ما اذكرش ..

الرئيس - ما تذكرش

الشاهد - لا ..

الرئيس - لماذا لم تعلن وانت وكيل الاخوان .. تعلن على

الملا ، وفى الصحف ، وفى الاذاعة على جميع المواطنين الا يصدقوا

ما ينزل لهم فى هذه المنشورات السرية

الشاهد - ...

الرئيس - باعتبار انك غير مقتنع ..

الشاهد - دى اتزلناها للاخوان فى المكاتب ..

الرئيس - بمنشور سرى تانى

الشاهد - لا .. بمنشورات المكاتب الادارية .. بواسطة

السكرتارية ..

ولماذا لم ينشر هذا المنشور كما نشر المنشور الآخر . .  
وبطريقة أقوى من الطريقة العلنية

الشاهد - يبقى ده تقصير . .

الرئيس - تقصير

الشاهد - ايوه يا افندم . .

وكيل النائب العام - ايه الى حصل من الهضيبي والجهاز  
السرى لما عرفوا انكم او ان بعض الاشخاص من أعضاء الهيئة  
التأسيسية يقفوا منه موقف عدائى

الشاهد - جالى استنكرات من الشعب بأن هذا العمل غير  
قانونى . . والا تستمعوا الى المكتب الجديد . .

وكيل النائب العام - كان فيه تهديدات

الشاهد - بعض الاخوان قالوا انهم جالهم تهديدات . .

وكيل النائب العام - من مين

الشاهد - من الشبان . .

وكيل النائب العام - مين يعنى

الشاهد - بعض الشيوخ بتوع الجهاز قالوا . .

الرئيس - مين الشيوخ بتوع الجهاز

الشاهد - الشيوخ الى هم السلسلة . . المرشد . . يوسف

طلعت فى المدنيين . . صلاح شادى فى البوليس . .

**الرئيس —** ما التفرقة بين الشيوخ والنواب .. (ضحك) ..  
أقصد ما التفرقة بين الشيوخ والشبان .. ما التفرقة  
**الشاهد —** مفيش تفرقة ..

**الرئيس —** أصلك بتعطى معنى خاص لحكاية الشبان ،  
وبتقولها بطريقة كده يعنى .. وبتقرص عليها علشان تؤثر  
بمعنى خاص .. أحب أعرف اذا كان هناك تفرقة بين الشيوخ  
والشبان ..

**الشاهد —** مفيش تفرقة يافندم ..

**الرئيس —** يعنى من أعضاء الجهاز السرى

**الشاهد —** أيوه .. يعنى من أعضاء الجهاز السرى .. وبعثوا  
لبعض الاخوان ..

**الرئيس —** من ايه

**الشاهد —** من الجانب المعارض ..

**الرئيس —** بعثوا لمن ؟

**الشاهد —** للسيد حلمى المياوى والسيد عبده قاسم ..

دول اللى قالوا لى ، وقد يكون لحد تانى ، وانما دول هم اللى  
قالوا لى ..

**وكيل النائب العام —** علشان يخضعوا الاعضاء لسياسة  
الهضيبى .

**الشاهد -** يعنى ان عملهم ده غلط ..

**وكيل النائب العام -** كان بعضهم يراقب أعضاء الجمعية في

بيوتهم .. يعنى كان فيه صور أخرى من صور التهديد ؟

**الشاهد -** ايوه .. كانت بتحتمل مراقبة على بعض البيوت

**وكيل النائب العام -** سؤال آخر .. بصفتك عالم بموضوع

الجهاز السرى .. اذا ارتكبت جريمة بواسطة احد أفراد الجهاز

السرى ، اليس المفروض ...

**الرئيس -** بناء على أوامر صدرت له ..

**وكيل النائب العام -** بناء على أوامر صدرت له .. اليس

المفروض - تطبيقا للنظام المقرر في تنظيم الجهاز - ان تكون

هذه الجريمة تنفيذا لخطة موضوعة اقترتها رئاسة الجهاز

**الشاهد -** لا يمكن ان ينفذ شيء في الجهاز الا اذا صدر به

أمر من رئاسة الجهاز

**الرئيس -** حولها الى أسماء ..

**الشاهد -** يعنى حسن الهضيبي يدى ليوسف طلعت ، وده

يدى للمسئول اللى بعد منه ابراهيم الطيب رئيس منطقة

القاهرة ، وده يدى للى بعد منه ..

**الرئيس -** مركزه ايه

**الشاهد -** يدى لرؤساء الفصائل ..

الرئيس - يعنى عندك خبر بحكاية الفصائل

الشاهد - دى عرفتها ...

الرئيس - الدفاع ..

الدفاع - استطرادا للسؤال السابق .. اذا صدر الامر لعضو

الجهاز السرى لتنفيذ جريمة .. هل تعتبر سلسلة الجهاز كلها مشتركة فى الجريمة .

الشاهد - على حسب ما يوصل الامر يعنى ..

الدفاع - يعنى ايه

الشاهد - افرض ان اللى حا يوصل الامر بالجريمة حا يوصل

له بعد اربع فواصل فداه .. اذا وصل له رأسًا ، يبقى منه

رأسًا ، واذا وصل له بالتسلسل ، يبقى بطريق التسلسل

الدفاع - هل يمكن أن يصل الامر من الرأس الى المنفذ مباشرة

الشاهد - فى الغالب .. فى الاصل ان اللى يوصل له الامر ،

يعرف انه جاى له من واحد متصل بالرياسة ..

الرئيس - يعنى من رئيسه

الشاهد - لا بد

الدفاع - هل تعرف محمود عبد اللطيف

الشاهد - لا أعرفه يعنى أصلا ..

الدفاع - واذا رايت هذا الوجه ، هل تذكره ( مشيرا الى

المتهم )



الشاهد — مش قادر اتبين ..

الرئيس — مخاطبا المتهم — قرب شويه يامحمود ..

الشاهد — للمتهم — تعالى يا محمود .. أنا شفتك يا محمود

قبل كده

المتهم — شفتنى فى المعتقل ..

الرئيس — لا .. لا .. انت حاستجوب المتهم والا ايه ..

الشاهد — لا يافندم ..

الرئيس — مابلش سياسة الاستهبال دى .. ( ضحك ) ..

الشاهد — لا يافندم .. ما اعرفوش ..

الرئيس — لا ماتعرفوش .. تعرفه والا ماتعرفوش

الشاهد — لا اذكره ..

الرئيس — لا تذكره ..

الشاهد — أيوه ..

الدفاع — يعنى من الجائز ان تكون قد رأيتك ولكنك لا تذكره

الشاهد — أيوه .. من الجائز جدا ..

الدفاع — هل كنت تلقى محاضرات فى المركز العام

الشاهد — نعم .. انا ايامها القيت بعض المحاضرات ..

الدفاع — يقرر محمود عبد اللطيف انه كان يحضر هذه

المحاضرات .. فهل تعتقد ان محاضراتك كانت عنصرا مؤثرا على

نفسيته وتوجيهها

**الشاهد -** على حسب استعداده لها .. يعنى على حسب  
تأثره بها ..

**الدفاع -** فى كلمة .. المحاضرات بتاعتك كانت تدور حول  
ايه .. عناوينها يعنى كانت تدور حول ايه

**الشاهد -** فى الغالب فى المركز العام كنت باعلق على  
الاسئلة .. ما قلتش محاضرات طويلة فى حياتى فى المركز  
بالقاهرة ، وانما قلت فى المنصورة .. فى القاهرة فى بعض  
الاحيان ، كنت أعلق على الاحاديث .. على الاسئلة

**الدفاع -** هل كانت تعليقاتك تنحو منحى جهاديا

**الشاهد -** تعليقاتى .. مش فى كل وقت .. يعنى وفقسا  
للسؤال .. على حسب السؤال ..

**الدفاع -** يعنى احيانا كده و احيانا كده ..

**الشاهد -** ...

**الدفاع -** هل تعتبر عمل محمود عبد اللطيف .. عمل من  
الاعمال الجهادية

**الشاهد -** لا ..

**الدفاع -** طيب .. هل تعتبر عمله من الاعمال المضادة  
للجهادية .. الاجرامية مثلا ..

**الشاهد -** انا اعتبر عمل محمود عبد اللطيف عمل  
اجرامى ..

**الدفاع — طيب .. سؤال عام لوجه الله .. لوجه الله ..**

**الشاهد — ايوه يافندم ..**

**الرئيس —** احنا بنتكلم لحاجة تانية من الصبح لحد دلوقتي  
غير الله .

**الدفاع —** يقيني انا .. انا محامي ما اقدرش اشهد ..

**الرئيس —** احنا بنتكلم من الصبح ، وحالفين يمين وقائمين  
بالدعوة للاسلام ، وعارفين اسس الاسلام .. وفي الاسلام  
يصح ان الواحد يكون بخبل ، ويصح انه يكون جبان . وانما  
مايصحش انه يكون كذاب .. ده قول الرسول .. قول الرسول  
محمد .. صلى الله عليه وسلم ..

**الدفاع —** موجهها كلامه الشاهد — اذكرك باننى ارجو  
شهادة لله ..

**الشاهد —** ايوه يافندم ..

**الدفاع —** فى المعايير التربوية والخلقية .. هل يسأل الاستاذ  
عن اعمال تلميذه ، خصوصا اذا كان التلميذ فى جهل محمود  
عبد اللطيف .

**الشاهد —** من غير شك الاستاذ يسأل عن تلميذه مادام  
خاضعا له .. فهو ماتصرف الا بأمره ..

**الدفاع —** برضه لازال اعتصامى بالله قائم ..

**الشاهد —** أيوه يافندم ..

**الدفاع —** هل تعتبر — كمسلم — ان الاختصاصات التي  
كان يزعمها النبي محمد لنفسه أكثر أم الاختصاصات التي  
كانت للهضيبي نفسه أكثر

**الرئيس —** ماقلنا بلاش ...

**الدفاع —** انا باتكلم عن الهضيبي مش حسن البناء ، وده  
مامتش ..

**الرئيس —** أنا آسف .. الشاهد يجاوب .. ( ضحك )

**الشاهد —** لا مقارنة بين معصوم وبين انسان ..

**الدفاع —** أنا لا اتكلم عن المعصومية .. أنت مسلم وبتدرس  
القرآن وبأسألك .. الاختصاصات بتاعة حسن الهضيبي — كما  
وصفتها — هل النبي محمد اعطاها لنفسه أو اعطاها للقائمين  
به له .

**الشاهد —** لا ..

**الدفاع —** أيهما أكثر

**الشاهد —** قلت لا يعنى ..

**الدفاع —** لا .. لا ماتكفيش ..

**الشاهد —** ماتكفيش

**الدفاع —** آه .. يعنى سيدنا محمد كان يستشير الاخوان

بجد او استشارة صورية

الشاهد - بجد ..

الدفاع - ويأخذ بمشورتهم أعمالا للآية الآتية « وامركم شورى بينكم »

الشاهد - ويأخذ بمشورتهم وينزل على حكمهم ..

الدفاع - حسن الهضيبي يأخذ بمشورة الجماعة كما وصفتها لنا

الشاهد - يأخذ بمشورة فريق معاه ؟ ولكن في الجماعة ككل .. لا .. لا يأخذ برأى الجماعة ..

الدفاع - اذن اختصاصات ايها أكثر .. النبي محمد أو حسن الهضيبي ، من ناحية الواقع والتنفيذ .

الشاهد - يبقى حسن الهضيبي أكثر ..

الدفاع - يبقى حسن الهضيبي أكثر .. هل لمسلم أن ينحى هذا المنحى ، ويتجه هذا الاتجاه ويعتبر نفسه مسلم بعد ذلك .

الشاهد - لا ..

الدفاع - مارايك فيمن أقرروا حسن الهضيبي على هذه السياسة .

الشاهد - مخطئين ..

الدفاع - مخطئين دي بتنغنصني وتعللني .. ده خطأ او جريمة .

الشاهد — ...

الدفاع — لا الواحد يخط واحد في الشارع عفوا .. دى  
عقوبتها تبقى عقوبة خطيئة .. ده خطأ او جريمة .

الشاهد — جريمة ..

الرئيس — والمتستر حكمه انه .

الشاهد — جريمة ..

الرئيس — مكتب الارشاد تستر ام لم يتستر .

الشاهد — احب اسجل لمكتب الارشاد انه كان دائم المحاولة

لوضع الامور في نصابها ..

الرئيس — وهل تستر بالنسبة للشعب ام لا ..

الشاهد — كان يجب انه يتخذ اجراء علنيا ..

الرئيس — هل تستر ام لم يتستر .

الشاهد — تستر ..

الرئيس — يعنى مكتب الارشاد اجرم

الشاهد — ايوه اجرم ..

الرئيس — لتستره على سياسة حسن الضيبي ..

الشاهد — كان يجب ان نفصل في هذا الموقف في وقته ..

الدفاع — بعد استئذان السيد الرئيس ..

الرئيس — اتفضل ..

**الدفاع —** هل هذه الجريمة تعتبر قائمة في حق الوطن والا في حق فرد ..

**الشاهد —** في حق الوطن ..

**الدفاع —** هل هذه الجريمة تعتبر قائمة في حق الدين او في حق فرعية من فروع ..

**الشاهد —** في حق أصل من أصوله ..

**الدفاع —** في حق أصل من أصول الدين ..

**الشاهد —** أيوه ..

**الدفاع —** قلت بأن نظام الاسر الذي انشئ ، كان هدفه توحيد منابع الفكر والقضاء على المشكلة الثنائية ..

**الشاهد —** أيوه ..

**الرئيس —** ما هي الوان الجهد الذي اتخذها في هذا السبيل.

**الدفاع —** قلت ان نظام الاسر كان يهدف الى توحيد منابع الفكر والقضاء على الثنائية ما هي الوان الجهد التي اتخذتها في هذا السبيل ؟

**الرئيس —** حدد السؤال من فضلك .

**الشاهد —** الواقع ان الجهد الذي اتخذناه كان قليل جدا أمام هذه الحوادث لاننا كنا نكتفى بنزول بعض الرسائل وبعض الكتب وفي الاجتماعات يقولوا لهم الرسائل فيها ايه والواقع ان ضخامة الدعوة كانت تطلب مجهودا أكبر وكانت لا تسمح

بظهور المجهود .

**الدفاع —** أى أن مكتب الارشاد لم يبذل أى مجهود فى هذا السبيل .

**الشاهد —** مجهود غير كافى .

**الرئيس —** بذلوا مجهود غير كافى فما هو ؟

**الشاهد —** طبع بعض المقالات وبعض الكتب التى يعملها الاخوان وده قليل .

**الدفاع —** هل اخذتم مصطفى مشهور من القسم العام الى قسم الاسر أو العسكر .

**الشاهد —** اخذناه الى قسم الاسر .

**الدفاع —** بصفتك نائب رئيس الاخوان .

**الرئيس —** ووكيل الجماعة كمان .

**الدفاع —** هل تذكر ان مصطفى مشهور كان متهما فى قضية سيارة الجيب التى ضبط فيها كل ما يتعلق بالنظام الخاص والتعليمات .

**الشاهد —** حصل .

**الدفاع —** اذا اخذتم شخص زى ده رئيسا لقسم الاسر وهذه صلته بالجهاز الخاص .

**الشاهد —** اخذ عضوا فى قسم الاسر علشان يطلع من الجهاز



ولم يكن رئيسا وكان الرئيس الاستاذ عبد العزيز كامل .

**الدفاع** — حدثنا عن سوء التفاهم الذي كان بين السندی وبين الهضيبي هل تعتبر اخراج السندی من القسم الخاص او الجهاز السرى كان بسبب عدم الود .

**الشاهد** — أيوه كان فيه عدم ود .

**الدفاع** — كان لعدم الود دخل فيه . . . هل ترى في هذا ان الولاء للمرشد كان له في جماعة الاخوان المسلمين طابع يغلب او يمتاز به صاحبه عن الولاء للدعوة .

**الشاهد** — فيها هذا المعنى لان الاخوان اتربوا على يد حسن البنا وهو استاذ فظنوا انه لم ييجى واحد مطرحه يحل محله ودى عادة الاخوان .

**الرئيس** — حتى لو قال الاستاذ زيارة كريمة لملك كريم ؟  
**الشاهد** — لا . .

**الدفاع** — تفتكر ان الولاء للتعالم او يكون الولاء للاستاذ ؟  
**الشاهد** — الولاء لابد يكون للتعالم .

**الدفاع** — يبقى دى تعليمات فاسدة في الاخوان منذ بدئهم  
**الشاهد** — دى عاطفة بالنسبة لحسن البنا ولكن لا يصح ان يكون الولاء الا للتعالم .

**الرئيس** — احنا مش في جو عواطف . . لما نخش في العواطف حنقم بايه ؟

**الدفاع -** يعنى ترى ان الولاء للشخص دون المبادئ هو الذى افسد الدعوة ؟

**الشاهد -** أيوه بدون شك .

**الدفاع -** هل تعلم ان الهضبي اعلن انه لا سرية فى الاسلام وانه فى نفس الوقت لم يكن قد حل النظام وانه ماحل الا لتدعيمه وليتولاه شخص اكثر ولاء للمرشد ؟

**الشاهد -** فى اليوم الذى اعلن هذا كانت النية متجهة الى هذا المعنى ولكن من غير شك الشخص الجديد اكثر ولاء .

**الدفاع -** كانت النية متجهة الى اى معنى ؟

**الشاهد -** الالفاء .

**الدفاع -** ولكنك قلت فى الصباح ان الالفاء لم يحصل ساعة من الزمن ؟

**الشاهد -** انا قلت لسيادتك اننا كنا فى طريق الالفاء وتوحيد منهج الدعوة .

**الرئيس -** ما هو الدليل المادى الذى يمكن تقديمه لاثبات انكم كنتم ماشيين فى طريق الفاء الجهاز السرى ؟

**الشاهد -** الدليل المادى ؟

**الرئيس -** الاثباتات المادية يعنى ورقة مكتوبة .. محضر جلسة .

**الشاهد -** ده موجود من زمن .

**الرئيس -** مفيش دليل ؟

**الشاهد -** الواقع انه كان يجب تحديد كل حاجة .

**الرئيس -** ادليك دليل على عدم صحة الكلام ده باعترافاك  
في نوفمبر سنة ١٩٥٣ أعدتم تنظيم الجهاز برئاسة يوسف طلعت  
بعد ان قابلت الرئيس جمال عبد الناصر في مكتبه في مجلس الثورة  
في مايو سنة ١٩٥٣ وحملك رسالة تشمل ثلاثة أشياء أولا عدم  
تدخل الاخوان في الجيش بتنظيم تشكيلات فيه ، ثانيا عدم  
تدخل الاخوان في البوليس كذلك ثالثا الغاء الجهاز السرى 'للدنى  
وسابق لهذا انك اعترفت انه جانبكم الصواب . . ولكن جالكم  
قاصح امين بين لكم مخاطر هذا الوضع فكانت النتيجة بعد  
ماظهر الحق والصواب انكم في نوفمبر اى بتاريخ لاحق عدتم  
تنظيم رياسة الجهاز .

**الشاهد -** انا قلت دى اخذت تتطور للوصول الى الحل وجبنا

يوسف طلعت .

**الرئيس -** يكفينى هذا انك عجزت عن تقديم دليل مادى .

**الدفاع -** قلت ان يوسف طلعت الرئيس الجديد قام باخراج

مجلة اسمها الاخوان في المعركة .

**الشاهد -** ايوه .

الدفاع - المجلة ذى أسبوعية نصف شهرية أو شهرية ؟

الشاهد - غير محدد كل ١٥ يوم كل شهر ...

الدفاع - يعنى نص شهرية أو شهرية ؟

الشاهد - فى هذه الحدود تقدر نقول شهرية .

الرئيس - يعنى ملهاش مواعيد محددة زى المنشورات ؟

الشاهد - أيوه .

الدفاع - قررت بأنكم أخرجتم عشر أعداد وانكم أوقفتم العدد

الحادى عشر مما يدل على انه استمر رضاكم عنها عشر اشهر

بعد أكتوبر ١٩٥٣ .

الرئيس - يا استاذ هوه مقالش انها شهرية دى مرتبطة

بالحوادث زى المنشورات .

الدفاع - دلوقتى حتبقى يومية طبعا .

الرئيس - الله اعلم مش سرية .

الدفاع - طيب مش عاوزين جواب كفاية كده .

الرئيس - الادعاء فيه أسئلة ؟

المدعى - مفيش حاجة .

الرئيس - باعتبارك الرجل الثانى القائم بدعوة وهذه الدعوة

اسلامية الغرض منها احياء الدين الاسلامى واصوله فهل تعتقد

ان تقوم دعوة اسلامية تدعو الى الاسلام والتمسك به فى جو

المسلمين فيه اسلامهم حصل مستوى عال او مستوى منخفض ؟

**الشاهد —** في مستوى لاشك منخفض .

**الرئيس —** ولما المستوى يبقى على يبقى مافيش . .

**الشاهد —** يبقى مافيش داعى للدعوة .

**الرئيس —** يعنى الاسلام أصبح في المستوى المنخفض كالطفل

عايز تربيته كما يكون بيرضع متقدرش تأكله لحمة عاوز تقوله  
الطرق التي اتخذتها الدعوة بتاعة الاخوان المسلمين لتعليم هذا  
الطفل وانتشاله من المستوى الواطى الى المستوى الذى يجب ان  
يكون عليه .

**الشاهد —** بدأت الدعوة بربط المسلمين وتعريفهم بالتحاليم

الاسلامية .

**الرئيس —** سنة ؟

**الشاهد —** سنة ٢٨ بدأت الدعوة وكان الأستاذ حسن البنا

يمر في البلاد ويعرض على الناس الاسلام بصورة مبسطة سهلة  
ويوجههم الى الاخلاق والفضائل .

**الرئيس —** أنا مبطلبش خطابة ولا موضوع انشا أنا بطلب حقائق

وخطوات زى كتاب تربية الاطفال لما يشرح رضاعة الطفل  
ويقول في الساعة كذا يرضع كذا وكمية كذا معمولة كذا درجة  
حرارتها كذا وياخذ كذا جرام فعاوز تحدد لى ماذا فعلتم  
لرفع مستوى الاسلام من اول ما ينشأ او من الدرجة الواطية  
الى انت بتقر انه وصل اليها الى المستويات العالية التي يجب ان

يكون عليها لازم تدينى الخطوات وتكون محددة .

**الشاهد -** أولا تعليم الفرد الصلاة والصوم والعبادات واشاعة الفضيلة والخلق والمحبة والتعاون على الخير بين الناس ده تقريبا كل شىء .

**الرئيس -** دى الاسس والخطوات الاولى فما الذى يجب ان يكون عليها ؟

**الشاهد -** معروف ان البلد اسلامية وان ده تذكير بهذه المعانى .

**الرئيس -** ومستوى المسلمين فى البلد دى فى اى مستوى من الاسلام ؟

**الشاهد -** يعتبروا فى مستوى كويس .

**الرئيس -** والدعوة انت قررت انها تقوم لما يكون الاسلام فى مستوى منخفض فلماذا قمت بالدعوة ؟

**الشاهد -** للتذكير .

**الرئيس -** هل تذكير جماعة الأخوان المسلمين للمسلمين اقوى من تذكير القرآن لهم خصوصا وانك قلت انهم فى مستوى عال ؟

**الشاهد -** القرآن أكثر .

**الرئيس -** يبقى فايدتكم ايه ؟

**الشاهد -** الغرض هو تفسير القرآن تفسيراً عملياً بين الناس .

**الرئيس -** هل التفسير العملى يكون بالاجهزة المسلحة ؟

**الشاهد —** لا نبث الفضيلة والخلق والمحبة كما هي في تعاليم القرآن ..

**الرئيس —** هل الاسلام مبني على الفطرة والا على العلم ؟  
**الشاهد —** الفطرة .

**الرئيس —** والفطرة السليمة تشترط في صاحبها أن يكون ..  
**الشاهد —** كريم مخلص وتشترط بالمحبة والتعاون والفضائل .  
**الرئيس —** كذاب ينفع ؟

**الشاهد —** لابد أن يكون صادقا محبا للخير متعاوننا مع الناس على الخير صاحب خلق صاحب فضيلة هذا ما يجب أن يتوفر في صاحب الفطرة السليمة .

**الرئيس —** حضضتم الناس على محبة بعضهم ؟  
**الشاهد —** الفترة الاخيرة دي ما قمنا بالواجب .

**الرئيس —** من سنة كام الفترة دي ؟  
**الشاهد —** من سنة ٤٨ حتى اليوم .

**الرئيس —** لماذا سمحت لنفسك بالاشتراك في جمعية وعملت في مستوى نائب رئيسها أو وكيلها وانت ترى أنها منذ سنة ١٩٤٨ تخلت عن الدعوة الاسلامية واتخذتها ستارا لها ؟

**الشاهد —** كنا نحاول بقدر الاستطاعة رد الجماعة الى الطريق الصواب .

**الرئيس —** لماذا لم تعلن رأيك فيها ؟

**الشاهد -** قد يكون هذا تقصيرا .

**الرئيس -** ألم يكن ذلك تضليلا عدم العلانية في موضوع يخص المجتمع الاسلامى يبقى ايه ؟

**الشاهد -** كنت احاول كثيرا الاصلاح .

**الرئيس -** فى أى مستوى ؟

**الشاهد -** فى مستوى الجماعة .

**الرئيس -** الفرد لايجوز أن يخفى شيئا الأفى مستواه الشخصى الذى لا يخرج خارج جلده فاذا تناول اكثر من هذا فانه يتناول من هو مسئول عنه أولاده واهل بيته أما اذا خرج عن هذا فلا بد ان يكون الامر علانية فاذا اخفاه أو أسره يكون الغرض من ذلك هو ألا يعرف الجماعة ويضللها و يجعلها تعتقد ما ليس بالحقيقة ... الكلام ده مضبوط ؟

**الشاهد -** كلام سيادتكم مضبوط ولكن حسبى هذه النية فى التفكير .

**الرئيس -** ما حكم الشخص الذى لا يمكنه أن يتبين مدى الافعال التى يقوم بها ونتائجها وتأثيراتها على المواطنين أهله وعشيرته ولا يستطيع أن يقدرها أو يحسبها الحكم عليه يبقى صح أو قلط ؟

**الشاهد -** يبقى غلطان .

**الرئيس -** ويبقى الغلطان قصير النظر فهل هو ده اللى يقوم



بدعوة علشان يوصل الاسلام من مستوى عال الى مستوى اعلى؟  
الشاهد - لا فعلا .

الرئيس - يعنى دعوة الجماعة فى اعتقادك كما قررت باعتبارك  
وكيلا لها وكنت فى فترة من الوقت نائبا لمرشدها لا تقوم بـ . .

الشاهد - الجماعة على الاقل من سنة ١٩٤٨ .

الرئيس - لا تقوم بـ . . . . . كمل ؟

الشاهد - بواجبها .

الرئيس - فى ؟

الشاهد - فى نشر الدعوة الاسلامية على خير وجه .

الرئيس - ازاي ؟

الشاهد - فيه ناس دخلوها على القرآن وفهموا وبقوا

كويسين .

الرئيس - هم مين ؟

الشاهد - كثيرين من الشباب .

الرئيس - فى انه مستوى اعضاء او رؤساء ؟

الشاهد - فى مستوى الاعضاء .

الرئيس - يعنى اتخذتم من اسم الدين الاسلامى وسيلة

لجذب المسلمين لينضموا اليكم كأعضاء حتى يمكنكم أن تجهروا

وتقولوا أن عدد الاخوان نصف مليون والحقيقة أن مين بيدير

سياسة الجمعية ؟

- الشاهد — الهيئة التأسيسية ومكتب الارشاد .
- الرئيس — الهيئة التأسيسية الى ...
- الشاهد — معينة .
- الرئيس — بواسطة .
- الشاهد — حسن البنا .
- الرئيس — والتي لا زالت معينة بواسطة ؟
- الشاهد — حسن الهضيبي ومكتب الارشاد .
- الرئيس — الى ايه ؟
- الشاهد — مختار من الجمعية التأسيسية .
- الرئيس — ويعمل ايه ؟
- الشاهد — استشاري .
- الرئيس — واستشارته غير ايه ؟
- الشاهد — ملزمة .
- الرئيس — غير ملزمة لمن ؟
- الشاهد — نحسن الهضيبي .
- الرئيس — وحسن الهضيبي يبقى ايه ؟
- الشاهد — يبقى المرشد العام للاخوان المسلمين .
- الرئيس — والمتصرف في ايه ؟
- الشاهد — في شئون الجماعة
- الرئيس — تفتكر ده وضع صحيح لما واحد يتفرد بأمر الجماعة

ومعاه جهاز سرى ارهابى مسلح مخالفا بذلك قوانين الجماعة  
تحت ستار الدين الاسلامى وباسم الدين الاسلامى الكريم تعرف  
ما هو الدين الاسلامى تعرف لو كنت فى زمن عمر كان عمل فيكم  
ايه ؟ تعرف قصة الخوارج .. قراتها .. قرات قصة الخوارج  
الى فى صدر الاسلام .

الشاهد - فى ايام سيدنا على .

الرئيس - عارفها كويس ؟

الشاهد - ايوه يا افندم .

الرئيس - هل فى طريقنكم لنشر الدعوة اتبعتم طريقة محمد  
والخلفاء الراشدين او اتبعتم طريقة الخوارج كما هو منصوص  
عليها فى التاريخ ؟

الشاهد - والله ياسيدى الرئيس ...

الرئيس - رد على سؤالى انا عايز جواب .

الشاهد - اختلاط فى الفهم .

الرئيس - الاختلاط فى الفهم هو الفرق بين اتباع محمد  
والخوارج .

الشاهد - الجمعية اتبعت الطريق الخطأ .

الرئيس - طريق مين ؟

الشاهد - كلمة الخوارج دى ..

الرئيس - محمد والخلفاء الراشدين اتبعوا الطريق الصح

أو الخطأ ؟

الشاهد - الطريق الصح .

الرئيس - والخوارج ؟

الشاهد - الخطأ .

الرئيس - يعنى انتم زى الخوارج ؟

الدفاع - ما هى مظاهر الايمان . . اليس الشجاعة من

سمات المؤمن

الشاهد - أيوه . .

الدفاع - لماذا اذا لم تواجه السؤال الذى توجه به رئيس

المحكمة . . ما هو الفاصل بينكم وبين الخوارج ؟ (

الشاهد - حسب فهمى . . .

الرئيس - والله السيد الدفاع يسمح للمحكمة تقول اننا

منقדרش نحكم فى هذه المسألة بل نترك هذا للمسلمين يحكموا

فيه وكل مسلم له ان يحكم وكل مسلم ملزم بان يقرأ دينه

ويعرفه ويفهمه والقرآن مش صعب ابدا انه يتفهم ولغته يعلمها

الجميع ولا تحتاج لشرح .

القرآن ما نزلش لناس متعلمين . . بل جهلة . . كانوا اميين

. . نزل بلغة يعلمها الجميع مش محتاجة ابدا لشرح او اى حاجة

ابدا . . تاريخ الاسلام يمكن قرئته فى الكتب . . وملزم انه يقرأ

.. تاريخ العقيدة الى اعتنقتها والدين الى هو يبهاى به ..

الدين مش كلام .. الدين أساس وأعمال ..

الدفاع — اردت ابراز هذا المعنى وقد برز ..

الرئيس — أشكر ..

اسمك ايه ؟

الشاهد — محمد خميس حميدة ..

الرئيس — بتشتغل ايه ؟

الشاهد — صيدلى ..

الرئيس — وعمرك كام سنة ؟

الشاهد — ٣ سنة ..

الرئيس — مع السلامة ..

تأخذوا ربع ساعة تشربوا فيها سيجارة ..

ترفع الجلسة للاستراحة ..

وفي الساعة التاسعة الا عشر دقائق أعيدت الجلسة وتولى

تمثيل الادعاء البكباشى ابراهيم سامى جاد الحق والاستاذ عبد

الرحمن صالح .. ونودى الشاهد الشيخ محمد فرغلى ..

الرئيس — الشاهد حاضر ..

المدعى — أيوه يا قندم ..

الرئيس — خليه يتفضل ..

ودخل الشاهد الى قاعة المحكمة

الرئيس - اسمك ياسيدى الفاضل .. ؟

الشاهد - محمد محمد فرغلى ..

الرئيس - صناعتك ..

الشاهد - واعظ بالاسماعيلية ..

الرئيس - سنك كام سنة ؟

الشاهد - ٧ سنة ..

الرئيس - اتفضل .. ده مصحف ..

الشاهد - ايوه ..

الرئيس - قول والله العظيم اقول الحق والله على ما اقول

شهيد ..

وحلف الشاهد اليمين

وكيل النيابة - منذ متى وانت عضو فى جمعية الاخوان ؟

الشاهد - منذ عشرين سنة ..

المدعى - ماهى الوظيفة التى تشغلها فى هذه الجماعة ؟

الشاهد - عضو بمكتب الارشاد العام ورئيس منطقة

الاسماعيلية ..

المدعى - منذ متى وانت عضو فى مكتب الارشاد ؟

وكيف التحقت بهذا المكتب ؟

**الشاهد -** انتخبت في الهيئة التأسيسية .. في الدورة

الحالية من نحو سنة ..

**المدعى -** وبعدين ؟ ومكتب الارشاد ..

**الشاهد -** ده في مكتب الارشاد .. أما الهيئة التأسيسية

فأنا عضو فيها من وقت انشائها في عهد الامام الشهيد ..

**المدعى -** هل لك نشاط في هذا الجهاز خلاف اعمالك في

مكتب الارشاد او الجمعية التأسيسية ؟

**الشاهد -** نعم لى نشاط باعتبارى رئيس منطقة

الاسماعيلية ..

**المدعى -** أليس في هذه الجماعة جهاز خاص له به علاقة ؟

**الشاهد -** في الجماعة نظام خاص .. علاقتى به علاقة

استشارية .. شكلية اكثر منها فعلية

**المدعى -** اشرح للمحكمة تاريخ اتصالك بهذا الجهاز فترة بعد

فترة .. ودون حاجة ان أسألك في توضيحات ..

**الشاهد -** بعد ان جاء الاستاذ الهضيبي الى جماعة الاخوان

.. حدث بينه وبين من يرأس الجهاز الخاص خلاف ..

**المدعى -** وهو ..

**الشاهد -** كان هذا الخلاف لان رئيس هذا الجهاز لم يكن

راضيا من الاستاذ الهضيبي .. وكان الاستاذ الهضيبي في

ذلك الوقت ايضا غير راضى كذلك عن هذا الجهاز الخاص ..

وكان لا يرى وجود تشكيل سرى فى الجماعة . . واختلف مع  
رئيس النظام لهذا السبب . . واستمر الخلاف فترة . .  
فانتدبنى الاستاذ الهضيبى آنا والدكتور محمد خميس حميده  
لبحث هذا الامر . . وفعلا تكلمت مع عبد الرحمن السندى  
الذى كان رئيسا لهذا الجهاز وبحثنا رايه فى هذا الموضوع . .  
وانتهينا الى انه ليس من اليسر تعاون عبد الرحمن السندى  
مع الهضيبى . . وانتهى هذا الامر بان تخلى عبد الرحمن  
السندى عن مسؤوليته فى هذا النظام وحل محله آخر  
هو زميله محمود الصباغ . . ثم لا يستمر طويلا فى قيامه على  
هذا الجهاز وانتهى الامر بتنحيه ايضا . . ثم انتهت رئاسة هذا  
الجهاز الخاص بالمدينين الى يوسف طلعت . . ويوسف طلعت  
هذا عضو من أعضاء جماعة الاخوان بالاسماعيلية لانه من ابنائها  
وانا أعرفه منذ نزل الاسماعيلية لانه عضو قديم وكان موجود فى  
عهد الامام الشهيد . . فاختره الاستاذ الهضيبى رئيسا لهذا  
النظام واتفقت آراء الاستاذ الهضيبى مع يوسف طلعت فلم  
يحدث بينهما خلاف . . وعند ذلك انتهت مأموريتى آنا وخميس  
فى التدخل فى أمر هذا النظام لان هذا النظام يتبع المرشد العام  
مباشرة . . وليس لاحد من أعضاء مكتب الارشاد او غيرهم  
شأن فيه . . فرئيس هذا النظام مسئول مسؤولية مباشرة امام  
المرشد العام ويتلقى منه الامر مباشرة ولا يتلقى من أى شخص  
آخر . .



**المدعى -** قلت .. عندما تولى الهضيبي أمر الاخوان اختلق مع رئيس الجهاز .. وذكرت فيما بعد ان هذا الرئيس هو عبد الرحمن السندى فما هى أسباب هذا الخلاف .. ؟ ؟

**الشاهد -** قلت أن الاستاذ الهضيبي فى بدء دخوله جماعة الاخوان كان لا يريد شيئاً اسمه جهاز خاص .. وكان يرى فى هذا شىء لا يرتاح اليه نظراً للحوادث القديمة المعروفة .. والقضايا المعروفة للاخوان فى العهد الماضى .. ولم يكن له صلة بالاخوان ولا معرفة بأوضاع الاخوان .. فكان يريد أن يتخلص من هذا النظام وما فيه ولكن عبد الرحمن السندى باعتباره رئيس هذا النظام والمتولى أمره فى عهد الامام الشهيد تمسك ببقائه واستمراره بالأوضاع التى هو عليها .. وهنا وقع الخلاف ... فحاولنا أن نوفق بينهما ليستمر الأمر فلم يمكن التوفيق ..

**المدعى -** وأنهى الأمر بآيه ؟

**الشاهد -** عزل عبد الرحمن السندى ..

**المدعى -** قلت ان الهضيبي أبدى رأيه صراحة فى عدم موافقته على استمرار هذا النظام السرى .. كيف يتفق هذا مع ما انتهيتم اليه من ابقاء هذا النظام وعزل رئيسه واستبداله بآخر يثق فيه الهضيبي ؟

**الشاهد -** مع مضى الوقت .. عرف الهضيبي أن هذا النظام

يشمل مجموعات من شباب الاخوان المتحمسين للفكرة .. وانه ليس من السهل التخلص من هذا النظام .. وان تمسك عبد الرحمن السندى - وهذه المسألة استمرت فترة طويلة من الوقت .. اكثر من سنة - استمر عبد الرحمن السندى قائم على النظام في عهد الهضيبي اكثر من سنة خلال هذه المدة عرف الهضيبي ما هو النظام .. وانه يشمل كثير من شباب الاخوان وليس من اليسير الغاؤه بهذه السهولة .. وهذا ما دعاه على ما اذكر انه يعدل عن رأيه الاول في الغاء النظام ..

المدعى - لم يكن من أسباب الخلاف .. أو السبب الرئيسي الى بين السندى وحسن الهضيبي هو عدم رغبة السندى في الخضوع للهضيبي شخصيا ؟

الشاهد - السندى كان لا يرى الخضوع للهضيبي شخصيا حينما كان يرى الهضيبي الغاء النظام ..

المدعى - وعندما قبل الهضيبي ان يبقى على هذا النظام ؟  
الشاهد - خضع عبد الرحمن السندى لراى المرشد ..  
المدة التى قضاها وهى اكثر من سنة كما ذكرت تتخللها فترات خلاف وفترات وفاق .. ففي فترة الوفاق كان يستجيب فيها عبد الرحمن السندى للهضيبي ..

المدعى - وما مهمتك أنت وخميس عندما نديكم الهضيبي ؟  
الشاهد - ندينا للتدخل فى اواخر فترة الخلاف عندما اشتد

• ولم لم يتيسر النوفيق بينهما انتدبنا وتدخلنا ليتيسر الخلاف القائم بين الطرفين ..

**المدعى -** ماذا كان اقتراحك أنت وخميس بشأن هذا النظام بعد أن تدخلتم حسب الامر .. ؟

**الشاهد -** كان افنراحنا أخيرا أن يتخلى عبد الرحمن السندى ..

**المدعى -** عن رياسة الجهاز . ؟

**الشاهد -** نعم ..

**المدعى -** معنى هذا أن رأيك أنت وخميس الإبقاء على هذا النظام مع تنحى الرئيس؟؟

**الشاهد -** أوضاع الجماعة تقتضى أن رئيس النظام خاضع للمرشد فإذا اخلف رئيس النظام مع المرشد يجب أن يتنحى رئيس النظام بقطع النظر عن قيام النظام ذاته . . لان رئيس النظام بقاءه فى الرياسة أو عزله منها أمر غير قيام الجهاز نفسه .. والا فإذا رأينا إلغاء النظام لا يمنع هذا أن يكون رئيس الجهاز متفق مع المرشد .

**المدعى -** أنت قلت ان المرشد وقت ان ندبك أنت وخميس أعلن رأيه بوجوب عدم الإبقاء على هذا النظام ... لماذا لم يكن لك اقتراح بشأن هذا النظام تأييدا لرأى المرشد الذى أعلن عنه؟

**الشاهد -** رأى المرشد كان فى بداية الامر مواجهة الاخوان ..

وفي هذه الحالة لم نتدخل في هذا الأمر ولكن تدخلنا بعد ان اقر الهضيبي فكرة النظام وصارت المسألة ليس خلافا أساسيا على النظام وعدمه.. ولكن خلاف في عدم تعاون عبد الرحمن السندي والمرشد .

**المدعى -** ألم يذكر الهضيبي ان لاسرية في الدعوة على سلا من الاخوان ؟

**الشاهد -** نعم ..

**المدعى -** هل هذا يتفق مع القواعد الاسلامية بصفتك من الوعاظ . ؟

**الشاهد -** هو قال على ما أذكر لا سرية في الاسلام وانا وافق على هذا ...

**المدعى -** ولماذا اذن اقررت النظام وسري.

**الشاهد -** أنا عضو في الجماعة .. وأمر النظام لا يرجع لى او الى رأى .. ولكن هذا وضع قائم نشأ في عهد الامام الشهيد واستمر قائما في الجماعة .. فليس لى وحدى ان أقره أو ألغيه.

**المدعى -** لما أنت وخميس ندبتم من المرشد .. هل رأيك فيه يتفق مع رأى الشرع ؟ ولماذا لم تبدى رأيك وليكن مايكون؟

**الشاهد -** لم ينتدبنا لبحث مسألة النظام وقيامه من عدمه..

ولكن الخلاف القائم بين المرشد وعبد الرحمن السندي ..

**المدعى -** تفصل في الرياسة فقط ؟

**الشاهد -** نعم . . . والا لو كان الهضيبي يريد إلغاء النظام كان اما ان يقرر الالفاء من نفسه او يعرض الأمر على الجماعة وفيها مكتب الارشاد والهيئة التأسيسية . . وغيرها من الجماعة القائمة . . وكان يستطيع ان يعلن هذا الرأي على الجماعة ويدعو الجماعة لهذا . .

**المدعى -** كيف وصلت الرئاسة الى يوسف طلعت ؟

**الشاهد -** كما ذكرت . . . بعد ان تنحى عبد الرحمن السندى وسحمود الصباغ كان يوسف طلعت من الاعضاء الذين يتصلوا بالهضيبي قبل ان يختار مرشدا وعمل لاختياره مرشدا . . وسعى في ذلك ودعى له وكان يسافر للقاء الهضيبي في الاسكندرية وهو هناك . . وتوثقت المعرفة والصدقة . . وكان من أوائل الناس الى عرفهم الهضيبي ووثق بهم . . ولما انتهت مسألة الصباغ . . وهو يعلم ان يوسف طلعت من أعضاء هذا النظام القداماء البارزين . . كان هذا داعيا له لان يختاره . .

**المدعى -** هل انفرد المرشد بتعيين طلعت تلقائيا من نفسه . . أم استشارك وغيرك من المقربين له ؟ ؟

**الشاهد -** بعد ان وقع في نفسه هذا الاختيار . . اذكر انه عرض على هذا الأمر ووافقت عليه . .

**المدعى -** دخلنا في النظام برئاسة يوسف طلعت . . اشرح للمحكمة كيفية تكوين هذا النظام على التفصيل الذي شرحته في

التحقيق ..

**الشاهد —** الذى أعرفه فى أمر التشكيلات فى الإخوان .. ان هناك تشكيلة كانت فى الجيش وكان مسئول عنها أبو المكارم عبد الحى ... وتشكيلة فى البوليس ومسئول عنها الصباغ شادى ... . وتشكيلة النظام الخاص بالمدينين ومسئول عنها يوسف طلعت .... وهذه التشكيلات تتبع المرشد رأسا . . كل رئيس تشكيلة يتصل بالمرشد رأسا ويتبعه رأسا ولا يخضع لغيره من هيئات الجماعة . . وتكوين النظام الخاص . . مكون من رئيس يتبع المرشد رأسا كما قلت يعاونه أربعة من اخوانه . . ثم بعد ذلك هم ينظمون هذه التشكيلات تنظيما خاصا بحيث يكون فى كل منطقة شخص مسئول يتولى أمر اخوانه فى هذه المنطقة ..

**المدعى —** اليس هناك بين رؤساء هذه الفرق أو هذه التنظيمات كما سميتها وبين المرشد مجلس أو لجنة عليا ؟

**الشاهد —** هؤلاء الثلاثة هم المسئولين عن الجهاز .. الثلاثة .. ويعتبرون لجنة عليا ويرأسهم المرشد ..

**المدعى —** مفيش حد آخر ؟

**الشاهد —** على مدى علمى .

**المدعى —** من أين علمت بالتشكيلات السرية وانت تقول الا علاقة لك بهم ؟

الشاهد - لم اتفى علاقتى بهم بتاتا .. ولكن قلت لى صلة  
معرفة بحكم وضعى فى الجماعة .. وحكم صلتى بهيئتها .. أنا  
أعلم هذا .

المدعى - بأى كيفية ؟

الشاهد - أوضاع الجماعة باعتبارى عضو قديم متصل  
برئاستها وعضو فى مكتب الارشاد والهيئة التأسيسية .. وهذا  
اعطانى فرصة للمعرفة ..

المدعى - على معرفة الاشخاص ؟

الشاهد - بعض الاشخاص ..

المدعى - هل هناك اشخاص آخرين خلاف من ذكرتهم ؟

الشاهد - أنا ذكرت أسماء الرؤساء المسئولين ..

المدعى - أنت تقول الثلاثة مجلس أعلى .. مفيش خدمعاهم ؟

الشاهد - المرشد .

المدعى - المرشد الرئيس الأعلى ..

الشاهد - بمدى علمى مفيش غير الثلاثة ..

المدعى - تعرف ابراهيم الطيب كويس .. ؟

الشاهد - نعم ..

المدعى - وظيفته ايه فى الجهاز ؟

الشاهد - أحد أربعة مساعدين ليوسف طلعت ..

المدعى - الوظيفة على وجه التحديد ..

**الشاهد -** مسئول عن القاهرة ..

**المدعى -** قرر ابراهيم الطيب أنك أنت والدكتور خميس حميده وصلاح شادى وآخرين ذكرهم أو عددهم على وجه التحديد أعضاء فى اللجنة العليا للجهاز السرى ..

**الشاهد -** هذا غير صحيح . . فأنا لست عضوا فى هذه اللجنة . . ولا اعرف أن هناك لجنة عليا للجهاز السرى او النظام الخاص الا من ذكرت . .

**المدعى -** وليه يقول ابراهيم الطيب هذا القول؟مالذى دعاه ان يذكره ؟

**الشاهد -** لا أدري ما الذى يدعوه الى هذا الادعاء . . أنا أقول ان هذا كذب وغير صحيح . . واقطع بذلك فيما يختص بنفسى .  
**المدعى -** هل اذا أقر المجلس الاعلى لهذا الجهاز امرا أراد تنفيذه . . . هل تبت هذه اللجنة فى هذا الامر ثم تأمر بالتنفيذ دون الرجوع الى المرشد الرئيس الاعلى لتأخذ موافقته ؟

**الشاهد -** اعتقد لابد من الرجوع الى المرشد . .

**المدعى -** ليه ؟

**الشاهد -** لانه الرئيس الاعلى . .

**المدعى -** هل النظام له مجلس أعلى آخر غير المرشد ؟

**الشاهد -** لا . .

**المدعى -** كن الاوامر تفصل من المرشد ؟



الشاهد - نعم . .

المدعى - هل تعلم شئ عن أجهزة تسليح أو أماكن تسليح هذه الأجهزة سواء في القاهرة أو غيرها . . ؟

الشاهد - أعلم أن هناك سلاح ولكن لأعلم لى بالمكان ولا بأنواع السلاح أو كميته لأن هذه مسائل أنا بعيد عنها . .

المدعى - وانت رئيس منطقة الاسماعيلية ؟

الشاهد - فى الوضع العام ليس الجهاز الخاص . .

المدعى - ماقولك وقد ذكرت أنت فى التحقيق أسماء أماكن محدودة فى الاسماعيلية وبور سعيد والشرقية ؟ وقلت هذه أماكن التسليح فى هذا الجهاز لهذه المناطق ؟

الشاهد - ذكرت هذا على أساس أن لهم علم بأماكن السلاح . . واللى أعلمنى ذلك حينما أردنا أن نتعاون مع بعض رجال الثورة حينما كان يراد القيام بحركة فى القنال واتصلت أنا بأحد الضباط القائمين على هذا الأمر . . وكان هناك ضباط موجودين فى المنطقة . . كل واحد يختص بجهة معينة . . فأنا اتصلت بالهضبيى وقلت له أننا فى منطقة القنال لابد أن نتعاون مع رجال الثورة فى أى عمل يطلب منا فى مقاومة الاستعمار . . وطلبت من يوسف طلعت بالذات أن يختار من كل منطقة من المناطق التى معين فيها ضابط من ضباط الثورة شخص مسئول ليتصل به ويتعاون معه فيما لو يطلب منه . . وفعلا تم هذا واختار الاسماء . . وقدم

لى هذه الاسماء ودعونا هؤلاء الاشخاص فعلا واجتمعوا فى ادارة الحرس الوطنى بحضور الصاغ كمال الدين حسين عضو مجلس قيادة الثورة وبعض الضباط وجاء مندوب من كل منطقة من المناطق فعرفت هؤلاء المندوبين وعرفت انهم مسئولين ولهم صلة بأوضاع النظام فى هذه المناطق وهذا ما دعانى أن اذكر هذه الاسماء على اساس أن لهم علم بالسلاح وطبيعى عارفين مكان السلاح وأنا حريص على أن لا يظل هناك سلاح مختفى لان الظروف لا تقتضى أمر من ذلك .

المدعى - نتمشى معك فى الحديث . . . هل كشفت لندوب القيادة عن أعضاء الجهاز فى هذه المنطقة فى الاجتماع الذى ذكرته؟  
الشاهد - اجتمعوا وحضروا بأنفسهم . . ونعرف كل مندوب لى الضابط المعين فى المنطقة . .

المدعى - وماذا تم بعد ذلك ؟

الشاهد - كلنا كل مندوب أن يتصل بالضابط ويتعاون معه . .  
المدعى - وماذا تم ؟

الشاهد - معرفش . .

المدعى - هل كان هناك أى تعاون ؟

الشاهد - أنا من ناحيتى افهم أننا استجبنا للتعاون مع الحركة  
وكيل النائب العام - هل ظهرت هناك أى شائبة للتعاون ؟  
الشاهد - نعم .

**وكيل النائب العام - فين ؟**

**الشاهد -** كنا متعاونين تعاوننا كاملا لأننا لم نمتنع عن أى عمل يطلب منا فى هذا الشأن .

**الرئيس -** ألم تسلم لك اسلحة بواسطة ضابط الاتصال قبل ٢٣ يوليو ولا داعى لذكر اسم هذا الضابط حرصا على الامن فى هذه البلاد ، أهل لم يكن هناك ضابط من القوات المسلحة فى منطقة القنال يتصل بك شخصيا ووردك بعض اسلحة مرسلة اليك من بعض الضباط اللى كانت قيادة الضباط الاحرار تمونكم بهذه الاسلحة ؟

**الشاهد -** نعم .

**الرئيس -** وسلمت اليك هذه الاسلحة ؟

**الشاهد -** هى لم تسلم الى شخصيا .

**الرئيس -** كنت حاضر فى التسليم .

**الشاهد -** نعم بعلمى .

**الرئيس -** أين ذهبت تلك الاسلحة ؟

**الشاهد -** سلمت الى الضابط الذى كان يقود حركة الاخوان فى القنال .

**الرئيس -** ضابط مدنى على حد كلام الاخوان ؟

**الشاهد -** نعم .

**الرئيس -** وليس شخص عسكري من القوات المسلحة ؟

**الشاهد — نعم .**

**الرئيس —** هل في يوم ذهبت الى الضابط الرسمي الى هـوه  
حلقة الاتصال مع قيادة الضباط الاحرار وقلت له انا عاوز سلاح  
عشان خاطر عندي ناس لسة ماتسلحوش فلما قال لك عدددهم كام قلت  
له ١٠٠٠ شخص ، فقال لك هاتهم وانا افرق عليهم السلاح ، فهل  
جبت له الالف واحد ؟

**الشاهد — لا .**

**الرئيس —** وهل تعلم ان حسن العشماوى تسلم اسلحة من  
قيادة الضباط الاحرار عشان تسليح افراد المقاومة في القنال وكان  
ذلك قبل ٢٣ يوليو .

**الشاهد —** اعلم شيئا من ذلك .

**الرئيس —** وتسلم ذخيرة ؟

**الشاهد — نعم .**

**الرئيس —** وضبطت هذه الاسلحة كاملة وهذه الذخيرة كاملة  
فين بعد الثورة ؟

**الشاهد —** على ما علمت في عزبة العشماوى .

**الرئيس —** فين ؟

**الشاهد —** في مخزن في عزبة العشماوى .

**الرئيس —** المخزن كان فين ، دي كتبت في الجرائد ؟

**الشاهد —** في عزبة العشماوى في الشرقية .

**الرئيس -** كتبت في الجرائد الا تذكر ، ولها محضر تحقيق في النيابة ؟

**الشاهد -** نعم .

**الرئيس -** فين ؟

**الشاهد -** كنا في المعتقل .

**الرئيس -** الم تقرأ جرائد بعد ما خرجت من المعتقل ؟

**الشاهد -** علمت انها ضبطت في مخبأ في عزبة العشماوى . . .

**الرئيس -** تحت الارض في أودة مبنية بالاسمنت المسلح واعترف العشماوى أن هذه الاسلحة والذخائر هى التى تسلمها من قيادة الضباط الاحرار قبل الثورة . هل استعملت هذه الاسلحة في معركة القتال ؟

**الشاهد -** طبعا لا .

**الرئيس -** لان الذخيرة كانت كاملة .

**وكيل النائب العام -** تسمح لى المحكمة ان اكمل المناقشة

فأسأل الشاهد سؤال ؟

**الرئيس -** ماهو ؟

**وكيل النائب العام -** لماذا لم تستعمل هذه الاسلحة ؟

**الشاهد -** هذه مسألة يسأل عنها العشماوى .

**وكيل النائب العام -** ولماذا خباها ؟

**الشاهد -** لاعرف عنها شيئا .

وكيل النائب العام - ولماذا لم تسلم الى الحكومة اذ لم تستعمل ؟

الشاهد - لا ادرى كيف خباها ولماذا لم يسلمها .

الرئيس - ولماذا انت لم تأتى بالالف شخص لضابط الاتصال

عشان يدريك الاسلحة التى طلبتها لتسليحهم بها ؟

الشاهد - انا لم اطلب الاسلحة .

الرئيس - انت طلبت اسلحة لناس ما عندهم سلاح . فقال

لك كام فقلت له ألف واحد فلما وجد ان العدد كبير اراد ان

يتحقق فطلب منك ان تأتى له بالالف شخص ، فهل اتيت بهم ،

واذا كنت لم تأت بهم فليه ؟

الشاهد - اذا سمحت سيادتكم .

الرئيس - اجب الاجابة تكون على قد السؤال .

الشاهد - حاضر .

الرئيس - انت قررت لا ، فتقدر تقول لى ليه ؟

الشاهد - انا قلت ان فيه افراد مستعدين وليست لديهم

اسلحة فاحنا تقدم الافراد للجيش وبعد ذلك الحركة تسليحهم .

الرئيس - انتهى حركة ؟

الشاهد - حركة الضباط . . . الثورة يعنى .

الرئيس - هذا كان قبل قيام الثورة .

الشاهد - آه .

الرئيس - الكلام الذى اكلمك عليه والثابت فى المحضر كان

قبل قيام الثورة أى قبل ٢٣ يوليو سنة ١٩٥٢ .

**الشاهد** - أنا آسف لانى أخطأت .

**الرئيس** - وكان ذلك على وجه التحديد فى اكتوبر ونوفمبر

وديسمبر سنة ١٩٥١ ويناير سنة ١٩٥٢ .

**الشاهد** - أنا آسف لانى أخطأت . وأنا لا اذكر انى قدمت

أسماء أو طلبت أسلحة .

**الرئيس** - أنت لم تقدم أسماء، وإنما طلبت من ضابط الاتصال

أسلحة ، وزى ما طلبتها ووعدك بها الضباط الاحرار عشان يديها

لك ومدى علمك وبعلمك سلمت اليك بعض هذه الاسلحة التى

طلبتموها برضه عن طريق ضابط الاتصال .

**الشاهد** - الضابط الذى أقصده هو الذى بدانى بالاتصال وهو،

من الاسماعيلية وقال نحن مستعدون ان نعاونكم من سلاح أو

ذخيرة وفعلا كان يرسل بعض أسلحة وذخيرة عن طريق القنطرة

وأنا كلمت واحد فى القنطرة ليتسلمها ويسلمها للقائم على امر

الحركة فى منطقة القنطرة وهذا بدوره ليوصلها الى مركز الحركة

فى الشرقية ولكن أنا لم اطلب سلاح لالف شخص ولا ذكرت هذا

العدد بالذات لانه فعلا لم يشترك منا فى الحركة ١٠٠٠ شخص

وكل الذى اشترك فى حركة القنال عدد بسيط .

**الرئيس** - كام ؟

**الشاهد** - عدد لا يتجاوز ٣٠٠ واحد بما فيهم طلبة الجامعات .

## خاتمة

... والى هنا ينتهى الجزء الثالث من هذا الكتاب وسنبدا  
الجزء الرابع باذن الله بما تبقى من شهادة المدعو محمد محمد  
فرغلى .

ونرجو ان يكون القراء قد لمسوا من مطالعة هذا الجزء  
والاجزاء السابقة ، كيف كان الاخوان يضللون ويخادعون بشتى  
المؤثرات والدعايات ، ويتخذون من الدين بضاعة يتجرون بها  
لصالحهم الشخصى ، ويسبغون على أنفسهم من القداسة مايضمن  
لهم السيطرة على الشعب ..

أقرأ هذه المحاكمات واحتفظ بها فى مكتبتك المنزلية ليرجع  
اليها ابناؤك واحفادك وقد جعلنا سعرها ثلاثة قروش فقط  
ليسهل على الجميع اقتناؤها .

اتصل بادارة النشر والتوزيع ، ٦٨ شارع قصر العينى  
واطلب النسخ التى لم تستطع الحصول عليها















